


清代傳記叢刊·綜錄類 ⑪
周駿富輯

大清畿輔先哲傳

(一)

四十卷附
列女傳

徐世昌撰



明文書局印行

大清畿輔先哲傳 目次

第一卷 名臣傳之一

李蔚

王崇簡

第二卷 名臣傳之二

梁清標 從父維樞

王熙 弟燕

劉武元

朱之弼 弟之佐

成克鞏 弟克大子亮 光

郝維訥 父傑

杜立德 子恭俊

冀如錫

王景祚

蔣元恆

魏象樞 子學誠

董應魁

魏裔介

苗澄 劉斗 許世昌

大清畿輔先哲傳 目次

大清畿輔先哲傳 目次

田種玉

徐化成

傅維鱗

趙之鼎 子 玫

劉 捷

郝 浴 子 林

林起龍

宋文運

袁懋功 兄懋德

張士甄

劉鴻儒

張文衡

高 景

陳 協 兄 慎

第三卷 名臣傳之三

劉芳躅

楊時薦 兄時舉

鄭 端

于嗣登

趙之符 子 璘 珣

張自德

劉兆麒 子 殿衡 兄 子 殿邦

劉元慧

徐國相

李煒

第四卷 名臣傳之四

勵杜訥 子廷儀 孫宗萬

閻興邦

崔徵璧

劉謙 子自潔

李旭升 子周望

黃叔琳 弟叔敬 子登賢

何國宗

王蘭生 魏廷珍

張渠

元展成

尹會一 子嘉齡

第五卷 名臣傳之五

陳惠華 弟惠正

周人驥

朱珪

李綬

李殿圖

史積容

大清畿輔先哲傳 目次

傅 鼎

徐 斫 王樹枏補傳

魏元煜 弟元煨

戴三錫

吳邦慶

虛 坤

第 六 卷 名 臣 傳 之 六

白 鎔 孫桓

趙 盛奎

張 文浩

李 鈞

王 植

劉源灝

桑春榮

韓 超

王發桂

惲光宸

廉兆綸 李茵

高崇基

李鴻藻

張之萬

鹿傳霖

第七卷 名臣傳之七

許國璧

張之洞

李連傳 傅鵬翔

陸鍾琦 子光熙

白斌 李正春

第八卷 名將傳之一

穆廷栻

徐可成

張英奇

王可就

劉國興 周貴

朱萬祺 子偉

王文雄

陳喜 周天命 李得春

李君賢 路鳴竹 田峻

張承恩

李連

楊捷

崔起潛

呂八音 苗之秀 張燦

王無黨 袁立相

大清畿輔先哲傳 目次

大清繼輔先哲傳 目次

丁士傑

劉國樑 董果 孫廷璧

哈元生 子尙德

李國梁 安廷贊

劉 順 李煦 汪騰龍

王 普

何守林

謝 斌

齊大勇 閻文繡

蘇 靈 劉文忠 安定邦

李國柱 齊元輔

蔣觀濤 王鑑

董天弼

穆 維 安慶 劉管城

許成麟

邢敦行

哈攀龍 子國興 國興子文虎

孫清元 王清弼 李錫命

俞金趾 李壽春

王萬清

郭繼昌 史善載

第九卷 名將傳之二

李士林
 武光琳 孔廣源 張鑑
 周景魁
 董光甲 石清吉 程三光
 劉玉豹
 吳璋 吳燦
 王錫朋
 段飛熊
 郝光甲
 郝上庠
 安勇

石皓 蔣照臨 鄭奎士

奎士子永祥

李成虎 于昌麟 昌麟從子二剛

弟昌慶

史榮椿 王鳳祥 王浚

劉景芳

賈吉齡

曹克忠

第十卷 師儒傳之一

孫奇達 子立雅 博雅 姪度雅

大清畿輔先哲傳 目次

孫淦

夏峯弟子

李 對 隰崇岱 賀應旌

張果中 耿極 耿權 魏一鰲

毛三光

馬之馴 王之徵 王餘佑

杜 越

賈爾霖 楊行健 殷 岳

殷之紐

申涵光 趙御衆 陳 澍

李衷實

徐夢松 崔蔚林 王體健

張翼星

高 鎬 賈三槐 李天篤

陳 鏞 孔衍學

閻顧行 閻國賓 張泰階

張 潛 弟冲

李鳴雷 洪月評 蔚雲會

李經國

王宏圻 王際明 牛光祚

第十一卷 師儒傳之二

劉之耀 張維德 劉師因

| | | | | | |
|-----|-----|-----|-----|-----|-----|
| 王爾祿 | 王爾禧 | 郭衛明 | 李昌宗 | 李發長 | 崔若泰 |
| 田存芝 | 李知新 | 孫鳳立 | 田迺理 | 劉統 | 管有度 |
| 金鏡 | 仇憲稷 | 于鴻漸 | 楊爾嘉 | 楊爾淑 | 管嗣音 |
| 謝皇錫 | 王延褒 | 李艾蘭 | 周維翰 | 陳大廷 | 杜郊 |
| 盧兆堂 | 馬爾楹 | 李之藻 | 戴方毅 | 劉鼎新 | 戴王綏 |
| 王元鏞 | 李體天 | 李合天 | 戴王絜 | 戴晏 | 陳遇堯 |
| 李明天 | 王一廉 | 李貞吉 | 趙時泰 | 孫揚陞 | 劉重慶 |
| 李滋 | 趙炎 | 田迺畝 | 趙應文 | 趙廷燦 | 閻廷儒 |
| 韓鼎業 | 王塤 | 張嵩崑 | 閻廷秀 | 唐文龍 | 王特簡 |
| 鄧傳 | 張興泰 | 陳奉教 | 李玉鉉 | 韓坤業 | 劉興秀 |
| 耿振采 | 孫立勳 | 李瑞徵 | 熊九疇 | 尹幡然 | 陳坦 |

大清畿輔先哲傳 目次

大清畿輔先哲傳 目次

熊夢飛 宋拱微 劉繹祖

高賡恩 父靜 王錫三

陳章 靳閻然 李煉菴

第十三卷 師儒傳之四

張一貫

刁包 子再濂 崔甲釗 崔甲鎰

第十二卷 師儒傳之三

崔甲默

胡具慶 父范

田極

王定柱 邊廷英 楊亶驊

趙景皋

楊開基 陰琦 琦子振猷 余一元

李集鳳

倪上述

賈潤 曾孫延泰 劉承擘

趙亨鈞

高維聰

徐棟

陳獻

于昌耀

劉正子鑣

張能鱗

左敬祖

吳本植 子玠 璠

劉芳喆

第十四卷 師儒傳之五

邢汝謙

李 鏗 子春源

戈繼皋 孫懋倫

趙允昌 子灝

張 烈 馮濂

王師旦

劉果實 劉漢弼

張 熊

左方燾 張延緒 李之暉

王 植 弟模 棫 子炯

王之樞

王之銳

劉元龍 劉瑄 劉士毅

士毅孫延祚

第十五卷 師儒傳之六

鍾 腕

王應鯨

大清畿輔先哲傳 目次

崔元森 祖緝麟

宋紹濂 王植枏 植枏弟植桂

閻斌 包儀

從兄植桐 呂式燧

鄧諧

鄭杲

蔣紹宗

第十六卷 師儒傳之七

沈兆澐 父峻

顏元

張玉堂

李璘

王振綱 子銓

王源

宋棟

卜應麟

第十七卷 師儒傳之八

王肇晉 子用誥

王灝 王仲倫

顏李師友

| | | | | |
|-----|------|------|-----|-----|
| 吳持明 | 賈珍 | 弟淦 | 魏弼直 | 孫之萍 |
| 李明性 | 兄成性 | 弟盡性 | 宋會龍 | 彭大訓 |
| 張羅詰 | 從孫秉曜 | 張起鴻 | 趙太若 | 朱湛 |
| 喬已百 | 呂申 | 趙琰 | 郭靖共 | 劉起聲 |
| 王養粹 | 父蘊奇 | 從兄純粹 | 彭士奇 | 馮廷獻 |
| 任熙宇 | 張鵬舉 | 李以子杜 | 王廷秀 | |
| 賈易 | 閻中寬 | 父際泰 | 陳振瞻 | 王曙 |
| | | 劉蔭旺 | 王胤 | 李貞吉 |
| 劉崇文 | 王紹武 | 張綸 | 孔思茂 | 楊雨蒼 |
| | 李翼公 | 王之臣 | 徐藍生 | 弟濟川 |
| 張而素 | 馮夢徵 | 賈聿修 | 彭子諒 | 彭好古 |
| | | 陳宗文 | 楊計公 | 子靜甫 |
| | | | 彭毓宗 | |

大清畿輔先哲傳 目次

大清畿輔先哲傳 目次

武 韓

趙思光

顏 利

彭好古

王之佐

李樹碩

劉有餘

朱體三

徐之琇

石 鷺

田中孚

張業書

石 鷺

石繼搏

忠秉彝

何千里

齊觀光

賀碩德

李仁美

第十八卷

師儒傳之九

顏李弟子

顏士俊

顏士佶

顏士鈞

顏士侯

顏士鎮

顏士銳

顏士濂

顏修已

顏爾儼

顏保邦

顏爾儀

顏早壯

顏士侗

顏重光

顏 亨

王久成

鍾 鏐

馬遇樂

曹可成

房魁盛

李植秀

李 利

劉心衡

劉心蕙

劉 珙

李書思

李元英

趙宏澤

趙宏濟

趙宏深

| | | | | | |
|-----|-----|-----|-----|-----|-----|
| 趙宏澍 | 齊春 | 彭如龍 | 王紹文 | 鄭知芳 | 鄭知寵 |
| 彭猶龍 | 閻鍵 | 閻鈞 | 張叔璋 | 劉廷忠 | 劉廷直 |
| 閻銓 | 閻鎬 | 閻由 | 王學詩 | 杜謙牧 | 劉調贊 |
| 閻茂宗 | 閻世昌 | 劉貫一 | 林沃 | 杜謙益 | 趙本中 |
| 郭藩 | 趙士秀 | 趙暉 | 劉焯 | 魏純嘏 | 張肱明 |
| 趙昕 | 趙暉 | 鍾淑 | 趙述舜 | 劉琛 | 國之桓 |
| 李廷獻 | 陳兆央 | 管廷耀 | 陳天錫 | 可默 | 李憫 |
| 管紹昌 | 張澍 | 劉文璋 | 曹敦化 | 鄭克昌 | 齊耀 |
| 郝文燦 | 郝也廉 | 郝也愚 | 李霖 | 李柱 | 詹遠 |
| 郝也魯 | 苗尚信 | 苗尚儉 | 張振旅 | 張智吾 | 王巽發 |
| 白宗伊 | 李宏業 | 韓習數 | 王濬 | 王澤 | 王懷萬 |

大清畿輔先哲傳 目次

大清畿輔先哲傳目次

王溥 王繩其 田得豐

第十九卷 文學傳之一

睿品 郝夢麒 申奇章

范士楫

董漢儒 董漢傑 郭瑛

楊思聖 喬鉢 連佳禮 周鏞

郭培 伊維藩 伊維城

楊繼芳

祁鼎臣 祝兆鵬 王業豐

呂纘祖 劉驊良

王業彪 李通 李基

石申

田如龍 王楫 齊勳

谷應泰

齊中岳 張珂 趙垂勳

周體觀

趙瑞鴻 弓巽 弓御九

陳上年 從子正 裔孫永壽

王博古 王傑期 程石開

李儀古

馮辰 郭金湯 郭金城

宋起鳳

郭 荼 子 焚 孫 青 塏

申 涵 煜 弟 涵 盼 子 頌

劉 可 書 王 儀

李 芳 莎

李 振 藻 父 雲 華 李 暄 亭

齊 祖 望

吳 珊

張 榕 端

曹 鼎 望 子 釗 鈞 董 榕

龐 道 弟 璽 邊 汝 元 李 鑾

榕 弟 樞

邊 樞 李 經 垓

張 衡

第二十卷 文學傳之二

劉 佑

林 徵 韓 王 煦 烏 恂 恂 弟 恬

袁 佑 劉 六 德 劉 元 徵 黃 蔭 若

魏 亭 培 王 僕 高 作 楓

蔭 若 子 任 儀 黃 仲 孫 郁

崔 樹 寶

張 鴻 儀 張 鴻 佑 黃 之 鼎

王 元 煊 元 煊 猶 子 維 坤

大清畿輔先哲傳 目次

郜煥元 李聘 成象珽

趙皇梅 竇遴奇

陳 僖

米漢雯 父壽都 崔如岳

張 霖 子坦 壘 坦子瑄 鯉

瑄子映斗 映斗子虎拜

虎拜從弟虎士 鯉子標

映斗弟映辰 標子靖

井 焜

魏 荔彤

趙 炯 趙爾孫 褚爽

張印潭

方 辰 子宏度 玄孫履錢

查為仁 弟為義 禮

劉獻廷

紀容舒 子暉 從子昭

昭子汝倫

李基塙 父觀曾 子景澄 曹昕

李法孟

第二十一卷 文學傳之三

陳 儀 井在

成文昭子懷祖 孫誠 謚

紀遠宜

子怡 怡子繼祖

王又樸 張壘

楊方晃

朱函夏 父同邑 弟紹夏

周人麒 徐炆 炆裔孫士鑾

陳浩

翟鑰 祖廉 叔祖庸 曾孫升

第二十二卷 文學傳之四

族子宗瑛

王太岳

李棠 父大章 子燧

單鈺 趙鉞

邵大業

燧子辰垣

何琇

周焯

邊連寶

戈 濤 李中簡 鮑梓

兄中寶 族人九整 九整族人銘

珣 九整子浴禮 銘珣子睿 睿

第二十三卷 文學傳之五

大清畿輔先哲傳 目次

大清畿輔先哲傳 目次

翁方綱 子樹培

賈 炎 從子汝愚

朱 筠 子錫庚 章宗源

辛大成 溫如玉 如玉子序斌

紀昀

宋赫寧長年

第二十四卷 文學傳之六

紀曾藻

李維寅 子雲章 龍鐸

張 湘 吳人驥

李廷敬 兄廷揚

王大鶴

張太復 潘文本 李昌舒

雷 鐔 子學淇

何詒霈 父夢蓮

崔 述 弟邁

張德懋

劉鶴鳴 劉會璇

杜南棠

劉錫信 王萱齡

舒 位 鄭佐

第二十五卷 文學傳之七

馬允剛 王居建 王企會 王若璉

李廣滋 世父掖垣 薛國琮

若璉子叔向

張九鼎 九鼎子山

吳名鳳 子潯源

高繼珩

李光庭 兄光里

沈道寬

毛士

趙文涵 弟文濂 文濂子會棟

王廷紹 父繼燿

王慶元

吳鼎臣 張漪

梅成棟 崔旭 旭弟暘 辰 劉錫

第二十六卷 文學傳之八

錫從父維祺

苗夔 張焱光 翟學易

吳蔭松 王瑞徵

華長卿 祖蘭 子光薰 鼎元

徐松

吳士俊

大清畿輔先哲傳 目次

馮 栻 從子秀瑩

趙國華 郝植恭

葉圭綬

弓汝恆 張廷楨

史夢蘭 子履升 王一晉

張佩綸

一晉弟一翰 常守芳

賀 濤 父錫璜

閻士元 楊在汶

張宗瑛

劉書年 子鞏均

第二十七卷 高士傳之一

劉培元

蔣慶第

沈 嘉

楊光儀

張 鎮

俞 燿

李 童

王 柘

史以慎

孫爾禎 弟爾祚 侯保

劉永錫

楊彭齡

杜依中 子其旋 裔孫正灼

王正中

王崇節 從曾孫順會

梁以樟

王所

李孔昭 單者昌 崔周田

霍璉 邵汝德 左槩

劉繼寧

趙湛 劉逢源 路澤農

樊夢斗

龐柄

夏道一

劉夢 潘班 王家基

彭之燦 弟子通

褚士奇

韓昌

聶繪于 徐景維

張蓋

牧犢翁

大清畿輔先哲傳 目次

大清畿輔先哲傳 目次

易 柏武之烈

金 銓 沈銓

劉績邵 李桂品 冀璣

金玉岡

郭璽

張世恩

李友泰

吳建勳

宋之弼

第二十八卷 賢能傳之一

苗君稷 楊大年

霍則白

王原臚

丁 懌

崔應鳳 郝士鐸

龍 震 張溼

寧承勳

蔣玉虹

邊大受

袁嘉教 畢梅 李雍

祕汝煥 父業捷 弟汝煜

陳寔

董應微 子鈺 從孫煜

李天敘

李復修 劉繼昌 郭文炳

祕延瑞 子丕笈

張雲

郭永昌

楊春芳

楊駿 顯祚 冀靖遠

白惺涵

彭憲祖 秦揚

梁維本

李人龍 趙耀 李正華

金鎮

楊春茂 子自牧

方國棟 玄孫聯聚

柳愈

蔡含靈

趙中寵

張令儀 鄧孟魁

江山秀

劉國英 劉鋹

大清畿輔先哲傳 目次

大清畿輔先哲傳 目次

魏裔魯弟裔訥 裔訥子勰

猶子勰 族叔韶鏞

王天鑑

張純熙 武士豪

宋牧民

崔維雅 孫祖詒

李順昌

劉 霖

劉 瀾

第二十九卷 賢能傳之二

楊惠心 邵沖 韓蓋光 崔鳴鶯

周根台 牛樞

倫品卓 子可大

張慎行

趙如瑾 劉世豸 常來譽

楊 璜 弟璪

王統鈞

石維崑 紀耀

劉三章 孫儼

李及秀

蘇就大 弟俊大 從孫璵

磯子曙

高光國

孫昌謨

高明紀從龍

從龍子溪

王寵受

胡昇猷

方于光

張弘俊

顏敏

李翼鵬

鄭名雷一龍一龍從子謚

崔成名師人淑

高光夔

張經安佑馮毓華

郭之培劉汝埴張重振

多弘安

馬之駿兄廷贊族人光

劉澤霖

高爾修

李士宏張璣王謹宸宋大中

劉宏譽何澄梁允植

大清畿輔先哲傳 目次

大清畿輔先哲傳 目次

王明翰

楨子涵煊

呂補袞 姪非虎

范育蕃 胡俊

韓玕 李浣 浣兄灝

張尊賢 陳萬春

李如喬 張冕 王之俊

谷峯 高廷獻

劉永祺

魏雙鳳

紀元

杜鎮

王階

李如澆

孫際昌

戈英 孫錦

于琨

第三十卷 賢能傳之三

賈維英

王澤洪 父顯 從弟澤長 澤長子楨 崔華

康霖生
 楊之柄
 王公任
 劉滋
 李孔嘉子廷徵
 曹首望姪鑛
 陳光祖
 王 郎子廷蘭 孫今遠
 王原直子榮賜
 宋師祁
 紀 愈

田三手 張倬 郭微祚
 李振世
 翟國桓
 劉若鼎 張澹
 王廷璧
 柴廷望
 岳 崧 秦恪 恪孫鑄
 王照乘
 戈時雍 傅維杞 康起梅
 趙光前 張羽紱
 王澤博

大清畿輔先哲傳 目次

大清畿輔先哲傳 目次

井 睦

高堂萼 張宏

鄭惟孜 子預

黃鼎楫 父洲

羅 綸 子得彥

高成齡 謝之洪 李之果

趙 瓚 猶子方觀

楊國聲 子鎡 兄芳聲

楊綠綬

石曰琮

衣締龍 王業立

舒成龍

鹿 賓 父盡心 孫邁祖

第三十一卷 賢能傳之四

承祖 從姪謙吉

李 霄 呂之釋

和氏璽 杜霽遠

張星耀 弟星輝 星法

成泰慎

星輝子模 辛煒

張丙厘 猶簽塏 坦

賈 樸 從弟棠 棠曾孫六奇

魏 曠 父體仁 馮仲焯

樸五世孫臻

趙尙友

趙延珍 馬輝

芮傳傳 曾祖昌齡

尹 烈

朱一鳳

汪與恆 子歛

周人龍

袁 璣

申程章

張 晉 曾孫灼

王 坦 龍需 劉拯

李兆齡 子渭 渭子經芳

陳惠榮

李厘望 子源 源從子槐蔭

陳洪範

賈懋實

黃 鉅 祖得焜

魏 壯 從弟觀

李法顏 父鄒 蘇廷瑞

大清畿輔先哲傳 目次

大清畿輔先哲傳 目次

曹大元

袁履恕 高第

紀邁宜

郭兆夢

刀承祖

朱宏仁 李元仁

劉葵和

劉士銘

季崇楷

第三十二卷

賢能傳之五

張丕亨 崔國棟

龐光耀

石鑑

賈多男

李蘭

李翔麟

姜順龍 弟順蛟

魏元樞 鄭之鐘

張澤仁

邊大乂

張華年 張敏

王枚士 父采 子詢

衛封濟

朱文炳 子堂 垣 堂子錫彤

錫爵

徐觀孫 子如源

李學禮 李鈞 鈞弟鏞

李光謙

張沖之

張惟寅

左基

閻公銑 高宮璽 董鵬翔

杜適文

崔 銓

谷 確

周 禮

金 鎔 子克誠

王發桂

項士鉉

紀 晉 子淑曾

梁 彬 子濟生 蘭生 何允紳

盧純嘏 族人經

第三十三卷 賢能傳之六

李永清

大清畿輔先哲傳 目次

邊方泰

鄭國棟 崔維允

田耕可

李會觀

解秉智

舒其紳

戈源

張方理

荆有慶 父果 徐永年

姚逢年

鄭恂

葉世經

吳沂 子茂楠

王元亮

邊思訥 族人象會

葉汝蘭 弟汝芝 孫圭書

劉訥 曾祖漢儒 楊鶴年

韓湯衡 趙黻

鹿荃 子嗣宗 孫傳先

李學沆 父錫朋 李維本

會孫瀛理

朱文卿

張琴
 常發祥
 張丙震
 葉治
 曹世俊 張同堂
 楊燕緒
 齊紹甲
 范達恩
 劉廷楠
 張樹之 余堂
 姚大謙

楊迦惲
 張世昌 父重光 弟世彥
 馬學賜
 王殊渥
 朱爾漢
 步毓巖 子際桐
 林天培 子寅官
 第三十四卷 賢能傳之七
 紀樹森
 齊正訓 兄正誼

大清畿輔先哲傳 目次

大清畿輔先哲傳 目次

魏煜 李際春

焦景新

王有慶

李大謨 周鍾泰

張志廉

張志詠

陳柱

崔德

張恪 四世祖福蘊

徐連 子雲龍 馮國楨

李培緒 祖楨 楨 楨 楨 子士焜

徐城 高祖孫森 祖汝槐

父輝 孫想穆 曾孫嘉猷

嘉禾 嘉霖

姪大鐳 王樹枏補傳

楊承湛

張鍊

周景巖 高守貴

王聯陞

靳廷鈺

孫述庭 劉慶元

張昫 曾祖為燮

賀雲舉 父仁聲 兄雲鴻

耿麟 白佩珩

張印塘

康懋敷

蔣敘倫 子慶筒

陳鳳圖

才字和

趙桐 李登洲

崔光笏 子鍾善

劉清華

崔侗

裘寶鏞 弟寶芳 子德長

裘寶善

王兆松

武汝清 兄澄清

張金管 兄金奏

王璐

第三十五卷 賢能傳之八

楊福五

吳惠元 父景周

王政令 劉穀萬

大清畿輔先哲傳 目次

王肇謙 祖錫培

劉其年

袁開第 父詵

李吉言 弟審言

王繼庭

劉毓珊

李長華 父泰

龐際雲 父朋

劉恩濟

席樹馨

賀錫福

郭長清

劉淮年

高思愨

陳世綸

張若陽 劉書畚

全士錡

祁德昌 李待時

李清平

胡景桂

許涵度

陳文騷

秦澍春

張元翰

張銓

李之實

杜懋哲 張鵬翼 劉湛

郜炳元 王應星 何衡泗

第三十六卷 忠義傳之一

胡其侯 吳盡忠 姚永燾

寶豸 王國用 劉祿

宋永譽 李芳徵 袁生芝

杜豹 傅進忠 王嘉楨

張鸞羽 劉璇 趙丕承

賈質 何瑞

李淳 劉澤厚

靳秉璋 王家珍 劉之屏

馬勝龍 胡養素

李雲起 王昌運 曲良桂

賈士璋 李承鑣 王任杞

趙居申 馬維熙

大清畿輔先哲傳 目次

張國賢 梁國棟

李進臣 王進忠 趙進禮

張國纓 王存智

蔚之煥

郝時言

李興元 張國彥 劉士英

楊三知

李向榮 傅桂芳

王 札

李崇道

高顯辰

姚廷佐 劉派久

張朝臣

魏樹祥

李躍龍 王宗武 張之馨

劉嗣俊

姪延祉 馬宏儒

姬登第 陳猛

馬孔任

章 倫

趙登舉

胡鑣 鑣九世孫良臣

周大綸 史謙

張善繼

第三十七卷 忠義傳之二

孫維龍 羅載堂 常紀 倪鵬

張發祥 張德飛 王武年

周國衡 李棟綿

武文玉 閃煜龍 傅成明

許濟 計宏謨

崔陞 劉揮

孟臣

楊開第 李廷彪 王宏信

賈慶檀 吳一鳴 酒天培

溫振賢

焦連登 陳傳實 張奇

王鴻儀

趙三變 章潮

李廷煥 弟廷燮

黃凝川

駱六 耿德芳

陳元燮

鹿丕宗 從子傳斌 石均

高舉 金廷勳 金克俊

史鵠

李鐘

魏亨達 劉西園 周鳴鹿

大清畿輔先哲傳 目次

大清畿輔先哲傳 目次

徐 堉 朱式璟 田彬

喬書年 金本

金光飭 田履安

李右文 子傑 弟傑文

從弟 載文

呂蘭昌

張遇祥 兄遇濤

王萬齡

袁懋績

張中寅

盧金第 楊均治 武世昌

寧曾綸 父蘭森 弟曾笏

俞昌烈 劉咸

秦虎翼 常奇珍 李信 張鳳春

陶景武 彭天栢

穆大本 張秉銳

葉濟英 劉東書 鄭沅 平原

谷景昌 谷杏林 馬鳳起

楊嘉運 楊士箴 王其昌

蔡中和 王順會 高學易

第三十八卷 忠義傳之三

馬長欽

任式坊 李蔚然

王保庸

王為霖 孫清臣等

黑珍

杜階平 王德潤

張耀

趙雲芳 郭鵬彪 路綬若

李書城 王化遠 謝振興

李鳳鳴 楊德

馬日駭 李郁 宋遵信

王永 馬翰忠 彩呈瑞

魏遇仙 倪雲鶴

張振威 何瀛

白含章 馬步衢 陳永春

潘佐廷 于燦 趙際清

陳成烈 于壯圖 馬奇峯

趙雲漢 潘俊三

周彬 滕懋德 張秉廉

王廷瑞 劉心台 袁名懿

朱思榜 劉日尊

鄭倬 王泰州 張保忠

常純

大清畿輔先哲傳 目次

大清畿輔先哲傳 目次

張昌茂

耿桂林

薛天然

趙明徵

孟樹勳

王國珍

張永年

王昭

何泰昌

張寶庫

高桂

孟良弼

于清元

王廷相

譚昌祺

張一躍

蔡毓秀

王燮

王公權

魏繼燁

李含春

第三十九卷

孝友傳之一

田大祿

子永隆

張士標

魏思明

劉潤

管德升

王廷輔

王之楨

邢琰

王銘

張鋆

李顯名

曹化洽

高國棟

智懷行

王三錫

劉甘蕙

郭雲城

齊應選

陳兆亨

曹廣攄

劉克家

趙植

蕭鵬起

陳心正

耿之翰

心正子秉信

路開泰

謝關先

王期元

崔士瞻

曾孫恂

耿元文

王金坡

張燧

彭度華

蘇奇英

劉漢儒

陳贖

曹永藻

溫熙之

段思齊

張孝子

韓溥

王傑

王福徵

韓泰夫

王又曾

劉公舉

陳倬

父聖俞

劉潛

苑梅陶

郭化遠

劉迺桂

劉廷訓

蔣爾恂

柳枝楊

溫得之

王之翰

大清畿輔先哲傳 目次

強珥裴

陳廉 高文友

趙燧 王懋桂 王慎德 孫

張咸 趙秉謙 劉叔茂

文安

王之俊 崔生 荀殿臣

劉德瀆 徐兆極

劉印永

袁斌

高裔

李浚 子恆光 浚弟濬

趙巡

張可久 魏三元

李桐

吳仲廣 弟仲大 祥瑞

劉復作

司世教

賈廷輔 趙越 賈其仁 康啟

劉澤厚

梁夢熊

趙萬麟 賈錫穎 李遇奇

宋時化 宋時正

趙方頤

王潔

張義

郝元功

曹允正

李良輔
劉復燦

任培元

路允升

趙昂

司鴻銓

崔渭源

李成龍

李長白

李琬

第四十卷 孝友傳之二

邵泰

趙允澍 弟允涵

王偉

戴珩 子三聘

李崑來 弟欽來

王孫錫 子作肅

李雋望

李雍熙

大清畿輔先哲傳 目次

大清畿輔先哲傳 目次

王弟紳

馮中存

王景功

張 莊弟蓀

商克勤

韓 仁

陳琪

賈 鏞

子澎

張 浩

艾子誠

任足兒

閻斌

李清泰

呂元龍

王書吉 鄭聚江

繆文璧 韓大佩 李永凝

孫廷欽 齊錦 劉之權

張創基

谷凌岱

于忠賢 宋立邦

趙嘉言 尙欽周

朱光觀 王澤溥

齊如奎 王書芸

魏文通

孫履隨
宋大成 曾好明
段金墀 兄金甌
徐樂兒 洪世祿
俞奎垣
崔增福
侯念祖 張升堂
劉如式
潘祖望
張承緒
雷林

劉瑛
康華國
曹紹遠 譚玉潔 李文玉
薛有信
任騎馬 馬傑
王定枚
劉世芳
王策
傅傳習
鄧人王
徐嘉賢 王樹枏補傳

大清畿輔先哲傳 目次

大清畿輔先哲傳 目次

趙基復

孟昭祿 劉世洪

王貴保 李重林

劉華祝 晁萬嶺 郭永

劉永生

趙魁升

韓 燿

陳金杰 呂登魁 鄭金鐘

胡柄泰

王紹義

席黑子

臧廷魁

曹窩升

楊慎初 弟愈初 李咸慶

李國桂

郭允中

敘 錄

大清畿輔列女傳 目次

第一卷 母儀傳

肅寧朱閨母鄭氏

定興杜越母宋氏

任邱劉鍊母白氏

宛平高裔祖母段氏

河間左方煥母王氏

玉田申贊皇母顧氏

磁州張丙厚母成氏

永年趙振宗母張氏

博野尹會一母李氏

永年申夢麟母劉氏

同縣曹士俊母賈氏

遵化董世明母王氏

鹽山劉曾璇妻吳氏

吳茂春妻張氏

南宮王堯恆母李氏

大城楊蔚林祖母馬氏

滄州葉伯儉妻全淡真

子圭書妻李繡英

永年武澄清母趙氏

新城王振綱母杜氏

永年翟觀承母連氏

天津徐世昌母劉氏

王樹枏補傳

大清畿輔先哲傳目次

大清畿輔先哲傳 目次

灤州李茂春母陳氏

同里霍綽母李氏

望都楊升恆母何氏

望都張鴻翔母寧氏

第二卷 賢李傳

清苑張羅彥妻趙氏

清苑王延褒妻張氏

豐潤唐之演妻姚氏

文安邢惟式妻萬氏

通州耿宗湯妻王氏

交河馮瑤林妻張氏

鹽山劉執中妾吳氏

同縣邵潔妻陳氏

韓芸書妻邵氏

大興厲淑明

滿城黃來聘妻魏氏

子鏡妻朱氏

鏡子傳綸妻馬氏

永清賈涑妻劉氏

灤州王曰錡妻魏氏 姑張氏

獻縣張守仁妻梁氏

故城張仲瑜妻王氏

陰常太妻李氏

永清陳應新妻高氏

深州李壽山妻魏氏

永清石堆妻吳氏 霸州吳繼

永清葉可興妻燕氏

科妻郭氏

同縣燕妻邢氏

大興袁宗菴妻邵氏

永清孫興禹妻張氏

永清溫得珠妻李氏

子鳳瑞妻楊氏

永清蔡浩妻鄔氏

霸州馮顯宗妻李氏

永清蘇廷燧妻西氏

永清李文燦妻郭氏

同縣張富妻蔣氏

同縣楊彬妻初氏

廣昌何某妻魏氏

永清仇致廣妻任氏

容城陰賢妻杜氏

子永齡妻燕氏

大清畿輔先哲傳目次

曲周王懃妻岳氏

同縣李長霖妻王氏 龐讚妻高氏

趙州閻貞女

李璠妻鄧氏

東光王而陶妻張氏

天津王瀛妻湯嘉名

天津吳某妻韓氏

大城王巨庭妻張氏

通州白鎔妻劉氏

同縣劉懋源妻元氏

宛平韓孝梅永清朱棫女

安州梁某妻張氏

棗強王孝女

武清高貞女

故城盧著

獻縣韓守立妻俞氏

元氏王炳如妻郭

故城張某妻李氏

滄州楊天德妻王氏

任邱白俊德繼妻劉氏

大城李壽山妻孟氏

孫蔭欄妻周氏

涑水章貞女

深州嚴烈女

獻縣吳孝女

赤峯范豈二節婦

天津金佑妻王氏

天津徐氏王樹枏補傳

灤州郭東陽妻劉氏

樂亭董孝女

望都耿一圭

大城韓天印妻楊氏

天津張王玉妹淑貞

大城葛廷魁妻梁氏

臨榆趙貞女

天津鄭羨仙王姐姐

任邱李樹畹

第三卷 節義傳

蠡縣蔣爾恂妻李氏

廣昌徐詰妻氏

姪圖遠妻趙氏

容城孫立德妻張氏

同縣宋諒妻孫氏

大清畿輔先哲傳 目次

南宮邢鏞李氏

懷安朱琇妻秦氏

柏鄉耿復昭妾趙氏

清苑何溶妾張氏

永清張科妻劉氏

永清張其蘊妻曹氏

通州張維垣妻姚氏

易州田氏雙節婦

平谷關某妻王氏

霸州王經妻何氏

同縣馬馭雙妻顧氏 王李妻倪氏

寧河岳景純妾張氏

李某妻韓氏

子屹然妻朱氏

東明房蒺妻甄氏

臨榆錢朝樞妻張氏

同縣戴會隆妻張氏

撫寧魯樊二女

永年杜斯美妻盧氏

安肅田廣宗妻張氏

蠡縣龐國棟妻魏氏

饒陽李氏楊氏兩賢婦

平谷劉秀姑

同縣劉百順妻王氏

獻縣紀汝備妻張氏

張志和妻邊氏女經姐 東鹿穆烈女

灤州賈克明妻孫氏

同縣石如玉妻彭氏

灤州李氏兩節婦

新安梁大用妻孫氏

涿州王萬齡妻張氏

蠡縣徐泐妻王氏

遵化何門兩節婦

同縣李壤妻辛氏

大城李柏齡妻陳氏

容城李煥元妻孫氏

大城王國風妻張氏

新安張攀麟妻荆氏

第四卷 貞烈傳上

高陽張毓椿妻白氏

同縣劉廣福妻龐氏

高陽王鈺妻張氏

韓蓋光妾譚氏

大清畿輔先哲傳 目次

安肅張永錫妻王氏

通州康流著

寧晉馮學曾妻王氏

新安魏克儉妻王氏

易州范烈女

易州田誠甫妻王氏

豐潤猷壯猷妻李氏

涿水蘭應祿妻孫氏

深澤袁邦靈妻楊氏

高陽孫之敬妻張氏

同縣李金錫妻賈氏

忻州戴五姐

蔚州宋典姐

同州寧超字妻焦氏 李成姐

永年楊之孚妻馬氏

東鹿宋鄭氏

武邑井第大妻滕氏

安肅商理姐

西寧侯烈婦

肅寧宋氏五烈女

王田桑琮妻曹氏

同縣苗烈女

交河董才姐

豐潤金烈女

香河朱某妻芮秉貞

天津邢文貴妻殷鳳娘

寧河樂某妻左氏

天津徐某妻張氏

宛平高章侯女

安州張貞女 雄縣孫貞女

天津高爾信妻魏氏

天津金振妻丁氏

同縣王廷錡妻劉氏

南皮張裕慧妻王氏

任邱邊蘭珠

獻縣戈鎮妻劉氏

大城孟黑子妻苑氏

獻縣黃貞女 任邱舒貞女

阜城寇貞女 寧津王貞女

天津張懷清

臨榆郭烈女

棗強屈瑜妻劉氏

固安高萬基妻呂氏

寧河王寅清繼妻吳氏

大清畿輔先哲傳 目次

東明曹三姐

天津金讓妻章氏：

同縣張黑妻董氏

獻縣張天錫妻孟氏

廣昌沈貞女

天津梁貞女

通州趙傑女 寶坻王澤世女

遵化王立妻孟氏

密雲楊文瑛

滄州某甲妻張氏

天津周鼎妻龍氏同縣葉烈婦王氏

故城張伉妻馬氏

志廬妻邵氏

天津王貞女

天津孟氏吳氏兩姊妹

天津張起妻趙氏

同縣關維印妻劉氏

長垣李烈婦

元氏耿志明妻董氏

曲陽崔貞女東明邱貞女

大興沈毓鳳妻史氏

正定蘇貞女 靈壽蘭貞女

武強張貞女

遵化洪士俊妻王氏

深州周成姐同州王二姐

天津于維琛妻劉氏

第五卷 貞烈傳下

同縣孫佑妻唐氏

朱元善妻陳氏

豐寧謝紹鳳妻徐氏

天津李黑姑

平泉州王興妻朱氏

天津劉鐘妻王氏

天津毛凌泉妻朱氏

元氏王訓之妻劉氏

同縣孫泓妻程氏

東明霍松坪妻李氏

新城孔貞女 同縣劉貞女

武清田大成女

文安李榮姑 婢陳春華

薊州王天元女 固安馮綸女

樂亭陰鳴岐妻李氏

文安陳貞女

大清畿輔先哲傳 目次

天津樊景恆妻王氏

同縣王恩徽妻金氏

清苑姚景崇妻任氏

棗強盧貞女

青縣周某妻謝氏

肅寧苗烈女

安肅蘇民生妻劉氏

南樂藍姑 同縣張姑

大城韓遇雲妻賈氏

天津金慶蘭妻周氏

同里崔玉堂妻張氏

同縣楊葆廉妻張氏

望都任氏婢祥姑娘

門世祺妻張氏

獻縣劉肇峻妻唐孟瑞

天津李夢齡妻梅氏

天津婁舉正妻王氏

滄州蘭貞女

笠山杜光泰妻周氏

天津孟傳謀妻龐氏

天津王兆霖妻金氏

同縣張文靜妻梅氏

平遠楊國昌妻陳氏

同縣李運昌妾徐氏

天津郭鴻儀妻張氏

天津鄭廣義妻劉氏

武邑魏某妻常氏

通州白楷妻沈汝可

大城蕭林妻馬氏

河間裘瑋妻宗氏

同縣沈廣維妻張氏

南皮張氏兩烈女

葉宜春妻邢氏

任邱王蒲

大城馬廷梅妻駱氏

第六卷 才藝傳

大城劉任二貞女

南皮慕貞女

盧龍蔡琬

灤州苗翠

天津樂樟妻王氏

天津三王氏

故城祕王伊繼妻何氏

大清畿輔先哲傳 目次

滄州左方燾妻張貞範

遷安高順貞

元城陳朝蔭妻竇氏

同縣李綸妻李氏

天津查為仁妻金氏

樂亭張山妻宋氏

女調鳳容端 綺文

大興方履錢繼妻呂氏

嚴月瑤 侍女宋貞娘

正定何鴻受妻子氏

許雪棠

大興劉尹玉 子婦劉已未

天津梅成棟妻金氏

文安張高山妻葛氏

同縣趙西姑 張筠

任邱李鄰煥

天津佛女

天津陸文輔

灤州王廷勳妻竇蘭軒

同州李希彬妻鄭淑

人

清

翠

輔

光

哲

傳

四

季

列女傳附



序

有清建國以來崇儒右文聖道昌明遠駕千古皇畿爲首善之區海內通才碩士鱗萃都下生其間者耳目漸染取法最近亦濡化最先故二百數十年來畿輔人才之眾幾甲天下往者讀魏蓮陸尹元孚北學正續諸編歎其取材太狹且不無入主出奴門戶之私識者病焉光緒初元樹枏嘗輯直隸人物依聖門四科之目分類纂錄曰德行科性理之學屬之曰言語科詞章之學屬之曰政事科經濟之學屬之曰文學科考據之學屬之總名之曰北學師承記惜其時搜討未備迄未成書二十餘年宦游四方稿本泰半散失甲寅之歲 弢齋徐公有纂修大清畿輔先哲傳之舉索樹枏舊稿存者寥寥且簡略不足備甄擇 公乃博爲搜輯凡國史所載以及私家撰著其文獻實有可以徵信者罔不窮搜博考力

爲表章閱時三年凡爲傳目八爲卷四十而以列女附焉嗚呼盛
已夫中國者眾學之淵藪而學者一國之範圍也經數千百年聖
作明述以造成一國之學經數千百年君相之作育師友之淵源
以造成一國之人其達而在上也則行其所學可以兼善天下其
窮而在下也則守其所學可以獨善一身自將相師儒立德立功
立言之大下逮愚夫愚婦其爲善俗所薰陶日用所行習者亦皆
足以扶名教而植綱常降及末世學非所學邪說恣行其甚者至
欲舉古聖先師之所以經世訓俗者一是屏棄之以爲無足與今
之天下學術之憂正未知何所屆也 公之爲是書也豈第一鄉
之文獻已哉其所以正人心維風化以詔後學者舉於是乎在孔
子曰居是邦也事其大夫之賢者友其士之仁者孟子論友由一
鄉之善士以極於尙論古人胥是志也夫以中國之大人人民之眾

其鄉賢達足以爲世表者所在皆是也有心世道者苟皆以公
之志爲志萃一邦之文物以彙成一代之典章則人人各抱敬恭
桑梓之心其效之普當更何如也子貢曰賢者識大不賢者識小
文武之道庶幾其不墜也與新城王樹枏謹序

月

198 - 072

例言

是編凡分八門曰名臣曰名將曰師儒曰文學曰高士曰賢能曰忠義曰孝友而以列女附焉

魏蓮陸北學編專取理學一門規模稍狹後之再續三續依形就範又有語焉不詳之憾學問之道無盡識大識小皆爲聖人所師不可以一格拘也是編義在表章先哲博採宏搜苟可信徵不嫌詞費

畿輔爲首善之區清朝定鼎以來文治聿興人才蔚起順治丙戌會榜多至一百餘人以後聞人代興指不勝屨傳流愈遠聞見愈希儻不及時網羅則數傳而後且有求其姓名而不可得者孔子曰史之闕文又曰文獻無徵斯則後死者之責也

北方士習樸實專務闇修不喜標榜碑銘傳誌傳者甚希而
方志所載又復畧而不詳寥寥數語所謂莫爲之後雖美弗
傳也是編所錄取有事蹟可敘能成傳者其但載名字或空
言無實一生學行事業無可搜輯則暫從闕如之例以俟後
之博聞君子

都會之地四方輻湊春秋兩試觀光之士占籍者歷科皆有
今定占籍之人斷以年代其父入籍則錄其子孫其子孫出
籍仍錄其祖父若永平翁叔元大興徐有王程鴻詔等雖借
籍成名並未遷居皇云土著如此之類概予削除以杜泛濫
畿輔詩傳載宮夢仁字宗衮號定菴靜海人康熙九年進士
歷官禮部尙書天津府選舉志謂夢仁靜海人康熙九年庚
戌會元十二年癸丑覆試官至福建巡撫而府志列傳中不

載此人查四庫書提要讀書紀數畧五十四卷爲官夢仁編
夢仁字定山泰州人康熙戊戌進士官至福建巡撫康熙四
十六年 聖駕南巡夢仁方罷官里居恭迎六御以此書奏
呈御覽得旨刊行案戊戌爲康熙五十七年若進呈此書在
四十六年罷巡撫家居之時是成進士反在官巡撫後矣戊
戌想係庚戌之訛又一字定菴一字定山必有一誤竊意夢
仁本籍泰州或冒靜海籍成進士後又改歸原籍亦未可知
據提要里居迎駕可定其爲南人非北人也姓名同官階又
同的係一人以籍貫在疑似之間不復載錄示慎也
八旗滿洲蒙古漢軍雖有屯居近畿各縣者因皆入旗籍概
不採錄以示限制

名臣傳內官斷自侍郎以上外官斷自巡撫以上以下則入

賢能傳中名將斷自副將以上以下多無甚表著其殉難者則統入忠義傳中

歷朝名臣有姓名僅存事蹟不著如清初吏部侍郎宛平胡兆龍工部尚書通州楊正中等稽之志乘寥寥數言無從考錄亦有官至極品雖無赫赫之功而謹慎恪恭素孚朝望者概予編入不事苛求識者自能辨之

分門別類視乎其人不僅在名位高下也如紀文達公名臣也然其文學鴻博昌明卓越今古故從其所重列之文學傳中張蓋趙湛劉逢源等皆文學也然其亢志高節自居逸民故列之高士傳中孫夏峯刁蒙吉杜紫峯等皆高士也然其倡明道學繼往開來其所重尤在此不在彼故列之師儒傳中魏貞庵魏環極朱石君郝中山等皆師儒也梁玉立黃崑

圃王振聲張文襄等皆文學也而訐謨偉績功在國家故列之名臣傳中凡如此類皆慎爲編次非有心軒輊也

師儒傳中學問派別暗區門類孫夏率一派爲陸王之學者屬之刁蒙吉一派爲程朱之學者屬之顏李一派爲蠡吾博野之學者屬之學雖殊途其揆則一依次編錄以示景行儒林文苑創自史漢林苑者取會萃之義但名類杜撰義嫌蛇足惟唐書作儒學文藝金史亦作文藝差強人意又史漢儒林多紀經術不盡醇才文苑專尚詞華無關實學至宋史乃特立道學傳以別於儒林有清又特爲經學傳以別於文苑區分愈密名目滋繁均未得其領要也案周禮曰聯師儒又曰師以道得民儒以藝得民鄭注曰師儒鄉里教以道藝者賈疏所謂致仕之賢者也文學居四科之一子游長於禮

子夏長於詩不僅以詞章見也今易儒林爲師儒傳則古之所謂道學者皆統之矣取南梁隋書遼史易文苑爲文學傳則詞章考據諸學皆統之矣

諸史循吏良吏諸傳多錄郡縣外吏案周禮三年大比攷其德行道藝而興賢者能者又曰使民興賢出使長之使民興能入使治之孟子賢者在位能者在職皆統內外而言今備錄京外各官實有政績可書者作賢能傳以示賅備

高士傳諸史或稱隱逸或稱高逸或稱逸士標名取義無甚區分今依晉皇甫謐稽康書定爲高士傳不僅錄明末逸民已也

是編意在網羅往哲闡發幽潛間有論斷皆本前人成說以守述而不作之旨

編次列傳以科分年代爲先後其無科分者以入官年代爲先後兩者俱無則按朝代敘次以清眉目

清初纂修明史編輯諸公多係南人北方名彥遺漏頗多萬季野曾痛切言之今值創修清史之時竊恐二百數十年文獻僅憑官家採訪不無遺漏因設局搜輯積四年之久始成此書上之史館以備採擇

是編取材廣博遠搜近訪所在須人適同年王晉卿樹枏來游京師因與商訂共擎斯舉復約同志分任採訪編輯校勘繕錄剗厲諸事每爲一傳輒與晉卿討論修飾以求完善起乙卯正月訖丁巳十二月三年之久始成書若干卷發幽光闡潛德有清一代畿輔先哲大半具於是編其有不知或舛牾之處尙望世之博學君子匡我弗逮

吾家自浙江鄞縣北遷順天之大興始於明季四世祖端叔
公再遷天津遂世爲天津人歷代先德詳誌家乘茲纂是編
同年王君晉卿謂不可不分載傳中以昭來許是編凡吾先
人諸傳皆晉卿手纂依年編次與諸傳同例
畿輔先哲祠中供祀孝友數十人大半皆割股廬墓方志中
如此類者不可勝舉今取其有事蹟可徵者編之入傳餘不
備書

姓氏

編輯

新城王晉卿樹枏

冀州趙湘帆衡

臨桂黃則甫閒

馮陽李平存心地

武強賀性存葆真

校勘

容城曹雲程海鵬

屏山吳蟄卿桐林

新城王法生孟戌

涑水趙石塵慶墉

生氏

一

故城王蔭南在棠

清苑許清卓育璠

開封朱鐵林寶仁

東鹿牛伯魯增奎

採訪

天津李嗣香士鈇

天津嚴範孫修

高陽李符曾焜瀛

鹽山劉仲魯若曾

天津華弼臣世奎

樂亭史康侯履晉

天津徐友梅世光

玉田蔣星甫式瑛

大興孟玉雙錫珏

大興馮公度恕

安肅袁霽雲廷彥

獻縣紀泊居鉅維

定州王合之延綸

清苑賀昆凡嗣盛

大城劉友石林立

東安馬著義鍾琇

書記

新城王叔仁輔之

屏山吳問秋盩

岳楊李紹甫觀杜

高陽李子壽鶴樓

霸州韓澤南書城

宛平榮厚丞深

冀州趙子平錫剛

新城王茂萱樹森

新城王馥園維江

束鹿錢化南興棠

宛平白與九恩錫

新城王季茂世忠

定興張銘閣炤麟

冀州劉重光貴斌

大清畿輔先哲傳目錄

名臣傳七卷

名將傳二卷

師儒傳九卷

文學傳八卷

高士傳一卷

賢能傳八卷

忠義傳三卷

孝友傳二卷

第一卷

名臣一

王崇簡

梁清標 從父維樞

劉武元

弟克大 子亮 光

成克鞏

子恭俊

杜立德

王景祚

魏象樞 子學誠

魏裔介

李震

第二卷

名臣二

王熙 弟燕

朱之弼 弟之佐

郝維訥
父傑

冀如錫

蔣元恆

董應魁

苗澄
劉斗 許世昌 田種玉

傅維鱗

劉捷

林起龍

袁懋功
兄懋德

劉鴻儒

高景

第三卷

名臣三

楊時薦 兄時舉

于嗣登

張自德

徐化成

趙之鼎 子致

郝浴 子林

宋文運

張士甄

張文衡

陳協 兄慎

劉芳躅

鄭端

子璘 珣

趙之符

子殿衡 兄子殿邦

劉兆麒

劉元慧

徐國相

李煒

第四卷

名臣四

勵杜訥

子廷儀 孫宗萬

閻興邦

崔徵璧

劉謙

子自潔

李旭升
子周望

黃叔琳
弟叔璫 子登賢

何國宗

王蘭生
魏廷珍

張渠

元展成

尹會一
子嘉銓

第五卷

名臣五

陳憲華
弟憲正

周人驥

朱珪

李綬

李殿圖

史積容

傅弼

徐炘

王樹枏補傳

魏元煜

弟元煊

戴三錫

吳邦慶

盧坤

第六卷

名臣六

白鎔

孫桓

趙盛奎

張文浩

李鈞

王植

劉源灝

桑春榮

韓超

王發桂

惲光宸

廉兆綸
李茜

高崇基

李鴻藻

張之萬
鹿傳霖

第七卷

名臣七

張之洞

陸鍾琦
子光熙

第八卷

名將一

徐可成

王可就

朱萬祺
子偉

陳喜
周天命
李得春
張承恩

楊捷

呂八音

苗之秀

張燦

許國璧

李連

傅鵬翔

白斌

李正春

穆廷斌

張英奇

周貴

劉國興

王文雄

李君賢

路鳴竹

田峻

李漣

崔起潛

王無黨

袁立相

丁士傑

哈元生

子尙德

劉順

李煦

汪騰龍

何守林

齊大勇

閻文繡

李國柱

齊元輔

董天弼

許成麟

哈攀龍

子國興

國興子文虎

俞金鼈

李壽春

第九卷

名將二

劉國樑

董果

孫廷璧

李國梁

安廷贊

王普

謝斌

蘇靈

劉文忠

安定邦

蔣觀濤

王鑑

穆維

安慶

劉管城

邢敦行

孫清元

王清弼

李錫命

王萬清

郭繼昌

史善載

李士林

武光琳

孔廣源

張鑑

周景魁

董光甲

石清吉

程三光

劉玉豹

吳璋

吳燦

王錫朋

段飛熊

郝光甲

郝上庠

安勇

石皓

蔣照臨

鄭奎士

奎士子永祥

李成虎

于昌麟

昌麟從子二剛

弟昌慶

史榮椿

王鳳祥

王浚

劉景芳

曹克忠

第十卷

師儒一

孫奇逢

子立雅

博雅

姪度雅

孫淦

李對

隰崇岱

賀應旌

毛三光

杜越

殷之紐

李衷實

張翼星

陳鉉

孔衍學

張潛

弟沖

李經國

第十一卷

師儒二

夏峯弟子

張果中 耿極 耿權 魏一鰲 馬之馴 王之徵

王餘佑 賈爾霖 楊行健 殷岳 申涵光 趙

御眾 陳澎 徐夢松 崔蔚林 王體健 高鏞

賈三槐 李天篤 閻顧行 閻國賓 張泰階 李

鳴雷 洪月評 蔚雲會 王宏圻 王際明 牛光

祚 劉之燿 張維德 劉師因 王爾祿 王爾禧

郭衛明 田存芝 李知新 孫鳳立 金鏡 仇

憲稷 于鴻漸 謝皇錫 王延襄 李艾蘭 盧兆

堂 馬爾楹 李之藻 王元鏢 李體天 李台天

第十二卷
師儒三

李明天 王一廉 李貞吉 李滋 趙炎 田迺
欽 韓鼎業 王墳 張嵩品 鄧傳 張興泰 陳
奉敕 耿振采 孫立勳 李瑞徵 李昌宗 李發良
崔若泰 田迺理 劉統 管有度 楊爾嘉 楊
爾淑 管嗣音 周維翰 陳大廷 杜郊 王方穀
劉鼎新 戴王綏 戴王絜 戴晏 陳遇堯 趙
時泰 孫揚陞 劉重慶 趙應文 趙廷燦 閻廷
儒 閻廷秀 唐文龍 王特簡 李玉鉉 韓坤業
劉興秀 熊九疇 尹幡然 陳坦 熊夢飛 宋
拱微 劉繹祖 陳章 靳闇然 李煉菴 張一貫

胡具慶 父范

王定柱 邊廷英 楊曾驊

楊開基 陰琦 琦子振猷 奈一元 倪上述

趙亨鈐

徐棟

于昌耀

高賡恩 父靜 王錫三

第十三卷

師儒四

刁包 子再濂 崔甲釗 崔甲鎧 崔甲默

田極

趙景皋

李集鳳

曾孫延泰

劉承攀

高維聰

賈潤

陳獻

劉正

子鑣

張能鱗

左敬祖

吳本植

子玠璠

劉芳喆

第十四卷

師儒五

邢汝謙

李鏗

子春源

戈繼泉 孫懋倫

趙允昌 子灝

張烈 馮濂

王師旦

劉果實 劉漢彌

張熊

左方壽 張延緒 李之嶧

王植 弟模 棧 子炯 王之樞

王之銳

劉元龍 劉瑄 劉士毅 士毅孫延祚

第十五卷

師儒六

鍾晚

王應鯨

崔元森

祖緝麟

閻斌

包儀

鄧諧

蔣紹宗

沈兆灃

父峻

張玉堂

王振綱

子銓

宋棟

卜應麟

王肇晉

子用誥

王灝 王仲倫

宋紹濂 王植枏 植枏弟植桂 從兄植桐 呂式棟

鄭梟

第十六卷

師儒七

顏元

李塏

王源

第十七卷

師儒八

顏李師友

吳持明

賈珍 弟淦

金

李明性

兄成性

弟盡性

張羅詰

從孫秉曜

張起鴻

趙琰

喬已百

呂申

王養粹

父蘊奇

從兄純粹

任熙宇

張鵬舉

賈易

閻中寬

父際泰

劉蔭旺

劉崇文

王紹武

張綸

王之臣

李翼公

張而素

馮夢徵

魏弼直

孫之萍

宋會龍

彭大訓

蘇德星

郭靖共

趙太若

朱湛

彭士奇

彭朝彥

劉起聲

馮廷獻

李以子杜

王廷秀

陳振瞻王鳳

王曙

孔思茂

李貞吉

徐藍生

楊雨蒼弟濟川

賈聿修

彭好古

彭子諒

楊計公子靜甫

陳宗文

彭毓宗

武韓

趙思光

李樹碩

劉有餘

田中孚

張業書

何千里

第十八卷

師儒九

顏李弟子

| | | | | | | | | |
|-----|-----|-----|-----|-----|-----|-----|-----|-----|
| 齊春 | 李元英 | 李植秀 | 全美 | 石繼搏 | 好古 | 儀 | 士銳 | 顏士俊 |
| 彭如龍 | 趙宏澤 | 李利 | 王恭己 | 孫秉彝 | 王之佐 | 顏早壯 | 顏士濂 | 顏士佶 |
| 彭猶龍 | 趙宏濟 | 劉心衡 | 宋希廉 | 齊觀光 | 朱體三 | 顏士侗 | 顏修己 | 顏士鈞 |
| 閻鍵 | 趙宏深 | 劉心蕙 | 朱有文 | 賀碩德 | 徐之琇 | 顏重光 | 顏爾儼 | 顏士侯 |
| 閻鈞 | 趙宏澍 | 劉珙 | 邊之藩 | 李仁美 | 石鸞 | 顏亨 | 顏保邦 | 顏士鎮 |
| 閻銓 | | 李書思 | 夏希 | 李 | 石鸞 | 顏利 | 顏爾 | 顏 |

| | | | | | | |
|-----|-----|-----|-----|-----|-----|----|
| 鑄 | 閻鈺 | 閻茂宗 | 閻世昌 | 劉貫一 | 郭藩 | 趙 |
| 士秀 | 趙暉 | 趙昕 | 趙隣 | 鍾淑 | 李廷獻 | 陳兆 |
| 央 | 管廷耀 | 管紹昌 | 張澍 | 劉發璋 | 郝文燦 | |
| 郝也廉 | 郝也愚 | 郝也魯 | 苗尙信 | 苗尙儉 | 白 | |
| 宗伊 | 李宏業 | 韓習數 | 王紹文 | 鄭知芳 | 鄭知 | |
| 寵 | 張叔璋 | 劉廷忠 | 劉廷直 | 王學詩 | 杜謙牧 | |
| 劉調贊 | 林沃 | 杜謙益 | 趙本中 | 劉焯 | 魏純 | |
| 嘏 | 張朏明 | 趙述舜 | 劉琛 | 國之桓 | 陳天錫 | |
| 可默 | 李佃 | 曹敦化 | 鄭克昌 | 齊耀 | 李霖 | 李 |
| 柱 | 詹遠 | 張振旅 | 張智吾 | 王巽發 | 王濬 | 王 |
| 澤 | 王懷萬 | 王溥 | 王繩其 | 田得豐 | 郝品 | 郝 |
| 夢麒 | 申奇章 | 董漢儒 | 董漢傑 | 郭鎮 | 郭培 | |

系

三

第十九卷

文學一

伊維藩 伊維城 祁鼎臣 祝兆鵬 王業豐 王

業彪 李通 李基 田如龍 王楫 齊勳 齊中

岳 張珂 趙垂勳 趙瑞鴻 弓巽 弓御九 王

博古 王傑期 程石開 馮辰 郭金湯 郭金城

范士楫

楊思聖 喬鉢 連佳標 周鑄 楊繼芳

呂纘祖 劉驂良

石申

谷應泰

周體觀

陳上年 從子正 裔孫永壽

李儀古

宋起鳳

郭葵 子熒 孫青壇 劉可書 王儀

李振藻 父雲華 李暄亨 吳珊

曹鼎望 子釗 鈞 董榕 榕弟樾

張衡

劉佑

林徵韓 王煦 馬恂 恂弟恬 魏亨培

申涵煜 王樸 高作楓 崔樹寶
弟涵盼 子頊 李芳莎

齊祖望

張榕端

龐塏

弟璽

邊汝元

李鑾

邊旌

李經垓

第二十卷

文學二

袁佑

劉六德

劉元徵

黃茵若

茵若子任

儀

黃

皇梅

寶遴奇

張鴻儀

張鴻佑

黃之鼎

王元烜

陳僖

米漢雯

父壽都

崔如岳

張霖

子坦

子壘

子瑄

子瑄

子標

子映斗

子映辰

子虎

井焜

魏荔彤

趙炯

趙爾孫

褚爽

張印潭

方辰 子宏度 立孫履錢

查為仁 弟為義 禮

劉獻廷

紀容舒 子暉 從子昭 昭子汝倫

李基塙 父觀曾 子景澄 曹昕 李法孟

第二十一卷

文學三

陳儀 井在

成文昭 子懷祖 孫誠 誕

紀達宜

王又樸 張畧

朱函夏 父同邑 弟紹夏

陳浩

翟劔

祖廉

叔祖庸

曾孫升

族子宗瑛

單鈺

趙鈺

邵大業

何琇

邊連寶

兄中寶

族人九整

九整族人銘珣

銘珣

九整子

楊方晃

周人麒

徐玠

玠裔孫士璽

第二十二卷

文學四

王太岳

李棠

父大章

子燧

燧子辰垣

周焯

戈濤

李中簡

鮑梓

第二十三卷

文學五

翁方綱

子樹培

朱筠

子錫庚

章宗源

紀昀

第二十四卷

文學六

張湘

吳人驥

王大鶴

雷鐔

子學洪

崔述 弟邁

劉鶴鳴 劉曾璇

劉錫信 王萱齡

第二十五卷

文學七

賈炎 從子汝愚

辛大成 溫如玉 如玉子序斌 宋赫 甯長年

紀曾藻 子雲章 龍鐸

李維寅 兄廷揚

李廷敬 潘文本 李昌舒

張太復 父夢蓮

何詒霽

張德懋

杜南棠

舒位 鄭佐

馬允剛 王居建 王企曾 王若璉 若璉子叔向

吳名鳳 子潯源

李光庭 兄光里

毛士

王廷紹 父繼耀

吳鼎臣 張漪

梅成棟 崔旭 旭弟暘 晨 劉錫 錫從父維祺

吳蔭松 王瑞徵

徐松

李廣滋

世父掖垣

薛國琮

張九鼎

九鼎子山

高繼珩

沈道寬

弟文濂

文濂子曾棟

趙文涵

王慶元

第二十六卷

文學八

苗夔

張焱光

翟學易

華長卿

祖蘭

子光鼎

鼎元

吳士俊

馮棧

從子秀瑩

葉圭綬

史夢蘭

子履升
士元

王一晉
楊在汝

一晉弟一翰

常守芳

蘭

劉書年

子肇均

劉培元

蔣慶第

楊光儀

俞燿

王柘

趙國華

郝植恭

弓汝恆

張廷植

張佩綸

賀濤

父錫璜

張宗瑛

第二十七卷

高士

沈嘉

張鎮

李童

史以慎

孫爾禎

弟爾祚 侯保

劉永錫

王正中

梁以樟

李孔昭

單者昌 崔周川 劉繼璽

樊夢斗

夏道一

彭之燦

弟子通

韓畱

張蓋

杜依中

子其旋

裔孫正灼

楊彭齡

王崇節

從曾孫順曾

王炳

霍璉

邵汝德

左槩

趙湛

劉逢源

路澤農

龐柄

劉夢

潘班

王家基

褚士奇

聶繪于

徐景雒

牧犢翁

易柏

武之烈

劉續邵

李桂品

冀璫

郭璽

李友泰

宋之弼

苗君穆

楊大年

霍則白

丁懌

龍震

張霍

蔣玉虹

袁嘉敖 畢梅 李雍

金銓 沈銓

金玉岡

張世恩

吳建勳

第二十八卷

賢能一

王原撫

崔應鳳 郝士錚

甯承勳

邊大受

祕汝煥 父業捷 弟汝煜

陳寔

李天敘

祕延瑞

子丕笈

郭永昌

楊駿

王顯祚

冀靖遠

彭憲祖

秦揚

李人龍

趙耀

李正華

楊春茂

子自牧

柳愈

趙申寵

江山秀

董應徵

子鉅

從孫煜

李復修

劉繼昌

郭文炳

張雲

楊春芳

白惺涵

梁維本

金鎮

方國棟
立孫聯聚

蔡含靈

張令儀
鄧孟魁

劉國英
劉鋹

魏裔魯
弟裔訥 裔訥子觀 猶子勳 族叔韶鏞

宋牧民

李順昌

劉瀾

邵冲 韓蓋光 崔鳴鸞 周根台 牛樞

楊惠心

張慎行

楊璜 弟璣

石維崑 紀耀

李及秀

王天鑑

張純熙 武士豪

崔維雅 孫祖詒

劉霖

第二十九卷

賢能二

倫品卓子可大

趙如瑾劉世豸 常來譽 王統鈞

劉三章孫儼

蘇就大弟俊大 從孫璵 璵子曙

謝泰

顏敏

高光國

高明紀從龍 從龍子濶

胡昇猷

張弘俊

李翼鵬

崔成名師人淑

張經安佑 馮毓華

多弘安

劉澤霖

李士宏 張琰 王謹宸 宋大中

孫昌謨

王寵受

方于光

鄭名 雷一龍 一龍從子 譔 高光夔

郭之培 劉汝埴 張重振

馬之駉 兄廷贊 族人光

高爾修

劉宏譽 何澄 梁允植 王明翰

呂補袞 姪非虎

韓珩 李浣 浣兄灝

李如喬 張冕 王之俊

劉永祺

紀元

王階

孫際昌

于琨

賈雒英

王澤洪 父顯 從弟澤長 澤長子楨 楨子涵 楨子煥

范育蕃 胡俊

張尊賢 陳萬春

咎峰 高廷獻

魏雙鳳

杜鎮

李如芳

戈英 孫錦

第三十卷

賢能三

崔華

康霖生

楊之柄

王公任

劉滋

李孔嘉
子廷徵

曹首望
姪鑛

陳光祖

王鄖
子廷蘭 孫今遠

王原直
子榮賜

宋師祁

紀愈

田三才
張倬 郭徽祚

李振世

翟國桓

劉若鼎
張濬

王廷璧

柴廷望

岳憲

秦恪 恪孫鑄

王照乘

戈時雍

傅維杞 康起梅 趙光前 張羽紱

王澤博

井睦

鄭惟孜

子預

羅綸

子得彥

趙瓚

猶子方觀

楊綠綬

衣綈龍

王業岵

鹿賓

父盡心 孫邁祖 承祖 從姪謙吉

李霄 呂之釋

張星耀 弟星輝 星法 星輝子模 辛煒

高堂尊 張宏

黃鼎楫 父洲

高成齡 謝之洪 李之果

楊國聲 子鉉 兄芳聲

石曰琮

舒成龍

第三十一卷

賢能四

和氏璽 杜霽遠

成泰慎

猶子壇坦

張丙厚

從弟棠

棠曾孫六奇

樸五世孫臻

賈樸

趙延珍

馬輝

尹烈

汪與恒

子欵

袁璣

張晉

曾孫灼

李兆齡

子渭

渭子經芳

李厚望

子源

源從子槐蔭

賈懋實

魏壯

從弟觀

魏嶸

父體仁

馮仲焄

趙尙友

芮復傳

曾祖昌齡

朱一鳳

周人龍

申程章

王坦

龍霈 劉拯

陳惠榮

陳洪範

黃鉅

祖得煇

李法顏

父鄒 蘇廷瑞 曹大元

紀邁宜

刁承祖

劉士銘

第三十二卷

賢能五

石鑑

李蘭

姜順龍

弟順蛟

邊大父

王枚士

父采 子詢

袁履恕

高第

郭兆夢

朱宏仁

李元昇 劉義和

季崇楷

張丕亨

崔國棟 龐光耀

劉濤

賈多男

李翔麟

魏元樞

鄭之鐘

張澤仁

張華年

張敏

衛封濟

朱文炳

子堂

垣

堂子錫彤

錫爵

張冲之

左基

杜適文

谷確

金鎔

子克誠

項士鉉

梁彬

子濟生

蘭生

何允紳

盧純嘏

族人經

李永清

徐觀孫

子如源

李學禮

李鎬

鎬弟鏞

李光謙

張惟寅

閻公銑

高宮璽

董鵬翔

崔銓

周禮

王發桂

紀晉

子淑曾

第三十三卷

賢能六

邊方泰

田耕可

解秉智

戈源

荆有慶

父果 徐永年

鄭恂

吳沂

子茂楠

邊思訥

族人象曾

劉瑋

曾祖漢儒 楊鶴年

鹿荃

子嗣宗 孫傳先 曾孫海理

鄭國棟

崔維允

李會觀

舒其紳

張方理

姚逢年

葉世經

王元亮

葉汝蘭

弟汝芝 孫圭書

韓湯衡

趙徽

李學沆

父錫朋 李維本 朱文鼎

張琴

常發祥

張丙震

葉治

曹世俊

張同堂

楊燕緒

齊紹甲

范逢恩

劉廷楠

余堂

張樹之

姚大謙

楊迦懌

張世昌

父重光

弟世彥

馬學賜

王殊渥

朱爾漢

步毓巖 子際桐

林天培 子寅官

第三十四卷

賢能七

紀樹森

齊正訓 兄正誼

魏煜 李際春

焦景新

王有慶

李大謨 周鍾泰

張志廉

張志詠

陳柱

崔偲

四世祖福蘊

張恪

子雲龍 馮國楨

徐連

祖楨芝 楨芝子士焜

李培緒

徐城

高祖孫森 祖汝槐 父輝 孫思穆 曾孫嘉猷
嘉禾 嘉柔 姪大鏞 王樹枏補傳

楊承湛

張鉞

周景巖

高守貴

王聯陞

靳廷鈺

孫述庭 劉慶元

張昀 曾祖為篋

賀雲舉 父仁聲 兄雲鴻

耿麟 白佩琦

張印塘

康懋敷

蔣敘倫 子慶筭

陳鳳圖

才宇和

趙桐 李登洲

崔光笏 子鍾善

劉清華

崔侗

裘寶鏞

弟寶芳

子德長

裘寶善

王兆松

武汝清

兄澄清

張金管

兄金奏

王璐

第三十五卷

賢能八

楊福五

吳惠元

父景周

王政令

劉毅萬

王肇謙
祖錫培

劉其年

袁開第
父詵

李吉言
弟審言

王繼庭

劉毓珊

李長華
父泰

龐際雲
父朋

劉恩濬

席樹馨

賀錫福

郭長清

劉淮年

高思愨

陳世綸

張若陽

劉書翁

全士錡

祁德昌

李待時

李清平

胡景桂

許涵度

陳文駮

秦澍春

張元翰

張銓

第三十六卷

忠義一

宋永譽

李芳徵 袁生芝

崔對

王顯 夏謨 崔燦 張鶚羽 劉璇 趙丕承

馬勝龍

李淳 劉澤厚 胡養素

賈士璋

李承鑛 王任杞 李之實

杜懋哲

張鵬翼 劉湛

郤炳元

王應星 何衡泗 溫可掬 童士勤

胡其俠

天盡忠 姚永燾 竇牙 王國用 劉祿 杜

靳秉璋

利家珍 傅進忠 王嘉楨 賈質 何瑞 曲長桂
趙居申 劉之屏 李雲起 王昌運 張國棟 張國
綏 王存智 郝時言

楊三知

王札

姚廷佐 劉派久

高顯辰

魏榘祥

姪延祉 馬宏儒 馬孔任

劉嗣俊

胡鑣 鑣九世孫良臣 張善繼

趙登舉

王進忠 趙進禮 蔚之煥

李進臣

張國彥 劉士英 李向榮 傅桂芳

李興元

李崇道

張朝臣

王宗武 張之馨

李躍龍

姬登第

陳猛

章倫

周大綸 史謙

第三十七卷

忠義二

孫維龍 羅載堂 常紀 倪鵬 周國衡 李棟綿 許

賈慶檀 吳一鳴 計宏謨 孟臣 酒天培 焦連登 陳傳虞 張奇

董凝川

陳元燮

高舉 金廷勳 金克俊 李鐘

張發祥 張德飛 王武年 武文玉 閃煜龍 傅成明

溫振賢

王鴻儀

李廷煥 弟廷燮

駱六 耿德芳

鹿丕宗 從子傳斌 石均

史鵠

魏亨遠 劉西園 周鳴鹿

徐埳 朱式璟 田彬 喬書年 金本

金光筋 田履安

李右文 子傑 弟偉文 從弟載文

呂蘭昌

張遇祥 兄遇清

王萬齡

袁懋績

第三十八卷

忠義三

張中寅

盧金第

楊均治

武世昌

甯曾綸

父蘭森

弟曾笏

俞昌烈

劉咸

秦虎翼

常奇珍

李信

張鳳春

陶景武

彭天相

穆大本

張秉銳

葉濟英

劉東書

鄭沅

平源

谷景昌

谷杏林

馬鳳起

楊嘉運

楊士箴

王其昌

蔡中和

王順曾

高學易

馬長欽

王保庸

黑珍

杜階平 李鳳鳴

王德潤 楊德

王永 趙雲芳

郭鵬彪 馬翰忠

彩呈瑞 路綬若

張振

威 何瀛 潘俊三

潘佐廷 于燦

趙際清

趙雲漢

王廷瑞

劉心台

袁名懿

鄭倬

王泰州

張保忠

任式坊

李蔚然

王為霖

孫清臣等

張耀

李書城

王化遠

謝振興

馬曰駮

李郁

宋遵信

魏遇仙

倪雲鶴

白含章

馬步衢

陳永春

陳成烈

于壯圖 朱思榜

馬奇峯 劉日尊

周彬 常純

滕懋德

張秉廉

張昌茂

耿桂林 張寶庫

薛天然

孟樹勳

王國珍

張永年

王廷相 譚昌祺

王燮

第三十九卷

孝友一

管德升 王廷輔 王之楨

李顯名

智懷行

齊應選

趙明徵

王昭 何泰昌

高桂 孟良弼 于清元

張一躍 蔡毓秀

王公擢

魏繼樓

李含春

田大祿

子永隆

張士標

魏思明

劉潤

邢琰

王銘 張鑿

曹化洽

高國棟

王三錫

劉甘蕙

郭雲城

陳光亨

曹廣攄

趙植

蕭鵬起

陳心正

心正子秉信

崔士瞻

曾孫恂

張燧

彭度華

陳貺

曹永藻

溫熙之

韓泰夫

張孝子

韓溥 桂

王傑

王福徵

劉潛

苑梅陶

劉連

蔣爾恂

劉克家

耿之翰

路開泰

王又曾

陳倬

郭化遠

劉廷訓

柳枝楊

趙燧

劉德瀆

袁砥

李浚

謝開先

劉漢儒

劉公舉

父聖俞

溫得之

王懋桂

徐兆極

子恒光

王調元

段思齊

王之翰

王慎德

孫文安

強琪裴

浚弟濬

張可久 魏三元

吳仲廣 弟仲大 祥瑞

司世教

劉澤厚

趙萬麟 賈錫穎 李遇奇

陳廉 高文友

張咸 趙秉謙 劉叔茂

王之俊 崔生 荀殿臣 劉印永

高裔

趙巡

李桐

劉復作

賈廷輔

趙越

賈其仁

康收

梁夢熊

宋時化

宋時正

趙方頤

王潔

張義

郝元功

曹允正

李良輔

劉復燦

任培元

路允升

趙昇

司鴻銓

崔渭源

李成龍

李長白

李琬

第四十卷

孝友二

邵泰

趙允澍

弟允涵

王偉

戴珩

子三聘

李崑來

弟欽來

王孫錫

子作肅

李簡望

李雍熙

王榮紳

馮中存

王景功

張荏 弟蓀

商克勤

韓仁 趙瓚 董景龍 趙乙 陳琪

賈鉉 子澎

張浩 任足兒 閻斌 李清泰

艾子誠 任足兒 閻斌 李清泰

呂元龍

王書吉 鄭聚江

繆文璧 韓大佩 李永凝 孫廷欽 齊錦 劉之權

張創基

谷凌岱

于忠賢 宋立邦

趙嘉言 尙欽周

朱光觀 王澤溥

齊如奎 王書芸

魏文通

孫履隨

宋大成 曾好明

段金墀 兄金甌

徐樂兒 洪世祿

俞奎垣

崔增福

侯念祖

張升堂

劉如式

潘祖望

張承緒

雷林

劉瑛

康華國

曹紹遠

譚玉潔

李文玉

薛有信

任騎馬

馬傑

王定枚

劉世芳

王策

傅傳習

鄧人玉

徐嘉賓

王樹枏補傳

趙基復

孟昭祿

劉世洪

王貴保

李重林

劉華祝

晁萬嶺

郭永

劉永生

趙魁升

韓燿

陳金杰

呂登魁

鄭金鐘

胡柄泰

目錄

四

王紹義

席黑子

臧廷魁

曹亨

楊慎初

郭允中

愬初 李成慶 李國柱

目錄終

名臣傳一

大清畿輔先哲傳弟一

天津徐世昌撰

王崇簡

王崇簡字敬哉宛平人父愛明萬歷進士官陝西布政使以清節著初任潞安府推官人稱曰王青天但飲潞安水耳無子以兄爵仲子爲後卽崇簡也崇簡早孤嗣母張督之成立善屬文少爲諸生有聲國子監司業張鼎提學左光斗素名知人見其文輒歎曰此公輔器也年三十六舉於鄉負海內重望爲清流所推登崇禎十六年進士甲申三月京師破值生母焦喪給假治葬在外遂避難奔金陵轉徙吳越間清朝定鼎始間道歸里世祖廣求文學耆宿以充館選順天學政曹溶首薦之補選庶常擢祕書院檢討歷侍讀學士遷詹事府少詹事以疾請告順治十二年刑部右

侍郎戴明說薦其才可大用特旨起補原官兼宏文院侍講學士
尋遷國史院學士時子熙亦官宏文院學士 上以父子不可同
列因擢崇簡爲禮部侍郎升尙書加太子太保崇簡幼時卽肆力
於學日誦記數千言自經史諸子百氏無不貫穿每考論古今治
亂興廢之故輒慨然有志當世益務爲經濟有用之術在宏文院
詔察明季殉難諸臣始末崇簡疏言內外死事者如東閣大學士
范景文山西巡撫都御史蔡懋德等三十八人皆得贈諡在禮部
會御史乞更定帝王廟祀典疏言廟創自前明迄於本朝皆祀從
來開創帝王今宜並祀守成令主因列舉商中宗高宗周成王康
王漢文帝宋仁宗明孝宗七君宜百世祀不當以守成見格又言
宋臣潘美張浚皆當罷祀詔從其言又議祭禮疏言宣 肇 興
景 顯四祖及 太祖南向 太宗東向議大享殿合祀禮疏言本朝所

封啓運山宜附中岳壇天柱隆業二山宜附北岳壇如前明附祀
例有建議請祀周公於孔子廟者疏斥其非言周公制作前代比
諸帝王今旣配享武王於廟禮數隆重若復祀諸文廟之中於體
爲褻非尊崇之意也議者謂北岳恆山立廟曲陽非是崇簡以先
儒言考之曰按曲陽有三地理志上曲陽屬常山郡在恆山北谷
下曲陽屬鉅鹿郡鼓聚少陽亭晉荀吳滅鼓其處也今之曲陽旣
非鼓聚又不在北谷距恆山絕遠昔趙宋時北岳不在境內以真
定在汴京之北故移置曲陽今天下一統宜從議者移祀渾源州
得禮之宜是時天下大定朝野乂安天子銳意創興禮樂崇簡學
問淹洽爲上所委任又身居禮官之長一切制度沿革必皆援
古證今侃侃建白雖或廷議糾紛亦皆俟一言以決由是眷注日
厚子熙以禮部尙書大拜父子登保傳位極人臣蓋二三十年所

未有也崇簡初值喪亂本無意當世用遭遇世祖以文學被知感
激思奮自以父子竝列六卿日以盛滿爲憂因夙疾屢疏乞罷優
詔不許會世祖升遐日治大行喪及聖祖登極禮勞劇疾益甚
再疏請告得允越三載遂引年致仕春秋纔六十有三然歸老在
家朝廷有大政士大夫疑不能決者皆就而取正焉崇簡盛名滿
天下凡四方人士至都者以不及見爲恥客到門投謁必相與握
手款曲人人色喜謂王先生親我諸所獎借其後率皆成名性清
慎不苟於財嘗貸前明中貴人何某金百兩何死於盜無所歸金
遂舍諸僧寺且設位爲文以告曰吾用資故人冥福有同年生宋
某者寓赤金百白金千兩其家不知也宋沒促其子至如數與之
其子大驚願以半爲壽笑曰如是則與乾沒異乎悉予之平居
無聲色博弈之尙晚歲益嗜澹泊惟潛心先儒義理之說以躬行

心得爲主與諸儒論難不強爲異同及其發之於文原原本本下筆輒千言而悉根柢六經其論文曰爲文必本於道道不出尋常日用之間自世有學道之名道遂日弊又曰學莫要於自得知之非艱行之維艱知而能行此聖賢所以幾於得也其論詩風雅正變則謂論正變以體不若論之以聲蓋體由聲而定也三代以上詩與樂出於一古人以聲詩奏之樂是故詩之本在聲孔子刪詩得其聲則存不得其聲則不存或謂詩有正變聲何以有正變不知宮商角徵羽正七變宮變徵皆變也後儒補六笙詩又補肆夏詩皆未達乎聲之義者也論春王正月則謂春秋爲孔子尊王之作因魯史之文遵周代之制概乎無可疑者使以夏時冠周月是倍王非尊王也是故孔子所書春者卽周之春所書正月卽周之正月也其議論平正皆有裨於學者其碑銘表傳之文尤見重當

世子若孫欲榮祖父者往往數千里來求其辭皆典核有則著有青箱堂文集三十三卷詩集三十三卷家譜年譜各一卷雜著述若干卷詩集以編年爲次始天啓丙寅迄清康熙戊午爲萊陽宋琬所刪定琬與崇簡早善嘗推之曰居衰亂之季有初盛之風海內之平兆於子矣年七十尤嗜學不倦欲依古人以每歲盡讀五經爲夏課宅居大市西庭宇肅穆階前築臺方丈餘夏秋日暮父子兄弟六七人率坐臺上或莊論詩書或稱述祖父遺事旁及故舊家世之盛衰以爲勸誡冬則篝燈擁爐呶唔不輟筆之爲冬夜語兒箋記時人方之顏氏家訓晚年工畫山水有王右丞米南宮逸致優游林下凡十五年康熙十七年卒年七十有七朝廷震悼特命諸王大臣皆往奠酒敕給祭葬如例賜諡文貞入祀鄉賢祠妻梁淑慎闡禮法嘗口授論語孝經教其子女崇簡年三十卽請

置側室廣嗣續年三十八而卒崇簡哀思之終身不復娶云

梁清標

從父維樞

梁清標字玉立號蕉林又號蒼巖正定人從父維樞字慎可明尚書夢龍孫萬厯閒舉人師事趙南星南星嘗曰風雅不墜見之梁生矣既從楊漣遊會逆奄起詔獄南星首被禍維樞傾身翼之楊漣銀鐺道出正定維樞往迓之大言檻車之旁曰公此行垂名竹帛夫何憾哉時邏卒竊立人咸危之維樞灑然不顧也尋授內閣中書遷戶部主事以黨論削籍清興起爲工部郎擢武德兵備道絕苞苴恤徭役武德多巨盜難猝治維樞練營卒嚴法令境內肅然乞養歸卒祀鄉賢著有玉劍尊聞姓譜日牋內閣小識見君子日牋諸書維樞爲人忼慨軒豁少好畋獵聲酒馳逐燕趙之郊其後折節讀書工爲詩古文詞其撰玉劍尊聞也謂自元以來數百

年閒雅言韻事幾同星鳳凡所聞見依劉義慶世說新語分部記之凡三十四類而自爲之注錢謙益謂其善師臨川寓史家於說部吳偉業亦謂一書之成於世不爲無助各宜愛惜其所聞則維樞於有明一代軼聞瑣事多所記載亦考文徵獻者所取資也清標生而穎異讀書日數行俱下擗管成文飈發泉湧年十四補明諸生崇禎十五年領鄉薦明年成進士授翰林院庶吉士清順治元年補原官尋授編修累遷禮部侍郎畿輔饑上分遣重臣往振清標巡歷保定所屬諸州縣還奏稱旨調吏部侍郎詔陳政事得失疏言民生休戚繫乎牧令請令督撫重視州縣官勿使疲於趨承得以便宜興利除害無或掣肘臺臣職居言路舊有部郎改授之例宜令各部堂官擇端方讜直者與卓薦州縣各官一體考選吏部掌人材進退宜於選功二司設記功記過二簿於序班升

遷中仍分別察核以昭懲勸至山林隱逸之士屢奉詔薦舉未有
應者宜令九卿禮聘至京召見咨訪以收旁求實用 上矚其言
以本生母喪歸十三年補授兵部尙書時蒙古諸部長來朝 上
目清標謂之曰此朕新用兵部尙書也知遇之隆如此江南提督
馬逢知素桀驁所在不法 上令陞見逢知念故事當赴兵部行
跪拜禮乃託所知浼清標求免清標面叱不少假借逢知氣折 上
聞之謂侍臣曰梁尙書不愧大臣矩度時有武林斥生誣逆首案
清標訊得實無辜者多獲保全康熙三年輔臣以選人壅滯議停
科目清標力爭不可卒得不罷人謂其能持大體云五年改禮部
京察罷職八年輔政大臣鰲拜獲罪詔復官以刑部尙書起用改
戶部充經筵講官十九年因星變陳言奏免秦中運糧入川二十
一年夏旱 上問弭災之方以省刑對尋兼兵部尙書事拜保和殿

大學士卒年七十二祀鄉賢清標雍容閒雅宏獎風流一時賢士大夫皆遊其門每退直日抱芸編黃閣青燈互相酬唱蒐藏金石文字書畫鼎彝之屬甲海內領袖詞林數十年歸然爲鉅人長德教子弟家法醇謹雖步履折旋進退必合規矩稗官野史一不使寓目然必使涉獵詩詞曰所以發其興觀羣怨俾識古人美人香草之意有所寄託也清標之詩枕藉經史不以一家名莊而不佻麗而有則其作於明季者多感慨諷刺之言及入清朝則颯颯春容之音爲臺閣中鉅手尤工倚聲論者比之吳偉業著有蕉林詩文集棠村詞棠村隨筆及樂府諸書

劉武元

劉武元字鎮藩宛平人初官甲喇章京拜刑部侍郎以病免世祖入都以天津爲京左要衝起爲參政備兵尋擢右副都御史巡撫

江西提督金聲桓與副將王得仁以南昌叛全省響應兩粵八閩皆遙爲聲援賴以孤城介處其間將士觀望計向背莫知所屬武元張筵召諸將飲問戰守策皆默然武元手卮酒顧諸將曰君臣之誼順逆之關請決於今日諸君願效死者盡此卮不爾斷予首以示賊毋顧慮也聲與淚俱眾感泣爭前飲酒因共歃血誓死守賊眾號二十萬武元開門迎戰而部將徐啓仁遽降賊賊乘勢圍城百計攻之不能下凡三閱月糧盡援絕武元悉出家財竝脫妻簪珥享士約背城一戰士卒皆感激大呼赴敵鏖戰竟日無不當百者賊大敗退屯東山設計誘我兵空城出而設伏以襲之武元知其謀選銳卒百人持炬而前伏果起武元以勁兵繼進夾擊之賊敗奔逐北四十餘里斬獲焚溺無算棄甲械與山齊城圍立解時粵賊李成棟謀取贛助聲桓糾眾十餘萬水陸竝進鋒銳甚

武元先馳兵數百與之戰入夜縋城出敢死士襲賊壘連劫十餘寨武元親以大隊乘之賊大潰成棟跳免事聞上嘉其績遣近臣持手詔慰勞之賜賚甚厚晉兵部尙書成棟圖再舉武元統滿漢兵下信豐大破之斬成棟以徇後以恢復廣東功加太子太保積勞致疾前後七疏乞歸家居六月而卒贈少保賜祭葬如例諡曰明靖

成克鞏 弟克大 子亮 光

成克鞏字子固號青壇大名人明大學士基命第三子幼穎敏八歲讀書能辨塾師解朱絃之誤年十三受知督學使者左光斗期以公輔器崇禎十六年成進士改翰林院庶吉士國變後避亂家居順治二年左庶子李若琳啓薦故明詞臣克鞏與陳具慶韓四維林增志高爾儼張懸錫同錄用授國史院檢討典試江南三年

主武會試五年擢祕書院侍讀學士旋遷內翰林宏文院學士九年副學士胡統虞主會試所取第一名程可則文悖經註克鞏力爭不得不署評既被吏議或勸以無評自解則曰業同事不可獨擠人也遂同鑄級未幾領戶兵二部兼理刑部事會都御史員缺特命克鞏攝理克鞏感激知無不言首上修省一疏繼劾舊憲臣徇庇匪人請撤回滿漢不任職者世祖以克鞏名臣子少參機務練達政體數召對稱旨柄用不次度越資俸在前者凡十餘人十年擢吏部右侍郎大學士陳名夏等會議總兵任珍罪與九卿異議敕回奏疏上克鞏未列名部議革職詔寬免四月上試翰林轉左侍郎越十四日擢尙書克鞏奏陳部務三事一課司官職掌之法吏部四司分省設官原以諮訪本省官評也請令各司人管一簿詳註其省之各官賢否復參之撫按舉劾以備要缺推選一

立督撫考成之法外吏大計京員考察皆以三年分別去留惟督撫向無考成請令直省督撫將列任事跡詳陳御覽以消弭盜賊開墾荒田清理錢糧糾除貪悍四者照例考成以示賞罰一選煩劇有司之法今文選推升人不分資格缺不分上中概從籤掣但地方繁簡衝僻不同如江南蘇松等郡有司官多以逋賦降革恐積弊之區非初任邑令所能振刷請取卓異官或升或調通融補授行之有效卽加優擢而於選法亦無礙焉章下所司行之晉內翰林祕書院大學士與馮銓陳名夏諫廢后事又嘗與馮銓舉原任御史郝浴才旣浴巡按四川密陳吳三桂不法諸事三桂劾其虛誑冒功浴逮治克鞏降二級留任十二年予復原職加太子太保四月充纂修 太祖 太宗聖訓總裁攝都察院左都御史十三年奏陳時政其略曰用人爲治平之急務而大僚尤重今通政使李

曰芳甘肅巡撫周文葉陝西巡撫陳極新皆衰老昏庸亟當更易至財用之困乏宜定丈量編審之期學校之冒濫宜嚴考貢入學之額河工之報銷宜杜虛捏侵欺之弊任樞密者遇封疆失事不得借行查以滋推諉司刑憲者於棍徒詐害不得寬反坐以長刁風凡此數事皆諸臣所當振刷精神以圖實政者也 上是其言時給事中孫光祀劾奏左通政吳達爲叛逆吳達兄下法司勘擬克鞏奏吳達與憲臣龔鼎孳同鄉同官徇隱不爲舉發鼎孳坐奪俸十四年直講筵詔命內臣偕畫工就邸舍圖其像屆秋試克鞏深悉科場弊進朝士與分校者諄諄告誡又飭其子弟不得躁於進取後闈獄起不用其言者皆罹於法而克鞏子弟無可捃摭者上乃益善之明年加少保改保和殿大學士兼戶部尙書又明年加少傅兼太子太傅以盛滿求退溫旨慰留其居常 上或中夜出

片紙作國書密詢時事克鞏亦入片紙占對雖家人子弟不聞所言其緝密如此十七年遵例自陳乞罷不許以布政參議道李昌祚與揚州叛黨同名不舉被劾議革職詔從寬免罪仍留大學士原任十八年主會試克鞏屢持文衡前後所得士如湯斌張永祺沈荃李來泰馬世俊唐德亮張玉書米漢雯許三禮嚴我斯皆一時名士多所建樹爲世名臣而郭士望梁化鳳亦以忠節武功著及與滿大學士巴哈納額色黑同輔政諸大典禮文準古酌今盡出其手十月以繼母疾請假弗許是年改殿閣仍爲內三院用原銜兼內國史院大學士康熙元年調內祕書院大學士二年以病乞休命解任調理遂回籍克鞏篤天倫十歲喪母執禮如成人父喪廬墓三年舊第有素園在城東南隅旣致仕重加葺治其中雲石堂八風亭攬秀集雲樓柳塘靜舫諸勝水木清麗嘗繪素園圖

同時題詠傳爲雅談又築學臺旦夕讀書摩研編削輯有倫史
一書按五倫分門各有子目君臣爲數四十五父子爲數二十二
夫婦爲數十一兄弟爲數十六朋友爲數三十三凡五十卷自告
歸後歷十有四年而成其采摭可謂勤矣二十六年聞太皇太后
哀詔興疾赴闕歸又四年卒年八十有四子祭葬如例祀鄉賢著
有清慎堂集四十四卷弟克大子亮光克大字子來基命第十一
子順治十七年舉人性激烈齟齬不合於時弱齡喪父以母老不
仕終養後始授內閣中書遷戶部主事擢員外郎時黔粵軍務興
度支數倍他司克大練達精密處之裕如會創設粵海關克大奉
命監督廣東香山澳門舊爲西人所居聞克大至整隊來迎槍械
森列克大宣上恩威皆懾服尋升郎中授貴州鎮遠知府鎮遠值
兵患後民億財殫苗人雜處克大招集流亡興學校禁姦宄政績

卓然郡人爲屏山遺愛碑紀其事克大好爲詩歌兼善顏真卿書法以兄克鞏沒乞歸著有春秋精義及歷遊詩行世卒年六十二亮字寅天號伍嵐幼聰慧年十二以父廕當次及弗就中順治三年舉人六年成進士改翰林院庶吉士八年散館授編修後改補戶部主事生平慷慨有志節甲申之變羣盜蜂起亮侍父避亂猝遇盜持械逼之亮以身翼蔽大呼願代盜懼以刃不爲動乃舍之去康熙二年丁母憂扶櫬歸葬哀毀困頓遂不起卒年四十光字近天號仲謙以父廕受工部員外郎博物洽聞與亮竝知名順治十四年順天鄉試衡文者競拔貴介子弟而克鞏居政府戒子弟勿躁進故光獨刊落世祖召見海子深加諭勉解所御貂裘賜之曰好讀書不失作翰林時年十五退作賜裘詩紀之康熙十六年以部郎巡視河南十八年升刑部郎中明年出爲武昌守道時妖

人朱方巨以術傾一時所過督撫以下咸謁拜如弟子光獨不爲禮其徒李晴子挾其術橫行鄉里官刑不能施光立斃之嗣丁父憂解官三十三年起湖南驛鹽糧道光舊游湖湘洞知漕政積弊立兌漕法及期行兌丁民俱稱便戶部尙書趙申喬撫湖南深器重之彬州人王體巨聚眾山中所爲不法光密使人入亂山計誘體巨至長沙決杖死陳丹書叛偵知之返自茶陵嚴備以禦紅苗之役大臣視師楚黔粵三省連師會剿軍事皆光督理三署按察使一署布政使均著勞績四十六年致仕性純孝事親盡色養居喪哀毀逾禮平生方正自持治家嚴肅工書善射亦喜作畫淡遠入逸品精賞鑒收藏綦富所著有素園詩集卒年七十五

杜立德

子恭俊

杜立德字純一號敬修寶坻人明崇禎十六年進士順治二年以

順天巡撫宋權薦授內閣中書考選兵科給事中時天下初定上
欲減租賦興文學與天下更始而法制未立兵繇數起吏或因緣
爲姦立德次第條舉首陳治平之道有三曰敬天曰法古曰愛人
人君爲天之子當修省以迓天庥今秦晉燕畿水旱風雹天心示
警凡開誠布公懋德敦行皆敬天事也古者事之鑑也是非定於
一時法則昭於百代故合經而後能權遵法而後能創凡建學明
倫立綱陳紀皆法古也自大臣以至百姓皆宜一視同仁棄短取
長無分新舊凡親賢納諫尙德緩刑皆愛人事也疏人上嘉納之
又言牧民之官數月遷轉則悠忽之念起推諉之路開宜久任以
驗成功於三年大計時分別糾劾俾銳者就繩懦者知奮又言荒
地以闢勘爲憑亡丁以審編爲據乃審勘動逾數月駁查又復經
年輾轉濡遲吏胥從而中飽故上有蠲賦之實而下不受蠲賦之

恩者弊率由此請自今蠲荒之數分疏款項預行頒示庶窮鄉小民咸喻上指又言條編之法簡易便民近因軍興旁午草豆未有一定額往往取辦臨時徒飽姦吏之橐請敕部酌定價值使民先事爲備疏並下部議行三年轉兵科右給事中四年遷吏科左給事中再轉戶科都給事中六年疏陳漕弊言漕臣庫禮搜獲運官使費册三十本送部其中所費皆東南數百萬赤子脂膏供貪墨者之魚肉請按款察究從之七年轉吏科八年正月疏請舉行經筵擇廷臣經明行修者授爲講官又請定朝期於朔望行大朝之禮使羣臣得以陛見陳所欲言若進見稀闕則上下之情不通且非臣子尊王之義其言愷切均蒙嘉納初睿親王多爾袞攝政給事中許作梅御史吳達李森先桑芸等交章劾大學士馮銓姦狀疏上旬日未下廷議立德疏請令滿漢大臣集議以伸公論且言馬

士英阮大鍼宋企郊等納賄招權煽惡流毒急宜捕誅以彰法紀
疏下刑部以事在赦前屢其議及聖祖親政黜馮銓立德因言許
作梅吳達李森先桑芸及僉都御史趙開心皆銓所構陷去官乞
矜察於是開心等皆起用九年遷太常寺少卿十年擢工部右侍
郎六月調兵部左侍郎十一年二月畿輔水災奉詔分振大名全
活者眾四月調吏部右侍郎七月丁父憂會以前任兵部時逃人
案鐫秩一級服闋補太僕寺卿尋轉大理寺卿疏言熱審之制請
令刑部按道路遠近預爲通飭舉行得旨如所請十四年六月擢
刑部右侍郎八月轉左侍郎十六年加太子少保銜九月遷刑部
尙書立德斷獄仁恕凡讞重辟屢易稿而後定吏讞或不當輒卻
其獄卽當受而著讞法必求其可生之路得則退有喜色不得則
日中不出署抵暮歸或竟忘食及條奏時恆引輕比上請上嘉其

用法平多從輕如所奏嘗入對既出 上顧左右曰爾等識此人
乎此新授刑部尙書杜立德也不貪一錢亦不妄殺一人其獲上
若此康熙元年調戶部立德稔知錢穀出入盈縮及吏侵牟狀於
是奏請各部寺錢糧歸戶部考成一切皆自訾省吏但坐曹行文
書不得爲姦公私稱便二年加太子太保三年調吏部尙書丙午
丁未之間銓選多變更立德秉法不撓均平酌劑銓政以肅八年
拜國史院大學士明年改內三院爲內閣授保和殿大學士兼禮
部尙書晉太子太傅時 上初親政立德竭誠奉公恪守先帝成
憲凡關國計民生殫心獻納遇事持大體 上嘗諭左右閣臣如
杜立德真不愧古大臣也甲寅以後三藩相繼煽亂於時廟堂之
上命將出師常決計於俄頃之際或密授方略或宣諭招徠贊策
草制責之閣臣立德之力居多而從容整暇不見喜愠之色故數

年閒羽書旁午而中外人心晏然若處無事十七年春上方振興文教命羣臣引薦文學之士備顧問立德舉名宿曹溶法若真施閏章等八人以應一日上顧閣臣謂在廷諸臣誰堪大用者立德卽面疏數人比退或訝其不少引嫌對曰自筮仕以來惟此心不欺可邀聖鑒他非所計也居相位十餘年恩禮優渥凡國家大典禮政事多屬釐定若詔修玉牒及太祖太宗聖訓世祖實錄皆以立德充總裁官又持節冊立中宮恭題仁孝皇帝孝昭皇后兩神主相眎山陵以及清理刑獄測驗歷法無一不與前後賜賞御書卷軸白金鞍馬黑狐紫貂嘉魚茶酒蓮藕上方諸珍物不可勝計嘗賜宴內廷特命列坐殿內漢大學士入殿坐自立德始也十八年自陳請罷秋地震復請罷皆溫旨慰留二十年冬構疾不能視事會瀆逆平上思加惠四海議頒恩赦以立德卧病不與議

特命近臣持詔款抵第問所增益二十一年正月上以武功耆定
宴廷臣於內殿賦柏梁體詩因立德未預宴特遣中使賚酒饌賜
之是年夏復乞休得旨允其致仕御製送行詩一章墨刻二冊御
書唐詩二軸及怡情洛社篆章以賜復遣行人馳驛護送人咸榮
之太宗實錄告成晉太子太師二十六年十二月太皇太后崩星
馳哭臨上以立德老病不任拜起命掌院學士張英掖之以行
賜御茗文綺以示寵眷三十年六月卒於家年八十一上聞震悼
賜祭加等爲二壇飭所司治葬事謚文端立德爲人慈和恭謹恂
恂寡言及當大事決大疑則毅然不可奪居諫垣彈劾不避權貴
凡所陳奏退削其藁雖子弟鮮知者歷官三部練習朝章遇事援
據掌故兼集眾長期於允當常曰我待罪都官數年不能自必無
過見得一分盡我一分職耳有旗人王某匿妻子於前妻父張某

家王潛逃適里中有投井者面目不可辨其妻誣張謀死其夫讞成抵罪上之秋曹立德檢獄牘見單填鬚長三寸而王逃牌無鬚頗疑之衆持不可亡何其主捕王到同官驚服又淮關鹽商虧課四十餘萬巡鹽使題請緩徵意在乾沒下部議懼立德持不可包門下客以千金壽立德曰吾俸餼足以自給忍置國家如許金錢而得巨貲肥已耶力主三年帶徵議乾清宮告成擇日臨御欽天監奏言吉神在某方不宜從中門入立德曰皇上遷正新宮自宜從中門入且帝星所在卽爲吉神欽天監妄奏非是吳三桂之亂賊將據兩川欽天監奏土星入於井上問閣臣立德對曰井鬼屬在蜀分土入於井蓋土克水之象兩川之平必矣逾月果捷至時渠魁俘京上命諸王貝勒滿漢大臣及九列公議逆罪久未定立德奏曰此輩重負國宜置重典不宜曲宥粵東反正所司具

正賦雜稅之數以聞立德奏曰廣東雜稅多係尙之信所加爲民間大累非朝廷正額 皇上富有四海何需此區區數萬金錢今兩粵變亂甫定正宜與民休息臣請除之便又請追逆商所領叛本四十萬免生事海疆諸所奏對 上皆從之順治丙戌典試浙江康熙甲辰典會試皆號得人癸丑再典會試時韓葵卷已遭黜落立德搜遺卷獲之大激賞執筆就批抹處改千里來龍四字遂定首選人至今稱之立德廣額修眉聲若洪鐘性坦平好汲引善類雖布衣下位無生平之雅者有一長必爲稱引里居課子弟讀書立身行已而不令與寒峻爭功名所作詩文規圓矩折恂恂皆仁者言初官京師有無賴子偶與驕卒鬪乘醉隨輿後詈之立德若不聞無賴子歸酒旣醒或告以昨辱宰相事倉皇詣第謝罪立德慰遣之予一金令改行其德器寬大若此三十九年 上南巡其子

恭俊迎駕三河 上詢知故相子甚喜竝問立德葬所御書永言
惟舊四字賜之揭諸阡恭俊以恩廕授工刑兩部司曹綜核詳審
補刑部督捕司郎中勘逃緝諸案多所保全出知廣信府未幾卒
恭俊好義喜濟人急邑人陳某欠官糧三百金將鬻其女捐金代
償而竝嫁其女父子竝祀鄉賢

王景祚

王景祚字振公號迂叟文安人其五世祖所謂王孝子原者也父
守明以德行舉鄉飲大賓景祚順治三年進士授山西太原府推
官太原省會地事繁劇前任以不職罷去案牘充棟景祚以旬日
了之巡撫祝世昌大喜凡府省大案及文武薦覈皆決於景祚姜
壤叛大同人心恟懼一日數警世昌以景祚攝盜武道以扼其吭
景祚疾驅未至城已爲賊據卽馳歸議城守而賊騎數十萬連營

結寨進偪太原景祚從容畫計神氣殊閒雅會有蒙古兵防邊撤
回途經太原頌供頓以部牌至景祚笑曰破賊之策在是矣舊例
兵馬不入城景祚與撫軍議以計留之不可得景祚奮袂進曰賊
騎臨城人心危懼公爲大將見賊不討而欲倡逃乎大軍一動勢
必奔潰失地之罪將有攸歸將軍曰非我職奈何景祚曰人臣之
職誅逆是也誠撲逆賊安全境土下拯赤子之難而上不貽君父
之憂此將軍之所以盡職也將軍遂出師景祚介冑以從與賊戰
於晉祠西大破之斬首數萬追奔數十里拔其所據城將軍將以
軍法屠之景祚跪而請曰變肇於逆民脇從耳活此數萬人皆將
軍賜遂止已而王師西下汾水暴漲議爲橋濟師檄太原榆次兩
邑宰皆辭以水勢洶涌撫軍目之曰以此累君景祚設方略爲之
橋成而師濟賊平治其黨所連引幾數百家下景祚鞠之多平反

甯武饑人相食景祚發倉儲數千石不暇請曰活此數萬之命罷予一人之官且甘心焉事聞撫軍大喜疏奏之報曰可當是時景祚名震三晉兩院皆薦爲第一九年內擢授廣東道監察御史巡視西城所言皆國計民生諸大事明年奉命巡湖北屬吏有不飭者聞風改操西山賊出掠官軍追之獲婦女數千口景祚勒令放還軍無一人明年補山東左參議備兵東兗榆園盜起山東河南直隸三省會勦無功標將孫維統沈勇有略景祚專任之授以機宜踰旬斬賊酋以獻隨作弭盜一疏請兵駐防善其後十二年歲大饑直省流人入境丐食各府誠於逃人之禁不敢納景祚曰流民亦吾民也避罍誤而輕人之死何忍耶嚴飭屬吏安集之高唐知州佟彭年首奉令招集數百家餘屬爭相倣效流民乃安十三年以父憂去官十六年起補杭嘉湖道未逾月奉內陞之詔明年遷

太常寺少卿遣祀南嶽轉通政使司右通政尋轉左封駁侃侃正
言無所避康熙六年轉都察院協理院事左僉都御史七年河決
文安疏免濱河地糧尋升奉天府尹至則輯和滿漢軍民各安其
所無閒言先是遷徙人口隸各牛采下景祚特疏請歸州縣遼左
舊不權鹽有豪商叩闕請行下景祚議景祚即日上疏言遼左不
權鹽者實有遠慮一旦創舉恐滋後擾奉旨罷之九年升大理寺
卿寺素名法司而權在部院景祚親閱爰書大案多所駁正一時
權貴斂手風節凜然十一年扈耕藉田以病失儀左遷十四年補
鴻臚寺卿明年春請告回籍年七十卒著有用拙山房稿父子竝
祀鄉賢

魏象樞子學誠

魏象樞字環溪號庸齋蔚州人明崇禎十五年舉人清順治三年

進士選庶吉士明年改刑科給事中骨鯁敢言事尤注意當世人
才賢不肖治術得失民生休戚是是非非必盡意乃止疏言督撫
按聽用之官太雜道府州縣胥隸太濫請清理報可尋劾安徽巡
撫王懷徇庇受賄罷之五年轉工科右給事中爲民請城南空地
徙居平價請更定會典以明職掌劾山東平陰知縣王國柱違禁
擅磔人七年四月轉刑科左給事中八年世祖親政免天下額
賦罷城工除加派時有以私征侵帑坐罪者上疏極陳其弊請定
藩司會計奏報之法以杜欺隱立內外各官治事之限以清稽帶
請嚴道府縱徇之律請訂考績大典反噬之禁江西左布政劉漢
祚缺賦五十餘萬請敕部察究論如律其最切者請聖躬慎起居
一疏辭逼輔臣大略言聖政維新中外想望治平非同昔日如皇
上近巡京畿輔臣當陪侍扈從以効啓沃之忠倘遠有所幸尤宜

諫止鑾輿以盡保傅之職又因災變陳言謂天地之變乃人事反常所致歷舉近日顛倒旨意輕重綸言諸事語侵權貴尤亟疏下九卿科道議左給事例不與議象樞補陳顛末固以請特命會議象樞面折諸大臣抗爭是非在廷爲側目獨大學士范文程心識之曰此我國家任事臣也其後有搆象樞者輒於衆中剖析之卒得白九年遷吏科都給事中十年大計塞門核冊令兵馬司周廬巡徼綱紀肅然連上四疏言計典其一請復糾拾之舊制言官不宜反坐下所司議著爲令因奏白給事中劉捷糾拾被譴寃言官吳拜吳達坐言事論死象樞謂言官進言不實第宜治以考功法惟坐婪贓馮法報怨挾仇乃可下刑部得旨允可論者謂言路堵塞此大關鍵也又請會推督撫宜核事實勿徇虛名請舉勤民大政詳陳民命民情民食民困四端皆報可象樞在吏垣有問職掌

事者則曰條陳參劾二者而已條陳當計利害若目前有利後日有害不宜言也參劾當論平日賢否若素稱賢者偶有微愆不必苛也聞者服其卓論前後疏凡三十餘上其大要崇治本別人才行實惠通民隱皆國家要政忌者日思中傷之會十一年大學士陳名夏得罪言官坐不先事糾發六科之長皆被議象樞降補詹事府主簿屢違旨陳言竝奏定文武官薦舉格式及拯救兵民節目四條遷光祿寺丞十六年以告養歸家居十三年精研理學以躬行實踐爲宗康熙八年丁母憂十一年服闋大學士馮溥特疏薦不起 聖祖再召迺趨朝授貴州道監察御史兼巡視北城疏言教化爲王道所先請滿漢臣僚敦家教以廣盛化治河繫國家根本請蓄任使人才以補救漕儲請戒淫巧輯禮書以正人心定民志請甄別考察以操守清廉爲上等請增俸以養廉改罰俸爲

記過請禁正月開征以昭萬世法守請畿輔設總督兼轄滿漢兵
民湖廣藩司劉顯貴虧帑九萬七千有奇撫臣徐化成給事中余
司仁行私曲庇請下所司察治上皆韙其言擢左僉都御史時吳
三桂寇滇蜀天下搖動象樞請申明法紀維繫人心請要地設道
員請緩征楚蜀錢米請秦省食鹽從民便凡所陳奏皆關大計疏
上輒削其藁不以示人十三年二月補順天府尹力薦原任巡按
御史郝浴且曰臣才守學識皆媿不及願以職讓浴後卒起用爲
名臣四月轉大理寺卿七月擢戶部右侍郎十二月升左侍郎一
歲五遷象樞愈自警惕深維大臣以道事君之義疏薦原任布政
使李士禎慶陽道王天鑑候補道鄭端常熟知縣魏允升皆報可
會西南用兵上籌餼三疏曰確估值嚴關稅簡藩司上命與侍郎
班迪清查工部盜庫事八閱月歲事科臣王光前請加徵練餼甘

文煥請益人口錢象樞皆力持不可具疏駁止之十五年充武英
殿殿試讀卷官十七年授左都御史首疏申明憲綱十事謂國家
根本在百姓百姓安危在督撫督撫廉則物阜民安督撫貪則民
窮財盡願諸臣爲百姓留膏血爲國家培元氣臣不敢不爲朝廷
正紀綱爲臣子勵名節 上嘉其切中時弊立予施行會徵博學
鴻儒象樞舉原任布政使畢振姬嶺北道湯斌糧道王紫綬員外
郎馮雲驤評事白夢鼐時嘉定知縣陸隴其以盜案落職請白其
冤鎮江知府劉鼎溺職無狀絳州知州曹廷俞貪酷厲民請糾其
罪磨勘順天鄉試卷陳科場八弊請設內簾監試御史陳學政六
弊請據爲三年考覈之實廷議竝著爲令舉學臣之賢者曰邵嘉
勞之辨劾其劣者曰盧元培程汝璞汝璞已經浙江巡撫保擢京
堂遂臚其罪狀竝劾督撫欺罔請論罪如律中外肅然一日奏事

畢 上命近臣捧御書詩卷一清勤慎大字三格物大字二賜之且
 曰爾居官不愧此故有此賜他日復賜紫貂皮領因面諭曰今年
 暫著明年且別製為卿換之十八年特授刑部尚書象樞請援漢
 臣汲黯自請為郎故事得拾遺補闕願辭司寇職留御史臺激濁
 揚清為 皇上振肅綱紀 上嘉之加刑部尚書銜留任於是一日
 具三疏劾權稅蕪關主事劉源山西巡撫王克善請嚴禁火耗私
 派勒索諸弊疏甫入京師地震 上晝夜坐武帳中象樞直入奏曰
 地臣道也臣失職則地反常臣不能肅風紀修職業請先罪臣回
 天變 上召象樞入象樞伏地涕泣請屏左右語移時極言天變
 乃索額圖明珠二相植黨市權排忠引佞以剝烝黎之應及出副
 都御史施維翰迂於後左門見頰悶猶瀆淚痕是日宿帳中語施
 曰今百姓疲困極矣而大臣家益富地方吏剝民媚上督撫司道

專一名臣一

七

L

轉餽政府以市權利又會推動輒徇私將帥無復紀律蠲免錢糧之惠不逮災黎豪右爲姦刑官鬻獄小民愁苦之氣上干天和致召水旱日食星變地震之異可憂可危之事無大於此明日以上六條宣廷臣集議大略如象樞指於是用事大臣皆爲股慄迨後索額圖明珠相繼罷 聖祖始以象樞面對語諭羣臣二相之黜皆象樞首發之也會詔舉循良薦原任侍郎雷虎班廸達哈塔高珩大理寺卿瑚密色侍讀蕭維豫郎中宋文運布政使畢振姬知縣陸隴其張沐皆得旨錄用十九年五月京師苦旱詔求直言疏陳旗民訐告選用司坊官員等事下部議行十一月任刑部尙書明年扈從謁孝陵一慟幾絕賦詩至哀讀者皆感動尋命與吏部侍郎科爾坤巡察畿輔單騎按行墨吏強豪皆屏迹百姓稱快積勞得疾朝夕視事不少休日吾偷安一日罪人待讞者增百苦矣

象樞歷官四十年嘉謨忠議朝章多所手訂與柏鄉魏裔介齊名
有二魏之稱二十三年春奏事乾清門暈踣於地疏乞骸骨溫旨
慰留賜參膏一器人參二斤八月再請上惜其去以詞迫切許馳
驛歸三覲乃行始入賜膳再賜茶三賜御書寒松堂額寵其行象
樞遂自號寒松老人出國門公卿祖帳盈道皆歎息以爲清操勁
節受天子之知可謂至矣然門庭蕭寂圖書數千卷無異秀才時
所增惟綸誥宸章及諫草一囊而已象樞初歸養時築介園花木
蔥蒨奉母朝夕又於寢室東闢地爲家祠中曰世德堂左存澤藏
遺書右授經傳家學其宗廟疏榮塗堊以及概散修屐規制悉遵
家禮立友仁社邑士從游者甚眾講求性理書凡嘉言懿行恆手
自鈔錄與白允謙刁包左光圖孫奇逢魏裔介成性李中孚馮雲
驥湯斌陸隴其諸子稱道義交走書往復辯析義理嘗曰爲大臣

而德不純學不粹。如下僚爲下僚而政不平。刑不中。不如素士
爲素士而理不明。學不正。不如庶民。其論學以修德爲體。以講學
爲用。以徒義改過爲工夫。平生事業悉本於此。順治六年己丑象
樞分校詩五房。取成性等二十三人。時闈中同人各期所拔士。或
云可相。或云可將。或云可秉節鉞。任封疆。象樞獨曰。願得理學任
吾道足矣。榜發。性冠本房。後以理學清介稱。餘官內外無一以貪
敗者。性篤師友。凡沒者必立位。陳酒果哭之。表彰節烈事尤視爲
性命。平生以循理守法安命六字時相箴勸。文章樸直如其爲人。
家居與鄉里同志十人聯詩社。集字爲詩名。蘿山雅會。徜徉泉石。
小飲長謠不一及時事。二十五年卒於家。年七十有一。賜祭葬如
例。謚敏果。著有儒宗錄。知言錄。寒松堂詩文集。雍正八年詔入祀
賢良祠。嘉慶五年仁宗詔求賢良後裔。六世孫煜以寒松堂集進

呈上覽稱善謂居諫垣者當以爲法賜煜舉人初象樞之以薦起
度俸糈不足自給不欲出有李恆岳者妻兄弟也謂曰子在京師
日費幾何曰得一金足矣恆岳曰子果出而有濟於世吾能任之
遂行終其身在官無內顧憂恆岳力也子學誠字無偽康熙二十
一年進士官內閣中書乞養歸 聖祖西巡謁行在改翰林院修
撰遷洗馬再遷諭德遭母憂遂不復出學誠少承父教文行純粹
澹於仕進家居七年不謁遇 聖祖眷念舊臣恩寵優渥遂感激
思報稱云著有一齋新舊詩行世

魏裔介

魏裔介字石生號貞庵一號崑林柏鄉人父柏祥字元昌號拙菴
篤學工詩文督學左光斗試畿南首錄之明天啓元年恩貢任俠
尚義崇禎六年流寇自甯晉掠而西柏祥捐金募殺賊者懸敢死

重賞列隊而出捕斬賊二十餘級城獲全鼎革後隱居城東隅築
樸園與諸昆弟觴詠其中復營柳莊別墅杜門著書年五十七卒
祀鄉賢著有四書目錄讀史纂言柏鄉縣志裔介生而沈默寡言
笑穎悟絕倫明季兵亂父子走避邑之西山游騎邀劫之力鬪得
免讀書山偏桃源洞講習經術世務以天下生民爲己任明崇禎
十五年舉於鄉清順治三年成進士選庶吉士明年改授工科給
事中時世祖已御極五載裔介疏請舉行經筵日講之典謂少
而勤學古人比之日出之光竊恐年歲旣盛嗜欲日開宜及時講
學以隆萬世治本又言燕趙之民椎牛裹糧首先歸命此漢高之
關中光武之河內也明廷屢詔蠲荒而畿輔獨未沾實惠宜切責
奉行之吏彰信於民又言各州縣遇災荒旣經報部例得蠲緩錢
糧宜卽停征以杜胥吏欺隱竝就各州縣所有積穀及存留銀先

行振貸爲便會應詔上書言時事孔亟民不聊生雖巴蜀湖湘儘多遺孽而萑苻小醜所以屢九重之宵旰者舉不足慮惟上下之情未通滿漢之氣中闕大臣鬪茸以保富貴小臣鉗結而惜功名紀綱日弛法度日壞貪官暴吏轉相吞噬以鳴得意臣實憂之宜改絃易轍盡反平日之所爲請時御正殿召對羣臣虛心咨訪令部院科道諸臣面奏政事詔史官記注以求救時之實制下立行其說先是江南既定明尙書張縉彥投誠大學士洪承疇軍至是河南巡撫吳景道援恩詔薦之裔介疏言縉彥在明朝任中樞養寇誤國有盧杞賈似道之姦而庸劣過之宜予擯棄以協公論疏下部察議以事在赦前予外用五年典試山西轉吏科給事中時世祖已親政而朝儀未定因疏言深居高拱不如詢訪臣鄰批答詳明不若親承顏色稽之故事有朔望之朝有三六九之朝有早

朝晚朝有內朝外朝今縱不能如舊例當一月三朝以副勵精圖治至意自是始定月逢五視朝之制又疏言督撫封疆重臣宜慎選擇不宜專用遠左舊人又言攝政王時匿逃之法太嚴犯者家長坐斬天下囂然喪其樂生之心後寬其禁責成州縣法至善也若舍此別有峻法竊恐下拂人心上干天和非尋常法治小小得失而已 皇上愛民如子各旗宜仰體聖意遇下以恩彼雖奴隸豈無戀主之心而烏獸竄胡爲也遂寬其禁中外大悅又疏言直隸河南山東水災勘報移覆尙需時日蠲振稍緩無救死亡請速發帑拯饑其言悚切 上卽出帑金二十四萬兩分遣大臣十六人督振全活數十萬人會有詔訪明季京城殉難諸臣疏舉大學士范景文等三十人乞宣付史館顯加褒錄於是諸臣先後得旌錄與祭謚母憂歸九年補故官十一年遷兵科給事中應詔陳用兵

大勢略言劉文秀起川南孫可望據貴筑李定國伺隙於西粵張名振流氛於海島連年征討尙逋天誅爲目前進取計蜀爲滇黔門戶蜀旣守而滇黔之勢蹙故蜀不可不先取此西南之情形也粵西稍弱昨歲桂林之役未之大創必圖再犯以牽制我湖南之師宜令藩鎮更番迭出相機戰守此三方者攻瑕宜先粵西粵西潰則可望膽落滇黔亦當瓦解矣其後諸路進兵卒如其言因疏劾將軍續順沈永忠當流賊孫可望犯辰州時擁兵不救致總兵徐勇等力竭殉城福建提督楊名高怠玩兵機致漳州郡邑爲海寇鄭成功所陷永忠名高均奪職又請錄用建言得罪諸臣請倣唐李吉甫元和國計簿令度支歲計出入盈縮呈御覽請增官吏祿俸請禁金玉錦繡浮屠塔廟一切侈靡蠹蠹之事請立勸農官請自今罪人勿發窰古塔請遣大臣督視河工言皆剴切多見施

行明年遷太常寺少卿擢副都御史疏劾大學士陳之遴營私植黨
詔解任發遼陽閒住戶部議開吏員納銀事例疏言此衰世苟且
之政今縱不能加小吏工食奈何著爲令甲以貲得官使銓政由
此而壞又請定教官每年考察例令學政刊布明儒薛瑄王守仁
等講學諸書以培眞才下部議行十四年擢左都御史因五月日
月交食上疏陳言歷舉兩漢日食詔書及光武時大中大夫鄭興
所云國無善政謫見日月之事請廣開言路停罷土木寬守令考
成參罰釋解寃滯矜恤鰥寡孤獨酌復五品以下官俸竝令南方
專意招撫固防險隘撤還旗下戍兵省數百萬供應之費 上嘉
之立即允行嘗春月侍經筵聽講漢文帝春和之詔因舉仁政所
先四事卽日以聞 上田薊州上疏切諫報曰朕不日卽還矣京
師惡俗人生女多棄不舉疏請嚴禁 上宣宗講筵命閣臣紀其事

正陽門外菜園居民稠密爲前朝嘉蔬圃地所司檄歸之官裔介過其地百姓遮道陳訴卽入言於上立以予民嘗言天下未平皆由徵求太急刑罰太繁宜獎進直言激發忠義尙寬大平易之治勿爲刻薄瑣碎之計有旨令對狀終以其言直不問也尋坐言事附和奪職特旨留任未幾復原官十六年加太子太保上嘗召至中和殿諭曰朕擢用卿非有人薦達也裔介稽首謝曰敢不竭孤忠以報知遇南苑閱武每賜宴賦詩天顏甚喜一日侍坐問民間收穫對曰畿內百姓困苦豐年僅供官稅上稱唐太宗英主對曰晚年無魏徵苦諫遂窮兵高麗至貽後悔其因事納忠類若此世祖嘗夜半閱明孝宗實錄有召對兵部尙書劉大夏都御史戴珊事心喜曰朕所用何遽不若大夏與珊明日宣尙書梁清標及裔介詣行幄備顧問君臣交孚當其時無與比也十七年上下

罪已之詔令羣臣各自陳裔介疏上奪宮保銜未幾疏劾大學士
劉正宗成克鞏欺罔附會諸罪 上震怒正宗籍沒入旗克鞏奪職
留任又以裔介不早言竝下獄然卒直其事出之康熙元年考績
復宮保晉吏部尙書 聖祖冲齡踐祚輔政大臣議加練餉五百萬
上疏爭之力中旨停罷雲南初定請捐無名賦稅以慰新附之氓
薦地方人才以收巖穴之士恤投誠文武以來膚敏之彥寬一切
禁網以安溪崗之蠻又言雲南既有吳三桂藩兵及提督兩標兵
則滿洲兵可撤但滇黔川楚之間不以滿兵鎮守要地倘戎寇生
心恐鞭長莫及荆襄乃天下腹心宜擇大將領滿洲兵數千常駐
其地無事則控扼形勢可以銷姦宄之萌有事則提兵應援可以
據水陸之勝疏入格於議又復請移舊駐武昌之湖廣總督於荆
州從之後三桂反湖南州縣俱陷卒不得過荊州人乃服其先見

云康熙三年擢保和殿大學士充實錄館總裁九年典會試尋爲御史李之芳所劾詔命裔介回奏上疏辨釋因請賜罷斥歸田明年病亟請告 上以其詞懇切不强留也十一年加太子太傅裔介在言路最久前後二百餘疏皆關天下國家大計或阻或行或天子排眾議而獨申其言用著爲律令國初名相無出其右者性嗜書輿中輒攜一卷及致政紬繹經史百家之言拳拳服膺宋五子書窮理盡性之旨時有所深省獨得嘗謂朱陸之辨紛紛不已然尊德性道問學實非二事故晚而相合論者欲復元明先須去識此據佛氏之論歧識與明而二之也論語云默而識之多見而識之易曰多識前言往行以蓄其德聖學重在默識未有以識爲害性而去之者識卽知也知卽性也識可去知可去乎知可去性可去乎佛氏之言有不可强同於儒者此之謂也君臣父子兄弟

夫婦中庸謂天下之達道又云率性之謂道謂此爲道之入門則何處更有道之堂室乎至謂善惡之念不得著之於心者此語論性似是而實非也孟子論性以爲仁之端義之端禮之端智之端蓋其中實有此物然後可以發生譬之稻種方能生稻穀種方能生穀若中無此種糠粃豈能生乎凡以無言性者皆以性爲糠粃者也謂人性不容一物似近於未發之說而不知從天命以求之耳事物終無可去之時性亦終無可離之理戒慎恐懼之中卽有無聲無臭之體此所謂寡欲養心復性聖賢相傳之要也若以無爲宗以解脫爲了當未有不流於放逸入於荆榛者隆萬以來之學者雖稱大儒多中此病其差在以佛附儒而不辨於毫釐之間也又嘗與孫奇逢辨論王陽明無善無惡一語曰心性一也謂無善無惡者心之體亦可云無善無惡者性之體乎若云無善無惡

者性之體是又一告子也於是本其爲學之宗旨著聖學知統錄
二卷以述見知聞知之統由堯舜而前始自伏羲以明知學之本
於天由孔子而後終於許薛以明知學之不絕於人又以董仲舒
以下至高攀龍諸賢材力有厚薄學問有淺深德業不同要皆足
以鼓吹六經羽翼聖道爲聖學知統翼錄二卷取周子太極圖說
張子東西二銘周汝登所輯程門微旨孫承澤所輯考正晚年定
論及朱子與廖德明問答諸書爲周程張朱正脈一卷孟子詳說
反約爲學者之指歸不有博何以說不有說何以約爲約言錄二
卷采古今嘉言善行而取其不偏不倚有倫有序者取周子通書
之義彙之成帙爲希賢錄十卷採五經論語孟子及秦漢而後諸
家言性之語而衷以已說爲論性書二卷集程朱及諸儒格致之
說而附以已所作辨二篇爲致知格物解二卷彙紫陽白鹿洞學

規及平川甘泉韜穎諸家而附之以已所纂述知性十八篇爲學
規彙編一卷以薛瑄之學得程朱正傳乃錄其要語以自修省爲
薛文清讀書錄纂要若干卷其平生講學尊朱大旨具備於以上
所著諸書其他所撰又有四書大全纂要四書精義彙解惺心篇
捷解若干卷孝經注義一卷鑑語經世編二十七卷傳家錄三卷
附家約一卷樗林三筆五卷明百家說三卷耕餘雜語一卷崑林
小品三卷崑林續鈔三卷鄉塾全書若干卷教民恆言一卷風憲
禁約一卷巡城條約一卷勸誡圖說一卷牛誠續鈔三卷裔介生
當明季喜言性理尤好爲詞章之學爲文醇雅不失爲儒者之言
詩宗陶韋而於君臣父子兄弟友朋之閒尤惓惓三致意焉其詩
有嶼舫集嶼舫近集文有兼濟堂集共五十餘卷吳偉業曰魏公
秉鴻駿魁傑之才遭逢聖朝迴翔禁苑世祖興起右文招延俊茂

文學侍從之臣而公實歸然爲冠其後歷諫垣躋憲府密勿論思紀綱庶政侃侃論列君臣一心卒致太平之盛康熙之初入居政府海內宴安無事公得以從容述作理學文章政事三者殆兼而有之此乃天所以啓一代文明之運非偶然也康熙二十五年卒年七十有一賜祭葬如例雍正十年入祀賢良祠乾隆元年追諡文毅裔介天資醇粹性篤孝友與人交質直無城府人要不忘尤善獎掖後進急人之難不啻飲食嗜欲懸車十六年課督農桑混迹田野人不知其爲舊相也嘗自作贊平生嚮慕留侯二疏及裴晉公白樂天之爲人其出處亦略相類云

李燾

李燾字景燾別字坦園高陽人明文敏公國槽子幼喪父母執親喪哀毀如成人刻志讀書言行不苟順治二年舉於鄉明年成進

士改翰林院庶吉士除檢討特改編修十年 世祖試習國書翰
林燾與侍講胡兆龍檢討莊同生竝列上等擢春坊中允再遷侍
講學士遷祕書院學士充日講官教習庶吉士尋充經筵講官十
五年五月以內宏文院大學士入閣辦事燾自釋褐迴翔禁苑十
餘年致位宰輔年方三十有四其由學士超拜尤異數也是年更
定官制改工部尙書兼東閣大學士十六年加太子太保坐票擬
失誤降四級調用燾杜門引咎曰臣實不職鐫秩猶寬典也三月
召復其官 聖祖卽位復設內三院改宏文院大學士是時 上方諒
陰恭默輔政大臣受顧命決機務或議事相齟齬燾輒默然俟辨
論將息徐出片言定是非票擬或未當不輕論執每於談笑閒旁
引曲喻令聞者心悅然後徐奪其所是而更正之輔臣每屈意從
其言一時調和匡扶保護善類燾之力居多八年夏旱奉詔清獄

釋繫囚四十二人未減七十九人寃者得白旣而復改內三院爲
內閣爵以保和殿大學士加戶部尙書十一年纂修世祖實錄成
賜銀幣鞍馬加太子太傅十三年詔舉素有清操堪任繁劇者爵
舉前布政使王舜年參議道俞之炎十五年再典會試十七年詔
舉博學鴻儒爵與大學士杜立德馮溥合疏薦副使曹溶布政使
法若眞參議道施閏章中書曹禾陳玉璣知縣米漢雲進士沈珩
葉舒崇及召試充閱卷大臣所取皆名宿焉二十年海內悉定
天子以明年正月旣望置酒乾清宮飲燕羣臣樂作爵奉觴上壽
上亦手卮酒勸爵賜坐殿上依漢元封柏梁臺故事上賦詩爵
及朝士相繼和御製序文勒石二十一年太宗文皇帝實錄告
成晉太子太師會臺灣初定提督施琅請設官鎮守廷議未決有
謂宜遷其人棄其地者上問閣臣爵奏如琅議上聽之二十三

年六月卒於位年六十遺疏聞優詔賜卹命大學士明珠偕學士一人往奠爵賜祭葬如例謚文勤入祀鄉賢祠壽在相位二十八年老成持重風度端凝內介外和朝野倚以爲重三藩變作海內騷察哈爾部亦相繼叛亂朝廷命將討不庭一應軍機方略諭旨皆口授籌起草每人直或夜分始出或留宿閣中有問者輒默不應其慎密如此居相位久嫻掌故凡朝廷大典禮如冊立中宮相視山陵題神主釋奠於先師每以屬之出則扈從入則進講主會試者三殿試文武進士讀卷者十四充纂修監修總裁官者十一賞資優渥自御書卷軸以至龍蟒貂綺金銀鞍馬上尊之屬無算然不爲私計自奉廉儉門庭肅然無衣紉之僕與人言聲音朗朗達戶外不爲促膝密語迹稍涉私輒避席改容人往往逡巡引去進退賢否賞罰一聽於公不喜立名譽務以忠誠結主上知其

遇察友終始無閒言朝野貴賤莫有指其過失者爵少力學讀書寒暑不輟喜著述雅負藻鑒能知人主試讀卷先後得士甚盛魁儒鉅公多出其門弟子之眾近世罕儷闢寄園於舍北自稱據梧居士吟詠其中有問業者講論不輟旁及天文地理百家之言無不精究康熙戊申欽天監正楊光先與西洋人南懷仁等論麻法得失不決上命爵觀其測驗日影又考驗吳明烜時憲七政二麻異同己酉正月測驗立春日影及火木星躔度太陰行度雨水日西洋法皆合三月觀杭人邵泰衢測驗日影月星行度所推皆誤按麻法立春日躔陬訾之次水星行疾至夜不見觀者都不能定爵以水星日行度幾何日暮已越幾何遂定其乖合泰衢以服壬子八月命至禮部驗看楊景南麻法無據景南能以口給禦人爵摘其一二以難之遂詘其精審詳明雖專門之學無以過也所

著有閩役紀行略伴星草心遠堂詩文集行世長洲陶樑曰國朝
定鼎之初北方實多賢輔而文章彪炳開一代風氣之先者首推
坦園相國今讀其集六代三唐合爐而冶聯珠綴玉蔚爲盛世元
音以視唐之燕許宋之楊劉有過之無不及也

名臣傳一

大清畿輔先哲傳第一

名臣傳二

大清畿輔先哲傳弟二

天津徐世昌撰

王熙弟燕

王熙字子雍一字胥庭號慕齋崇簡子生而穎異五六歲卽能誦孝經學庸論語父崇簡爲講解大義有疑卽問輒驚人十五爲諸生順治三年舉京兆試明年成進士選授國史院庶吉士習滿書六年授檢討分校壬辰會試十年試滿書拔前列世祖召見弘文院命以滿語奏對大加褒賞隨升國子監司業賜滿文洪武寶訓三國志二書尋轉左春坊左中允充順治大訓纂修官甲午命譯書經升司經局洗馬召入南苑譯勸善書及大學衍義一日上猝至直幄閱所譯書喜諭閣臣稱善久之遂令長直南苑十二年隨獵賜乘御馬是科館選庶吉士特命熙引見南苑升右春坊

右諭德充孝經衍義纂修官十三年初設日講官以熙同學士麻勒吉胡兆龍等充之御試滿書復第一賜御服貂裘是秋升左春坊左庶子 上幸景山臻祿閣召日講官五人進講熙講書堯典稱旨命每日進講侍坐駕出即隨行不必請旨十四年升弘文院侍講學士充經筵講官七月擢弘文院學士 上諭曰父子同官古今所少以爾誠恪特加此恩十五年教習庶吉士秋主武會試授翰林院掌院學士兼禮部侍郎以學士三年考滿加禮部尚書銜時崇簡已長禮部父子同部尚書海內榮之十八年 上不豫日入請安御榻前正月六日漏三下召入養心殿諭曰朕勢將不起爾詳聽朕命撰詔書庶匍伏飲泣筆不能下 上諭抑悲痛即榻前起草熙拭淚書第一條進恐聖躬過勞移乾清門下撰擬凡三次進覽皆報可日入始脫稿 世祖竟於是夜上賓熙一慟

幾絕其面奉憑几之言決大策定大議終身不以語人雖子弟莫得而傳也四月改授弘文院學士兼禮部尙書十二月以禮部尙書管左侍郎事康熙五年擢都察院左都御史疏言藩臬兩司總理錢穀刑名守巡各道分蒞各府州縣職任綦重近來督撫因其地近情親互相容隱糾劾無聞請敕部嚴定徇庇之罪得旨如所請六年疏言六部漢官一司之事專委之郎中其員外郎主事僅積俸待遷而已自後應照滿洲例各勤職業其不辦事者卽行劾罷今各省官倉抽分造船等事已歸有司管理宜停遣部員其戶部工部漢主事各員當酌議省減在京六衛管徵錢糧所設守備千總實爲閒冗亦宜裁併又陳官員貿易之害謂近日閩廣江西湖廣等省官員多自置貨物售之所屬兵民或指稱藩下挾勢橫行放債取利省會要區徧置官商占踞盤剝致小民以貿易爲生

者顛連失業請下部議自今以後凡閩廣江楚等省王公將軍督撫提鎮大小官吏如有持已資與民爭利及姦商借藩下勢橫行者所管官不能覺察及已發覺而循隱不以實奏者嚴定處分著爲令甲又見任官員捐助銀米博取議敘每云設法捐輸夫設法之中何可究詰名出私橐實則取自民間况其中誇張鋪敘捏少爲多是又徒有捐助之虛名更屬無益近者別項捐納雖停而修城備振及修造軍器等項仍有紀錄之例如遇降罰亦得抵銷終非所以飭勵廉隅昭垂法守祈敕下部詳議凡係地方見任文武官員捐助敘錄之例概行停止又近例招民百家優授知縣夫縣令宰治百里撫綏眾民關係匪輕儻有不肖之輩授以此職則百姓之累無窮况招民百家送至盛京往來之費非數千金不足夫不惜數千金而欲得一縣令則借資爲市其心可知旣欲謀利其

一邑之民安危可知臣愚以爲嗣後招民百家之人應給與閒散官名色頂帶牌扁旌獎勿授以理民之職又見今流徙寧古塔尙陽堡犯人認工釋罪令其修蓋城樓部院衙門此等犯人流徙之時家產已盡籍沒入官能認造此數萬金城樓之工價從何而得不過借認工爲名指稱奉旨取回視原籍稍可給之家挾詐逼勒一不給與動稱違誤欽工交官追取良民受害而姦惡之人愈益縱誕不知畏忌此例應卽停止凡所上疏皆得政體大指歸於子惠萬民培養元氣每奏上輒報旨未嘗不稱善下部議或行或格而其疏要爲不可易也會天旱金星晝見上諭各部院例繁滋弊上千天和熙疏請酌復世祖舊章以昭政典請先帝御極有年憂勤圖治各部院應行事宜皆經詳定盡善無遺茲者數年以來有因言官條奏改易者有因各部院題請更張者有會議興革者

法經屢變則例繁多反啟各衙門任意輕重乘機作弊之端自古
聖賢之君莫不以敬天法祖爲兢兢皇上當勵精圖治之日法祖
卽所以敬天臣請敕下部院各衙門詳查見行事例有應遵世
祖時典制者具題改正施行卽比年以來因時定例實有便於今
日國計民生者亦須詳察始末條晰不得不然之故具陳統候裁
奪畫一永遵上覽疏嘉歎於是世祖舊章次第酌復中外趨之熙
在臺二十有一月所建白甚眾其懲貪崇儉獎廉疏銓法課官學
諸疏皆鑿鑿可施行當是時宇內初定而三藩各擁重兵吳三桂
駐雲南耿精忠駐福建尙可喜駐廣東皆予王爵三桂兵尤強擅
署置官吏浸驕蹇萌異志子應熊以尙主居京師多聚姦人散金
錢交通四方中朝皆憂之莫敢先發言熙獨疏言直省錢糧大半
耗於雲貴閩廣之兵餉就雲貴言本地賦稅不足供十一勢難經

久臣愚以爲滇黔已平綠旗額兵亟宜汰減卽藩下甲兵亦宜遣散屯糧則勢分而餉亦裕命下部臣核議歲省餉銀一百餘萬蓋陰裁抑之也七年升工部尙書兩視孝陵大工十一年從耕籍田明年轉兵部尙書是歲十二月吳三桂反書至一夕都城內外所在皆火尋有朱三太子之獄捕繫百千人掠治訖不得主名皆其子應熊之黨爲之聖祖以其尙主不忍誅十三年三月熙上疏曰逆賊三桂負恩謀叛肆虐滇黔毒流蜀楚散布僞劄煽惑人心今大兵已抵荆南剋期進勦元惡指日授首獨是叛子吳應熊素憑勢位黨羽眾多擅利散財蓄養亡命依附之輩實繁有徒今雖被羈守而種種流言譌傳不止姦謀百出未易周防大寇在外大惡在內若不早斷貽禍匪輕且大逆不道不限籍之同異皆處斬三桂逆天叛主今古罕聞討平之後脅從尙可邀恩而首惡必無

可赦應熊之當誅戮無待再計而決者亦何庸緩其斧鑕而不以
安天下之心哉爲今之計惟速將應熊正法傳首楚蜀以寒老賊
之膽以絕羣姦之望以激厲將士兵民之心今應熊親隨人等發
禁刑部者不下五六百人眾則難防時久則易玩請敕法司鞫
訊情罪重者立決次者分給各旗以絕禍本章下議政王貝勒大
臣九卿科道會議應熊尋伏法始三桂憑藉其子爲內應西煽秦
隴東蔓江浙自恃兵勢朝廷必不殺其子以爲之招故上書多媢
語及應熊伏誅三桂驚悸舉軍慟哭竟以是恚發病死人皆趨熙
之特見能聲大義云十四年充冊立皇太子副使尋奉諭專管密
本漢官與聞兵機蓋自熙始十七年丁父憂服闋卽家授保和殿
大學士兼禮部尙書時黔南甫平海內苦兵革久熙爲相務以和
平寬大宣上德意與民休息造次數陳必歸於忠厚將之以誠敬

奉法循紀不敢失尺寸其有應奏請變革者必酌乎人心公論之
同然直言於上前無隱平生不沽鬻不市恩不立黨每論事闕廷
指畫可否具有經緯聞者咸歛容欽服其性無鉗忌能容眾尤樂
獎進人才賓禮後進經史能隨事舉述大義絕不以賅治自矜撰
擬文字屬同官具藁點定一二字深中事理詩詞頌賦閒進於上
問則奏曰實代作非老臣所及不欲取先詞館諸臣也在帝左右
或危論或微言隨事諷諫率能動上聽平定三逆後開方略館一
日諭閣臣曰當三桂初反時漢官有言不必發兵七旬而有苗格
者又其時漢官盡移其妻子回家何也顧學士韓葵曰汝爲朕載
之葵商之熙熙曰待縛我之東市君乃載耳因大言於閣中曰有
苗格乃會議時魏蔚州語告者截去首尾遂失其本意然若如其
言豈不誤國漢官移家偶然耳亦多有否者日久何從分別耶翌

日入見懇懇如閣中語 上笑曰朕固知此兩事不可載也事遂
寢熙子克善克勤皆 世祖賜名克善能文熙不令與試又屢辭
典會試戊辰會試 上特命爲主考常從游宴諸閣臣多不與賜席
寵堂扁曰曲江風度寵眷日加歉然若不自勝求退之懷未嘗一
日釋三十一年以足疾請解任詔不許三十四年復請告溫旨慰
留如初三十六年丁丑以年七十引年以請復奉有宣力兩朝久
贊機務眷倚方殷不必引年之旨逾年擬再請 上先諭閣臣斷來
章遂不果三十九年復請 上仍降旨慰留不忍其去也明年疾大
作大學士伊爾圖以狀奏行在 上命賜寶露上藥服之病少閒復具
疏申前請始准以原官致仕特加少傅兼太子太傅先是 太祖實
錄成加太子太傅至是進少傅 上特以榮其去往者致仕諸大臣
無有也是年十月遣侍衛賜帑幣上珍明年上元節賜宴於家四

月遣侍衛捧手書至榻前賜扁聯臨米芾書一幅勸其勉強餐食
輔以醫藥以慰朕不忘舊臣之至意熙匍伏感泣命子克昌孫景
曾隨侍衛詣暢春園謝恩復傳諭如病少愈朕尙欲一見故熙遺
疏謝恩有冀臣病之再甦許瞻天之有日蓋紀實也四十二年上
元節復賜宴於家熙彊起進一箸遂卒年七十六 上聞震悼特
命皇長子直郡王率滿大學士及禁近諸貴臣至喪前命王行三
叩禮舉哀諸大臣等同跪舉哀道路擁觀父老多泣下漢大學士
九卿詹事及百執事之長皆欷歔感動合疏謝恩蓋從來所未有
也內閣請易名之典 上親定諡曰文靖雍正八年入祀賢良祠
熙內行完備十二歲母梁病篤禱於天者四晝夜母沒哀號昏絕
口鼻出血升餘父崇簡抱置懷中食頃始甦侍父事無鉅細必稟
命逢先世諱日崇簡必集子姓齋宿外舍熙率先致敬家在京師

每朝退朝夕温清與兄弟共之春秋佳日輒侍父遊西山諸勝又恐勞於登陟乃構怡園於宅之西偏築亭臺植花木以養其志侍疾躬治湯藥不敢頃刻離左右父沒號泣如孺子顏其書屋曰慕齋兄弟六人簪笏相重恆遺書戒勉以國恩家訓再得恩蔭皆推與其弟助其內外姻戚之不給者崇簡素所與交故人子弟周卹之終其身未嘗倦也自少天才敏捷工文章然不欲以此炫長其子克昌編其遺集凡二十四卷弟燕字子喜以父廕累任戶部郎中康熙二十四年授鎮江府知府令行禁止境內肅然三十一年陞江蘇按察使聽讞無一留獄嚴守律例不敢以意毫髮重輕屬吏奉燕指凡所上初招獄詞亦無敢翫法行私者七郡之獄稱平三十三年晉湖廣布政使是時楚省設鼓鑄局藩司董其役宿弊叢集私鑄倍於官鑄榆莢縋環十不當一上下官吏相漁獵以爲

利藪莫肯摘發其事者燕白督撫罷其事其他收支抑勒輸納重耗諸弊悉釐革之州縣奏銷之費歲派取於民間者嚴予禁絕有費卽身任之閱四載而湖北藩庫無復浮冒虛詭者三十七年授都察院右副都御史巡撫貴州貴州彫敝民不知禮教燕以廉潔導羣吏凡關民生教養者次第舉行因具疏言黔省師儒之官諸多未備各州縣衛有初未立學宮者有學無官而附試他郡者請依滇南故事通省建學設官悉依小學例取文武生員八名廩貢亦舉行如例又言全黔荒田十居三四墾經數歲然後收穫而所入薄不足輸稅故人懷觀望之心儻依減則寬以六年未有不鼓舞爭赴者賦雖減重就輕田則易荒成熟是於國稅原無損也均下部議行四十五年疏稱苗人掠劫有司處分特重黔地熟苗供辦徭賦非野苗可比特一旦負罪而竄入叢篁深箐難以立禽儻

卽議有司降黜去官則人才可惜且參罰既重諱盜者必多請限
年追緝依漢民爲盜議處下九卿廷議從之燕善拊循苗人時頒
條教飭州縣官吏無縱類人詐索土司鎮寧州民曹邦傑妻張氏
夫亡從死法不應旌燕力爲請 上特許之民尤傳頌焉撫黔三
年積勞咯血疏乞骸骨不許越二載疾益劇四十二年更申前請
詔允致仕去黔之日遠近軍民苗獮遮道拜送有相顧泣下者家
居六年卒年五十有七賜祭葬如例

朱之弼

弟之佐

朱之弼字右君號幼菴大興人順治三年進士選授禮科給事中
遷工科都給事中之弼歷司言職抗直無阿苟利國家不避權貴
疏言體統尊卑原有定分褻體統而紊尊卑者莫如胥吏加銜舊
例胥吏供役三四年積勞議敘選用佐貳今戶兵等書役別繫職

銜既奔走本衙門之中復趨踰卿大夫之列非官非吏有玷班行
且此輩出身貧賤不數年間家資巨萬食用服飾窮極奢華非舞
弊何以致此況戶兵各官遷轉無常而此輩子孫世守官如客而
吏如主流弊何窮請嚴查斥革庶名器重而弊蠹消下部議行六
年分校禮闈逾年丁父憂九年服闋補戶科疏言小民納糧一也
其自有漕糧白糧軍糧恤孤糧四種人皆樂軍糧恤孤糧遲緩無
增耗之費有力之家往往營求撥兌派漕白於單弱之戶苦樂不
均害一兌軍糧必行折色軍得銀則沿途妄費掛欠之弊由此害
二兌恤孤糧半飽彙強鰥寡孤弱無所控告害三請救漕臣糧道
親督州縣畫一編徵盡數輸納敢有撥兌者治罪又言錢糧侵欠
兵食不充今侵欠之大者莫若漕欠與糧欠漕欠宜責總漕巡撫
親督糧道糧欠宜責督撫親督布政今年帶完某年之欠若干逾

限不完均以溺職論嚴立考成其姦弁侵虧及有司怠緩從事者
參處如此閱一年則銷一年之欠官有責成而舊欠可清又言國
家章程大備六部各有成書儻部臣實心任事利自知舉弊自知
革言官不過拾遺補闕而已六部任事之人視國事如家事猶恐
廢弛今則盡若事外之人疑事畏事之念多任勞任怨之意少事
稍重大則請會議遷延日月行查而已不然聽督撫參奏科道指
糾而已不然苟且塞責無容再議而已上下推諉以爲固然彼此
相安以苟歲月如此國家之事安得不廢百姓安得不困而欲望
致太平必無之事也今日之治惟在擇人而久任之責其成效以
定賞罰伏乞 皇上召諸大臣親試才品因能授任復考其歷事
後興革幾何視成效多少以定功罪而行賞罰無少姑息則人知
法之必行而事舉矣未幾除太常少卿歷右通政宗人府府丞擢

戶部右侍郎旋以公事貶官十五年補光祿少卿轉通政司左參議明年擢左副都御史疏言民之不安吏之不察由巡按之不得其人而其要惟在責成堂官嚴加考核而已蓋巡按之賢不肖卽堂官之賢不肖臣請與同堂諸官暨諸御史約一曰操守清潔毋貪污不法一曰舉劾得宜毋賢否混淆一曰撫按互糾毋瞻徇督撫若臣等定差不公考核不當受私請屬阻撓事權諸御史亦得舉奏所以交相勸誡者如此夫自治而後可以治人正己而後可以率眾責成有歸則紀綱自振至於巡方事宜御史親歷其事見聞必確應責掌河南道會同十四道各抒見聞詳細陳奏敕部院諸臣會同參酌定爲畫一之制自足以興利除害不然議論益多端緒愈亂巡按止皇皇補救網過之不暇則亦安所措其手足哉之彌嘗以淮庫收支不實疏請敕漕運總督嚴核節年出入掛欠

并餘庫各項銀兩歲終造冊奏報以憑核銷又以楚漕宜留協濟
漕折宜清完欠錢局宜查銅本上疏力陳皆下部議從之時世
祖方嚴懲貪之典凡貪官得贓十兩以上流徙塞北著爲令之弼
曰此令一出天下不復有清官矣上疏切諫言自諭旨宣傳之後
撫按所糾必無以大貪人告者何則一經提問有司無不求減贓
罪圖保身命雖有盈千累百之贓而及其結讞期以不滿十兩而
止是有司之貪未糾以前徒層累而輸於上官被糾之後又層累
而輸於問官而尺籍所科百不一二蓋雖起古襲黃之徒爲今之
有司未有不犯十兩之令者而普天之下盡是不取十兩之有司
豈今日之有司皆出古循吏上哉良以有嚴令之名無行令之實
令嚴則思遁也皇上何不更法變制但擇撫按一人貪者懲之
撫按一大廉者獎之則眾貪懼眾廉奮矣會天旱極言山東前撫

臣秋傳河南撫臣賈漢復以舉荒蒙賞而百姓以賠款受困歲增
數一萬之賦稅大約多得於鞭笞敲剝呼天搶地之子遺而非額
外樂輸之賦稅怨苦之氣積爲疹厲宜加勘豁適河南報災戶部
奏言六月內旱 旱上求禱甘霖大霽遠近均沾而彰德衛輝獨請
蠲恤請覆勘以昭核實之彌曰此小人之言明欺君父輦下得雨
曾天率土豈無差別河南撫臣以被災細數報部覆請再勘旣以
撫臣爲不可信矣而又倚之踏勘藉使撫臣告災如前部臣信之
不可不信將必易人踏勘徒增地方煩擾耳且自夏徂冬被災州
縣豈盡停徵待至勘明已屬明春雖復蠲免徒飽吏橐而嗷嗷待
哺者已轉爲溝中之瘠矣因與尙書王宏祚力爭於朝宏祚辭卒
康熙二年轉戶部左侍郎三年充武會試副考官四年調吏部
五年擢左都御史督工部尙書疏言閩地兵米之苦請閩省官兵

每年所需月米除徵米十萬二千餘石外買米四十餘萬石每石價銀二兩四錢朝廷買米養兵絕不虧損民價恩至厚矣臣聞延建汀邵苦於買米之攤賠有願繳田入官者漳泉之間逐日按地畝均派方司餉未到曰借派有借竟無還也及司餉既到曰均補謂餉米不敷按畝攤派也又巧立名色曰預徵先事而派也各縣派米於民每石必加六斗又不令納米折價三四兩不等是數倍於正供也請敕督撫窮治所司庶免百姓腴削之苦又言私派民夫之害謂閩民既罄其食以供兵復驅枵腹之性命以供無窮之役閩民何罪臣實痛之上乃下詔切責督撫大吏大吏以下多得罪去閩中積弊遂除七年調刑部疏請旗下軫恤家人更定私嫁之例俾免離析又請免康熙七年酌省存留錢糧以紓百姓又言懲貪之法非不嚴厲而貪污仍敢肆行者恃與受同罪之例與

者不敢質證耳請嗣後因事賄賂者照例同罪如因逼抑出錢儻
非官役仍照舊例庶過證與錢者得吐實情而國法伸矣詔並如
所請九年調兵部十二年充殿試讀卷官疏請爲本生母終喪久
之丁內艱服闋補工部二十一年典會試總裁九月朝考充讀卷
官明年會推按察使之弼舉道員王垓上以所請非材交部察
議降調或勸具疏自明之弼曰吾昨一歲四遷不以無功辭今甫
一謫遂以無過辯可乎乃解職以歸時徐元文爲都御史同罷職
笑謂之弼曰曩固聞公之義而韙之今得從公後其敢有所言之
弼曰然哉徐又嘗語人曰每議事與大興宋公及蔚州魏公接茵
而坐三人者所見略同而朱公議論尤以惜人才重國體爲急其
爲同僚欽服類此之弼以諫臣事兩朝讜直端亮著聲於闕廷前
後章數十上至於鋤大猾釐積蠹凡國家大事皆他人所不能言

亦不敢言反且以爲不足言者而獨侃侃陳奏鋒發矢激中外屏
氣讀其疏章剴切敷陳唐陸贄宋范滂殆無以過傳於世者不過
十之一二而已生有孝行事親以色養居喪盡禮與弟之佐篤友
愛自延師授室及諸居處服御皆爲辦治由少至老每食未嘗不
共又推恩族裔以及執友寒素待以舉火者甚眾喪葬嫁娶皆爲
之伙助無倦容嘗買妾詢知爲士人女弗御而嫁之年十六讀書
塾中聞鄰有哭聲以貧將鬻子爲之醵金代贖家居課兒誦經
史暇則寄興詩酒人未見其愠容生平所精思熟復者尤在近思
錄朱子節要上蔡語錄諸書嘗撰述薛瑄胡瑗論政之語用以自
警手輯先儒遺書刻之家塾燕寢門闥皆勒箴銘其立身持論無
造次苟且蓋其淵源於學問者深矣康熙二十六年卒年六十七
弟之佐字左人幼孤依伯兄之弼兼師友教誨順治十四年進士

改庶吉士歷官至翰林院侍讀學士分校春闈會元黃仍緒狀元
繆彤皆出其門居恆肆力古學落落寡交游雖踐清華自處若寒
素好先儒語錄沈潛研討粹然一出於正嚴事伯兄雖白首若弟
子然時論比之二程

郝維訥父傑

郝維訥字敏公號端甫霸州人父傑字棫清明崇禎十年進士入
清召爲戶科給事中疏請開經筵祀闕里起廢斥諸臣之有才德
者朝賀大典內監不得入班行禮俱下部議行累遷至戶部右侍
郎順治十六年卒維訥順治四年進士授刑部主事升郎中值天
下初定訟獄繁多刑部設管理章奏科錄讞詞以輕重比而爲例
一以維訥任之訟獄遂清七年遷福建督糧僉事閩中故無漕駐
防兵食仰給長豐倉倉僉因緣窟穴招攬納戶維訥取巨蠹置之

法令民自輸自是民便而兵不苦饑大軍下漳南糧運多阻維訥督米二萬石率舟師浮海達泉州一軍飽騰海疆平巨寇張自盛犯延邵上官以維訥能調署延邵道至則設方略勵戰士用閒散其黨自盛就禽尋署兵備驛傳道權按察使決獄平恕一切以法外寬之八郡一州咸安處無動搖於是天下監司之稱廉能者推爲第一撫按交章舉卓異吏部侍郎孫承澤成克鞏復力薦之世祖知其賢獨先被召去閩之日士民泣涕追送數十里外勒石以誌去思擢通政司右參議十二年遷太僕寺少卿尋轉左通政大理寺卿十三年擢戶部右侍郎管理錢法疏請清鑄本收匠作漕艘抵通州大雨水漲重運皆飄泊奉命往經紀維訥跋履水次轉粟貯京通倉於是運船得回空無凍阻患十五年調吏部右侍郎旋轉左充殿試讀卷官十六年丁父憂服闋補戶部左侍郎是

時州縣歲征稅銀分解各部寺院充一切經費額數少而款目繁各以十分未完論有司註誤去者相望維訥倡議天下錢糧總歸戶部合以十分爲考成酌定一條編法公私稱便康熙二年復遷吏部左侍郎三年充會試總裁官殿試讀卷官四年升都察院左都御史維訥念開國二十餘年南徼初定民困未蘇上疏略言天下大弊在民窮財盡連年川湖閩廣雲貴無日不增兵增餉本省不支他省協濟臣觀川湖雲貴及沿海之地尙多曠土若選綠旗及降兵精銳者隸之營伍其餘概給牛種所在屯田則供應減而協濟可以永除閭里無追呼之困矣又以廷議罷天下御史巡按責之督撫疏言督撫任重事繁出巡動踰旬月旣誤公事而騎從眾多經過滋擾其屬官之貪廉閭閻之疾苦耳目仍寄之司道奚必僕僕道途爲也請嗣後事關重大者仍親身巡察餘概停止四

月疏言山西山東等省旱災發帑振濟窮鄉僻壤恐難徧及惟蠲
免錢糧率土均沾實惠但田有田賦丁有丁差前者被災地方例
多免糧不免丁其有丁無田者反不得與有田之人同霑聖澤請
丁銀均照田糧分數蠲免從之八月疏言貪官逢赦止免應得之
罪仍革職追贓此定例也近有藐法肆貪累審成招罪至應死者
因赦免死竝免交吏部議處竊思蠹役贓款審實雖經赦免仍行
革役此輩身爲職官饕餮狼藉未可令其復玷名器貽害地方雖
新例赴部另補而貪殘所至播虐維均請敕部定議凡犯贓審實
者雖事在赦前止免應議之罪仍行革職庶官箴可肅民害可除
上是其言下部議行時議者欲破資格以舉人進士貢生爲一途
而督學之任多非其選又罷大計考察定內外官六年考核之例
維訥一一疏陳謂考察大典不可停學臣非用進士有文學者不

可程士舊例試而後授宜於序俸之中寓選擇之法維訥忠勤審直國之利弊知無不言又多密奏人鮮聞之者五年遷工部尙書轉刑部持法平允山東賊于七遁未獲及浙江逆書之案株連蔓引姦民乘機告訐誣善良不可勝數而所在以無賴自驚旗下誣控妻孥由宅財物寄某某被荼毒蕩產殺其身者歲累千數百家有司莫敢誰何維訥力陳其害請嚴整重罰以絕其姦戶部尙書蘇納海與督臣朱昌祚撫臣王登聯以奏止圈地俱得罪下刑部維訥方以疾在告蹶然起急入署曰三公爲民請命無死罪遂輕擬同事者爲之危維訥不動也七年遷禮部請上幸太學行釋奠禮大典以成八年轉戶部請復還州縣存留謂民不聊生在官吏朘削而州縣存留舊額皆公務所必需不可盡裁者今盡裁之或有事不得已必仍派諸民貪污藉口橫加民力愈窮財愈竭矣又

請緩徵錢糧定夏稅於五六月秋糧於九十月請免追藩產之價
請停督撫勘災之行以省供役請申嚴圈取民地之禁以安民生
疏入 上皆報可十一年遷吏部力持大體深以依違推委偏執爲
戒言官論事失實例不免維訥獨議免之先後獲全者數人復疏
請寬言路處分例謂從來治亂關於言路通塞優容而嘉與之猶
恐讜言之不至豈可因而加罪耶其扶持正氣皆類此州縣清查
隱地及格者皆增秩或驟遷以去然相度多不實維訥力陳其弊
稍裁抑之兵興開捐納事例正途日壅維訥斟酌資格按缺分選
銓法稱平吏部長六卿進退百官而會議會推及朝審諸大政莫
不委曲參酌期於至當遇持議膠執不可力爭者輒引譬談笑卒
歸於善每於 上前敷奏條暢卽所見與眾偶有同異亦必開陳端
緒不留隱情 上深倚重往往從其言然未嘗出而告人也初維訥

在閩時閩人有以計偕入謁其父傑者居第不容旋馬室無髹漆
交牀坐器傑服澣濯衣出見曰吾兒在閩其無得罪百姓乎人生
親老家貧多不得爲廉吏今吾藉先世薄田足饘粥吾勞於此分
祿以養其妻子所以勸爲廉吏也見者言維訥治行則大喜及維
訥擢參議傑以子貴移疾歸而維訥一歲中於傑所居舊職歷之
殆徧時人榮之性至孝屢欲致仕歸養傑不許傑卒維訥奔喪歸
哀毀特甚服闋奉母於京邸十九年母李病維訥將上疏請養母
怒止之維訥日奏對治事歸坐卧牀下竟日夜不少休積勞成疾
母卒 上賜茶酒命大學士臨其喪維訥守制過哀病日劇 上幸霸
州扶病謁道左 上見其羸瘠咨嗟動容久之賜食與藥遣御醫治
之服闋赴京又日賜參藥存問而病卒不起遺疏入 上震悼卹典
有加謚恭定時年六十一 維訥外和內剛刻苦自勵未嘗表飾求

赫赫名受知兩朝公忠篤練國家有大事非維訥不能決常以疾
在告大臣罷議待之人吏候門者數輩故終年鮮休暇之日於國
計銓政尤慎而詳戶吏兩部法經維訥裁定者守之不變性復簡
澹動遵父傑所爲或勸其變適曰吾家法在也初吏部考滿例廕
一子維訥請移廕於其弟大臣移廕者始此

冀如錫

冀如錫字公冶一字鎔我永年人明崇禎十二年己卯舉於鄉順
治三年成進士授刑部主事屬當提牢遇罪人應流徙者所司胥
吏多沒其財如錫力追給之全活無算歷轉員外郎郎中出知湖
廣襄陽府兵燹後民流賊起而白雲山寇尤陸梁爲民害一日得
謀書攻城狀如錫嚴備以待賊不敢犯會大軍進勦燒豹尾
山毀望京城師行無阻賊遂平閭井宴然有居民王宣治夫婦夜

被殺如錫夢人告以北門失火頃之果然如錫馳往救適邏卒獲一盜人卧衾者如錫訊曰盜衾小事殺某夫婦者汝也色遽變鞫之果得實一郡驚以爲神以卓異升河東鹽運使去之日百姓攀號百餘里如錫篤志勤學尤究性理諸書公暇手未嘗釋卷朔望集諸生於薛文清家廟中講宋明儒先之學士習一變升河南布政司參政甫三月擢浙江按察使在任八閱月清結京控案一百七十餘內陞太常寺卿轉通政司通政使擢工部右侍郎監造世祖山陵奏罷各省灰車之費轉左侍郎丁內艱服闋補兵部左侍郎擢左都御史振法紀杜貪緣凡所建白皆切中時弊嘗疏言獄訟繁興弊皆伏於砌款黏單豪猾之徒往往造無據之詞羅富民以媚貪吏一狀而裝十數事一事而累數十人陽借鋤暴懲姦之名陰爲擇肥而食之計甚至有革汰逃兵砌剋餉之款以告某將

領者有甲外游棍砌橫徵之款以告其州縣者挾私行詐貽害何窮請敕內外大小衙門嚴行禁止竝治其違例之罪又有奴僕告主者以役使之人挾私報怨上下之分不明而又陷愚人以必死之法臣請著爲禁令布告中外庶名分定而愚昧之刑少綱紀肅而悖逆之風絕俱下部議行九月擢工部尙書十五年淮揚河決奉使往勘會同侍郎伊桑阿奏參河臣王光裕無治河才所治隄工皆不實光裕坐革職如錫上奏曰河道水性靡常全恃隄工捍禦黃河南岸自白洋河至雲梯關北岸自清河縣至雲梯關以及高堰周橋翟壩古溝一帶決口與隄之殘廢不完者俱宜亟行修築其淤墊之處應卽疏濬深至當日河底而清水潭諸處決口尤關運道歸仁隄石土各工均宜速行堵塞一律興修今特立勘驗之法遴選廉幹諸員分工勒限詳定各官題敘處分之例俟隄工

告成更請特遣大臣履勘以昭覈實下部議從之尋因事例降解組歸居里中益殫心於濂洛關閩之學以躬行實踐爲務飲食衣服樸素如寒士見者不知其爲尙書也晚年尤耽周易論者謂其立朝居鄉持己接物必衷於道而行是以出處裕然身名俱泰皆得力於易也二十五年八月卒

蔣元恆

蔣元恆字九貞遵化人生而聰穎沈毅力學天聰三年太宗統兵入關元恆年甫十五從蹕而東拔入內院賜名赫德甲申從世祖入關定鼎燕京擢授翰林國史院學士教習丙戌丁亥己丑三科庶吉士旋拜宏文院大學士加太子太保掌國史院事晉禮部尙書文華殿大學士加少保尋以疾解官 聖祖卽位召入內閣久之復乞歸里歷事三朝端方清慎有士棍張廷豫韓鼎玉以爭姦誣

傳二
控叛逆者元恆奉命按之雪其冤 上以久旱命清理刑獄多平反
全活者眾一生淡靜無他嗜自奉儉樸第宅卑隘無異寒士卒諡
文端祀鄉賢

董應魁

董應魁字捷軒遷安人喜讀書慷慨有大節順治初知良鄉縣愛
民勤治抑驕弁甦郵困人以強項目之擢湖廣寶慶府知府寶慶
遭亂離積尸彌野城署生蒿萊應魁埋骨掩骼招集流亡民稍稍
還居而城守魏某謀爲亂應魁單騎詣其營正色折之亂乃定遷
武昌分巡道會黃州寇起嘯聚山砦聞應魁躬督兵擊而平之遷
山東驛傳鹽法道擢福建按察使先是汀漳龍道黃澍爲海寇所
困食已盡應魁設計登樓張樂累日寇疑有備解去內擢侍郎出
爲廣東巡撫剿逆賊鄧耀直搗龍門寨追至交趾揚江平歷官凡

十七年致仕歸卒年九十有八

苗澄

劉斗

許世昌

田種玉

苗澄字大生任縣人博洽經史精毛詩弱冠補弟子員明末流離關左顛沛不廢學居遼久知滿州文語順治初試多士以澄才兼文武置首選由侍衛授啟心郎與劉斗同官俱以文學稱澄章疏經披閱輒報可譏譯四書進覽賜蟒玉鞍馬世家子弟咸執經問道晉僉都直言侃侃稱真御史十七年總督河務親履河干講求利害遷邳城築遙隄條陳兩河皆中時弊山東巨寇作亂一鼓禽之授四川總督晉尙書銜時巴蜀初定整肅部伍恩威竝濟興屯裕餉蜀賴以安人方之韋皋張詠云後還京授步軍統領卒於官劉斗清苑人少習國書善翻譯能得其精義教習諸王世子授兵部啟心郎積九載擢宗人府旋晉國史院學士出撫甘肅上疏陳

邊要肅郵政墾荒田清蕃漢地界悉荷嘉納後遷福建總督與巡撫許世昌治績竝稱一時時海寇頻警軍興旁午斗戢兵籌餉卒奏大功八閩薦紳勒石頌之康熙五十七年卒祀鄉賢

許世昌字仲軒宛平人順治初官兵部謀畫悉當上意巡按江西所至激濁揚清吏治一肅尋擢福建巡撫值閩地新復除強植弱一切利弊皆次第興革著有西巡奏議數十卷

田種玉字公琢與世昌同里順治十一年舉鄉試第一明年成進士選庶吉士歷官至禮部侍郎性剛介寡交游左遷奉天府丞遂乞歸卜居易水時圃自給康熙五十二年加工部尚書太子少傅

傅維鱗

傅維鱗初名維楨字掌雷一字歉齋靈壽人明崇禎十五年舉鄉試清順治三年成進士選庶吉士入內翰林國史院明年授編修

改內翰林祕書院五年典試江南九年晉左春坊左中允兼內翰林宏文院分修明史維鱗以所纂止二十餘年類編實錄鮮及他書乃搜求明興以來行藏印鈔諸本與家乘文集碑誌得三百餘部九千餘卷參互考訂撰述本紀宮闈紀表志記世家列傳凡七十七曰一百七十二卷題曰明書其後徵其書入史館論者雖議其體例然亦不能不服其勤博也十年御試翰林以維鱗諳練法度習知民情外授山東東昌兵備道時八旗兵駐防臨清南北往來日派夫千計維鱗請於大吏止照勘合定數絳夫量給工食報銷總督李蔭祖據其言入奏得旨允行會山左大饑籌振施糜活者數萬人每徒步田野雜進老農詢疾苦利害而興革之嘗以屯田爲民累窮年芟雜卒無成功乃著屯田苦民書臚列二十款痛陳其害竝建議以墾荒責成督撫道府州縣每一省計所轄原額

除熟田見徵大糧外共荒若干以二十年爲率每歲應墾若干足額者無論溢額者分別賞之不及者罰道府各官勸墾限以一年至秋按畝稽核歲終報部次年照大糧起科則荒者成熟正供漸溢十年之後可墾者悉墾之若有田地化爲巨浸如東昌一帶不可墾者州縣申報督撫查勘止墾勒爲定額事出一手政不兩行庶田無蕪萊賦可充裕所謂日計不足月計有餘也於是御史采以入告果盡除之十二年上以維鱗愛民有治行又學問素裕授大理寺少卿遷太僕寺卿再遷通政使甫五日都察院左副都御史缺上顧維鱗曰無以易若者特擢授之次日卽上勸學疏略云堯舜之世都俞吁咈交儆咨從古聖政卽爲聖學初無所謂經筵 皇上天縱聰明講官侍側其無庸經筵之陳迹明矣况奉有文華殿工成舉行之旨今復以爲言不幾贅乎然黃帝訪道於啞

峒光武論藝於息馬宋眞宗講禹謨於苑中學固不以地限如今
之景山瀛臺皆可講學何必斤斤文華之待也臣請勅命輔臣博
考舊章肇興大典 皇上臨御講官卽援古證今隨方啓沃於經史
之中參以時政之得失反復陳說以盡其致臣尤不欲 皇上之獨
爲學而願諸臣之共爲學凡遇講筵一時大臣卿寺科道畢侍於
是議天下之大計陳兵民之疾苦諸臣有聞輒告 皇上有問輒對
果當上心協公議立使屬草卽允施行不必如尋常章奏僅博部
議之一旨其職掌不明者嚴加申飭甚則罰治如此君臣交儆政
學一致良法美意遠邁前代矣十四年奏言御史巡方期滿復命
宜令條答八事以嚴考覈各部參罰之案毋以升降幸免一切敘
錄不論升降一體議敘疏皆下部議行而密策邊海機務一疏尤
爲 上所嘉納維鱗在諫臺知無不言忠懇周至每一疏出海內皆

仰風采爭相傳誦其條議國用二款及請更役法力言差役之善
僱役之不善至爲詳切論者謂差役僱役各有利弊良民之畏役
已久惟游惰之民樂爲之欲禁樂者之不爲而驅畏者使爲之此
勢之至難也此法若行勢必良民陰僱游惰之民在官以爲差役
在民則仍爲僱役雖官僱與民僱有殊而游惰之民充役則一旦
官僱有定額民僱則誅求無已其或犯法究及僱者利則歸於游
惰害則及於良民其爲弊更不可言此熙寧元祐諸臣所以各持
一見而不能定也周禮有轉移執事之游民僱役之法恐不待後
世而始有大抵治之得失在官不在吏官誠賢則雖僱役亦足以
爲治官誠不肖則雖差役亦足以生姦論治者知僱役之害而謹
防之可矣若欲舉其法而盡變之亦未易言也尋以能圖合疏陳
請更定世襲革職留任十五年召復原職擢戶部右侍郎明年加

太子少保乞假治母塋歸里靈壽地瘠民苦賠糧首率士民具狀請蠲荒賦奉旨俞允十八年補工部右侍郎轉左侍郎晉尙書康熙五年督工孝陵以勞疾乞歸丁父憂哀毀疾益劇卒於家賜祭葬如例祀鄉賢維鱗性伉爽好直言爲學在濟世不屑屑章句之末故其所陳述多直抒胸臆不可以文法繩之著有四思堂集

劉樾

劉樾字玉壘號公愚大城人順治三年進士時簡新進士十人分用六科授樾戶科給事中會大計以撫按糾舉多不實嚴小吏寬大員因疏劾青州道韓昭宣受賄縱叛賊十四人昭宣坐視職四年轉兵科右給事中以秦州游擊潘延吉棄城遁疏劾江南巡按宋調元濫舉失當調元亦坐革職是年樾循大計拾遺例揭山東聊城知縣張守廉贓款爲忌者所中罷歸十年正月吏部都給事中

魏象樞疏奏行大計拾遺例竝陳劉樾坐誣冤狀 上以糾拾反坐
言官壞吏治塞言路命以原官起用授兵科給事中六月充福建
副考官十一年五月疏言近畿水澇之後請救撫臣檄州縣借帑
銀備災黎籽種嚴飭牧令親巡田里勿假手吏胥 上諭行之十二
年復設巡按御史樾條上四事一舉劾無徇虛名宜進悃愾吏而
抑巧宦一禁交結以清賄賂之源一提問禁稽遲貽累一慎關防
無使幕役叢弊皆關民生吏治之要者是年海寇鄭成功犯漳泉
省會戒嚴樾疏言福清之有鎮東衛爲明駐兵防倭之所備復舊
制可障長樂而衛省垣宋元以來設州治於海壇島明初棄之若
設將駐守可與鎮東互爲犄角仙霞嶺乃入閩門戶與贛浙接壤
易於藏姦宜設官控制招民以實其地又海賊數犯京口皆泊平
洋沙爲巢穴如乘賊未至移官兵駐鎮其地賊旣退無可據必不

敢深入內地疏下各督撫酌議如所奏行十三年授山西河東道下車卽榜其署曰存心似水執法如山歷除兵餉侵扣織匠包賂之累山盜竊發單騎諭解之悉散爲農巡方御史疏薦以聞十五年轉河南鹽驛道明年遷湖廣按察使尋擢布政使舊例協黔餉必經楚藩兌授楨改令解官面付不由司庫省胥役批掣留難時日稱較輕重諸費公私稱便次第協濟滇黔兵餉至八百餘萬清逋賦墾荒地除鼓鑄積弊諸事條舉時大兵會勦西山巨寇需糗糧數十萬民苦輓輸多逃逸者疆吏屬楨督運攀藤緣谷履穿衣裂寢食荒榛宿莽中小民感之爭來執役賊平總督張長庚巡撫楊茂勳交章以薦會丁母憂回籍康熙九年服闋授江西布政使值滇藩叛亂楨措餉供兵事辦而民不擾憫江土磽瘠申請免四州縣浮賦撫循流民禁差役追索歲禮躬親振粟民不知饑其帑

藏羨餘前官所私收者悉屏不納清操亮節聲達於朝十四年內
擢太常寺卿道聞江右戒嚴疾驅而返時人心洶懼見楫至歡呼
迎馬首下車部署一切民賴以安十六年遷大理寺卿不數月擢
副都御史疏言江右當楚閩亂後民逃田墟錢糧多缺額不蠲則
逃者不歸歸者復逃荒者未墾墾者仍荒反復疏請上爲動容
特旨蠲免又言楚賊守長沙以大兵由江西道袁州而不知袁州
南出永新不百餘里達茶陵又三百里可取衡州衡州下則長沙
不能守西北辰常西南寶永俱可傳檄定也又言自吳逆叛亂以
來軍需旁午直省督撫無行舉劾大計之典者伏思兵燹之後殘
壤已極正賴賢有司招徠安輯潔已奉公若使不肖者濫側其間
何以澄吏治奠民生息盜賊請令督撫速行舉劾凡經保舉各官
或改行易操一體嚴察不得徧循干咎上是其言下部議行楫

初遭母喪毀甚至嘔血數升患左脅痞疾至是疾復作具疏乞骸
骨溫諭慰留遣醫診視七月遷吏部右侍郎十二月擢刑部尙書
明年四月以病劇再疏乞休俞旨予致仕五月卒於家予祭葬賜
諡端敏樾賦性謹厚與人無忤朝野稱爲長者歷官四省所至必
修學宮建書院講聖諭以經術爲治術善撫百姓如家人父子待
屬吏持大體不爲苛察且勇於爲義讀書學道務見諸躬行詩文
不事彫飾所著有雙鶴堂詩集諫垣疏稿樾卧病時魏象樞詣榻
前問起居樾執象樞手以未報國恩爲恨沒後象樞狀其行以端
亮稱云康熙二十二年崇祀鄉賢

林起龍

林起龍大興人順治三年進士授吏科給事中鯁直敢言不畏強
禦時白蓮大成混元無爲諸教恣行於世首疏請禁絕勿使惑民

聽又以教養之責在守令請以招流亡墾荒蕪巡阡陌勸樹藝稽
戶口均賦稅輕徭役除盜賊抑豪強懲衙蠹振災患濟孤寡修濬
溝池平治橋梁興舉學校十五事考其殿最而太吏以時訪察之
俱如所奏行四年正月劾山東巡撫丁文盛薦大理寺卿王永吉
代之下部議降二級外用尋坐誣劾登州道楊雲鶴贓款削官
世祖親政覽前奏詔來京復原職國初用兵患饑缺八旗禁兵至
不能餬口起龍請敕司計諸臣講求積貯實京內外諸倉儲以備
水旱調發之用且言昔年兵在盛京無餉而富今在京師有餉而
貧急宜更定法制凡駐守征行所需馬匹草束軍裝戎器悉出官
帑估值分給庶籌備有資無虞拮据疏入上諭吏部曰滿洲兵建
功最多資生無策十年以來章奏未有言及此者林起龍所陳條
畫有緒實心爲國嗣後有關政治民生利害興革者言官均宜直

陳無隱以起龍爲法郎諭部以五品京堂擢用仍留原職十一年
轉刑科加大理寺卿銜疏陳州縣官媚事上司耗費不貲狀竝請
道廉能大吏進行各省考其利弊而黜陟之飭部議行尋以疏劾
總河楊方興工部尙書劉昌不實坐杖流 上宥之改降三級調
用補充光祿寺醫正明年授大理寺寺丞十三年薦擢至工部侍
郎十五年調戶部左侍郎總督倉場明年加太子太保請更定綠
旗兵制使兵馬器械無虛額訓練行伍非具文留有之兵裁無
實之費取材技於武科責愛養於總帥章下所司議行十七年加
兵部尙書銜巡撫鳳陽先是立懲貪例官吏犯贓照輕重科罪不
許納贖至是起龍請復舊章收贖充餉 上命九卿科道會議從所
請諭曰立法止貪今因濟餉而貸法如民生何所奏俱不進行 聖
祖初元授漕運總督疏請豁免東海邊居民所遺地糧濟運河開

淮城迤南運河七十餘里直達射陽湖五年疏言漕運倚於河防
 濟寧臨清一帶勢雖建瓴泉湖蓄洩隄閘鱗次請飭有司修築俾
 無廢阻竝疏陳運兵病民運弁病丁之弊以江浙蘇松常嘉湖等
 府折征舊額浮於市價請改征本色 上竝從之初起龍奏禁運
 丁多攜貨物漕運稽遲宜令沿途監司節次稽察儀徵瓜州責之
 總漕及漕儲道淮安責之淮安道濟寧責之濟寧總河及濟寧道
 天津責之倉場及催漕分司以重責成會漕儲道裁缺糧艘至儀
 徵瓜州運丁有額外攜貨者事覺總河盧崇峻揭以聞御史張志
 尹復糾勘之部議坐失察命降三級休致以疾卒於家

袁懋功 兄懋德

袁懋功字九敘香河人順治二年進士授禮科給事中通敏詳慎
 遇事敢言嘗疏請慎簡學官磨勘文體釐定禮制又以前明廢官

援恩詔踵至雜流奔競請命吏部會同都察院嚴核才品竝停各
省撫按舉送皆得旨如所請五年轉刑科給事中八年疏言浙江
織造局以富民充機戶胥吏誅求至有破產求脫者請飭令禁止
尋革機戶名官自買絲募工織作百姓德之十年以集議總兵任
珍罪坐黨附鐫級旋擢太常寺少卿累遷至通政使十二年擢刑
部侍郎尋調吏部十三年以議免員外郎朱世德虧稅事降光祿
寺少卿十六年擢左副都御史疏請命禮臣詳議歲暮禘祭之禮
上是其言舊制直隸巡撫主武生鄉試惟隸京衛者試於兵部至
是懋功請令彙送兵部試騎射技勇用翰林官爲主考試策論十
二月擢戶部右侍郎十七年滇中初定特簡懋功爲雲南巡撫賜
袍馬竝帑金三千俾治裝懋功至滇宣布恩信煦嫗瘡痍令降兵
各自歸農無主之田任其開墾編保甲隨時稽之士官子弟令赴

學官訓課其優者竝許應試行之九載邊徼宴然初滇省駐軍屯田計畝抵餉其後兵不耕而鬻諸民輸糧衛所每畝以四斗有奇爲額至是改隸州縣仍名屯田按舊額徵之視民田賦重懋功疏請酌減糧額竝請於楊林諸所依舊設衛以徵距城遙遠之糧增設各州縣夫役以供輸運竝請停京官丈勘滇地田畝之令上皆俞允時吳三桂驕橫有異志懋功鎮之以靜其部曲皆愛重之無敢犯其法者康熙六年以父憂歸九年起授山東巡撫聖祖召見詢問慰勞賜蟒服鞍馬在任仁慈廉靜正己率下一如撫滇時十年十月卒年六十賜祭葬如例諡清獻山左士民請崇祀名宦初五月濟南大水五十六州縣衛新墾地皆淹沒懋功疏請展限一年起賦格於部議懋功病革時口占遺疏猶剴切爭之有臣卽填溝壑死無恨之語聖祖感動如所請行懋功爲人溫良易直生平

無疾言遽色遇疑事剖以一言立解講習吏治務在休養生息馭屬吏嚴而不刻推誠接物人罔敢以欺售者條上便宜前後以什百計皆關家國大計撫滇九載政績爲諸省冠性尤孝友屢請終養格於例不得歸與兄懋德敬愛甚摯懋功官卿貳時懋德以部屬改省員援故例請避懋功亦具疏求罷人兩稱之及懋功卒懋德方宴客聞訃慟哭踏地絕而復甦座客皆揮淚而散以歲貢生官至運政使兄弟並祀鄉賢

劉鴻儒

劉鴻儒字魯一遷安人順治三年進士授兵科給事中鴻儒以國初賦制未定胥役蠹民上疏略言盛朝創興之始惟安百姓爲第一急務安百姓惟輕賦徭革積害爲第一急務皇上定鼎伊始卽頒詔賦徭經制照萬歷初年及觀順治二年徵納之數較明末之

分數不減且增兵火餘生何能堪此竊念元年清核賦役之詔至三年未見施行三年之清核又不知何年何日臣請先飭有司悉照萬歷初年清核之後再頒定制然衙蠹不革弊孔百出卽賦輕而私索之害無窮州縣六房書吏之設其初每房一書一吏今則增至七八十人朘民膏竊官帑加以虎狼阜快肆行閭閻官受其欺民遭其毒臣請嚴勅部臣申行州縣一切書吏皂快止照舊數簡選備用餘悉裁革爲民間除一害卽爲民間造一福百姓安則人心固人心固則盜賊息久安長治之道端不外此 上嘉其直令覆奏指實鴻儒奏臣籍隸遷安遷安自明末丁銀下下則二錢下中則四錢上地一畝銀七分有奇百姓輸納艱難每多逋欠皇上優卹黔黎下詔蠲免乃所徵之數每丁二錢者加至三錢六分四錢者加至七錢二分上地畝加八分有奇一縣如此他郡縣可

知乞敕巡撫監司清查蠲免庶不致上有輕徭薄賦之名下無輕徭薄賦之實上命戶部覆核免之四年調戶科給事中疏陳畿東鹽法之弊略言鹽政之設因民生日用之需取天地自然之利必使上能裕國下不厲民始堪爲經久不易之策如江淮諸處水陸四達產多食廣招商銷引自屬成法惟臣鄉永平府所屬灤昌瀕海諸處產鹽無幾自明季清初以來行販流通郡邑悉地方有司給票收稅禁遏私販名爲包課而課不失額民頗便之至順治四五年無籍棍徒規時射利亦借納銀銷引之名投認鹽商力承課稅一自納銀之後遂於州縣要地各設鹽店一區行販悉行禁絕扼吭自恣價憑自定升斗抑勒數倍於前如此專利病民卽使國課足額已非善計况諸人本屬赤手實無蓄儲初猶借債以支撐意圖取償於重價然價旣騰踊買者自少及年例應輸之額依然

拖欠封納不前竟至公私交受其困平時有司以承課有人不復
管理及至銷引不及納課失期復以干已考成從而爲之代納則
其累及於有司者又如此昔人云塞人之養而隘其途猶云將以
取利也今此一事而上下咸屬不便則將安用此坐店之鹽商爲
哉臣請勅部察其積弊將畿東鹽店商人盡行裁革所有當發額
引仍責令有司支領給票通商禁止私販務俾正課足額而民不
受累庶公私兩便之道也五年以糾勘失實降補上林苑蕃育署
署丞十年特旨以原官起用十三年補兵科給事中十四年三月
疏言畿輔盜劫之案請嚴飭防守將領按汎地失事之多寡立參
罰降革之科條沿路要害必多設弓箭鳥鎗手馬步相間巡邏救
應賊可立禽窩盜之家發兵禽捕紀錄功次以鼓勵之如此則防
捕盡心而盜賊可弭下部議如所請四月充福建鄉試副考官八

月轉戶科給事中十五年十一月疏言古帝以仁儉造邦其取民也不盡其財其制用也必有其式我朝開國以來百度維新獨於財賦一事度支屢見不敷遂至汰冗員增權務廣開納督積通講求開節之道已無不盡而其實皆不得已權變之策也今南服削平萬邦底定不於此時總計財賦之數準其出入定爲經久不易之規則日復一日因仍補苴豈能長繼臣愚謂天地生財原自無多必權衡於源流本末之間始足供用今賦役既有全書掌握豈無確數請通計一歲內凡賦稅丁徭各省輕贖重運及贖錢事例汰其中猥瑣無藝者所存惟正金粟若干數然後計一歲之中上方供應官吏俸薪兵馬糧料及朝祭禮儀修築工役細至於師生廩餼胥役代食凡各部寺所掌共應用金粟若干數兩數相衡要使所入之數合於所出之數始堪定爲會計之準以永遵守臣又

思國家用財之大端惟兵生財之本計惟土若使兵農同業省度支而紓國計莫善於屯田之法朝廷下民屯之令招集墾荒立意未嘗不善然設官設役多糜廩祿得不償失歷稽古時屯制原不在民而在兵今各省民田尙未盡闢明未廢藩勳舊田土亦所在皆有請各省駐兵之處無論邊腹地方凡田土可耕者悉令兵丁充種先正疆界信賞罰以使之尤當豐其種具寬其程效行之數年收穫既充則額糧可減儲儲益廣則轉輸可省且立有恆業漸成土著足以默制譁變之心唐初府兵之制無事執耒耜有事執干戈不借司農古稱良法至於新復之地行之尤便今蜀黔已入版圖所得之地必需駐守若令處處興屯則根本自固戰守咸資此又漢臣趙充國之於先零晉臣杜預之於宛葉確然可循之遺策也抑臣又有請者畿輔之地被圈以來民多失業今喜峯冷口

諸關外大寧以南地方彌望千里咸稱膏壤請令民願出邊開墾者許爲己業永遠承種數年後漸次起科成聚成邑堪作神京之保障茲二者皆軍國大計若當事設誠致行久之兵食充足國計可以漸紓民賦可以漸減不惟經費有資抑且緩急可恃此億萬年不拔之基也 上俞其言十七年遷順天府府丞尋授左通政十八年遷太常寺卿康熙三年授通政使六年擢兵部右侍郎八年轉左十年調戶部右侍郎十二年轉左十二年九月遷左都御史先是鴻儒官戶部時甘肅巡撫華善擅發倉糧振濟災民部臣循例題參竝議罰賠鴻儒無異議至是官都御史疏論華善不應參處請嗣後督撫大臣有濟世利民之舉當準情酌理不宜拘以文法給事中成性劾之下部議以鴻儒先未立議後以公議已結之事指摘沾名降二級調用尋卒於家祀鄉賢著有四留堂集

高景

高景字似斗新安人順治二年舉於鄉明年成進士國初用人不
次新進士甫釋褐卽召試館職其副卷之優者皆補科道景初授
湖廣道監察御史多建白侃侃有直聲出按宣大以事左遷回籍
值土寇數千人乘大水以舟泊城下城幾危景率進士楊行健同
心捍禦出奇兵擊賊殲其魁餘黨悉散起補山東鹽運司經歷內
擢京秩數遷至太常卿歷通政使宗人府丞上察其才可大用
擢爲兵部右侍郎以母憂歸服闋補刑部右侍郎轉左旣改戶部
總督倉場遂督工部尙書旋調刑部景長於經濟遇事敏而詳和
而有守由言路歷卿貳所在著稱議事務持大體不爲苛碎博聲
譽前後蒞西曹久讞決精明以欽恤寬大爲本凡可生全者必傳
經典爲平反或請創造刑具爲滅耳之校節以鐵景婉辭謝之曰

奈何令後世目吾輩爲酷吏乎聞者赧然而罷江南逋賦興大獄
當逮京者數千人景偕同列力爭得就地勘結姦人借野史傾善
類或攢撫居爲奇貨景力排解獄以無株累其平恕不阿率類此
時有修造贖罪之令僥倖者蠶起訐訟紛然景持正抑之反爲所
中與同官皆落秩以免及再補官竟令致仕去人爭爲不平景歸
里絕口不言人尤服其量云景頎然玉立儀觀偉然磊落善談吐
世祖每於班行中指目之遂被知遇及解政厝里值 聖祖兩巡畿
甸景迎覲慰勞有加禮賜蟒裘蟒袍鄉里傳爲盛事景性豁達樂
易見義勇爲與人無城府直躬坦懷見者意消好客能食酒每高
會引滿慷慨自豪人莫能當也然內行修謹事親孝喪祭盡禮恭
兄友弟始終無間言鄉人化之康熙二十年卒年七十有四

名臣傳二

大清畿輔先哲傳弟二

名臣傳三

大清畿輔先哲傳第三

天津徐世昌撰

楊時薦 兄時舉

楊時薦字仲升號賢甫鉅鹿人幼孤與兄時舉事母孝母卒兵火
 臨境兄弟守棺不去兄病躬自祈禱願減己算益兄壽時薦病時
 舉與同卧起者浹歲湯藥必親人以孝友兩稱之時薦順治三年
 進士官山東聊城知縣時東土甫定崔苻充斥時薦威愛兼施蒞
 三載盜息民盜輿人頌之錄善政刊為成書循卓之聲冠東郡十
 五年分校鄉闈得士六人皆成進士報最擢兵部主事歷郎中十
 八年充山東副主考以得士稱尋僉憲中州整郵傳理鹺務鉏姦
 剔蠹夙弊頓清旋攝學政築錄遺兩河士八百餘人創建社學晉
 鴻臚寺卿轉宗人府府丞遷左副都御史侃直敢言疏陳時政多

見諸施行奉命祭告秦蜀旋京升兵部督捕右侍郎讞獄平怨恐
民蹈非罪刊律例示世竝編爲歌詞條分縷析俾家諭而戶曉之
天下多陰受其福時薦性仁厚爲秀才時恆閉戶潛修不妄交游
見古人忠孝遺事輒手錄之以自策勵於爲善最樂一言尤身體
而力行之生平宦轍所至以子惠爲先窮民無告者施濟無倦色
遇大兵大荒之後加意撫循至去積弊懲巨愆則毅然無所撓生
平清白自持所守若寒素嘗自著當官功過格一册自省竝著鑒
徵錄觀善錄行世康熙五年卒年六十九時舉字良甫拔貢生明
末飢人相食時舉發廩濟之匍匐於道者給飲食助糧糗使還其
里漳水災捐貲築隄與細民共甘苦兄弟同祀鄉賢

于嗣登

于嗣登字岱仙安州人少好讀書足不出戶閩性至孝初領鄉薦

以祖母疾不赴公車州長造廬敦迫見其誠懇惻然曰孝廉何減李伯令耶太息而去登順治三年進士特授侍御史任兩月以監禮太廟失儀罷歸里居十年用薦復官遣視兩湖鹽政清逋裕餉部內有大猾爲害積不能制嗣登捕眞之法報最掌河南道事監視吏兵二部尋遷吏科給事中轉禮科章疏皆關大計時論躋之升光祿寺少卿累遷刑部右侍郎多所平反人號曰今之于公凡爰書有不當者輒獨上一議或勸阻之嗣登曰此心無愧此官安足惜會更定處分光棍例嗣登又獨主一議忤旨降補光祿寺卿未幾升大理寺卿康熙十八年以病歸卒於里囊無一錢五十八年祀鄉賢

張自德

張自德字元公號潔源豐潤人年十六補明生員十九隨王師而

東遂隸籍藩下順治四年成進士授慶都知縣縣瘠而衝自德整飭郵驛乘傳使客無敢需索舞弊者胥吏素爲民患完欠混淆自德盡法繩之逋賦以清暇則葺學宮興文教風化大行報最行取補貴州道御史視鹺兩淮時秦楚軍需浩繁率取給淮鹽自德躬督轉解士馬飽騰豪右悉斂手課額增倍入掌河南道管京察大計執法不阿陞大僕寺少卿協理督捕堂事歷通政司左右參政大理寺正卿以右副都御史巡撫陝西尋罷職家居康熙元年起復原官授河南巡撫河南遭李自成亂決河灌城墟莽無人迹諸官吏皆駐雍邱自德倡捐修築不數月建置一新屹然爲一大都會而民間不費一錢自德終日坐堂皇理冤抑奏釋房有才輩十有三人其叛案之株連藩產之蔓引一經鞫訊圍室爲空其性忼直不能容人過見者多股慄然好賢下士遇廉能之吏殷勤獎掖

未嘗見其疾言遽色也在任六年循聲卓然上以其修城墾荒振
穀完漕諸政績特晉工部尚書加正一品尋奉旨巡歷郡邑以勞
致疾卒年六十崇祀河南名宦祠自德留心國計民生章奏尤爲
剴切中時弊先是西山構亂豫省僱募夫役以濟軍全境騷動自
德抗疏爭之謂西山隸楚境向因房竹諸邑爲賊踞道路梗塞不
得已令豫省協濟今房竹已通而僱募如故民不堪命請罷其役
下部議行又茶馬院請將監馬分給河南各驛自德疏言八九千
里外牽領煩費且領馬必償價豫省蠲荒後驛站額銀尙不足養
舊定額馬更以何者充新馬之價乎議遂寢自德著有四要六弊
諸篇專言河工之事省工節帑人尤奉爲治河之準的云

徐化成

徐化成字文侯昌平州人順治四年由貢生授光州知州光當楚

三
三
豫之交遭闖賊蹂躪民流亡無寧宇化成招徠撫輯界口食給牛
種俾各安其業又修築舊城以捍衛之定鼎之初大兵所出道多
倚勢爲民害大帥肆武力往往橫加於守令化成每先期備車輛
峙芻蕘戒館舍具牛酒以待兵至民不知擾州舊有懋振彬三文
社遭亂廢學復創爲貫社聯之以課士子建廟學崇祀典四境始
聞弦誦之聲七年遷台州知府值歲旱步禱雨立霽蝗災復禱於
天有異鳥羣集食之盡歲獲大豐人驚爲神鎮兵以缺饑譁於途
化成檄黃巖太和二邑米運江滸貯天寧寺倉卒夫不繼化成徒
步率眾役挽攜百姓聞之爭先來助頃刻而畢升台無耗台州總
兵馬進寶縱士卒爲暴化成奮詞與之抗馬恚甚譖於總督陳錦
錦疑之輕騎往察見吏事整肅歎曰此賢太守也馬帥幾誤我由
是愈重化成郡有大猗某竄山海間謀倡亂化成密以計生致之

諭曰若壯士豈終爲盜邪釋不罪某感泣願効死於是亡命舟山者聞之皆鳥獸散八年升苛嵐道副使台民赴闕請留計千百數時苛鎮總兵馮某失拊循斃於兵人情方寃孰化成以鎮靜持之舊額兵數萬新裁止二千餘人同其甘苦用寡如眾十年調山東萊州道勤修庶政一如治光台時十三年擢廣東右布政使當嶺海用兵化成兼攝臬司軍需仰給無或後期其理鹺政糧驛釐剔尤當藩鎮制府皆嘉歎其才十六年轉河南左布政使時奏銷獄起負課者千餘人將罹不測乃捐金三千輸之庫皆獲保全又出俸錢濬棘院周濠添號舍設薑粥藥餌治豫十二年政績卓然康熙十年召見上改容嘉勞擢都察院右都御史次年授湖廣巡撫嚴舉核請蠲貸絕苞苴慎刑獄勸開墾恤戍卒期年之間百廢具舉時漕運繁劇自支運改兌邇旂丁卽水次與民交斛有脚

費溢耗諸項糧之輸於上者十四飽於下者十六楚中疆域遼闊積弊尤叢化成嚴飭運官以批其根重繩衛胥以絕其窟盡破歷久沿習之害漕政之肅爲三十年中所未有繼至者皆遵行之是秋監臨楚閩士有屬作而疾作者調以湯藥卒賴以獲雋舊例題字點畫訛者輒束卷不膽化成受卷亟閱必追其人改之始啓鑰縱去其恤民愛士若此化成幼時力學攻苦父應祿早卒事母至孝年十五補博士弟子員學使卽以大器期之次年出關伯陽郡王愛其端雅俾司帑藏化成於持籌之暇日夕窮究書史卒用儒術美其吏治世祖留心疆吏書其名御屏每遇遷除輒指之姓氏幾至漫滅人稱其受知之宿云康熙十三年卒年五十四祀河南名宦十六年崇祀鄉賢

趙之鼎

子致

趙之鼎字潔菴滿城人父國棟有孝行偶出游道遇遺金拱立以俟還其人之鼎中順治五年舉人授浙江淳安縣知縣多惠政奉檄造海船工省而民不勞遇丈量之役躬自履畝姦豪不得逞民歌曰趙公我母嬰啼而拊康熙時總督范成謨特疏薦擢監察御史時海內用兵以籌餉爲急之鼎上疏略曰兵食資於民民食資於力欲盡其輸將之力毋違其耕耨之時不違其耕耨之時先減其詞訟之累請飭督撫首察貪墨吏毋致妨農足民卽所以足餉也疏入上納之累遷刑部侍郎常語人曰秋官職司明允一有弗慎下筆刀利紙上鬼啼矣引疾歸卒長子珏貢生浙江嵒縣知縣有長厚稱次子玫字文玉號蒼漪貢生官慶雲縣教諭邑瀕海士不知學玫修廟庭設兩廡木主及釋奠俎豆月課諸生其中供飲噉甚豐有宗生不檢切責之卒爲善士母憂去生牽衣拜且泣曰

眞吾師也送者皆感動泣下擢河南上蔡知縣縣歲有河患隄潰則責之民致出倉穀給役者一月工竣催科不假手胥吏先輸者鼓吹送之不及者緩其期不得已後刑刑示辱而已民爭相勸恐後境界鄆城西平遂平三縣豪民謀決隄壑蔡蔡人集眾將與決死鬪致馳諭散之牒陳利害巡撫委員詳勘蔡賴以安修上蔡書院增置義田三千畝延宿儒王涓主之人文爲中州冠學使陳某語人曰義學之役徒長吏爲名高耳若上蔡可謂實有其文矣刻石表縣治揭雜派私徵諸不便民者若干事悉革之以什伍法編人戶姦民無所容除里豪張宏略呂調韶等境內肅然兩攝西平確山一如治上蔡去之日民泣涕如失父母年六十六卒父子同祀鄉賢

郝浴
子林

郝浴字冰滌一字雪海復陽其別號也先世由山西洪洞遷定州歷數世至大鈞以貢生考授通判隱居不仕撰同然集四卷皆古人經世濟物之學浴其子也生有異質慷慨負氣節年十五能通六籍百家言高自期許明末避亂山中日手易一編夜步河干值大風雪失路猶誦讀不輟素不屑爲俗儒章句講求古今治亂興亡之故慕諸葛孔明李鄴侯之爲人順治三年舉於鄉六年成進士出灤州石申之門許爲國士殿試陳時事數千言授刑部主事兼攝郎中事爬梳弊孔老吏不敢欺言論風采傾動一時尋改授湖廣道御史巡按四川是時張獻忠餘黨劉文秀盤踞滇黔南寇川中焚屠徧四境有司多武弁恣爲貪虐浴至披荆棘立約束豁免逋租罷長吏之不職者兵將皆斂手不敢爲民毒九年吳三桂統重兵屯川南所部無紀律憚浴嚴正令各路不發塘報浴疏言

臣忝司朝廷耳目而獲闕若此安用臣爲實陰刺三桂也旣三桂爲賊所敗走綿州浴時監保寧鄉試文秀等合眾數萬薄城土子倉皇思竄走浴揚言秦兵旦夕至而密令總兵嚴自明環城以守飛檄邀三桂赴援責以大義且謂不死於賊必死於法一晝夜凡七往三桂不得已逾月乃至浴面授方略且言賊可破狀賊踞錦屏山勢張甚浴憑堞指揮矢石過耳屹不爲動賊夜渡嘉陵江繞出城後浴輕騎出入行閒激發將卒心背城力戰大破之捷聞世祖知浴才可辦蜀詔問收拾全川之策因陳善後法略言籌蜀必及於秦大兵勦賊借陝西運餉道遠費繁勢將兩倣宜移左右路與四鎮之兵屯田成都竝招流民開墾借給土司牛種屯耕一年可抵輸運二年之利又言滇賊履山嶺如平地蜀中土官土兵尤嫻於此宜簡其精銳爲前茅而以滿洲雄騎壓其後三省齊驅一

戎大定奔雷迅霆之下寇必鳥獸散矣 上嘉其奏下部議部臣以
戰守機宜應由三桂酌籌履其議浴又言土賊投誠給劄授官恣
行劫掠爲民害請嗣後願歸伍者聽其願爲民者卽令有司造冊
編丁以資生聚累年雜派牛租民力不堪請一切免除就熟地開
征俾民賦有定額疏皆下部議行又劾奏永寧總兵柏永馥臨陣
畏縮廣元副將胡一鵬驕悍不法狀竝奪職逮訊方保寧之奏捷
也詔頒賞將士三桂因以冠服與浴浴不受疏言翦平賊寇平西
王責耳臣司風憲不預軍事而以臣預賞非黨臣則忌臣也因疏
劾三桂擁兵觀望狀三桂銜之刺骨先是參議董顯忠等皆以副
將銜改授司道等官爲民虐浴劾其不識文字還原職三桂乃嗾
顯忠訴於朝三桂陰左右之坐是降調甫歸里十一年湖北巡撫
缺閣臣馮銓陳名夏成克鞏呂宮張端合奏浴文武全才堪大用

三桂懼浴再起乃摭拾保寧奏捷疏中語誣以冒功欺罔欲置之
死世祖燭其枉從寬流徙盛京當是時三桂跋扈蓄叛志招納
亡賴凶燄日張疆吏攫其鋒者禍立至浴以一書生與之抗發姦
摘伏言人所不敢言士論歸之至鐵嶺益發憤於學築書室三楹
顏曰致知格物之堂日夕危坐讀書其中其學以主敬窮理爲工
夫身體力行爲究竟偶有所得雖中夜必披衣秉燭書之垂二十
年志益堅性益定行哦坐嘯不知身之在窮荒也康熙十年聖祖
幸奉天迎謁道左具述按蜀始末上改容傾聽慰勞者久之十二
年三桂反朝士爭訟浴冤且言三桂之所仇正國家之所取府尹
魏象樞再疏保舉且曰郝浴才守學識臣自愧不如願以職讓部
議格不行特旨召用復原官上章首言聖學聖心爲戡亂大本兼
請召對滿漢諸臣商確大政勿待事至後議詞剴切詳盡時陝西

提督王輔臣叛應三桂跳梁秦隴閒浴疏請分兵駐秦隴寶雞以固棧道防隴寇東下然後坐困平涼固原之賊遣驍將急趨西河扼其衝以鄖陽兵攻興安調河南兵入武關斷商洛之路以取漢中而於袁州一帶聲言進取長沙以牽制賊之全勢虛實交用賊成禽矣 上深然之 下其疏於諸路施行浴以軍興以來民間供應轉輸弊端百出因奏言兵者國之神氣民者國之元氣未有元氣足而神氣不旺者今民間納糧多額外征求致正額反缺招買軍需名爲市易實則攤派里民比及發價官役互侵於解餉時又多索收餉之費種種弊端括民以益兵將來民窮財盡餉無從出兵民交倣可立斷也請敕督撫嚴察以爲今日用兵根本大計至籌餉之法請留山東河南額征正耗米折銀兩免運京通各倉以濟軍需一轉移閒可得餉銀六十萬兩疏竝如所請行十六年巡視

兩淮鹽課潔已率屬宿蠹一清以稱職復留差一年裕課數十萬
加太僕寺少卿准揚大禮倡議設六廠振饑民全活數十百萬親
履各場設閘引江海潮水灌河渠通鹽樓百廢具興擢僉都御史
未逾月晉左副都御史明年奉巡撫廣西之命陞辭日奏言畿內
重地宜厚加培護秦民輸輓頻年勞倍他省宜破格優恤兼條析
粵西事宜皆稱旨賜御廐良馬一單車之任地經兵火後閭閻凋
敝官斯土者多玩民行私乃設匭通衢許冤抑者控訴糾十餘人
屬吏皆凜凜奉法乃條陳善後事宜大略謂粵地鳥道猿蹊水多
瘴毒養馬十斃八九又新經添設冗兵數千糜餉無算竝宜裁汰
至鎮安泗城二土府界連滇黔土賊出沒田州爲安籠門戶殲蠹
二營係控禦交南鎖鑰梧州一郡居兩廣之中扼三江之要皆宜
增兵防禦而省會重地尤須良將勁卒以資驅策 上是其言悉聽

浴區處初滇中班師例由黔楚後假道粵西爲民累浴請復舊例人慶更生裁兵謀亂爲捐米千餘石資口糧送遺遠近晏然時議裁標兵節部餉浴再疏言粵西外控土司內制猺獞裁之不便於是各省撫標俱獲留又請卹死事諸臣以勵忠節資給鄉舉衣冠以作士氣建立書院以勸來學稽覈支領以清浮冒皆次第舉行粵境大定二十二年積勞卒於官年六十一士民奔走巷哭者三日喪歸熱香送者數千里不絕語及皆實涕云初巡撫傅宏烈以軍需移取庫金七萬有奇米七千餘石浴泣任擬以庫項扣抵及卒護印者誣其侵欺部議革職追補上曰郝浴廉潔素著其所動吏非人已著免追取後其子林復上書訟寃復原官賜祭葬如例初浴按蜀時營將多新附擁重兵自固跋扈無狀聞欽使至又白面書生也意輕之一日諸營盛陳兵衛邀浴宴浴單騎往一揖

登上座將帥以次行酒走卒捧肴烝至則以巨鼎盛人頭進浴拔佩刀剋一目大啖之談笑自若聲如洪鐘壁衣中甲士數萬人皆聘眙噤齟不敢動將帥爭藉藉耳語曰郝公真天神也自是帖服無異志有李某者高陽李燾之族謁選得四川令乃薦之浴偕行至保寧圍中浴正監試與同官談論經義若常時李晉謁時見兵甲摩戛有聲目直視不語呼之已僵矣救之甦乃進之曰相國薦君有膽勇今異懦若此徒膏斧鑕耳浴少有至性念祖喪未葬輒掐左臂肉以志痛長篤學見義必爲嘗慄四十無聞之懼奮身自擲幾於傷股與人交和易曲盡至當大事發大議他人張皇失措獨不動聲色處之裕如生平所遭多苦境用世之志歷久益堅嘗與容城大儒孫奇逢論學自道其所得謂往者竊取聖賢窮理盡性之書日循其說晨昏省克至廢寢食又時於求道之家密證切

問以庶幾於一旦之獲而漠然未有人也致成重疾復出入諸家
求其所以然而挾其弊久之忘焉反之於曾子孟子及兩程子之
學孜孜研入時若偶有所窺因參之六經以合於宋明諸儒若有
別也爲之放懷天地縱觀古今前三代締造良法後三代開創大
政又思所以適於治之正理乃確然深信兩程子之學於聖門爲
契合卽與周子朱子明之薛王俱屬無論諸儒也浴之學酷嗜孟
子及二程遺書謂非由孟子無由入孔子之室非由程氏無由升
孟子之堂平生自得實在於此其所爲詩文慷慨踔厲浩然沛然
如干將莫邪不可逼視蓋合義理詞章經濟三者而一之者也著
有易注孟子解中山史論中山奏議朱紫陽大全始條理編中山
詩文集行於世

林字中美一字筠亭順治十一年生於銀州戍所少讀書機警七

歲能屬文長益肆力於學康熙二十一年登進士明年丁外艱服除補中書科中書舍人遷吏部主事旋升員外郎隨少宰勘獄陝西同事或敗於賄以林嘗爭執獨免四十二年入禮闈四十五年擢郎中持已廉正練於事情姦猾吏皆屏息搖手終其任無敢以意稍有所進退時目爲鐵面選司尙書富盛安凡事有難決者必曰視郝選司故案見重若此四十六年授禮科給事中明年典粵西試轉吏科掌印預會議侃侃爭執每至再三有不得或牽率書題林獨否遇秋審亦然九列皆相顧曰郝君平日恂恂長者今乃如是皆歎服五十年升光祿寺少卿轉太常升通政五十二年遷太僕卿明年命爲奉天府尹奉天寄籍者眾命案滋多林蒞任令戶懸一牌大書戒酒戒鬪戒帶小刀於上出入觀之踰年命案減半禁倉穀之勒借而淨收者凡田宅之歧界者清之子女之鬻

他省及典旗下者請治其罪曰吾以實陪京也五十四年晉宗人
府尉丞旋升左副都御史務持大體以風僚屬擢工部左侍郎部
事繁重多弊實鋪戶例得預借錢糧數萬兩按期責程輒誤公事
有某鋪欲循故例屬居間者微言願為壽林正色曰此朝廷物敢
輕以絲毫假人終不許外省奏銷及解硝筋棕毛等物例有部費
解銅鉛者則曰解費一切屏絕之 聖祖崩龍輻奉移景陵林奉命
祀土前後復遇 孝惠章皇后 孝恭仁皇后喪皆倚之以辦雍正二
年丁內艱奏請終制 上諭同籍營葬事畢來京明年特旨補侍郎
林入都以老病力懇解退 上溫旨勉留林感泣入署比歸寓即白
衣冠以居者三年四年調禮部左侍郎以目疾乞休奉有老成謹
慎之褒特予尚書致仕林以工部積遺例應分任居邸者六年奉
旨寬免因泣下曰皇恩如天豈獨私老臣顧老臣無以報耳十年

九月卒於京邸年七十有九林篤內行丁父艱三年不之私室以
其母王早卒不逮事忌日輒思慕涕泣迎養繼母蔣於京邸有珍
羞必先進嘗之而後退推蔭於兄子誠燕而語其子曰汝當自奮
也族人走京師告急者輒傾囊以授歲歉輒命家中分穀貽之
初林年三十未舉子叔爲置妾至則泣曰人廷我不爲妾也林卽
處之別室呼其父母還之且給道路費屬曰善擇壻毋再廷於人
生平不喜事不沽名在諫垣未嘗爲矯激摺奏皆自削藁雖子弟
莫得聞嘗請禁餽送嚴勒索以杜虜空之源又請疏通教職壅滯
皆獲施行雍正三年特命京官俸銀米相等如旗下例迨林告休
上召廷臣諭曰此郝林所奏也其慎密如此著有奏議一卷徂東
遺懷一卷使粵吟一卷唐水詠草一卷春明雜詠一卷

宋文運

宋文運字開之南宮人生而穎敏苦學年十五補博士弟子舉順治二年鄉試六年成進士授山東滋陽知縣時軍興驛驢文運供支無缺而民不擾遇訟者親錄兩造供吏不能上下其手八年辛卯充同考官得士六人先後皆捷南宮十三年升刑部主事兢兢守法漠然無他營過從稀少以清介著稱十五年遷吏部文選司主事向例部吏參送治罪無袒衣受杖者積久玩生文運謂此輩何知體貌遇怠惕者立行扑責諸吏皆凜凜一時銓規最稱肅清康熙元年丁母艱七年升員外郎明年典雲南鄉試九年升郎中掌選事謹守資敘按俸題請不於格外私厚一人亦不於法中妄抑一士意所不可威勢弗能奪也十二年內升回籍十八年左都御史魏象樞疏薦文運清直不阿十九年授鴻臚寺少卿踰月升光祿寺卿旋擢順天府府尹光祿之擢未經部推府尹之缺例應

迴避俱奉特旨用之蓋異數也文運在順天凡事不便於民者不
數月革除殆盡豪蠹斂迹畿甸肅然一日上諭大學士曰居官者
以清廉爲尙今朝臣有如于成龍之清者否馮溥奏稱文運有清
名而家甚貧上曰清廉不在貧富謂富者必貪而貧者必廉可乎
亦視其人居心何如耳二十年擢都察院右副都御史是秋侍宴
瀛臺受蟒袍錦緞菱藕之賜明年上元侍宴乾清宮觀燈賦詩用
柏梁體文運句曰恪遵訓厲敦羔羊可以見其志矣奉命祭告闕
里升刑部右侍郎時河決徐家灣蕭渡諸處上命偕戶部尙書伊
桑阿往勘適布政使崔維雅奏呈所輯治河書並條列二十四事
欲改河臣靳輔所行減水壩法上命帶往江南會同靳輔議奏旋
召文運與伊桑阿至御座前諭以黃河潰決關運道民生務與靳
輔公同商酌勿各執己見凡會議事宜必一一陳奏之又諭文運

曰爾初往閱河如有確見務堅持詳議毋以伊桑阿爲尙書阿意
順從治河最難勿視爲尋常玩忽貽誤也十月還奏斬輔建議大
修河道無成效崔維雅改議修築亦不可行 上卞廷臣議仍從斬
輔文運回部日坐堂皇治文書以刑官任重與諸司約勿妄意增
減卷案顛倒字句勿宜急而緩苟且遲延勿宜緩而急希圖朦混
文案公同簽押勿私改牌票務奉堂批勿濫行守法奉公無違欽
恤至意二十二年正月 上御乾清宮廷臣侍宴賜表裏馬匹文運
與焉二十三年以病乞休 上以文運謹慎廉潔加太子少保致仕
七月卒賜祭葬予諡端慤二十五年祀鄉賢二十三年 上念文選
司重要先年郎中宋文運操守聲名今無一能及之者命傳諭吏
部知之可以見當日君臣契合之盛已

張士甄

張士甄字繡紫號鐵冶通州人順治六年進士選庶吉士授編修
 累遷贊善纂修順治大訓及通鑑全書同事服其淹博多就裁焉
 尋遷諭德時世祖常進詞臣試滿漢文義士甄輒居前十四年遷
 國子監祭酒葺辟雍飭條教集六館諸生月程而季課之上幸
 太學眷注益篤明年遷庶子分校禮闈十六年遷侍講學士主武
 會試聖祖御極擢國史院學士奏對皆稱旨賜貂裘寵之康熙五
 年丁母憂服闋補內閣學士十一年駕幸薊州士甄扈從馬疲賜
 御馬更之尋升禮部侍郎丁父艱十六年補前官甫兩月改吏部
 侍郎疏壅滯謹黜陟澄敘流品一時有冰清衡平之頌是年詔舉
 博學鴻辭士甄所舉皆名士有重望者壬戌賜宴乾清宮上首倡
 柏梁體詩士甄以次屬和蒙賚文綺四廐馬一繼命祭恆霍諸嶽
 值山右裁兵無所歸譁於路士甄語巡撫善部署之民用不擾又

以河東鹽課積逋爲商累撫臣疏請下廷議士甄剴切指陳竟豁免商困以甦二十三年晉刑部尙書奏讞稱平恕乙丑主會試榜發呈前列十卷温旨褒答之前未有也二十六年轉禮部尙書訂太皇太后升遐禮調吏部以冢宰爲六卿長不徇已不苟同一持以正大而臨事必熟覆者再每啓奏敷陳明晰如列眉指掌本末該徹 上以此益重之三十二年以老病致政杜門課子里中若不

知有張太宰者 上東幸過州城迎駕道旁屢叨優禮士甄歷官四十餘年恪恭謙慎當代推爲巨人長者三十二年卒年七十遺疏入 上痛惜之

張文衡

張文衡字聚垣赤城人早孤事母以孝聞崇禎七年遇清兵獨石攜之去擢文書館參機務與范文程同事特簡大臣女配之定鼎

後枚上相文程薦爲儲相順治元年出知青州府誘禽流賊餘黨
趙應元山東平移守淮安修戰具軍需應機立辦無缺供禁士卒
入城擢徽寧道副使剿滅土寇劉時祥累功升江南按察司巡撫
甘肅至則自潼關抵肅州三千餘里置十驛募遞運教邊人刈穫
法貧不能具牛種者給以貲又爲置醫藥療疾月課士子出膏火
資之適總督孟喬芳調回兵征川寇其酋米喇印丁國棟結生羌
入蘭州爲亂殺總兵劉良臣文衡倉猝聞變集親丁三十四人巷
戰中流矢死尸立不仆賊驚懼羅拜誓不敢犯眷屬尸乃仆文衡
精陰陽家學赴甘時僚友讌集忽大風起眾請占之曰此應關西
極邊有變殞二大僚其一卽我至是其言果驗年四十七贈都察
院右副都御史賜祭葬建坊廕一子入監崇祀鄉賢祠

陳協
兄愷

陳協字念蓋文安人與兄慎俱以治行著名慎字懷蓋順治十年以明經爲崇明知縣崇明孤縣海外爲島賊所覷甫下車卽撫瘠民嚴保甲選偵探備城守崇人悅之作謠歌道其事四越月張名振擁眾入吳淞劉河福山燒殘無完土據崇境山前大安排山等沙慎躬督將士攔城兩戰大創之崇得以不陷慎長于心計雅負遠略常相形勢創平安壩以遏兵衝築施翹河東阜沙平洋沙三土城以屯難民兩邑聲勢得聯絡民賴以安又自高橋洪至四漊河築隄長百二十里以防賊舟乘潮登岸十六年鄭成功入崇明總兵梁化鳳奉檄援江甯兵去城空虛民大恐慌慎督鄉勇伏而擊之俘獲無算八月賊率舟師三千環攻城以洩金陵之憤城壞數十丈慎誓以死抗躬督眾修葺之賊計窮解圍去督撫方露布上其功而主計者以兵餉未完革職崇明士民萬餘匍匐兩院哀

詞籲留事聞 上以愼全成功大復其官擢知州旋卒贈布政司參
議照殉難例諭祭葬廕一子入監後敘江南平寇功 上諭再給拜
他喇布勒哈番准襲替一次誠異數也康熙四十五年祀鄉賢協
順治三年進士授中書舍人究心當代掌故擢戶科給事中遷禮
科升工科都給事中 世祖初親政宏開言路協尤質厚非軍國大
計不以上初入禁垣首言請定賦役預以易知由單布海內俾民
不重科官吏無乾沒 上嘉其奏命司農修直省賦役全書開國
之始諡法未定協請列事蹟議之太常秩宗請當之覈定本朝有
易名鉅典自協議始宣大爲雄邊號饒沃自姜瓖之亂城若甌脫
又裁宣撫與口北道協力言修復之便文安苦鹽課攤派疏請蠲
之又痛陳凶荒籌子傭工一事 上爲之動容協每恨舊朝臺諫
以門戶恣其淫議往往以空言僨事故介然獨立不抗不墜務循

職守無出位之思 上深倚任之補太僕寺少卿遷鴻臚寺正卿
轉通政使司左通政宗人府府丞旋擢都察院副都御史既一歲
累遷協益感奮効忠知無不告嘗疏言今日興屯之利可以生財
不宜裁官俸汰工食效錐刀末術尋升兵部右侍郎理督捕事督
捕者主勾覆隱匿之政專察八旗逃人始任是者多以縱舍不稱
職協至則首在申明條例刊行教約下督撫榜郵亭卽窮徼老稚
皆通曉不敢犯復依滿洲例每僱買人口官給符票使眞僞易辨
株蔓者得以不寃改戶部右侍郎總督倉場倉場向稱弊藪姦弁
侵盜主藏耗蠹視爲固然協立期會不絲毫假借公私悉使之及
卒賜祭葬如例康熙三年祀鄉賢祠

劉芳躅

劉芳躅字增美宛平人父餘祐官至少保芳躅年十歲從餘祐中

州明上洛王一見奇其丰采妻以女順治十一年成進士改庶吉
士散館授編修充日講起居注官十六年遷侍講尋進內宏文院
侍讀學士康熙五年充明史纂修官遷內祕書院學士六年充會
試副考官纂世祖實錄充副總裁七年以都察院右副都御史巡
撫山東至則請免秋稅蠲丁徭以振災功加工部右侍郎銜八年
疏言山東眾山綿亘瀕海臨河爲盜賊淵藪請復設東兗登萊濟
東青州各守巡道以資控制地方緝盜預勒名數多誣扳之弊請
嗣後報盜止陳失事情形不得預勒其數若硬坐抵充至死者以
故殺論又以盜案覆審與初供不符原審官畏顧瞻徇不免冤濫
請凡獲盜初供不必先敘俟審實列奏以成信讞俱得旨允行先
是東省鼓鑄局以銅缺多買舊錢供鑄舊錢已盡而銅缺如故疏
請徹局停鑄以杜糜費山左多勝國藩產正供之外仍取租累民

竝奏免之有黃培者以謗誹繫獄數年株連者眾芳躅讞實坐培罪一人餘悉奏釋十二年以事調用遂告歸卜居易水上與弟芳詰往來大房諸山中以詩酒相娛樂著有留雲山房集

鄭端

鄭端字司直一字德信棗強人父芋有隱德艱於嗣明末家毀於賊事平得諸土寇名不與究至是連舉六子端其長也順治十四年舉於鄉十六年成進士授庶吉士又二年改工部主事康熙六年擢員外郎奉命巡視三楚蘆政刑疵剔弊人弗能欺次年升戶部郎中八年典試江西九年遷貴州提學道按察司僉事以興學育才爲己任人文蔚興旋丁父憂服闋大學士王熙刑部尙書魏象樞交章薦剡十五年補陝西神木道僉事屬滇黔用兵羽書旁午事無留滯時制府尊嚴藩臬而下率長跪伏謁端獨守庭參三

揖之制同列咸震駭錯聘制府知其賢笑而受之十六年以前任
事徹回工部丁母憂歸二十一年補浙江台州巡海道署糧道巡
撫趙士麟舉爲兩浙廉明第一二十四年調陝西涼莊道嚴斥亭
堠桴鼓無驚政暇葺理學宮日與士子講習邊人師之彬彬如內
地二十六年擢湖南按察使明慎用刑杜絕請託訟風頓衰次年
晉安徽布政使又明年升偏沅巡撫皖中懷其德建長生祠竝爲
詩歌頌之先是湖北兵變上命鎮武將軍瓦岱率兵往討端以迎
候失將軍意及上謁又傲岸就坐將軍讓曰奉朝命統兵江上何
不備船端曰此驛傳道之責非藩司事將軍曰爾藩司耳見將軍
當席地坐端引朝儀答曰禮當倚將軍語塞於時總督及臬司諸
官皆惴恐起謝將軍胸端出將軍怒弗釋次日遽以令箭提饒思
寤陷之端先夜已稽舊例封應支諸款以待將軍大駭及散饒聞

滿兵驩呼鼓舞僉稱自鄭公蒞任銀米以時無毫髮缺失統兵所
過州縣亦稱頌無異詞乃大悔曰吾幾失人歸而力薦於朝故有
是命端勵職益勤舉賢劾貪力任勞怨時湖南官役俸工未給全
數端疏請如制以勵廉隅又以兵火之後地丁缺額五十餘萬疏
請清丈以正經界然必寬期在農隙之時并減造魚鱗圖冊仿行
朱子成法又念廢員歸旗之限極嚴奏請比照赴任違限例有疾
病事故或貧苦無藉時遇嚴寒許其展限停解以廣皇仁雖格於
部議識耆躋之閱一年調江甯巡撫時郭琇因言事得罪發江蘇
質審前任吳江縣事端以郭琇當代直臣爲假銀二千餘兩結其
案淮揚二屬涸出積滄田地四萬六千頃有奇部議一律起徵端
奏言新涸之地畚鍤難施如按畝徵租百姓畏累而去不特久荒
之田不能墾闢卽新熟之田亦且棄置復荒疏三上力爭得停徵

者過半又奏蠲淮甯濱河廢地缺丁江都牧馬草場回地之一田
兩賦及邳州缺額商稅諸銀兩其前後所敷陳皆以培養元氣爲
先 上深知其賢多特旨俞允平日取與進退尤守義不苟其在工
部前後任兩密差除扣減工匠銀積習在浙江革除陋規以恤弁
丁運解之苦兩淮鹽賈三關部使例有歲獻概罷止之藩司故事
賦有奇羨恆外儲以留佐公需爲名端悉令付簿入歲會自爲監
司以來凡公用皆以身任不派取屬吏絲毫其治民以嚴杜好訟
爲安養善良之本教屬吏以平情爲息爭之道耐煩爲省事之源
治豪猾抑權貴尤乞乞不少假借生平好學不倦能以經術潤飾
吏治嘗著政學錄五卷采呂坤余自強兩家之書而參酌之內而
閣部科道外而督撫司道守令應行事宜及一切利弊悉載之於
篇以爲終身模楷其自勵如此屢以病乞休 上未許康熙三十一

年五月卒於官年五十四 上震悼賜祭葬如例端持身涉世一以聖賢爲則研究宋儒諸書无折服考亭摭拾緒論分類編輯列目爲二十三卷曰德性曰訓義曰講學曰格物曰讀書曰天地曰聖賢曰異端曰存心曰持敬曰主靜曰克治曰家道曰出處曰政事曰治道曰禮樂曰刑罰曰井田曰荒政曰學校曰教化曰詩教統曰朱子學歸其自序大略謂聖言之載於四子五經者如日月之經天如江河之行地昭示陳布幽明巨細靡不畢該後之儒者相與謹守而共學焉以爲求道而入德者舍此爲無所用心矣然去聖旣遠講誦失傳循流昧源泥文忘義自宋儒周程張朱五子者出發微言闡大義直探孔孟不傳之旨於是聖學晦而復明道統絕而復續故朱子傳註經書已集大成又掇取周張二程遺文爲近思錄書成直命曰四子五經之階梯近思錄四子之階梯明

儒高景逸亦取朱子文集語類倣近思錄爲節要余讀近思錄最
久求節要數年不得得朱子文集語類見其廣大閱博若無津涯
將欲從之心目交困因擇吾力所及知者隨筆摘錄積而成篇其
所不及知者則闕焉以俟後之君子義例大概倣近思而閒有增
損輯成二十三卷後得天台楊廣文郵致節要一册取以相質其
學業精粗用心疎密有不可強同者嗚呼景逸節要進乎道矣吾
所錄者猶未離乎器也然器亦道道亦器有分別而不相離也吾
將以茲錄爲節要階梯因節要近思以達於四子五經舍朱子其
誰與歸端又嘗有孫子彙徵四卷日知堂文集五卷初聖祖南巡
聞端清廉特御書端清二字賜之至今鄉人稱曰端清公蓋卽以
御書爲私諡也

趙之符

子璘

珣

趙之符字爾合號怡齋武清人父光璧篤學好修官榆次主簿以廉幹攝縣事吏民畏懷建祠祀之之符順治十六年進士改庶吉士授戶科給事中遷兵科歷吏科掌印給事中除鴻臚寺卿擢都察院左僉都御史居諫職十有三載建白至數萬言以直聲著天下其論銓選謂銓曹升遷之法揆資遞轉以一人之身而遍歷各署安保其事事皆優嗣後凡遇會推務求才能品望與職守眾情允協者久任以課其功累擢以收其效截留各員宜逐項分晰取選以法均平漢軍漢人升轉之途宜畫一以便論品論俸其論明廢藩變產之弊謂值頻荒之歲責極困之民令其出不易得之金錢置不欲置之田產萬一有司奉行不善誠恐如部疏所云勒逼坐買殊非 皇上矜恤災黎之盛意臣思變價之事無分遲速宜準豐凶應請立撤部差責成督撫爲便論八旗新圈近畿田土戶部

所開八旗應換地畝約三萬一百餘晌通計不過一千八百餘頃
據稱應取每壯丁退出一晌之地及內務府退出地畝撥給如地
畝不敷將與滿洲地界相連民地取撥部中不將二項地畝與應
換給之數抵算徒議酌圈一經請旨俄而此縣報圈地矣俄而彼
縣又報圈地矣聞與滿洲地界相連者已經圈給矣卽與滿洲地
界相遠者亦復圈給矣自春徂夏圈撥靡已况去歲甫經水旱子
遺僅存貸借種資竭力南畝惟冀二麥告登庶可少延殘喘不謂
青苗在地驟然圈給旗丁東作徒勞西成絕望尺地一椽皆非所
有流離轉徙民命奚堪伏請諭令新圈地畝盡行歸民其換給各
旗者照退地晌數撥給更祈頒諭中外永不再圈庶百姓有安居
樂業之一日論 聖祖巡狩德州謂萬乘巡行八旗兵士重煩馬匹
糗糧之費橋梁道路修築所需動支正款倘州縣官措置乖方藉

端擾累開銷之惠不及於民支給之繁重累於下皆 皇上所惻然
不忍者也又况京師地震山東大災尤宜以安靜爲修省之實恤
民爲答天之誠論兩廣總督盧興祖縱弁殃民湖南道張登雲狗
庇私黨謂親民之官莫如縣令縣令剝民之穢蹟無過於橫徵私
派上下徇縱不肯糾參民生朘削日甚一日論陝西山東旱蝗謂
用積穀以備振施則各州縣之贖錢有名無實從來未有顆粒足
以充一糜一飯之需卽計分數以行蠲免而各郡邑之守令罔上
行私或且朦混起存不能無半免半徵之弊請敕各省督撫申飭
所屬凡災異地方概免徵逋論拯恤近畿剝船謂漕運剝船六百
艘每艘給地十頃照地僉船行之既久積弊甚眾夫小民應船既
給以地則凡造船有費駕撐有費水手工食有費篷桅席片有費
凡一船日用之需皆取給於地畝之中則三時力作勢不能分身

河干以應公家之務一意亟公又不能竭力田畝以辦終歲之需此不便於民者一也至各州縣距河甚遠勢不得不於河干僱覓民船代爲應役計一船之費一年約用價銀五六十兩撥之原地納糧遂增一倍而河下游閒之徒嘗藉之以邀利及至接運漕糧往往有盜賣攙和之弊甚有盜賣將盡故爲傾覆其船者迨經運官查明而領船人役逃散一空仍坐地戶賠償以致傾家蕩產賣男鬻女苦無可控此不便於民者二也且南漕告剝雖有倉場衙門而領船之戶實則天津鈔關部差統轄之每歲河冰未泮之日部差催提如雨船戶往返千里匍匐赴津因而差提有費過堂有費守候有費種種苦累難以罄舉此不便於民者三也尤可憫者連年水旱災荒凡納糧之地例得邀恩照被災分數蠲免獨至一應差船卽被災甚重顆粒無存不敢不竭蹶以供一年之役同屬

朝廷赤子同一被災地畝而應船者遂不得與納糧者一例沾恩
 此不便於民者四也更有小民之本業已圯撥補於他州縣遠者
 千餘里近亦七八百里往來徵取地租行旅已自告難乃尙有徵
 租不起逐歲淹流異鄉流離不可勝計而州縣按名解船訪無正
 戶以致株累親族代爲應役此不便於民者五也况剝船之設原
 以備河道淺阻之用時而河道順利不用剝船領船人役猶全勒
 地戶一年之僱價是以朝廷正項之賦稅小民終歲之勤劬徒供
 河下游閑者之坐食此不便於民而兼病於國者六也見在照地
 應船有數家共應一隻者有十數家共應一隻者以地多者爲應
 船正頭而地少者朋當之往往窮民不能應役棄地而逃一戶逃
 亡眾戶爲之賠累竊恐窮民賠累愈深相率而逃田地拋荒而船
 差亦無著落是欲速漕而反誤漕此不便於民而兼病於國者七

也且每船一隻每歲仍給水腳銀十餘兩計船六百餘隻約費庫銀六七千金然每船剝運僅可容載百石卽遇河道淺阻之日以河下僱船剝運計時價估之遠者運價不過五六兩而止况遇河道順利之日又不煩剝運何竟以國家正項額賦重費帑銀而留此或用或不用之剝船以重爲民累也此不便於民而兼病於國者八也種種滋累上下交弊不圖變計害將安底夫以六千頃地按額計之可徵銀一萬五千金莫若罷之徵其銀儲庫遇運河水淺則僱船應剝庶民困蘇而國賦亦無虛耗論寓振於河工之法謂四分給發原爲應得之夫食而量加二分以示拯恤計災民各有家口旣應募作工不能他往趨食惟賴此六分工食買粟養家若減至四分妻孥老幼何以餬口况河工銷算務須覈實倘遇連綿陰雨畚鍤難施停工之日夫食亦且停給若不稍有贏餘豈能

枵腹而待六分猶苦無多豈宜復減况應募皆少壯之人土田既
荒而工食又不能保其家口子然一身無所繫戀竊恐逃亡相隨
盜賊漸起此不可不為遠慮也論滇省徵糧過重謂雲貴初下之
日大兵畢集饋運為難故將折色改徵本色其中有額外加重以
四斛抵充一石者地賦按畝起科豈可以權宜一時之計竟作為
國家不定之規惟徵者守成例而求盈輸納者痛剝膚而難繼民
力已竭萬不能支論藩旗耕屯之利謂閩粵二省遷海棄田共七
萬六千餘頃原納額銀四十萬兩有奇額米六萬一千八百餘石
除八九兩年展界墾荒外尙餘棄地三萬三千餘頃其田土膏腴
可知是有地耕也靖藩平藩旗兵額餉而外閑散家口歲支月米
共十萬七千有奇其人丁蕃庶可知是有人耕也以藩旗家口之
餘丁墾海濱拋棄之曠土既非荒熟錯壤頃畝零星之地可無兵

民雜擾之虞又非披堅執銳分汛防守之人可無廢事憚勞之慮計口授田督之墾闢酌給兩歲應發之月米藉爲牛糧資具之需而一歲秋收其所獲足以自食則月米可以永省每歲卽餘數十萬石之糧俟墾闢漸廣獲多力裕之後按畝起科以正兵饌是每歲又省數十萬撥給之月米且屯事旣興營伍連接沿海駐居者皆藩下之人無事則耕種相安有警則守望相助以藩旗驍壯之人屯聚其中家自爲守人自爲戰不必添兵設戍自足以威鎮邊疆固圉之計莫便於此論官吏去任百姓保留之弊謂服官之日未聞政績一經離任而口碑傳頌幾於到處皆然揆厥由來或下屬交結上官派斂資斧驅愚民以獻媚或本官留戀地方授之意旨藉公論以行私或姦棍號稱通家糾集里黨囊集金錢或幹旋爲挾制官府之私計以朝廷進退之權竟爲姦人營競之寶揆之

政體宜行禁止時旗下逃人遍天下株引所及閭里爲墟當時人莫敢言者之符獨抗疏論之謂包衣之逃不實之法而乃蔓引無辜勞痛天下非朝廷矜憫庶民之意請自後逃人旣獲不得牽累良懦近各省駐防將軍署均設理事官司逃人及兵民訴訟之事理事官秩微而責重或恣爲姦利請歸郡邑有司治之疏上竝下所司議行逃人自是絕迹又請遇參官員首告指參上司者當嚴定反坐條例請申明世祖舊典請直省巡撫管理軍務請各旗圈地報災不必踏勘卽就民地被荒情形據爲則例請投充賣身旗下者所帶本身土地恐多隱佔宜備檔案嚴查請照會典給兵錢糧舊額旗兵月饟而外量與以馬匹草料盔甲器械等費免其自行備辦之苦請邊地題補府縣各官先行委署二年課最實有廉能者方准補授請凡恢復吳耿倡亂地方新鑄諸印宜微異前式

請江南藩司既分駐宜以逋負分責左右司請練饒未輸數無多者當免請畿輔旱災當命大臣清刑獄請五歲一恤刑部差宜復請道臣整理驛傳不可懸關皆下部議其言或行或不行朝野咸服其敢言之符奏議一本經術簡厚真醇有密疏則焚之人無知之者其於天下事靡不通達凡疆域要塞吏治龐雜與夫賦役徼徭屯役之緩急皆瞭然如指諸掌宛平王熙稱其有陸宣公之剴切無汲長孺之慙直言之可行行之有裨於世者真諫官也之符爲庶吉士卽分校禮闈得士爲盛官吏科遇會試武舉人充同考官掌計典者一掌京察者一門館肅清是非多所駁正性孝友交游重言諾人有善亟爲稱許御下無疾言怒容家居倡修學宮姻郤有急卽垂橐必稱貸應焉初項某館之符家課其子三年病沒腆備棺衾送柩歸葬復庇項子入監時徵博學鴻儒之符又以館

師高詠應詔得人詞苑仍割半宅以居歲供炭米其愛士重賢若此康熙二十五年卒年六十二所著怡齋文集燬於兵僅奏疏二卷行世子四璘珣璵璿璘字雯玉號冰崖至性純篤兄弟怡怡四十年內外無閒言宗族里黨無貴賤少長悉以禮相接鄉俗化之中康熙十六年舉人銓授廣信府同知廣信爲江右山郡林菁多伏莽璘至示威信懸賞格期年而盜息聞攝屬邑事以循良稱治行爲一時最八年升惠州知府潔己率屬諮訪民瘼如官廣信時凡興學校禁刁訟立保甲課農桑諸大政次第興革以惠民瀕海濬淤滯資蓄洩水利畢興郡人比之韓蘇二公焉辛卯奉盤查之命卒於道號送者數百人逾境乃絕年六十有四珣字仲琳號繹亭夙有至性十歲時遭本生母劉喪哀慕毀瘁執禮如成人沈毅好學博覽羣書記誦輒不忘少時在京邸兄弟相師友康熙十四

年舉於鄉長洲韓茨華亭王鴻緒得卷歎賞以爲有古作者風二
十一年成進士授中書遷吏部驗封司主事升稽勳司員外郎調
文選復升稽勳司郎中調考功徧歷四司蔚然負清望康熙四十
九年雲南上計簿廣南知府盧詢列卓異而格于成例珣倡言盧
君天下賢吏顧可以常法拘耶駁如法而別敘其賢附議末上亦
素知盧破格用之珣前後在吏部久時蒙宰熊賜履富甯安並雅
相推重己丑會試充同考官會河南學使缺以名特薦奉命旨以
往比至官整肅規條擯絕苞苴振拔寒賤中州人從教嚮風至今
稱道之任滿北還過濬縣愛其風土遂家焉康熙五十四年卒年
六十二崇祀名宦鄉賢祠

劉兆麒

子殿衡

兄子殿那

劉兆麒字瑞圖寶坻人父世則夢雙石麒麟入室生二子長因名

兆麟次名兆麒兆麟順治十八年進士兆麒幼而端重寡言笑舉
止如成人讀書過目卽成誦爲文皆有理法年十四遇太宗觀兵
畿輔見兆麒異之令人官學讀書年十六隨世祖入關又七年詔
選漢軍滿漢文藝兆麒名列上卷授翰林院編修兆麒起布衣爲
侍從感激圖報世祖廬奉內院喜其年少敏練十年中歷擢都察
院啓心郎改宗人府晉都察院左副都御史時兆麒年未三十丰
采整暇每奏對輒當上指順治十八年滇黔旣平餘孽逸入楚上
以兆麒能擢湖廣巡撫聖祖卽位大軍南下糗糧芻秣兆麒皆躬
理之無缺供加工部侍郎銜楚人新罹兵災噢咻安輯民慶更生康
熙七年擢四川總督旋以裁缺回京授兵部尙書加從一品錄其
撫川功也八年授浙閩總督時海氛未靖兩省皆巖疆兆麒條上
防海機宜十二年入京陛見適有三藩之變廷推將帥上特用文

臣三人改銜以往兆麒其一也初任直隸援勦提督改授江南崇
明水師提督崇明密邇海氛地險要兆麒請擇偏裨自隨預儲糧
餉壯我之威伺寇之隙 上稱善再三悉俞所請坐鎮十載人不知
兵二十三年俄人犯境 上擇賢能諳練大臣掌軍事以兆麒爲黑
龍江總管督兵三戰皆有功三十一年邊境肅清兆麒年踰六十
以母老拜疏乞歸優旨俞允徜徉林下六年監修北河工既竣上
復命爲總督兵部尙書時其子殿衡官江南布政使值 聖祖南巡
迎駕 上問兆麒年及提督海疆歲月兼賜尙方珍物其上膺主眷
久而彌篤誠殊遇也四十七年六月卒年八十兆麒性孝友家門
雍穆生平守不欺之學僚友故交皆終身如一利人濟物之事見
無不爲殿衡繼撫楚遺民故老爭迎馬首問兆麒起居可以知其
德澤之人人深矣兆麒初無子以兄兆麟之子爲嗣卽殿衡也後

生子二曰殿璣殿章

殿衡字伯玉自少喜讀書負經濟才名以蔭就銓爲兵部武選司員外郎升刑部江南司郎中大小咸辦分巡井陘道遷保定守道調西寧巡道西寧邊塞咽喉番回雜處每春預徵糧粒草束給戍軍民罷不堪命殿衡請期至秋收後竝乞河西五衛一例緩征其番長車馬供應先期符驗郵傳肅清有治大魁者掌回教素樹氣節或密告其通外番爲亂已就逮矣回人數千環殿衡車前鳴其冤殿衡請於總督佛倫密疏爲剖辨上矜而赦之賜以世職諸回皆歡忭羅拜聲震湟中擢江南布政使清隱冒除版荒興水利贍饑民舉節孝政暇行田野翺游山水閒集名流觴咏如布衣交再遇聖祖南巡嘉勞之親灑宸翰以賜遂擢湖北巡撫武昌故兆麒舊治殿衡周知其利弊次第興革之與湖南巡撫趙申喬會勘土

司區處允協荆巫諸士民皆感佩無敢梗命者以憂歸服闋仍撫其地不易條約而人情帖然江陵監利諸縣水溢隄壞部議失防官俱褫職殿衡以江隄乃民自修非官築費帑金請獨當罪而免其餘上俱宥之荆門沙陽隄勢險工鉅捐金采石調淮陽埽夫築埧建閘以時開閉蜀江出峽下夷陵直公安危礮石時碎船殿衡乘水涸募工劊截牙角連築月隄以護竝多設救生船至今賴之時大學士高安朱軾方爲潛江知縣以折獄忤上官意將置下考殿衡與制府力爭卒舉卓異軾嘗語人曰吾自爲縣令時守直道而不變者由劉都憲之知我也在任數年以勞卒官仲兒殿邦字安侯兆麟子累官至蘇松糧道署布政使 聖祖書一州之表四字賜之時謂一門盛事云

劉元慧

劉元慧字子睿正定人順治十八年進士知山東鄒平縣請蠲逋賦萬餘金民困以蘇會軍興滇閩大兵過境供應芻糧咄嗟立辦不以絲毫累民遠近帖然以治行內擢吏部主事遷郎中累遷順天府府尹遇事持大體不以察察爲明飭紀整綱豪強斂跡尋遷左副都御史移疾歸卒祀鄉賢祠

徐國相

徐國相字行清京師人初官戶部擢刑部郎中升山東右布政使尋移安徽授巡撫江南財賦甲天下地廣民殷政繁役重國相滌除宿弊省徭役禁苛索當康熙甲寅乙卯之交滇閩用兵皖據長江咽喉舟車絡繹大軍駐江右三楚者數十萬米穀草豆之屬皆取辦江南國相近饋遠輸不事苛派境內晏然廬鳳滁所屬海遭旱澇民多流亡國相捐俸倡官紳輸助復疏請朝廷振救之活飢

民數十萬汝陰鍾離諸地瀕河近淮歲多水災國相疏請行溝田之法築堰疏渠招徠開墾期年民用大饒遷湖廣總督下車察謠俗問民疾苦而湔除之激揚吏治百僚肅然兵荒之後一意與民休養革除鄉保里役差役行頭以杜煩擾禁止火耗嚴懲刁訟建學宮設義館教化大行楚人鑄碑以頌其德及去官歸京師行橐蕭然康熙三十八年卒

李煒

李煒字峻公號浣廬武清人生而奇雋垂髫即善屬文年十三補博士弟子員弱冠舉康熙二年鄉試二十二年由內閣中書出官饒州同知甫三月丁內艱歸服闋補戶部員外郎轉兵部郎中精勤任事兩曹積冗爲之一清二十五年授東兗道激濁揚清政教畢舉撫軍以卓異薦之三十八年升廣東按察使痛洗陋風不少

假借有陵水令楊某者素淫橫無忌既被罪輦數千金冀求釋卻
不納卒申以法而性尤慈愼每遇命案重情必再四詳閱部民歐
陽元開與黃姓爭田殺其族人歐陽世贍圖陷黃府縣疊審反坐
罪於世贍之兄與姪煒燭其寃平反之闔省欽服二十九年遷湖
北布政使旋丁父艱三十二年補安徽布政使煒念江左民力困
敝飭有司減火耗禁私派慎平編裕積貯不三年令布風行江南
北多賴之三十五年擢山東巡撫瀕行白下薦紳繪清畏堂圖賦
詩以贈道旁攀轅留者數千百人東省地曠民頑素稱難治煒念
安民以察吏爲主潔躬率屬風紀肅然有陽穀令具千金請託煒
曰此民間脂膏也奈何污我因斥譴之由是吏治一變司道以下
罔敢干以私者疏準家窪之水入小清河擴貢院號舍以振文風
葺州縣供應以抒民力士民紀善政刻石頌焉二十七年以望誤

傳三
罷歸逾一載以倡修永定河隄獲優議煒風格秀整識高器超生
平甘淡泊不喜浮華而敏於治事遷粵臬司時 聖祖南巡閱河煒
朝夕扈從 上親詢官職姓名命賜果品備叨異數後補皖藩召見
暢春苑 上諭以人臣之道惟誠與廉能以治粵者治吳則督撫且
畏之矣其蒙優眷如此四十一年以疾卒於家年六十

名臣傳三終

大清畿輔先哲傳弟三

名臣傳四

大清畿輔先哲傳弟四

天津徐世昌撰

勵杜訥

子廷儀

孫宗萬

勵杜訥字近公靜海人初以杜姓為生員學問淹博精楷法康熙
 二年纂世祖實錄詔選善書之士杜訥試第一書成授福建福寧
 州州同命留南書房食六品俸舉博學鴻詞科未中選會殿門易
 額敕翰林官書禁匾皆不稱旨惟杜訥書報可十九年優敘特旨
 授編修充日講起居注官遂賜勵姓 上日御內殿閱諸史命杜
 訥與大學士張英同侍嘗評論古帝王政治得失文武張弛及人
 才進退邪正消長與夫諸儒舊說之聚訟紛紜者親加剖決杜訥
 一一劄記總曰聖論上之時承問對皆條奏明晰二十七年遷右
 贊善明年轉左又明年升侍講改光祿寺少卿三十六年遷通政

司參議三十七年遷太僕寺卿尋擢宗人府府丞三十九年遷都察院左副都御史疏言督撫大吏朝廷昇以百餘城吏治數千里民生任至重也若託詞鎮靜漸成悠忽殊忝封疆之寄請敕諸督撫年終策察吏安民興利除弊諸實蹟以備清覽如開注不實治以欺罔之罪庶諸臣時時警勉不敢草率將事貽誤地方其所轄藩臬專掌錢穀刑名州縣有無虧空定案之羨書有無駁審宜詳悉并列以爲考核藩臬之法至提鎮保送將弁時有騎射甚劣竝年老之員請敕下兵部將引見不稱旨之員彙冊進呈酌定處分下部議行四十二年擢刑部右侍郎十月卒於任年七十有六賜卹如例特旨給全葬後二年上駐蹕靜海御書文恪二字賜其家雍正元年追贈禮部尙書八年入祀賢良祠高宗御極加贈太子太傅杜訥以諸生膺殊遇出入禁闈數十年小心慎密前後疏

奏多所建白居憲職詳讞刑獄無所瞻徇朝野推爲正人子廷儀
孫宗萬曾孫守謙皆庶吉士清朝四世翰林者海內僅五家勵氏
居其一焉

廷儀字南湖康熙三十九年進士選庶吉士明年丁母憂又明年
特命直南書房四十二年授編修尋丁父憂服闋充日講起居注
官四十五年遷右中允轉侍講學士五十六年擢內閣學士六十
一年充經筵講官掌院學士晉兵部右侍郎兼掌院如故雍正元
年修 聖祖實錄充副總裁擢刑部尙書疏言各省常平倉米穀雖
有專管之官難保無徇隱之弊請責成督撫覈實存倉時委幹員
盤查年終造冊題報督撫離任冊籍交新任詳覈虧空題參新任
徇隱者罪之部議如所請十月疏言古北口外命案向由本處武
職詳解刑部派司員往驗路經數百里傷痕已變審擬每多失實

之時請於口外適中之地設理事同知一員專司其事盜案亦如
之詔下部議設滿州理事同知一駐熱河隸霸昌道轄二年疏言
團練民壯每州縣選五十名分習槍箭尤壯者選爲頭役其工食
請於州縣俸工內酌給之上嘉其奏嚴飭督撫實力行之三年疏
言監禁宜分內外內監以居要犯外監以居輕犯其女監另牆隔
別庶防範嚴肅不致串供部議從之五年充會試正考官尋坐違
例保屬僚降級從寬留任七月坐讞獄罪名錯誤議革任上仍命
免革尋復職六年疏陳考職積弊四事禁止私鹽四事清查入官
家產弊端四事俱議行七年加太子太傅賜矜慎平恕額九年遷
吏部尙書仍專管刑部事十年以病乞保上慰留之閏五月卒年
六十四命大臣往奠茶酒賜祭葬如例諡文恭
宗萬字滋大號衣園幼警敏善作大小字自六七歲時卽以書爲

戲嘗題其塾門曰有敢持尺絹寸楮過此者必取書不貸父責之
然心異其不凡及長善屬文通音律經史淹貫旁涉古今樂府一
覽不忘詞流韻士殷懃奉尊酒然負氣傲岸口多微詞以是多爲
人摺撫年十六舉康熙五十九年鄉試明年成進士改庶吉士授
編修蓋自其祖父以文字結主知宗萬承家學英年特達故受寵
眷尤深雍正二年入直南書房五年充日講起居注官提督山西
學政特賜摺匣令言事宗萬疏請學臣舉黜優劣隨考報部不惟
可絕瞻徇之弊且使優生知部册有名劣生知部册可畏各思奮
勉於士習尤爲有裨八月疏言蒲解二州及臨晉榮河萬泉河津
安邑夏縣平陸芮城垣曲聞喜十縣額設運學考試分民籍商籍
生童多冒名兩考當澈底查禁均下部議行潞安有臨晉縣民解
進朝詐稱御前辦事總管私書請託宗萬疏聞上嘉獎之六年遷

國子監司業七年遷翰林院侍讀管理巡察山西事務疏請嚴禁州縣赴省私謁免曠職守請州縣額設民壯精習技藝講武備皆從之尋爲巡撫石麟所劾落職十年授鴻臚寺少卿入直南書房十一年遷光祿寺少卿十二年遷鴻臚寺卿擢內閣學士兼禮部侍郎銜十三年充皇清文穎館副總裁遷禮部右侍郎調刑部左侍郎兼管禮部 高宗御極宗萬以內閣學士捧冊寶贊大禮年裁三十朝士榮之國初每科進士除選庶吉士外分派各部以主事學習行走三年期滿以部屬知縣分別錄用乾隆元年宗萬疏言各部主事共四十八缺每科分布不下四五十人若期滿不卽題補固無以爲勤敏者勸然不分優劣概以主事題授不但冒濫名器且候補候選應升行取各員無缺可補若將不諳部務之員概以知縣選用則民社重寄又非庸材所可濫膺請嗣後學習期滿

人員令堂官出具考語分爲三等引見一等補主事二等卽用知縣三等補國子監助教監丞及司經局正字等缺又前因禮部事簡停止分派額外主事請仍照舊例與五部一體簽派下部議行十月爲保舉河員註誤罷職尋命在御書處辦事四年命在武英殿行走七年補侍講學士充武英殿總裁遷右通政八年擢通政使扈從興京 上纂修祕殿珠林張照梁詩正薦宗萬入懋勤殿時召見講論書籍皆稱旨九年遷都察院左副都御史疏言直隸居民無山澤之利家鮮蓋藏一遇災荒往往就食鄰省近來資送流民回籍途中雖暫資餬口而歸鄉仍無計謀生請敕奉天山東山西河南等處各府州縣流民入境仿宋臣富弼知青州法隨宜安集或耕曠土或作工程務令遂生免填溝壑倘故鄉豐稔流民情願復業則給以路引聽其自歸毋庸押送至於興工代振原救

荒善策直屬應修城工三十餘處請酌量興築俾資民食力傭工
更爲有益竝請仿照雍正五年營田事例於江南捐限屆滿之時
改於直隸收捐助振詔下大學士九卿科道議行七月疏言近日
士不務學多以夾帶獲中竟有纒識之無己登高第者卽素稱能
文之士亦相率效尤不但鑿衡淆實而苟且僥幸之私中於人心
者爲患甚大請敕禮部順天府步軍統領五城等衙門先期出示
申明禁諭點名時特派近信大臣監同查察官卷旗卷一體嚴搜
仍約束兵役不得陵辱刁難監試官徇縱者卽指參勿貸得旨允
行十二月遷工部右侍郎十年調刑部尋因門客沈文傑行賄事
部議革職予杖徒特旨寬免勒令回籍宗萬自念年逾四十再起
再斥恩不可屢倖歸里後築室於老屋旁疏圍杜門掃迹有終
焉之志越二年坐族子與里豪訟田事罰修固安城於是盡鸞其

田宅給工費猶不足官限且滿 上憐其窮特賞帑金四千俾竣事
十六年起授侍講學士十七年因事調用十八年補鴻臚寺少卿
遷太常寺二十二年以天壇遞香失儀降二級留任二十四年遷
光祿寺卿秋得失音疾九月卒年五十有五宗萬書法力追晉人
得其韻度每奉敕寫經書及自進詩冊輒蒙褒異賞賜無算勵氏
父子三世皆掌邦禁爲正亞卿又皆直南書房充日講官知起居
注敷歷清要在官皆有名蹟海內榮之

閻興邦

閻興邦字崧仲號梅公宣化人自其始祖海明初以功授指揮世
襲至六世祖璿仕至甯武總兵祖正名仕至遼東義州副總兵父
師臯仕至大同副將世以武功顯興邦始勵志於學治舉子業少
從舅氏遊江浙閒與東南諸名士爲文字之會才名藉甚康熙二

年舉於鄉選授廣西馬平知縣丁艱歸起補直隸之新城新城爲畿南孔道輪蹄絡繹驛馬或不繼輒簽之里民興邦出私錢買驢數百養之民間役至以應官暇則俾民自牧雇直爲芻牧費民咸便之縣有集場多假旗豪爲壟斷興邦時時策騎行村落中姦宄屏迹暮年以才能擢知通州州視新城尤劇十三年軍興旁午興邦修橋梁平道路餼糧芻芟皆夙辦無缺供十六年升工部員外郎監收崇文門稅課風清弊絕囊不餘一錢二十一年奉命從大學士伊桑阿往視河工至則測河身之淺深相地形之高下度決口之緩急目數心識繪而成圖及入告興邦隨諸大臣後指畫井井上心異之呼前問姓名具以對未逾日改授監察御史駁駁將大用暮年升鴻臚寺卿扈蹕南巡二十四年光祿寺卿上廷語諸臣曰光祿弊大而費繁非閭興邦不能辦也越次用之興邦爲

省浮冒嚴濫給平價值歲省國帑錢不貲二十七年擢順天府府尹會湖廣叛卒夏逢龍構逆上念中州與楚疆接壤思得重臣鎮撫之特召興邦陛見賜鞍馬星馳之任下車問民疾苦察長吏賢否紀綱肅然其大要以潔己率屬奉公愛民爲先兩河左右千里戴之若慈母豫省漕糧久行改折會部議仍徵本色再疏爭之始得請又以歲旱民困疏請緩征豫民大悅秦中浮饑詔撥江南湖廣漕米數十萬輸之秦車運驟負興邦親駐洛陽躬督率之閱三月事竣調撫貴州貴省素僻遠苗夷雜處興邦首以禮讓化導其俗嚴飭各屬勿侵擾諸苗念貴陽地狹民寡則有請併縣治之疏以黔省防兵困苦則有預撥協饗之疏其最著者則請廣鄉試額略言同文敷澤已徧遐方黔粵皆同邊服今禮闈旣分中右而鄉試中額多寡有殊不免向隅之歎乃援粵西額數以請上覽之尋

令天下鄉試皆增額有差實興邦啓之也初總督甘文焜將軍王之鼎皆殉吳三桂難興邦疏請建祠於黔以表忠節厲殊俗上允之爲御書扁額以賜三十六年元旦行賀禮暈於地病數日卒年六十四興邦性孝友與人交終始如一尤好周人之急雅喜爲詩得大歷閒風味所爲古文詞皆端雅有體所著有冰玉堂集行世

崔徵璧

崔徵璧字文宿一字祀功號方厓長垣人康熙九年進士授內閣中書舍人外轉登州府同知擢河南懷慶知府禁科派振孤貧政聲翕然四十二年聖祖西巡回渡孟津徵璧隨至沁河命賦詩講易擢開歸道除陋規清訟獄猾吏蠹役無所售其巧累遷工部右侍郎管寶源局疏言銅商怠玩由立法未定請立成限以一年爲率下部議行徵璧好讀書性勤敏敷歷中外數十年兵刑錢穀應

手立辨卒年七十六賜祭葬祀鄉賢名宦祠著有西清初學編東海金台懷州遊梁諸集嶽瀆陪祀記詩韻鵠存仁錄等書行世

劉謙子自潔

劉謙字益侯號思菴武強人父懷志廩生讀書教子嚴立課程著有尚書口義藏於家生二子謙其長也生而沈靜端慤不妄言笑既冠遊鄉校有聲稱武強原隸正定每學使按臨考試輒首列及覆試再超其等康熙十四年舉於鄉十五年成進士十七年考授內閣中書先後丁內外艱服除遷禮部儀制司主事隨擢祠祭司員外郎三十八年充四川副考官三十九年升郎中是年春提調會試上賜御書一幅四十一年奉命督四川學政故事學臣由翰林稱提督由部署稱提調至是特命易提督關防蓋異數也四十五年補鴻臚寺少卿旋升正卿明年升右通政四十七年充四

川鄉試正考官是歲升光祿寺卿再升太常寺卿越七日又升通政使五十年升工部右侍郎五十一年往奉天案高麗通商事又往河東案運使石文彬事未復命晉都察院左都御史凡三充殿試讀卷官一充會試總裁官御試四書文二詔草一擬朱子全書序一又於御前誦太極西銘圖說命修尚書折衷皆荷褒嘉賜御書廉平堂扁額及聯語會臺臣有不慊於謙者以僕隸不謹訐奏之遂罷謙自起寒素以至通顯奉養益薄無他嗜好喪偶幾三十年不畜一婢官至御史大夫未嘗衣貂方督學時爲劍南學約十八則以教蜀士又刊孝經性理等書頒發各學其所進退黜陟皆本至誠惻怛之心更定學校新例以磨勘試卷歸之九卿省試取中卷民十官一皆謙所建白立朝不爲黨援嘗曰治朝廷事有意牴牾與有意附和者緣芻中不能去私化黨此臣子所宜大戒者

在工部考校度支出入疏通錢法在臺省則平反冤獄釐定天下
鹽法弊絕風清偶在班行中譽一觀察歸第其家僕輒持兩練帛
來謝謙曰有是哉次日當人告謙乃不署名尤加意人才所論薦
如大學士朱軾尙書勵廷儀大理寺卿汪滄巡撫李馥朱綱巡按
御史張應詔皆當時名臣有所糾劾不畏權貴罷官日或諷以疏
辨謙曰戢僕隸之未能實有罪焉敢喋喋利口以欺聖明耶旣罷
或又彈謙與李光地妄談道學人爲謙危上寢不問尋罰令修河
謙家故貧鬻田三百畝宅一區以濟歸而借屋數椽以居顏曰養
觀授徒自給與邑令李君模善朝夕研究濂洛關閩之書盡得李
光地所傳之奧以朱子爲宗主謂立志以定其本居敬以持其志
窮理以致其知反躬以踐其行四語盡爲學之要壁間列白鹿洞
規克己銘養觀說尤好易繪河洛先後天圖日夜觀玩獨處則正

襟危坐默識其理或子孫門弟子在側則披圖指示反覆不厭著
有四書朱傳綱目周禮瀚義廉平堂文集等編卒年八十有四學
者稱碧峯先生子四人自潔康熙五十二年進士授翰林院編修
先後主講大梁瀛洲兩書院著有周禮質疑陰符經注漢書集粹
定性齋詩文集

李旭升子周望

李旭升字東生號晴崖蔚州人康熙二十一年進士授中書歷工
戶二科給事中屢疏陳時政擢太僕寺少卿典湖廣壬午鄉試稱
得人歷遷戶工二部左右侍郎嚴出入謹度支勾稽詳覈胥吏莫
敢上下其手時商人積逋屢疏請以一丸帶征限年完補公私
便之四十九年閩饑出督海船運米三十萬石振之歸調刑部左
侍郎轉吏部公廉嚴正苞苴不行十二年如一日雍正中累疏乞

休賜御書衡平耆碩四字額加尙書銜予告歸六年卒賜祭葬子

周望

周望字渭湄一字南屏康熙二十九年舉於鄉三十六年成進士
選庶吉士授檢討五十一年充會試同考官又明年遷國子監司
業再遷侍講督學湖廣以維風化正文體為己任詔命廷臣甄別各
省學臣周望為天下第一擢國子監祭酒仿古太學三德六行教
士之法嚴考課勤講貫捐修學舍以棲士子五十八年遷詹事仍
兼祭酒事明年充江西鄉試正考官尋晉內閣學士兼禮部侍郎
銜六十年督運西陲出喀喇沁口抵插漢叟兒納米木城日夜冒
風雪輓軍儲周廻萬餘里明年再督運至插漢叟兒遷戶部左侍
郎雍正元年充經筵講官二年清查兩淮鹽務疏言兩淮行鹽一
百五十九萬八千五百餘引舊例每引行鹽二百二十七觔後遞

專四各臣四

增至二百九十四劬臣查湖廣江西上江行鹽地廣應請每引加鹽五十劬若邳州山陽清河桃源宿遷睢寧沐陽贛榆江都諸處逼近場竈鹽不易銷應請免加以示區別至行鹽各有定地若令通融銷售易開私販之漸應仍舊爲便下部議如所請又疏言兩淮積欠銀一百二十餘萬前工部尙書李先復奏准自壬寅綱起至甲辰綱止分三年扣江南督撫各官鹽規及匣費雜費銀抵完今壬寅綱帶徵銀數雖完而各官規禮仍舊饋送是在官有抵補之名而在商有重出之累又副都御史謝賜履奏請將鹽規銀抵補江安無著虧空自雍正四年起分作四年輪補是商人既有帶徵積欠又有應納規禮若再令填補江安虧空則有限之資本安能應無窮之追求惟以各官應得規禮自行解送江安藩庫填補虧空庶不致重累商人得旨照所議行時有條陳鹽政者周望奏

稱兩淮總商三十人又有四五人主名管事者號大總往往借端私派刻剝眾商宜除去商人有官於朝者爲官商挾引課歸名下以免費取利宜禁革得旨依議速行三年擢禮部尙書以病乞罷温旨慰留六年父憂歸八年卒年六十有二賜祭葬如例周望爲人厚重居官尤清慎敷陳章奏多見施行繕疏後卽焚稿有所薦舉其人終身不知自奉淡泊無異寒素以至誠接物無激矯之行著家訓一編以示子孫其嘉言懿行多可爲縉紳則倣焉

黃叔琳

弟叔璣

子登賢

黃叔琳字宏獻號崑圃父華蕃本安徽程氏也父華蕃養於繼母舅大興黃爾悟家遂爲其後因占籍大興叔琳幼有神童稱年二十中康熙三十年一甲三名進士授編修研究性理經世之學與檢討衛旣濟討論宋人語錄恂恂然有醇儒風見者不覺其爲少年甲

第也遷侍講督學山東毅然以興賢育才爲己任捐修三賢祠於
泰山之麓祀宋胡安定孫明復石祖徠俾學者知所景從又興復
白雪松林兩書院延師儒選才雋捐俸膏火所造士多窮經致用
之英晉鴻臚寺少卿領學政如故除通政司參議僉都御史太常
寺卿六十一年遷內閣學士尋擢刑部右侍郎雍正元年典江南
鄉試調吏部侍郎命偕兩淮鹽政熊賜履赴湖廣同總督楊宗仁
酌定鹽價革陋規商民勒石紀事二年奏請兵糧撥運支給儘不
州縣衛所額米撥給不敷再由附近州縣撥運俾民免輸輓加征
之累 上是下部議行三年授浙江巡撫值夏亢旱步禱於三竺
之神行三十里反而雨大降校士撫署爲講畫文義諄諄然如家
人黜貪墨之官平反冤獄士論稱快時御史錢廷獻請濬浙江東
西湖蓄水灌田部議令叔琳確勘定議叔琳奏言仁和錢塘海甯

三縣田十數萬頃恃省城上下兩塘河水灌溉兩河水源皆自西湖流注其所以灌溉利溥者一由沿湖山水暢流入湖一由山水來路設閘以阻浮沙一由上塘五十里外有東湖爲之停蓄自閘廢土淤民佔爲田利甚微而所損三縣田畝踰鉅萬請照西湖舊址清出歸湖去其梗塞開通水源其淤泥葑草則幫築舊隄下沿隄釘椿編竹不使淤泥入湖裏湖各橋建閘啓閉城內河道皆酌量修濬之所屬官塘運河支河港汊壩堰埭門俱一律疏濬以興水利部議如所請初杭州旁邑多豪猾侮鄉曲士民善爲飛語巧中官莫能制叔琳銳意除之取其魁十人杖而械之通衢中有一人病死者爲怨家所誣劾免官謫海塘工次効力閱八年事白放歸里奉母僦屋以居乾隆元年高宗以叔琳儒吏起爲山東按察使墨吏帖息苞苴不行復審案定限舊例以杜通融挪改之弊

有屬吏以所畫扇獻者叔琳曰今民方苦潦且蝗而足下顧暇爲此耶其人大慚而去明年遷布政使疏言養濟院孤貧口糧每名歲給米錢三兩六錢從地丁內撥給其春夏秋三季米係州縣養廉銀墊給多不能及時支領請酌借司庫存公耗羨銀給發從之著爲例四年丁母憂歸七年授詹事坐布政使任中誤揭屬員諱盜追論罷官叔琳篤內行事母志物咸備平居晨起必肅拜先祠執節遠出則載主以行出而參皂之世宗嘗撤御坐木瓜貯之青龍瓷盤中漬以薇露賜之曰供母聞香又御書德門壽母四字榜之庭其所居顏曰德壽堂者以此也性嗜學博極墳典詩古文詞淵源秦漢凡詔誥制敕朝廷大著作皆出其手尤負人倫鑑以薦賢爲重謂世道之隆替人才之邪正消長爲之也所識拔皆以循良遷秩而分校禮闈主試江南所拔取者若任啟運胡寶瑑陳

祖范徐文靖張鵬狎徐士林潘師梨張醇夏用修李慎修輩皆經
明行修爲一時之望桐城方苞爲諸生時來謁一見稱莫逆交凡
苞所著周禮春秋之學皆與叔琳往復商訂他若周大璋顧進等
又數十人不憚千里親炙就正其所學之及人遠矣十六年復遇
臚傳之歲當事以聞詔加侍郎銜褒之曰熙朝人瑞天下榮之二
十一年卒年八十有五叔琳以文學政事受知三朝當代推爲鉅
儒天下士識與不識皆曰北平黃先生京師首善地列官朝省者
無慮數十百輩然相與語稱北平不問知其爲叔琳也生平著述
有硯北易鈔十二卷詩統說三十二卷周禮節訓六卷夏小正傳
註一卷文心雕龍輯註十卷史通訓故補二十卷顏氏家訓節鈔
硯北雜錄硯北叢錄宋元春秋解提要宋元易解提要諸書養素
齋詩文集叔琳自五歲入塾至大耋之年凡二萬九千日中蓋無

日不學也可謂純篤君子矣弟叔琬進士官太僕寺卿叔琪舉人
官甯國知府皆有賢聲叔璫字玉圃康熙四十八年進士由太常
博士遷戶部主事晉吏部員外郎以薦擢御史巡視東城時王公
貴人多以追私逋相屬且曰務親治叔璫正告同列曰御史非王
府官屬何瑣瑣爲下所司理之有銜邸命至公署者昂然坐滿御
史上叔璫使撤其坐將劾之其人悚謝去自是無敢以私干者時
久停御史巡方之制上以臺灣初定特遣巡邊至則翦餘孽釋
脅從反仄以安雍正元年任滿特旨留一年命以所行事告代者
叔璫爲列海疆十要既還京怨家中以蜚語罷職乾隆初起河南
開歸道調督糧道豫大水撫恤災民甚周至濬永城河口開儀封
引河築虞城隄岸皆中窾要在豫四年以母憂歸服除補江南常
鎮道又三年致仕家居七年卒年七十有七叔璫平居呐呐言不

出口遇大事侃然執持不少撓屈究心宋五子書及元明諸儒集其學以立誠爲本要其功歸於篤敬晚號篤齋蓋揭以自勸也著有中州金石考八卷南臺舊聞十六卷南征紀程一卷臺海使槎錄八卷廣字義三卷近思錄集注慎終約編旣倦錄諸書藏於家登賢字雲門叔琳之子也年十六舉雍正二年順天鄉試叔琳不欲其速化攜至浙江撫署自課之旋遭母喪歸里而叔琳爲怨家誣奏羈留海塘登賢侍祖母吳家居朝夕依膝前娛慰之又與弟登穀以學問相切劘更代人吳省父從諸名士游學益大進乾隆元年成進士授戶部主事轉員外郎升郎中凡在戶部十餘年長官器其才常令兼攝他司恢恢而辦吏不能欺遇興革大事經登賢定議奏上皆報可爲尙書海望撰皇后躬蠶儀 上覽之稱善詢知出登賢手擢廣西道監察御史遷吏科給事中轉刑科掌印給

事中巡視通州漕務丁憂服闋補戶科給事中再任刑科掌印巡
視江南漕務前後任臺察給諫凡十一年所陳奏皆切時務可施
行者山東災運奉天河南天津米濟之登賢言青萊距濟東寫遠
利津昌邑以南諸縣山徑崎嶇陸運復不易宜以豫糧仍舊運通
以南糧如數抵撥近從淮安鹽城出口由海港直達沂州府屬之
夾倉口青州府屬之宋家口萊州府屬之膠州東門外海口分貯
平糶則東界南界俱得資接濟至飢民就食他方向有留養資送
之例然其中有本來游惰之民無業可資轉以荒年爲幸及資送
回籍往往結夥滋事有於經過鄉村搶食作踐者臣以爲振卹之
恩難容濫及遞送之例當有區分被災之區原有振濟者戒其毋
輕遠出其已出者惟老弱殘疾留養外餘聽其自爲謀食願回籍
者陸續資送按日分遣多不過三十人如有強梁之人混入隊中

卽繩之以法別行遞解回籍庶乎主客相安不受外來之擾奉旨
如議以行又奏除幕友盤踞省會之弊杜經紀巧昂錢價之害提
比捕役專責成府廳磨勘試卷令考官迴避漕丁餘米許在通出
糶皆一一允行巡南漕歸復命稱旨擢太常寺卿會 上御門班退
以短視失儀部議革職奉特旨留任三十二年改宗人府府丞明
年擢都察院左副都御史三十四年授倉場侍郎尋擢漕運總督
加兵部尙書銜以事降調詔加恩以三品京堂用三十六年補都
察院左副都御史三十九年奉命提督河南學政特調山東蓋是
時壽張賊初平士習民風 上加意整頓以登賢有威重故改用之
登賢之生也叔琳正提學山東相距六十六年凡整士習勵風教
一以其父爲法四十一年五月按視曹州疾革命子嘉績具遺疏
且曰生於山東死於山東命也生於學畧死於學畧數也目注書

晉者久之端坐而逝年六十有八登賢性至孝自以生晚不及親見父少壯所行事每侍談隨得輒錄今所傳年譜卽本此也學不務雜以小學近思錄爲主盧文弔館其家講考據之學好糾梓本書籍之誤登賢曰讀書以求益也今書并受君之益矣蓋規之也

何國宗

何國宗字翰如大興人康熙五十一年進士改庶吉士內廷行走學習算法五十二年彙編御製律歷淵源成授編修雍正元年歷少詹事三年擢內閣學士是秋奉命閱視黃運河道四年疏奏東昌府城南有七里河口下歸徒駭河北有魏家灣河口下歸馬頰河德州南有減水閘下歸老黃河皆運河東岸洩水入海故道與大鹽河小鹽河爲四支河各渠皆歸此四河以洩民田之水年久淤塞應挑濬之以復其初山東汶泗泉源紆迴二千餘里請設

管泉通判一官專司疏濬高家堰以南石隄之上臨湖鑿壑僅丈餘葦柴僅高三四尺應於柴工後加高土隄歲修之時逐漸增修之運河自臨清以北賴衛水濟運而衛水發源百泉益以丹河洹河其流始盛向例三日開閘濟運一日閉閘灌田日久弊生致運河淺阻臣等查勘百泉議分三渠中爲官渠東西各一爲民渠東口門寬五尺五寸西口門寬四尺五寸小民灌溉有資亦無損於漕運洹河萬金渠口外有石壩一上年水溢止露壩頂二十丈餘坍入水遂將石壩拆去十五丈留五丈迎水入渠今水消壩南淤成沙灘灘南有石橋一涵洞四十有三請自東第十洞處許民於需水灌田時自築石子壩北接沙灘灘東開小渠一引水入渠其西三十三洞盡行疏濬無庸拆去石壩洹河之水自可一分灌田三分濟運俱下部議行充經筵講官被議鑄級五年授大理寺卿

遷內閣學士尋遷工部侍郎八年命偕侍郎牛鈕督修北運河奏
言河西務城北老屋舊隄及要兒渡舊河口魚鱗壩俱大溜頂冲
宜保護堅固方資捍禦請先撥銀二萬兩發通永道辦料興工庶
不貽誤 上是其言又奏減水引河壩門前加寬四十丈則引河
亦須加寬舊引河南岸廢隄必須拆去始能暢順但工作持久應
先於新引河中間沿舊廢隄開深槽直達塌河淀竝濬河口及舊
河內淤淺水流自暢再查塌河淀下口有陳家溝舊河一東隄頭
舊河一賈家沽新河一三河寬不及三十丈擬於賈家沽新河傍
再開洩水河一寬三十丈方足暢流歸海又奏三里淺應建挑水
壩一堅築雞嘴壩其隄灣回溜處修排椿一路又筐兒港壩門急
溜汕刷應建挑水小板壩一大板壩一順水排椿一路又孤雲寺
係大溜頂灣排椿損壞應修補西岸華家口係舊河上口原有攔

河壩一頂衝汕刷僅存靠隄陡岸壁立舊河地勢窪應修葺工張
家莊老莊刷去僅存月隄應建挑水板壩一後接排椿火燒屯舊
有排椿應修補又上年水漫隄頂二十處應加倍修築詔如議速
行九年兼河東總河初國宗奏請戴村增築石壩至是田文鏡疏
稱石壩害民礙運道部議革職乾隆二年命充算書館總裁四年
充國子監算學總管六年充律呂總裁書成授副都御史十三年
遷工部侍郎二十二年授禮部尙書坐事罷職旋賞給編修歷遷
至禮部侍郎致仕卒何氏世業天文故國宗以算學受知聖祖嘗
預修御定麻象考成編御定數理精蘊御定考成後編御定儀象
考成皇朝文獻通考象緯考諸書康熙年間實測各省及諸蒙古
之高度偏度乾隆二十年準噶爾蕩平奉命出塞測定東西南北
里差奏準載入時憲書一例頒發錢大昕者嘉定名士也官翰林

時於國宗為後進國宗聞其精算學即先往拜謂曰今同館諸公談此道者鮮矣因歎息久之國宗在蒙養齋與梅穀成同修算書其學相埒而國宗與人言算尤平易盡出所蘊以告人蓋猶有梅文鼎之遺風焉

王蘭生 魏廷珍

王蘭生字振聲一字信芳號坦齋交河人生而穎異風度端凝讀書就外傳即通小學大意出入進退皆依書以行家貧夜讀以香火代燭年十八應童子試時安溪李光地視學順天奇其才置第一入邑庠勛以程朱之學蘭生亦毅然以賢聖自期明年江陰楊名時繼督學政拔冠其曹與論經義竟日拊其背曰君學十富於余不當在弟子列遂與訂交已而光地以吏部尚書巡撫直隸檄入保陽書院肄業親課之益自刻勵研極性命之理自樂律音韻

旁及中西象數莫不冥心探討深造其微前後從光地學凡十有三年長洲顧炎武最淵博喜言古韻宣城梅文鼎善星緯熟於方程勾股皆光地上客常與辨難不能屈炎武分古韻十部蘭生界以六炎武謂妙契古先遜不及改其十爲六梅氏筆算三角乘除之術多苦繁蹟蘭生不終朝而得其蘊江南名士何焯深敬禮之曰好學深思之士惟坦齋一人而已 聖祖詔修字典例以等韻列前編無能應者因諭廷臣有精於韻學者舉聞光地至是爲相以蘭生應召見試以曆象竝音韻合聲之法合聲者國書上二字頭切法也上色喜顧謂光地曰此國器也命南書房行走食翰林俸出入禁闥凡鑾輿所至悉命隨行是時天下殷阜無事 上游藝翰墨退朝則事詩書每至夜分諸臣皆不及侍惟蘭生在 上左右 上賞鑒西山律呂新書有理無器命之製器審音更與方苞魏廷珍等作律呂

正義令太常肄之又以世人鮮通韻學而近代韻書又多戾於古命蘭生考定期年成帙於古韻之所以合今韻之所以分宋韻之所以異於唐辨別精詳啟前人未發之秘書上聖祖稱善命尙書徐元夢校而刊之世宗親製序賜名音韻闡微藏之武英殿以頒天下自是言韻學者宗之蘭生日直禁中四方賢士大夫皆延頸望風采一時巨卿司文衡者爭欲致門下蘭生拒不與通以故省試輒黜而受知於上獨深康熙五十二年癸巳特賜舉人辛丑試禮部復不第上詔責考官復命與留保偕新進士竝試天安門留保者亦積學未遇者也上親校閱黜進士八人而蘭生與留保俱賜進士以一甲一名選庶吉士充武英殿總裁纂修子史精華駢字類編等書世宗卽位改授編修雍正四年遷國子司業日升堂召館生講中庸以爲中之言始於堯舜而後世妄求高遠故孔子

益之以庸如易有交易變易之說而大傳歸於易簡易與簡對於
險反而陽足包陰故以易名易平也庸也中庸而天下之理得矣
集其說二卷曰國學講義學者謂近思錄以後所未見是年充廣
東考官號得人適查嗣庭呂留良嚴鴻逵輩獄起 上以浙習澆漓
慎選督學相國張廷玉以蘭生應 上曰此先皇所擢拔者剛柔
併濟得其人矣遂晉侍講命督學浙江抵任以清慎勤三事自勵
嚴絕苞苴教士必課以經學古文辭尤諄諄以正心誠意相勉日
視卷千百皆躬自檢閱試之明日榜甲乙無一失者拔其尤致之
幕諸生桂庸幼聘未娶妻家恥庸貧悔初盟聞入幕即日完娶一
生爲江南制軍記室不獲與試例黜名制軍乞附試册曰未試而
列之册是欺也吾生平戒欺自欺不敢欺君乎格不行已西浙
江科舉錄遺不得試者二百餘人赴訴總督李衛所衛爲言蘭生

曰古者選造不過數人今數且至萬不中試者僅二百人細其試所以勵其學公不議減而願請益乎在任三年庠序肅然士習爲之一變調任安徽旋升內閣學士仍留督學其按試嘉興也時李祖惠尙爲附生特列第一己酉選拔有忌之者造爲浮言以沮其事弗爲動卒貢成均陸祖錫全祖望梁其新金簡輩皆得自特鑒後俱知名及試安慶諸幕友以桐城故擬優於張氏蘭生以爲學使校士宜據文爲去留奈何以貴胄棄寒畯榜發遂無張氏名張族大譁方苞素相善其子弟試者亦不少假必正教之蘭生出入中外單立一身無左右者至是流言大興然上深知其賢超拜內閣學士兼禮部侍郎銜十年復命典江南試事以學臣兼考官前所未有蓋異數也時西陲方用兵上念陝西重地移蘭生往督學秦吏盛興衛往迎至潼關見有傲裘乘羸騎者從二人來吏疑行

商以爲道見學使者馬上探起居遠近蘭生笑曰我使者也吏方
倉皇前趨謁秦吏飾邊幅多巧弄見使者清簡不可干率改行首
按西安校士必勛以有用之學嘗召至明倫堂講西銘乾稱父坤
稱母言人受天地之氣以生有呼無吸則死呼者我氣吸者豈能
反我方出之氣復入乎蓋天地之氣也人無息不與天地之氣相
流通實無異於父母則吾之由親親以及民物雖區而別之有其
等漸而施之有其序而其原無二理也此西銘之旨乃太極之蘊
而皆原於乾坤之易簡搜其根明其義以實見諸行則放僻邪侈
之念無由生而殘忍刻薄之行無由著矣或有以出王游衍請者
曰天一積氣之爲無處非氣卽無處非天故曰地以上皆天也而
有不及爾者平時有樵叟聽之自稠人中躍出拜堂下其開示明
切能感人類如此三原劉紹旼以古文見知延授子弟經向晚則

過書齋講易背誦經文竝儒先諸解盡卷不論一字而已則折其中焉蘭生歷仕二十年講貫無虛日依然老書生也雍正十三年因所拔嚴州吳茂育刊求志編聖吏議禡職署陝西巡撫史貽直密疏保留會吏部以學政缺請補名單上 上視之無當意者仍命改爲革職留任降授少詹是時準夷策凌勢鴟張哈密巴里坤嚴兵爲備甘州軍士值換防以提督某扣剋軍糧不肯行幾致大變蘭生按試甘州出署撫諭皆斂手聽命事定飛咨督撫使參辦軍民遂安堵無患高臺縣知縣某以軍需故簽派生員充鄉保有受比責者諸生大閱期罷考蘭生召諸生切責竝奏參某吏疏入上嘉其無隱 高宗卽位召入京以 世宗遺詔復原職奏言浙江銅政大壞請變通其例陝中流民舊令土人養之宜詔有司別爲安插皆見施行故事京官退直接見賓朋候謁相踵蘭生門外蕭然惟

二三執經之士往就業而已乾隆元年詔修三禮充副總裁官升刑部右侍郎擬斷明允尙書孫嘉淦倚爲左右手旋以前銜管禮部侍郎事二年二月以世宗奉安山陵扈從次良鄉翼日早發在途遭疾卒於肩輿中年五十八上憫悼賜帑金五百命直隸督臣爲治喪併賜祭一壇蘭生身長六尺豐頰隆準大口美髯鬚居處甚莊正坐終日不欬與人遇雖丙夜未嘗不冠善屬文精楷法其學綜貫諸儒而要歸於安溪之旨光地以朱子琴律圖說雕本流傳多誤屬爲審定證明瞭然可曉光地進呈御覽深被嘉賞嘗本明道程子之說以人之中聲定黃鐘之管積黍以驗之展轉生十二律皆與古法合又至郊壇目驗樂器而知絃音只爭長短或用倍或用半其聲可以相應管音則有長短巨細之差故有黃鐘積八倍者或四倍者而匏笙之管反有用黃鐘積八分之一者至壎

箴之類亦皆以黃鐘積實加減而得其應聲蓋線與線體與體之
比例異故也其說小變朱蔡而實與史記管子呂氏春秋淮南子
諸書合又謂韻學支微魚虞歌麻數部能生諸韻而不爲諸韻之
所生人之聲皆出於喉而收於喉天下之字音宜收歸於影喻喉
聲之二母至見溪羣疑數母出於喉繞於腭而實歸於鼻古云來
日半舌半齒音者言中分二母來爲舌音附澄孃之後日爲齒音
附審禪之後耳今世所傳等韻書清濁未分元聲不辨邵子經世
詳等而略韻顧氏音學五書詳韻而略等均未極其至及奉敕編
纂棄短取長用國書五字類爲聲音之元以定韻又用連音爲紐
切之法以定等所論精通明顯盡人可知惟其天姿超悟又於古
今音韻樂律諸書以及外域之譜無不講習討論洞悉源流當時
編纂欽定諸書與其役者皆一時之選至律呂音韻必折中於蘭

生非他人所能預也 聖祖嘗曰蘭生爲人正朕深知其學伊亦
知朕最深一日侍側至夜深立而假寐 聖祖呼之不應起執其臂
而醒之曰小子不如老夫耶始爲驚謝其以母病請急也命攜韻
書就家編輯督學浙江時廉俸所入至不能具裘馬 世宗察知之
爲給學租辦公一介之儒受知三朝君臣遇合之奇蓋古今所僅
見者蘭生清介絕俗愛士如子弟頒示安溪遺書經說俾諸生誦
法凡奇才孤學通知陰陽曆術者必提撥獎成之故主三大省學
政興賢育才鼓舞淹滯青衿組帶之士彬彬郁郁莫不願出門下
迄今誦說不衰居平好施在館職時總河顧琮以繼母故屏居於
外數口嗷嗷不能舉嬰爲貲助之經年繼母卒感悟召入後爲名
臣李光地次女歸吳某隨宦秦之隆德虧帑數千吳死女坐繫乃
代完全資之歸親族依以生者數十戶而食不兼味衣無新製家

有茅屋數椽不足蔽風雨自列九卿未嘗有尺寸益爲家計凡一
爲司業兩主棘闈三視學政及門且千人多爲名卿佳士其沒也
咸服心喪私諡曰文誠先生乾隆五年通政使錢陳羣表其行請
於朝詔祀鄉賢所著有詩古文二十卷藏於家

魏廷珍字君璧景州人幼端穎博學爲安溪李光地所知延校三
輔試卷光地以一代巨儒開府畿南及門如何焯方苞等俱海內
名宿一見爲莫逆交宣城梅文鼎精於算法九章三角之學廷珍
一經指授輒得其要旁究天文地理河渠樂律無不討論精確得
其指歸康熙四十四年舉於鄉光地薦入內廷與王蘭生梅穀成
校對樂律淵源諸書竝命同光地參訂樂律韻學士論榮之五十
二年以一甲三名及第進士授編修超擢侍講五十五年充日講
起居注官轉侍讀庚子典試江南擢詹事旋升內閣學士六十一

年管理兩淮鹽政時運庫虧空百三十萬下車清查據實奏聞條
分縷析以三十年補足帑項充實商力無虧雍正元年擢偏沅巡
撫偏沅仍舊名咨部入告改爲湖南巡撫二年緣事降調回京授
盛京工部侍郎三年授安徽巡撫兼兵部侍郎清查上江錢糧拖
欠釐剔積年諸弊端補各關缺額隨收隨解稅額有餘又奏請將
潁州州同移駐方家集專司巡緝兼管水利鹽務部議從之八年
調湖北巡撫九年擢禮部尙書十年授漕運總督漕船過淮簽盤
官吏需索旗丁隱忍受害廷珍親製簽尺簡而不煩猾胥不能上
下其手其運丁盜賣挂欠之弊由於本地耗費沿途逗留廷珍洞
悉情形嚴行飭禁尋署兩江總督十一年回任總漕遷兵部尙書
調禮部乾隆三年授都察院左都御史四年轉工部尙書五年以
老病乞休廷珍清廉誠樸然少幹濟才 聖祖 世宗屢告誡之至是

忤上意羣職十三年上東巡過景州廷珍迎饗賜林泉耆碩額并給還原銜御製詩二章賜之十六年再賜以詩二十一年三月卒年八十八遺疏入賜祭葬如例謚文簡著有課忠堂詩鈔

張渠

張渠字濬川號認菴武強人由歲貢生中康熙五十年副貢任太常寺博士入貲加郎中雍正五年補刑部郎中尋充大通橋監督七年發廣東以道府用占渠兩任倉差聲名俱好諭督撫酌量題補八年補惠州府知府鹽權羨餘悉歸公不私一錢特擢肇羅道十年遷按察使明於鞫獄有嘉應民胡甲以心疾誤服草藥死族人控其繼妻毒害有司已擬極刑矣渠親鞫之寃乃白和平民羅阿九以嫌戕其鄰賴某而狡叛同族羅應凡爲主謀疊刑誣服渠一鞫得其實立釋之其明慎多類此十二年奏竊案宜分黨夥

多寡器械有無定罪請嗣後三人以下持械行竊雖不得財杖六十徒一年四人以上雖不得財亦無器械爲首者徒一年爲從者減一等至十人以上不分首從俱發邊衛充軍地方官疎防諱匿照強盜處分疏入議行遷布政使十三年調江蘇布政使乾隆三年奏江省營馬放青向無定所踐食田禾又攘濱江海民田爲牧場與民爭訟請令駐防六旗營汎視馬數定牧場禁民佔墾如無曠土卽以營中公地州縣官基改設或民間草地豁租立限如踐食田禾旗兵鞭一百營兵杖四十過多者依毀伐稼穡律治罪革伍追贓其管官失察者罰俸縱庇者降革又請變通舊例二條一向例地丁錢糧經州縣徵欠一分至四分者降職戴罪督催限內不完始議降調署任官初參三分以上經徵督催俱降一級調用二限未完不及一分降一級留任臣思正官僅止虛降而署官之

咎獨重勢必嚴行酷比民不堪命請署官處分與正官畫一庶免
偏枯一向例戰船小修勒限四月大修六月違限一月者承修官
降一級調用兩月三月以上降二三級調用五月以上革職督修
官與督撫俱分別罰俸降調至內河弁兵平時哨船與海外戰船
不同而修造處分一例輕重失宜請酌定不及一月者免議兩月
三月以上罰俸四月以上降一級留任五月以上降一級調用督
修以次遞減較別項工程處分已重比海外戰船已減承辦之員
庶不致概罹重罰均下部議行尋擢湖南巡撫奏乾州永綏同知
鳳凰營通判管轄紅苗養廉僅能自給遇有違犯請每年各增銀
二百兩以資緝捕詔如所請時花園寨通溪寨風火坪諸峒苗作
亂所在騷然渠下令州縣各安堵如常時檄各寨勒獻楊香兒龍
四斤諸逆首追還陷口峒人得檄震懼渠威名傳獻逆首遠近苗

猶俱帖然不敢動遂以無事奏入賜御書及麀鹿羊雉獎賚有加
四年調江蘇巡撫奏劾蘇州織造兼管許墅關海保貪婪枉縱各
款命總督郝玉麟會鞫得實擬罪如律又請蠲除泗睢桃宿等州
縣淤地升科逋賦清雜稅浮耗五年四月奏吳江縣盛澤鎮地界
浙江商販雲集往往藏姦爲民害請將縣丞移駐以資彈壓部議
從之七月調湖北巡撫卒

元展成

元展成字允修號芝亭靜海人歲貢生初納書爲兩淮鹽大使雍
正元年升雲南阿迷州知州四年遷麗江府知府五年擢糧儲道
六年升按察使七年調廣西八年晉布政使十年擢貴州巡撫疏
言黔省新闢苗疆設立重鎮宜豫籌積貯以裕民食古州都江河
直達廣西便轉運請撥廣西潯州沿河倉穀五萬石運赴古州建

倉分貯下部議行十二年疏言冊亨羅斛兩州同均有錢糧命盜之責與州縣略同永豐州夷目及南籠府經歷皆處煙瘴之地請將四缺均照苗疆例三年俸滿卽予升用從之十三年五月苗人叛擾黃平州上以黃平逼近苗疆設兵少而無備又清平縣知縣邱仲照守城不力平越縣知縣楊興道辦軍糧多飾詞推諉僅革職未請治罪上責其徇庇下部嚴議高宗卽位詔來京質訊擬遣戍特恩寬免尋起爲山西按察使二年擢甘肅巡撫三年二月奏甘肅藩庫有平餘銀兩歲不過千餘金舊日藩司於放兵餉各項內零星剪裁加至三千之數旣失政體竝滋弊端嗣後請將平餘實數報部卽以此項留充書院費用得旨允行十一月奏蘭州係省會之地請將臨洮府知府及附府之狄道縣移駐蘭州改爲蘭州府臯蘭縣原駐蘭州知州移駐狄道改爲狄道州蘭州原轄之

金縣河州渭源各州縣俱隸首府其經歷州判吏目典史等官各隨原屬之府州縣移駐下部議行十二月甯夏地震總督查郎阿奏聞展成奏報遲延予嚴飭四年五月奏安西鎮卜隆吉屯田被災屯兵按季攤扣之銀請限以兩年分七季扣清從之六年四月奏甘省地處邊陲山頭地角沙磧之區獲利甚微應聽民種植永免升科其平原曠野官興水利或民間自出貲引灌認墾者應照例六年起科如開墾尙未及年而地有沙鹼者准報免如所請行尋以州縣匿災爲御史李愬所劾革職戍軍臺自請捐滄州城工贖罪釋還九年卒展成清介不苟爲政持大體不擾民其牧阿迷建文廟增倉廩繕城垣革里役之弊一州稱治撫黔時有苗匪兄弟與其母苗霞飛作亂展成出奇計禽其渠削平之在甘肅番眾皆畏服部落帖然署內建水鑿亭明志削籍家居產盡落人皆憐

之

尹會一 子嘉銓

尹會一字元孚號健餘博野人父公弼早世母李以節孝旌會一幼孤五歲母口授論語卽知孔子之言不可悖及長舉止端凝見者決爲國士與同邑劉克一祁州刁顯祖清苑王奎結社爲文率以道義相切劘宿儒杜汝礪亦引爲忘年交康熙五十九年舉鄉試雍正元年癸卯會試榜發上命朱軾張廷玉搜落卷會一與王步青張江等獲選中第十八名廷試逾期明年始成進士授吏部主事四年充廣西副考官遷員外郎明年分校禮闈故事會典鄉試者例不開列蓋特命也尋外補湖廣襄陽知府奉母以行襄陽臨漢江水暴漲壞護城石隄會一捐金修築自萬山至長門延袤十里又建八蜡廟於社稷壇西爲民祈報之所郡中舊有書院而

士人苦無書爲購經史萬餘卷藏其中政暇則親課諸生顏堂曰
 推訓以推母訓及人也訪諸葛隆中舊址建廬爲記接士以禮撫
 民以寬輿論翕然上官察其能移權荊州值歲荒饉石首饑民萬
 餘聲言劫倉穀會一減從行縣洶洶擁輿前會一曰毋譁吾以救
 汝來便宜發倉粟拯之察強悍者繫以懲眾事遂定荊州都統將
 兵西征取道漢江檄命造浮橋吏民驚駭會一婉陳乃改以船濟
 總督蒞荆襄料軍見部署井然頌聲不絕於耳謂會一曰君何施
 而得此時某相國如都亦云於途所見惟襄陽守實賢十年調江
 南揚州府揚俗奢靡會一事事導以節儉屏絕苞苴有年家子饋
 鮓魚亦堅卻不受十一年遷兩淮鹽運使乾隆元年加僉都御史
 銜尋擢兩淮鹽政疏陳鹽務三條一挑濬兩城運河蓄水以利舟
 楫一出官錢買貯餘鹽以裨商竈一以新頒引鹽其丙辰綱請展

限奏銷下部議行二年入覲命巡撫廣東以母老陳請調撫河南
值開歸四十七州縣大水章自劾因采宋富弼趙抃救災事宜
損益之條爲十六詔從所請其大略曰貧民無居者暫予以葺屋
之資曰乏食者暫予以一月之粟曰緩徵曰減糶曰貸倉米曰移
他郡之粟曰留漕運曰助籽種曰勸富民使之相周曰假富民有
餘之居爲貧民曰夕棲身之地曰建棚舍以安流亡曰免米稅以
通商賈曰及時興工以資丁壯曰多種蔓菁以代穀食曰捐施藥
餌以療疾疫曰延社生以備稽查而流離求食者要以因地隨時
便宜行事爲本至令有司隨在廩給竢改歲東作資送還鄉則古
法所未備也以是災民無一出境者又以災禳之後盜賊滋多爲
清保甲稽客舍申夜禁增設巡檢一官於伏牛大隗重山險隘之
區盜遂不能爲民害又條奏農務四事以豫民播種多失天時而

一夫之耕動至百畝故工薄而獲少樹藝紡織之事亦不講求乃
 爲之分晰種植先後刊諭老農一人授田以三十畝爲率沙鹵之
 地廣植樹木竝勸導婦女興紡織之利時時周巡四境督率大小
 官吏講明周官溝樹畜牧比伍保受之法逾年教化大行鄉農種
 榆柳棗梨二百萬株風俗爲之一變嘗至輝縣登蘇門見濱河渠
 內有以水田徵糧而不得水利者請減科改爲旱田凡一千八百
 畝有奇又以俸糈所入爲揚州兩營及河南撫標三營置舉本各
 二千金曰凡卒伍必使衣食得自贍乃可以法繩也又以唐韓愈
 宋范仲淹應照周程張朱之例添設博士湯斌宜從祀孔廟先後
 奏請均得旨允行此尤有功世道之大者四年爲御史宮煥文所
 劾解任旋京授左副都御史卽奏言人主一言天下屬耳目焉今
 方甄別年老不勝任之員而饒州知府張鍾又以年老命改部司

旬日閒前後頓殊恐羣下無所法守 上嘉納之五年以母年逾七十疏請終養奉旨後卽馳出都門公卿送者皆不及九年丁母憂十一年服闋授工部侍郎命督學江南十三年轉吏部侍郎卒詔遣布政司參政陶正中諭賜祭十六年順天學政呂熾請入祀鄉賢十七年江蘇巡撫雅爾哈善請祀名宦十八年江蘇學政雷鏞請從祀道南祠二十五年河南巡撫胡寶瑤請祀名宦祠俱奉俞允會一事母篤孝少時授經邠州假館迎母侍養凡七年不忍一日離在官每夕必以所措施詳告其母母意或未愜則跪而請罪不命之起不敢起官中祿賜出入壹稟於母非請命妻子不能取尺布錙金日用外多布之治所周恤貧困寒者衣疾者藥矧設義田義倉義學諸凡惠政會一皆奉母教行之其母通文史憫民俗恬侈縱逸作女訓質言十二章以劾茲之每遇水旱輒跪禱聞聖

制悖大以及臣下讜論訐謨必再拜稽首以慶當歸養時上御製詩章扁聯寵賜之朝士大夫藉藉稱羨僉曰馮母宣文君今再見矣會一築健餘堂承顏養志年五十依依猶嬰兒狀高斌總督直隸以事過博野府縣囊弓輔矢車騎絡繹馳抵其家升堂問母起居每值嘉節執友碩儒宗尙鄰里咸奉觴上壽環聽母訓不敢愆忘家居五年朝內外大臣交章相薦起會一謝曰吾豈以三公易養耶母卒號泣擗踊斂葬悉準古禮舊撫士民皆遠來會喪樊城宜城爭建賢母祠以祀焉會一篤信程朱謂治法不本於三代皆苟道也故自服官後日取漢唐以後代不數見之人以自律其在河南以中州自北宋以來理學最盛歷金元明代不乏人清朝孫奇逢湯斌張伯行耿介張沐尤爲傑出會一慨然以振興絕業爲己任增訂洛學編示學者命州縣分四鄉立社學簡有齒德者

爲之長每朔望長吏集諸生講論德義書其孝友睦婣任恤與其
放逸奇袤爲患於鄉里者而加勸懲焉糧道黃叔敬醇粹儒者每
與兩司晉見會一執後進之禮視學江南首謁東林道南祠舉舊
典答諸生再拜凡試畢士旅見皆然願小學倡明程朱宗旨以此
邦文勝講求明倫敬身之教以敦厲學者嘗屏騶從徒步數十里
造謁方苞於清涼山下操几席杖屨北面稱弟子苞辭謝不敢當
越日又走謁苞畏邦人疑詫入九華山以避聞陽湖處士是鏡隱
居有孝行親訪諸舜山薦舉以礪士習丹徒鮑皋長於詩江陰包
彬謹飭篤學會一皆禮致之按試蘇州時溽暑店作越七日自知
不起草遺疏言任賢納諫始終一意以立誠爲本旬日中無一語
及家事卒之日知府某人見子嘉銓侍尙爲辨人心道心之分汗
涔涔霑衣請少偃息不可移時危坐而逝年五十八生平爲學務

在力行於古今人學術純駁審擇之而未嘗攻斥曰吾惡學者之
好爲謾罵也初氣質不能自克請益於高斌斌曰只欠讀書耳告
以近思錄遂終身墨守居官二十餘年功業在天下而自視粥粥
若無能者嘗論爲學之要曰讀書要闕疑然後所悟爲真得修身
要改過然後遷善能日新又曰聖人中禮賢人守禮學人當習禮
下學上達無以易此又曰人知周子之學主乎靜也然觀易通所
載必以懲忿窒欲遷善改過爲立誠之實功而諄諄於慎獨是慎
獨乃見其主靜合內外徹上下孔門學脈正在乎此非異端所得
藉口也又曰蹇以反身修德困以致命遂志君子處窮所得爲者
如斯而已大壯以非禮弗履晉以自昭明德君子履盛所可恃者
如斯而已此謂守約此謂由己其論爲政之要曰昔人論爲政之
道興一利不如除一弊漢文帝躬修玄默令德善政相望於冊而

書除者居其大半可謂省刑罰薄稅歛矣以此化行天下吏安其
官民樂其業不亦宜乎若夫內多欲而外尙繁文自生民以來未
有能治者也又曰大學言誠意重在好惡兩端乃人心之同然也
推之爲恕絜之爲矩由家而國而天下已情不辟人性無拂持其
平焉而已後世不講乎此刑賞舉錯動與羣情相反不知大權所
在人不敢違而公論所在亦實有難犯者自古驕秦之主欲與天
下爭一日之是非而不可得堪爲鑒矣又曰今日講養民之政制
田里難教樹畜易今日講制產之法限田易授田難非得命世之
才不能潤澤周禮之大略心乎斯世斯民者以樹畜爲救時之急
務以限田爲授產之權輿可也又曰居官者無論才之長短祇此
寸心中常存一爲國爲民之念視爲天經地義則不拘何職必能
顧名思義勉求盡分思之思之才力出矣其持論切實皆本心得

大率類此清初孫奇逢表章正學誘進後人嘗以洛學編屬湯斌
北學編屬魏一鰲會一撫豫時曾續洛學編歸里迺刪訂魏本增
入原編四人續輯後編十三人博采行實期年始成書三卷督學
江蘇蒐輯道南編未竟而沒士論惜之今所傳者有小學纂註六
卷近思錄集解十卷呂語集粹四卷讀書筆記六卷健餘劄記四
卷講習錄二卷君鑑臣鑑士鑑女鑑十六卷奏議十卷撫豫條教
四卷從宜錄一卷又作賢母年譜一卷質於方苞苞曰大夫人天
下賢母創例爲世法可也會一編次其母卒時慟哭漬紙墨皆淚
痕其健餘文集十卷詩三卷尺牘四卷年譜二卷則方苞所訂也
門人王繫瑄稱其文三變少而宕激壯而肆晚而簡質以程朱之
學爲門庭以周孔之書爲歸宿可謂明道篤古君子矣子嘉銓雍
正十二年舉人繇刑部主事遷郎中乾隆二十八年授山東濟東

道三十二年晉山西按察使明年升山東布政使旋調甘肅三十
九年擢大理寺卿四十三年以原品休致四十六年高宗回蹕經
保定以不親迎駕失上意又爲讎家所誣誅死嘉銓性純孝丁父
憂三日後始進米飲一溢朝夕啜豆粥廬墓三年哀聲動人水暴
漲漫廬死守不忍去墓側枯楊復生鍾淑撰三異記彰其孝行淮
商感會一德致五千金爲賻嘉銓堅拒之曰大人生不取一錢今
受此何以對九京聞者感歎以爲會一有子初嘉銓舉孝廉後銳
意帖括其父教曰人生可法可傳何在此古人年少登科爲不幸
汝戒慎之時建安定書院立講堂學舍百二十閒延王步青爲經
師使嘉銓受業講習小學近思錄又命執贄方苞門下效蔡沈父
子同受學於朱子故事苞授以儀禮析疑嘉銓生平得力於父師
之學甚厚意欲以經術相承而衰年罔識忌諱橫遭文字之禍故

著述概毀滅無存可重歎也

名臣傳四終

大清畿輔先哲傳弟四

名臣傳五

大清畿輔先哲傳第五

天津徐世昌撰

陳惠華 弟惠正

陳惠華字雲倬號月溪安州人年十六補州庠生康熙五十九年
舉於鄉雍正二年甲辰成進士廷試第一人及第授職修撰京畿
士前無魁天下者一時榮之四年丁父艱服闋充日講起居注官
七年擢贊善九年升侍讀學士提督廣東肇高學政旋調廣韶遭
內艱歸未終制召充一統志副總裁十三年主試浙江乾隆元年
充會試同考官十月遷詹事府詹事充經筵講官入直上書房擢
刑部右侍郎三年充江南鄉試正考官四年正月賜羣臣宴賦柏
梁體詩惠華與焉尋遷戶部尙書五年京師有富室俞君弼者死
九卿俱往弔事聞飭查未往者惟惠華等數人七年奏言居民近

山海關三百里內出關種地者不得留難給印票驗放下大學士
議行尋調兵部八年以弟惠正任陝西按察使鞫王之博幼女獄
爲巡撫塞楞額所劾具密摺將自辨惠華沮之坐是部議降二級
授兵部右侍郎十二年以議處江西總兵高琦部議革職十四年
特起爲都察院左副都御史仍在上書房行走二十二年升工部
侍郎又明年遷禮部尙書二十九年致仕三十六年孝聖皇太后
萬壽詔繪惠華入林下九老圖蓋異數也四十四年卒年八十三
惠華少讀書靜室有東隣女竊窺正色拒之書曹鼎不可四字於
座右以第一人及第性儉素退朝歸組袍蔬食蕭然如寒素恆手
一卷危坐誦之立身動遵禮法而不居道學之目諳於政體綜覈
績密所至無廢事而亦不輕舉一事嘗謂士大夫之患莫大於近
名求立德之名則必有迂怪不情之舉而實行反荒求立言之名

則必有異同勝負之論而正理反晦求立功之名則必務見所長
紛更舊制立一法反生一弊而實行反無所裨聽者趨之著有葵
錦堂詩集道光七年入祀鄉賢祠弟惠正字醇叔號葛城少善爲
文桐城方苞見而亟稱之以爲二十年來時文家未見有此雍正
八年成進士分吏部額外主事學習期滿治稿案明敏無遺見重
於大學士張廷玉越次題補文選司員外郎尋擢郎中乾隆三年
京察一等特授山西冀甯道六年晉山東按察使七年調陝西適
蒲城王幼女被勒死訊悉姦而非盜而同州知府張某懼罪以先
入之言聳巡撫聽飭行省釋惠正不從將欲封章以聞爲總督所
劾遂奪職發軍台越六年釋回籍更肆力於詩文掌教問津書院
及門從游者甚眾辛卯遇慶典給職銜惠正平居好讀周秦以上
諸子書寢食以之其詩上溯建安下逮長吉心摹手追劇有心得

卒年七十有三著有醇叔文稿葛城詩集念堂詩話

周人驥

周人驥字芷囊號蓮峯天津人生而岐嶷卓犖有奇志資性端重修眉美髯狀貌甚偉幼補博士弟子員淹貫經史爲文千言立就雍正四年舉於鄉明年成進士授禮部主事同官咸相推重受 憲宗特達知以主事加翰林院編修銜提督四川學政釐剔宿弊不誠而嚴差竣補精膳司主事擢儀制司員外郎充典試福建副考官考授貴州道監察御史丁母憂服闋補廣東道監察御史轉吏科給事中巡視南漕歷任科道三載值 高宗御極之初人驥遇事直陳不邀名不立異凡有關國計民生者斟酌古今多所建白一切奏上每蒙嘉納其奏進尙書毛詩講義二篇尤合古人君臣交儆之義旋外授廣西右江道下車之日有苗民隔省爭山訟久

不決人驥爲勘定界址訟立息柳潯諸郡邑文風樸陋每集諸生
討論經義授以讀書爲文之法士風丕變擢湖南按察使治獄精
慎其於輕重得失出入生死之間衡情準法必得其平而後已沈
寃滯獄爲之一清發姦摘伏計二百案編彙成帙題曰臬楚摘案
見者歎其精允擢陝西布政使旋調湖南值洞庭水漲瀕湖居民
奔集號呼人驥捐廉分厰煮糜計口授食全活無算再調浙江入
覲溫旨慰勞未出都卽授浙江巡撫蒞任除漕弊補積逋植樹畜
禁左道邪俗嚴緝盜賊獲其魁數人並請公帑修築海塘發倉穀
活窮黎被水者四境晏然以失察前撫鄂某事筆吏議去官未幾
命署廣東巡撫再調貴州清釐錢法勸植棉麻以川江險運銅費
重奏開南明河以節經費並藉通黔省百貨諸船會有効其靡帑
累民者褫職歸里罰修完縣城工卒年六十有八人驥生平清介

才氣過人其爲言官人謂有古名臣風三歷封圻廉潔自持未嘗謀身家之利每接見僚屬諮詢民生休戚風俗好尙語不及他一切官書不假手賓佐盛暑祁寒躬親裁決不顧勞瘁晚年因開河一案竟致廢棄人多惜之人驥善射工詩精書法人得其片紙隻字視如珍寶著有香遠堂詩集行人驥自罷官歸僅舊宅一區沒入官家益貧賃居草屋數間藉蔽風雨沒後妻崔氏李氏守志日或不得一食惟長齋繡佛處之晏如人皆難之

朱珪

朱珪字石君號南厓晚號盤陀老人大興人祖登俊與高安朱軾友善父文炳受經於軾故珪自十一歲卽傳高安之學年十七舉乾隆十二年鄉試與兄筠同榜名震都下次年成進士選庶吉士習國書阿克敦劉統勳鄂容安皆重其學行十六年散館第一授

編修累遷侍讀學士以撰進文冊受 高宗知二十四年主河南鄉
試奉使祭告南嶽明年充會試同考官秋授福建糧道毀和合諸
淫祠民大驚服二十八年擢按察使兼署布政使閩人裘自位假
平臺灣功鬻武職獄連數十人珪誅正犯一人諸受欺者皆不究
有告家譜妄逆者讞之僅戮一撰譜者屍不坐其子孫二十九年
丁父憂歸三十二年補湖北按察使時緬甸用兵珪司驛務無誤
無擾明年調山西又明年遷布政使奏立保固城工法以三十年
爲限下部議行三十六年權巡撫事奏撥歸化綏遠二城穀十餘
萬石搭放兵糧以省采買而免紅朽奏免土默特蒙古私墾之罪
以所墾牧地三千一百餘頃許附近兵民認耕納租歲六千餘兩
增官兵公費奏太僕寺牧地苦寒宜改徵折色以便民除弊皆下
部議行三十八年勘歸化城水災奏撫恤之明年按察使黃檢疏

劾珪終日讀書廢事又明年入覲授侍講學士四十一年命上書
房行走侍 仁宗學時初置文淵閣官特命珪直閣事逾年允會試同
考官四十四年主福建鄉試明年督福建學政將行上五箴於 仁
宗藩邸曰養心曰敬身曰勤業曰虛己曰致誠 上力行之及親政
亦嘗置座右四十九年扈蹕南巡授內閣學士閱江浙召試卷五
十一年授禮部侍郎主試江南督浙江學政五十四年置蕭山祭
田百畝冬還朝充經筵講官明年經筵進講諸皇子侍班環聽 高
宗稱善者久之春總裁會試秋授安徽巡撫命馳驛振水災乃攜
僕五人與村民同渡振宿泗碭山靈壁五河盱眙民以糧借懷遠
鳳臺壽民以糧及種築決隄六十餘丈復請展春振手自散給民
無流亡五十七年奏鳳穎水災免民欠萬五千兩祁門縣築城成
輕騎往驗之至新嶺有欲中傷歙縣令者屬掌亭人以饘餲進珪

恬然飽之五十九年調撫廣東尋署兩廣總督授左都御史兵部
尙書皆留巡撫任英吉利入貢呈土物卻之嘉慶元年授兩廣總
督兼署巡撫六月有旨內召將用爲大學士也俄以閩浙總督魁
倫奏粵東艇匪駛至閩浙珪在總督任不能緝捕寢前命仍授安
徽巡撫會鳳陽等屬水災疏請振恤親給之官吏莫敢侵時楚豫
有邪教流言皖屬多跽伏者珪曰疑而索之是激之變也乃親駐
界上籌防禦徧蒞潁亳等屬聚城鄉長老教誡之廣張文告簡明
諄切民大感化明年授兵部尙書調吏部皆留巡撫任振宿靈壁
水合肥定遠巢來安全椒諸縣旱災明年蒙亳復水振恤如之會
高宗崩 仁宗馳驛召珪珪哭且奔道中上疏略言天子之孝不以
毀形滅性爲奇以繼志述事爲大親政伊始遠聽近瞻默運乾綱
霧施渙號陽剛之氣如日重光惻怛之仁無幽不浹修身則嚴誠

欺之界觀人則辨義利之防君心正而四維張朝廷清而九牧肅
身先節儉崇獎清廉自然盜賊不足平財用不足阜惟願我皇上
無忘堯舜自任之心臣敢不勉行仁義事君之道及至京哭臨
上執珪手哭失聲旋命直南書房管戶部三庫自是國家大政事有
所咨詢皆造膝自陳不草一疏不沾直不市恩不關白軍機大臣
上以其第在外城特賜第西華門紫禁城騎馬加太子少保尋命
充實錄總裁嘉慶四年典會試調戶部尙書時上禁浮收漕米之
弊外省以運丁貧仰資州縣州縣取民不得不浮於是安徽有加
增銀江蘇有加耗米之請部議將擬行矣珪思之不寐綜其數較
原徵加倍乃決計駁曰小民未見清漕之益先受加賦之害不可
行並令曹司以後凡事近加賦皆議駁以體 皇上損上益下之意
長蘆鹽政奏鹽價一劬加錢二文珪駁曰前蘆策因錢價過賤已

三加價又免積欠二百六十萬兩餘欠展三年商力自寬而今之
錢價又漸貴應無庸議廣東布政司奏升濱海沙地賦珪駁曰海
沙淤地坍漲靡常故照下則田減半賦之今視上中田增賦是與
沿海民計微利非政體且民苦加賦將別有漲地亦不敢報墾不
可行後倉場建議請預納錢糧四五十倍準作義監生珪駁曰國
家正供有常經而名實關體要於名不正於實有傷斷不可行凡
駁議皆親屬稿奏上皆韙之五年兼署吏部尙書坐輿夫毆傷禁
門兵免太子太保解三庫事彭元瑞墮馬西華門內珪呼其輿入
門昇之復坐違例鐫三級留任六年陪祀祈穀壇未曙誤行墜甬
道下傷左跨賜醫賜食駱驛於道遣內監賫硃諭至第視疾且詢
事三月小愈卽趨朝七年秋扈蹕灤陽宣制以戶部尙書拜協辦
大學士仍加太子少保八年兼掌院學士九年春駕幸翰林院先

期晉珪太子太傅及幸院賜宴聯句御書天祿儲才額摹刻院堂以墨蹟賜珪第中珪在翰林爲二十四科前輩資最深且掌院事瀛洲典故盛且榮焉十年正月宣制拜體仁閣大學士管理工部事上以是命遵先帝遺詔也命詣裕陵謝明年春感疾上命遊覽西山諸勝以散其懷時珪年七十有六矣九月乞休上曰待卿八十當爲壽尋命戶部尙書戴衢亨賈賜詩十韻及玉鳩杖諭天寒間二三日入直且俟日出後至南書房候召對每入對則預定召對後期十一月庚午寒甚乾清宮召對畢降階忽痰壅歸第賜御醫視疾賜假兩月十二月乙亥力疾作芻獻詩上將親臨其第丁丑復命戴衢亨來問疾夜輿至卒上震悼泣諭羣臣降制曰大學士朱珪持躬正直砥節清廉經術淹通器宇醇厚凡所陳奏均得大體服官五十餘年依然寒素家庭敦睦動循禮法洵不愧爲

端人正士遽聞溘逝深爲痛悼初六日朕親臨賜奠已賜陀羅經被可令慶郡王永璘帶領侍衛十員先往奠醑給內帑銀二千五百兩治喪晉贈太傅入祀賢良祠卯上親臨奠三爵哭不止回宮降制曰乾隆朝惟故大學士劉統勳蒙皇考鑒其品節賜諡文正易名之典特隆顧統勳於署總督任內曾經獲咎褫職至朱珪立朝五十餘年敷歷中外從未稍蹈愆尤猶憶伊官翰林時皇考簡爲朕師傅其所陳說無非唐虞三代之言不特非法不道卽少涉時趨之論亦從不出諸口啟沃良多揆諸諡法實足當正字而無愧著卽賜諡文正毋庸內閣議請也又曰本日朕親臨奠醑見其門庭卑隘清寒之况不異儒素晷念遺風愴懷未已可再令皇二子前往代朕賜奠俟殯送時派慶郡王永璘前往祖奠目送以示朕眷懷舊學至意復撰抒痛詩十二韻命南書房翰林黃鉞於

殯前焚之壬辰命禮部尙書承恩侯恭阿拉諭祭其第明年御製
碑文刻石阡門上旨旨 上謁西陵蹕路距珪墓數里遠眺松楸追
懷愴惻命大臣詣墓賜奠 高宗實錄成以珪總修八載賜祭一壇
長子錫經服闋後以京卿用珪在翰林時國家有大典禮撰進雅
頌詩冊文跋 高宗必嘉賞之以爲能見其大頌不忘規或陳坐隅
或命諸皇子皇孫寫爲副聖製詩時時寄示命和其官督撫時
仁宗在書房常頒手札積一百三十九函裝六卷歸朝繳進 上赤書
數年懷珪詩數十首爲二冊題曰蒹葭遠目曰山海遙思以示珪
珪跋云臣之蕪陋何足以當非常眷注惟有此心不敢欺耳生平
於大學義利之辨通鑑治亂之由天命呼吸可通民情憂樂無閒
反復敷陳 上嘗爲之聳聽其所著知足齋詩文集 上命以刻本
進賜題律詩四章於卷首應制諸作摛華揆藻實大聲宏颯颯乎

朱紘清廟之音至於感物懷人模山範水長篇險韻別開生面才力之大無所不舉而真情至性勃勃動人未嘗求肖於流派實則與杜陵昌黎爲近古名臣大儒之專集未有盛於斯者珪端凝純粹胸中無城府於經術無所不通漢儒之傳注宋儒之性道兼而有之取士務以經策較四書文銳意求樸學才士黃景仁張騰蛟死深痛惜之通人寒士必揚其名於朝得其一言獎藉者必曰出石君先生門下典試事不受外僚贈遺承宣數省平餘銀鉅萬悉不取撫安徽裁蕪湖南關陋規閩省以洋商陋規事覺發欽使蒞治惟珪未受一錢珪官於外厓岸廉峻中朝大官絕無繫援管部事持大端不親細務清操亮節海內仰之撫皖時門人汪庶子學金來請益留帑月歸珪曰何所聞而來何所見而去汪曰一談一笑無非天理某所見乃大進矣其感人如此尤篤孝友父杖兄跪

傳五
而以身蔽受之慟母氏早世事庶母幾於母事諸兄悲愉如一體
執兄喪咯血幾至毀事寡嫂盡敬撫兄子如己子三郇故交皆受
其周卹無少吝容嘗曰吾三十九歲夜坐忽腹間自暖由脊上貫
於頂甘液自呬下注由是流轉至老不絕乃知朱子注參同契非
空言也年四十餘卽獨居迄無妾媵御製抒痛詩有云半生惟獨
宿一世不談錢其知之者深矣

李綬

李綬字佩廷號杏浦又號竹溪宛平人乾隆十六年進士改庶吉
士授編修二十年轉湖廣道監察御史奏湖北枝江縣知縣黃文
瑗因迴避本籍五百里以內調任棗陽縣吏部書吏詐贓請交刑
部嚴審奏六部司員缺有繁簡刑部爲刑名總匯前定遇三缺以
二缺咨吏部一缺留本部題補乃因積缺滿漢接算留缺亦可通

融甚至已咨之缺與別缺抵換弊竇叢生請嗣後各自接算分別咨留奏劾前革職浙江巡撫周人驥匿災殃民不宜起用二十五年充河南鄉試副考官二十七年提督湖南學政奏請學政按臨提調官應將府縣原取各卷解送磨對其府州縣及院考保結廩生不准節次更換奏湖南士子留心經學者少禮記一經多誦習坊間刪本較全經不過十分四五請敕禮部行文銷燬並轉飭各省學政考官經題不得盡出素擬三十年遷奉天府府丞奏定盛京宗室學生及覺羅學生規條清書漢書互相研習作詩文習弓矢設功課簿逐日登記府丞親往稽查將軍府尹每月考覈以爲常奏添設宗室覺羅二學副管長奏規訂瀋陽書院經費八千餘金發商生息以資膏火奏設立錦州書院皆允行三十四年丁母憂服闋補通政使參議三十八年仍擢奉天府府丞奏定奉天滿

合字號生員考試章程四事奏參蓋平縣學訓導周蒲因病廢倩
人頂認驗看奏燬奉天前明違礙碑碣一百六十六件四十四年
轉通政司副使明年遷大理寺卿又逾年擢內閣學士兼禮部侍
郎銜五月稽查中書科事務四十八年充文淵閣直閣事八月提
督江西學政授江西巡撫尋調湖南值湘省水災奏請帑振飢給
穀播種奏增衡陽彬州諸路驛馬奏稽察西洋教九月調湖北巡
撫五十年復內授兵部侍郎轉工部五十二年擢都察院左都御
史五十三年三月辦理萬壽慶典五十四年充上書房總師傅賜
紫禁城騎馬五十六年卒年七十有九綬持身貞介不欲曉曉露
圭角而義所當爲皆毅然任之一不稍顧忌一典鄉試兩督學政
兩任奉天府丞外蒞疆畿內掌風憲前後條奏便宜並邀褒賞立
見施行乾隆乙巳綬與千叟宴次子文杞以縣丞改工部司務特

旨侍養皆異數也。綬孝友有幹略。年十七。父孔嘉罷官。滯滇中。卽能奉母歸里。營大父喪。豐儉皆中禮。治家嚴肅。而門庭雍睦。兄弟交相切劘。以學幼弟及諸姪。婚宦皆藉以成就。而收恤孀妹徐氏。卒教其子。明元成名。尤爲士夫所稱。性喜讀書。暮年尙手錄文選。爲詩不下數千首。皆付子孫藏。弄不欲與時人爭名。然文章具有法度。學者稱杏浦先生。

李殿圖

李殿圖字九符。號石渠。又號露桐。高陽人。乾隆三十一年進士。改翰林院庶吉士。三十四年授編修。三十五年充順天鄉試同考官。三十九年充湖南鄉試正考官。四十年充會試同考官。尋遷廣西道監察御史。四十二年提督廣西學政。四十四年丁憂回籍。四十六年服闋。補山東道監察御史。四十七年轉掌河南道監察御史。

四十九年升禮科給事中時甘肅逆回田五滋事上命阿桂福康
安往剿殿圖以京察一等記名道府辦理軍站糧餉事宜尋授鞏
秦階道六十年遷福建按察使旋以官犯胡啟文墜鍊斃命部議
革職留任嘉慶三年升布政使六年擢安徽巡撫調福建再調江
西尋召來京降補左春坊左中允遷翰林院侍講十五年以病乞
開缺十七年卒年七十五初任鞏秦階道伏羌獲回人偽牒人情
洶洶適殿圖按部次蘭家店有訛言賊至者殿圖訶得其情不問
驚亂遂定乃誅其魁婦孺被繫者量情宥釋之振恤被害諸家輕
徭薄稅次第施行會卓尼土司與四川松潘漳臘諸番爭噶固山
界大吏檄殿圖往勘攜一二騎行歷小洮河丈八嶺鶯哥口諸要
害惡湍峻谷荆莽縱橫人蹟罕到羣番導行抵界所片言解紛咸
歡呼服從立石達魚山頂而還任閩藩時奏言農家畜騾馬三四

頭供耕種地方官不得藉事滋擾地方獄訟宜速審結各省常平倉穀無災之年不准出借定書吏衙役常額數禁關津稅口門役之弊上嘉其切中時弊命直省督撫仿行之又奏言閩省佃戶脫欠銀糧由於佃戶抗租橐胥影射宜詳查懲辦以裕國課台匪陳光愛等倡亂兵弁効力疆場者應與海洋緝匪被戕官兵一體入祠皆如所請行殿圖莅閩十年清積牘至數千百案囹圄無冤者捕殺漳匪蔡牽海賊陳湯等七百餘名訪獲械鬪案內林陳藍胡諸姓悉諭如律風遂息先是通省庫儲僅二十萬逾年樽節增至一百二十萬其利益國計民生者多類此平生讀書必求寔用不徒以考據爲長然辨證古今訓詁家往往不及嘗奉命查涇渭清濁源流自秦州溯流而上至鳥鼠崆峒著涇渭清濁源流辨繪圖上之議駁詳明上嘉其賅博乾隆四十年乙未會試殿圖獲

吳錫麒卷力薦總裁稽璜賞其制藝慮五策博奧有舛誤欲擯之殿圖力爭每條下疏其來歷凡數紙璜驚服遂獲首選殿圖作詩紀事人謂科場佳話云著有番行雜詠一卷傳於世

史積容

史積容字文量宛平人幼敏悟受學於大興朱筠乾隆三十三年舉於鄉又三年成進士授禮部主事遷員外郎遇事持正不苟阿韓城王杰器之曰史君若驥伏閑中殆難爲羣矣五十四年充會試同考官遷郎中是冬記名以御史用明年外授雲南楚雄府知府捐俸課士決龍江水以溉山田又教之樹桑飼蠶之法三年以治行卓異聞嘉慶元年威遠猥匪爲亂積容與迤西道李亨特鹽法道顏檢攻破土地塘賊巢賞戴花翎旋署開化猥人謀變鄉民奔入城總兵閉門不納積容曰吾聞設城以衛民未聞閉城以拒

民者也總兵曰賊闖入奈何曰若輩已至城門內之則助我拒之則從賊耳有變吾獨任之不累公也叱兵吏開城民乃得入卽其中揀練鄉勇卒收滅賊功任滿入覲上問殺賊狀奏對稱旨詔軍機處記名五月遷湖南衡永郴桂道楚俗於端陽競渡分黑白二旗角勝負先期聚眾要誓於楊靈廟溺死者相踵不鳴於官官亦弗能禁也積容至毀其廟編次江舟爲甲乙號屆期令保長巡徼約束之衡郡饒米粟姦商屯販米輒騰貴積容以法平其直及去任父老攀轅泣曰史公去吾屬無賤米食矣永州地界廣西民多食私鹽江華有私販數十人巡檢某遽以畔聞積容以所報無左驗陰至永州案其事未至而官吏已禽其黨盜首逃巡撫飛章入告謂結盟飲酒已具反狀劾積容緩事必欲督兵竟其事會兩廣總督吳熊光以反狀未實人奏上切責巡撫擢積容湖南按察使

然卒以失察私販吏議當免官詔以白衣領職明年署布政使條
奏重銓衡勤操練恤犯婦保城垣四事卽實授布政使尋以縣缺
補人失次爲巡撫景安所劾事尋得白內授光祿寺少卿遷大理
寺少卿十四年復出爲江甯布政使在任三歲調廣西布政使巡
撫欲奏案各州縣虧空積容以爲此私罪今藉藉如是若輩甯不
能設法彌縫乎不如陰察之得實以聞事乃無變不聽遷奏之上
命尙書初彭齡案驗不實大吏皆以罪去積容亦奪職歸二十年
五月卒於家年六十有八

傅鼎

傅鼎字重菴其先山陰人遷居宛平遂占籍初由吏員納貲爲府
經歷分雲南乾隆五十六年署廣南府經歷五年補實官尋升甯
洱知縣時湖南苗匪吳隴登爲亂雲貴總督福康安四川總督和

琳剿之鳴保砮治軍饒有功以直隸州同知升用並賞戴花翎
嘉慶元年補授福建汀州府同知八月調湖南鳳凰直隸廳四年
鎮守黑苗吳陳受嘯眾數千犯邊上嚴責巡撫姜晟砮爲禽之
上其功以知府用初湖北四川教匪起諸將移師北征草草奏苗
疆戡定月給降苗鹽糧銀羈縻之苗勢愈張藉口前宣勇伯和琳
苗地歸苗之約蔓延三廳地姜晟至倡以苗爲民之議有所求輒
應之時鳳凰廳治鎮守當苗衝砮乃上書總督百齡略曰三苗自
古叛服靡常治之惟剿撫兩端叛則先剿後撫威克厥愛乃濟邇
者楚苗之役福和二大帥以七省官兵撻伐二載而未底定何哉
論者謂始則恃搏象之力搏兔以爲功成指顧而無暇總全局以
商定算繼則孤軍深入苗巢前堅後險實有羝羊觸藩之勢兵頓
烏草河牛練塘九龍溝者俱累月不得已廣行招納歸咎於客民

爭占之滋覺盡撤苗巢營汛四十八處以期苗釋怨罷兵如豢貪
狼養驕子大功未就相繼齎志而歿踵其後者承士卒之疲勞國
帑之糜費又值川楚事急倉黃移師北去是以苗志得氣盈鴟張
魚爛不可收拾而大兵旣罷勢難再議興戎鼎思民弱則苗強民
強則苗弱非力籌衛民練勇之法不能戢其凶心與之更始於是
日招流亡附郭棲之團其壯丁而碣其要害十餘碣則堡之年餘
布置漸嚴密苗以礙出沒死力攻阻之難率鄉勇且戰且修其修
之之法界邊牆設哨樓建礮臺築堡以衛居民家室立碣卡以守
以戰以遏出以截歸邊牆互山澗哨樓倚邊牆礮臺橫其衝碣堡
扼其要凡修此數者近石以石遠石以土留孔以架槍礮掘壕以
限人馬又日申戒其民曰勉爲之不可失也是有三利矢不入火
不焚盜不踰有三便族聚則心固守要則備易相爲犄角則勢彊

民競以勸百堵皆作三年苗大出焚掠下五峒大吏將中縣開邊
釁罪有兵備道田灝者阿大吏意吝出納以旁掣之事且敗會吳
陳受亂作奉嚴詔詰責眾始不敢諱言兵是年碉堡成明年邊牆
長百餘里亦竣工苗人不敢潛出沒有警則每哨樓舉銃角婦女
牲畜悉入堡環數十里戒嚴時鎮守左右營黑苗屢爲邊患謀知
曬金塘苗出掠瀘溪卽夜擣燬其巢復伏苟群嚴大殲之誅逆首
吳尙保苗氣始奪六年而貴州石峴苗煽十四峒糾合湖南苗以
叛湖南環苗東南北三面七百餘里其西南界貴州碉卡未立故
乘隙來擾邊殫以鄉勇千五百馳赴銅仁貴州巡撫伊桑阿叱之
還楚界遂以招撫戡定奏邊民愬之雲貴總督琅玕琅玕急檄
會攻崖屯溝石壘殫使貴州兵攻其前而躬率鄉勇夜探山後徑
猿引上黎明抵其砦貴州兵見火起奮呼奪隘連破五巢進攻上

下潮萬山一峽苗扼其衝誓死守殫乘夜分貴州兵左右襲其山
而以鄉勇當峽口戰至晡潛兵火其砦上下潮相繼潰前後禽斬
二千餘凡三日苗壘悉平瓊珩奏楚勇功最并倣湖南法建碉堡
守之巡撫初彭齡劾伊桑阿冒功誤邊伏法而以殫總理邊務殫
以承綏孤懸苗穴有三難二可慮議遷城花園地而貴州方倚承
綏爲聲援不欲移殫請於貴州邊設螺螄堡移湖南守備戍之以
助彈壓七年九月廳旣移而羣苗爭舊城以兵相鬩者彌月殫率
鄉勇數百人往苗糾黨圍殫數重殫急據吉多砦按兵不動徐以
奇計穿圍去乃議繳槍械絕苗牙距十年承綏鳳凰諸苗羣起抗
令石崇四嘯聚數千勢尤猖獗殫率鄉勇千苗兵二千往苗目笑
曰往者宿將如福王者尙不敢搜吾鋒藐茲微官何足污吾刃也
連戰數旬敗之芬都河燒六砦追至陽孟岡夜五鼓萬苗突至會

我兵火藥匱絕後援而天忽大雨霰苗繩硝皆凍溼不復然鼎揮
兵以刀槩刺入陣鏖戰久之墮崖溺水死者二千餘生禽石崇四
明春正月移兵螺螄堡連夷破口漏魚補抽諸砦是役也賊初起
戕良苗故鼎得藉苗力深入轉戰月餘破砦十六獲槍礮刀子三
千有奇餘砦皆乞命降由是師行所至萬苗嚮服羅拜納兵唯恐
後鼎竝檄黔苗勒繳槍械罔敢抗命者鼎以嘉慶元年逆苗叛產
竝客民插花地畝分給窮苗今皆爲強苗侵霸石崇四竝占種他
砦田地一千餘畝其餘諸逆亦多侵占之田頃經分別清查仍照
叛產歸公例佃與良苗納租以充公用現在遠近砦苗聞風震懾
永綏七八九十等里繳出一萬餘畝乾州鳳凰保靖諸處亦紛紛
呈繳擬請邊防撤後挑留苗兵分交帶管卽以此項官糧賞給苗
兵支食湖南巡撫阿林據以疏聞得旨允行五月補授辰永沅靖

道初乾隆乙卯嘉勇貝子征苗時湖南提督劉君輔進五路平苗策不能用故苗得併力拒大軍鼎則偵謀聞然聲東擊西倏來忽去專用沈希儀鵬剿法大小百戰殲苗萬計追出良民五千良苗千餘而所用鄉兵祇數千而已大都苗兵有三長與壑重巖足仄目憚獸蹠柔騰如履平地此一長也地不容大眾其進無部伍行列退則鳥獸竄罔迴籌邃賊忽中發內暗外明猝不及防此二長也銃銳以長隨山起伏腰中繩藥無重衣裝忍飢渴耐暑寒此三長也鼎因苗地用苗技先囊沙輕走以習步倣造苗槍立上中下三的以習俯擊仰攻之法臨敵亦不爲方陳呼聚嘯散無異以苗攻苗苗挾利刀能乘火器甫發冒煙豕突因兼習藤牌刀法每戰還必嚴汰其無能者數年始得精兵千號飛隊優養勤練而嚴節制之行山澗風雨而行列不亂遺貨貨載道無反顧者共甘苦

若妻子哭陣亡者若子弟報公憤有如私讎鄉兵旣明地利習苗情又多被禍同讎之家故致死如一上下其法於各省督撫提鎮以練鄉勇者練官兵其見重如此鼎之禦苗以屯勇均田同籌竝舉嘗上巡撫高杞書曰防邊之道兵民相輔兵衛民民實屯有村堡以資生聚必有碉卡以固防維邇者貴州巡撫初公奏商均田一事請陳利害情形而效其說湖南苗疆環以鳳凰永綏乾州古丈坪保靖五廳縣犬牙相錯其營汛相距或三四里或五六七八里故元年班師後苗雲擾波瀆如故維時鼎竭心力籌之無出碉堡爲上遂募丁壯子弟數千以與匪苗從事來痛擊去修邊前戈矛後邪許得險卽守寸步而前而後苗銳挫望絕薪燼燄熄隄塞水止然湖南寅卯二載用兵以來已糜帑金七百餘萬國家經費有常而頑苗叛服無定募勇不得不散則碉堡不得不虛後患不

得不虞則前圖不得不亟通力合作且耕且戰所以招亡拯患於始也均田屯丁自養自衛所以一勞永佚於終也相其距苗遠近碉堡疏密爲田畝多少鳳凰廳碉堡八百需丁四千輪守竝留千人備戰共需田三萬餘畝乾州廳碉堡九十餘守丁八百屯田三千餘畝保靖縣碉堡四十餘守丁三百屯田千五百餘畝古丈坪廳苗馴止設碉堡十餘守丁百屯田五百餘畝永綏廳新建碉堡百餘留勇丁二千亦屯田萬餘畝而後邊無餘隙各環苗境以成圈圍之勢峻國防省國計異族偏處非碉堡無以固碉堡非勇丁無以守勇丁非田畝無以贍在邊民瀕臨鋒鏑固願割世業而保身家卽後路同資屏藩亦樂損有餘以補不足况所募土丁非其子弟卽其親族而距邊稍遠者則仍佃本戶輸租視古來屯戍以容卒土民雜處者勢燕越矣與其一旦散數千驍健無業子弟流

爲盜賊爲無賴何如收駕輕就熟之用而不費大帑一錢稽之古效則如彼籌之今勢則如此惟執事裁之其堅持定議大指蓋如此久之制益密田益闢又有出前議外者於是墾沿邊隙地二萬畝曰官墾田又贖苗質民田萬餘畝曰官贖田以補助折耗以廩賞以葺繕以周卹百務並舉而苗占田三萬五千餘畝亦以兵勒出別屯苗兵五千其苗弁復自呈七千餘畝爲經費以苗養苗卽以苗制苗於五年陳屯政三十四事十年陳經久八事十二年復陳未盡七事大抵其經費田皆佃租變價者其屯丁田則附硿躬耕者其訓練與農隙講武則屯守備掌之以轄於兵備道者使兵農爲一以相衛使民苗爲二以相安故約官與兵民曰毋擅入苗砦毋擅役苗夫約苗曰毋巫鬼椎牛羣飲以靡財毋挾槍矛尋睚眦以釀釁立書院六處義學一百處遂同學校同考試於是苗

傳五
民相安十年之內無復出砦滋事者十三年屯務竣入覲詔加按察使銜明年授湖南按察使以苗民顛留命每秋一起苗疆慰邊人之思甯之在苗疆也日不暇給門一木甌訴者投其中夜歸倒出閱之黎明坐堂皇剖決兵民以事至直至榻前及爲按察使一如同知時下無壅情事無不舉十五年兼權湖南布政使十六年入覲六月卒於官年五十四事聞震悼贈巡撫賜祭葬祀名宦祠並建苗疆專祠

徐炘

徐炘字晴圃大興人乾隆五十七年舉人六十年乙卯會試上命大臣覆校落卷得文理優者三卷炘與焉特賞內閣中書嘉慶三年丁母憂六年服闋補原官充軍機章京尋丁父憂服闋升內閣侍讀十一年記名以御史用十二年京察一等七月扈蹕灤陽校

射中三矢賞戴花翎十四年補福建道監察御史尋外授江南河
庫道十六年王營漫口合龍所獲優議十四年因案降四級留任
十八年保薦卓異十九年署江甯布政使先是直隸教匪煽亂上
從兩江總督百齡請命駐江南邊竟籌辦防堵事宜事平敘功授
江西按察使尋調湖南二十一年升陝西布政使次年護理巡撫
二十五年調山東布政使上以東省倉庫錢糧三次清查皆不得
肯綮命所詳覈奏之道光元年四月署巡撫六月調福建布政使
先是長山縣監生王鳳廷京控縣書多徵浮折上命偕山東布政
使琦善會鞫得實論知縣及鳳廷等如律尋調福建布政使二年
召還京以四品京堂候補授內閣侍讀學士六年授陝西布政使
逾三月護理巡撫時逆回張格爾滋事大學士揚威將軍長齡及
提督楊遇春參贊大臣武隆阿統率大兵赴剿陝省籌撥軍餉及

料理過境軍馬諸事所專司之迄亂平無稍差八年略陽水壞縣城所奏請於迤東文家坪移築新城允之旋授山西巡撫奏晉商行銷豫省引鹽請照舊章奏文浴河由文水縣西北發源故道久湮若議疏挑徒勞虛費惟有順水之性暢水之流或截灘偪溜以杜其旁溢或督率疏濬以納其來源其各村所築隄堰不得攔河以杜爭端而資捍衛奏常平倉穀出陳易新請暫緩採買以濟民食皆如所議行十年調陝西爲御史葛天柱所劾降補湖南按察使次年召還京以四五品京堂候補十二年授太常寺少卿十三年督辦順天府清河振務補光祿寺卿十四年乞病解任尋卒所少受庭訓父齡椿敦品植節多陰德以例授布政司經歷乾隆三十八年高宗幸淀津齡椿接聖駕蒙賜朝珠豐貂大緞諸珍物朝野榮之所官中書時齡椿論曰讀書當以濟世爲念爾能無忝厥

職卽慰我心此孝親之大者其後手書敦勉無閒三日所歷官中外數十年矢慎矢勤仕已無喜愠色人以爲能遵父訓云

魏元煜弟元煜

魏元煜字升之號愛軒昌黎人乾隆五十八年進士改庶吉士六十年授檢討嘉慶三年大考改吏部主事四年補官五年充四川鄉試副考官七年充會試同考官遷員外郎九年升郎中授江南道監察御史十年兩廣總督那彥成奏調赴粵上念其親老仍留京補原缺轉掌湖廣道監察御史父憂服闋補山西道監察御史尋轉掌貴州河南道先後居諫垣凡六載持大體不屑毛舉細故十八年外授江蘇江安糧道核庫款恤幫丁禁浮收剔丁蠹三月政聲大著尋以官御史時失察林清滋事降調十九年復原官授浙江杭嘉湖道調江蘇蘇松糧道二十年遷浙江按察使二十三

年擢廣東布政使二十五年巡撫江蘇道光元年疏言江蘇倉庫虧缺追補未清請暫免州縣處分俟新賦提解如額再行覈辦詔如所請二年授漕運總督疏言軍船領運漕糧某幫應兌某倉宜有定制以杜弊端除饒州撫州兩幫均循舊章辦理餘十一幫領兌四十餘廳縣漕糧請將各倉秉公搭配照幫分爲十一籤分別掣定自道光三年新運起三年一屆由後推前挨次輪轉不必再掣如船多米少以後倉米數撥補米多船少以後幫船數找兌從之嗣以漕船舞弊失察降調留任四年定漕船水手章程復喫水尺寸舊制江浙以三尺八寸湖廣以四尺三寸爲度十一月黃水倒灌禦黃壩洪湖高堰山盱諸隄皆潰決罷兩江總督孫玉庭以元煜代之玉庭留工督辦河漕調倉場侍郎顏檢爲漕運總督協同籌畫時清水宣洩過多明年重運艱於浮送玉庭授嘉慶時節

黃濟運之策元煜亦以爲請 上以所奏爲目前權宜之計命吏部
尙書文孚會同詳議文孚尋亦如元煜所請 上從之五年啟禦黃
壩引黃入運三月運口淤墊軍船難挽渡元煜玉庭奏雇民船起
剝竝請帑一百二十萬兩 上不得已姑允所請然以借黃濟運非
善策欲令江浙漕船試行海運下元煜等議元煜以窒礙難行奏
覆四月協辦大學士戶部尙書英和請暫雇海船以分滯運酌折
額漕以資治河復下元煜等議元煜奏請仍徵本色五月塞禦黃
壩河淤船滯部議降調 上加恩留任復授漕運總督六月裏河揚
河運道淤墊疏請築壩蓄水浮漾軍船並於淮城以上挑河砌灘
旋以水勢短絀餘漕船一百萬石不能盤運請暫存貯俟明年搭
運 上責其靡帑病民降三品留任是月卒元煜謙和寬厚平生無
疾言遽色居官絕饋遺以清操結主知自奉甚儉衣服時露補綴

痕而厚恤族御始終不倦晨夕侍母白首如孺子處兄弟怡怡如
平居蓋其天性云子亨遠嘉慶二十四年舉人咸豐三年知江甯
府殉粵逆之難贈太僕寺卿

元烺字麗泉元煜弟也幼而穎悟好學受兄教如嚴師時有二蘇
之目嘉慶五年舉鄉試十三年戊辰成進士改翰林院庶吉士除
山西洪洞知縣歷官至閩浙總督道光十二年英船駛泊閩之五
虎希求貿易元烺驅之出洋奏入上覽之是年台灣匪民張丙陳
辨糾眾倡亂戕府縣攻陷斗六門勢張甚元烺聞警檄提督馬濟
勝率兵二千渡台十戰而台平十九年疏請試習砲陣略言閩省
爲濱海巖疆武備最要而火器爲先火器中有速戰陣者於軍尤
利其陣法以五人爲伍五伍爲排是爲一小隊其大隊則兵百人
遞用外委千總把總領之積五大隊爲一旅以參守統之數十旅

以提鎮統之由伍而排而隊使將皆識弁弁皆識兵如臂之於身
指揮如意其操演之法兵分兩翼每大隊一用礮二每旅前列礮
十繼以鳥槍接以矛刀弓箭如牆而進又以馬隊列於陣之兩翼
爲游兵四隅關顧聯絡相維其進退疾徐則分旗色以爲號令法
旣簡明用又敏捷無論營之大小兵之多寡皆可遵循練習以壯
軍威奏入上如所請是年入覲補大理寺卿擢至禮部尙書調兵
部以疾乞假尋卒賜祭葬諡勤恪

戴三錫

戴三錫字晉藩號羨門大興人少刻苦爲學嘗爲人傭書自給乾
隆五十八年成進士以知縣用補山西臨縣以治行稱母憂服闋
謁選發四川署營山川楚軍過境供張無缺然不以華美悅上官
立團寨招義勇守城賊來薄城下攻之不能克卒賴保全補南充

權牧縣州勸農桑築陂塘行保甲問疾苦懲姦宄事無不舉擢馬
邊廳通判改戡邊廳撫夷通判歷署資眉邛知州保寧順慶夔州
成都知府邛州民黃子賢等以療病爲名嘯聚亡命倡立鴻鈞教
約州試日爲亂三錫捕獲之戮首惡一人餘以次軍流事聞奉特
旨褒美擢茂州知州嘉慶二十三年升寧遠知府雲南永北廳夷
人爲亂三錫練鄉勇嚴壁壘以待永北難民沿江就食者悉招之
渡江設法全活之凡數萬人道光元年升建昌道旋擢按察使二
年升江甯布政使以迴避原籍調補四川三年命以二品頂戴署
四川總督五年實授兼署成都將軍三錫官蜀中近三十年始皆
循資遷轉及兵備建昌不三年遂洊歷封圻膺重寄三錫感特達
之知益以飭吏治正風俗爲本務又愛禮士人釐訂書院規條增
義學三千餘區繹欽定十六諭衍爲詩六十章刊布之俾人人誦

習義田積穀奏定以三千至萬石爲定額每歲於青黃不接之時
出陳穀糶賣易銀以備歉歲賑恤之用新都民有楊守一者以邪
教惑眾遣人弋獲之置之法越衛生番劫商旅掠婦女眾議以兵
往三錫不許但飭鎮道捕治數十人歷辦雷波瞻對果洛克夷人
惟申警斥堠嚴察卡隘約束將弁不得倖事邀功以開邊釁雲陽
鹽販拒捕守令具讞上以夥梟論三錫曰買由官肆則非私梟販
止十人則非大夥當以重律非法矣惟當治拒捕傷人罪耳讞旣
定人稱明允八年奏拿獲粵西會匪劉子耀等上嘉其不分畛域
九年內召命署工部左侍郎十年致仕卒年七十有三三錫長身
火色目爍爍有紫光性清峻不受饋獻事上唯謹不阿從處同列
以和不以己長掩人短精力適厚每當繁劇益見縝密性嗜翰墨
工行楷尤工漢隸手錄書及讐校書盈篋喜讀薛瑄呂坤書不爲

無益之學其爲州縣時尤得民斷獄甚簡蓋庶幾乎古循良之風
焉子於義嘉慶十九年進士官吏部郎中

吳邦慶

吳邦慶字霽峯霸州人少孤事母孟盡孝督之嚴有過輒令長跪
弱不好弄讀書刻苦能自成立年二十五以拔貢官昌黎訓導乾
隆六十年舉於鄉嘉慶元年成進士改庶吉士授編修大學士紀
昀一見卽許以公輔之器尋擢御史疏言軍機章京宜令大員子
弟迴避以嚴樞密遂著爲令前後章數十上皆國家大計十四年
巡漕濟甯奏請重浚運河竝請復山東春兌春開舊制以杜州縣
折收虛兌之弊而蘇丁船守凍沿河民夫派巡之累十六年東河
水淺滯運議先閉分水口迤北之柳林閘使水南下俟挽船過分
水口卽閉迤南寺前閘托水北趨而開柳林閘放船順流以出如

其言漕得速達十九年擢鴻臚寺少卿偕內閣學士穆某督通永道張五緯濬北運河事竣授內閣侍讀學士二十年授山西布政使值蒲解地震民死萬餘口邦慶區畫周密沒者以掩生者以安調河南河南通省地丁三百餘萬皆由胥役催納民之全完者胥役輒蝕其半以爲民欠或先期墊交而倍取償於民民欠日多而力益困邦慶嚴禁其弊令民自赴官輸納於是輸將踴躍終其任賦無逋者常平倉穀久缺飭屬補之官吏有墨於行者訪聞得實輒彈劾不少貸二十三年擢湖南巡撫明年調福建未至閩授刑部侍郎途次命往河南查馬營壩大工二十五年授安徽巡撫時河南蘭儀漫口未合黃水由亳挾渦以注於淮洪湖汎溢浸連鳳穎乃與河南總督黎世序商放湖水以洩盛漲而親往災區振撫未幾以審案被議落職特賞編修道光九年授洗馬十年授少詹

事旋授貴州按察使越日命署漕運總督習聞軍船私載津鹽爲
淮綱病謂當因所利而利之不可遽禁以法於是指示開導令載
他物之可以獲利者而弊遂絕督漕三年轉運無愆期去任之日
軍民焚香跪送爲立長生祠十二年授河東河道總督以山東運
河惟恃四百八十四泉爲灌注請復設泉河通判以專責成修防
餘暇率道廳捐資造水車馬營壩北及蔡家樓大窪積水地七千
餘畝悉爲良田革除河工諸弊省國帑以數萬計初道光三年邦
慶請假修墓是時雨潦盛積經流支川皆汎溢爲患直隸則滄陽
自磁州北至大陸貫二泊會滹沱以入南運河而正定宣化古北
口關內外諸水或入清河或入永定或入北運河皆與南運河匯
於天津以趨一綫之海河下流壅而上流益潰 宣宗軫念郊圻
詔大員疏通河道竝修復雍正初年畿輔水利邦慶遂著畿輔水

利叢書略謂本朝定制於經流則設總河及河道以司修防而塘堰圩圍則府州縣佐皆兼水利之銜以董之 世宗時興修直隸水田特設營田水利竝設觀察副使諸官各揚其職觀建官之制知其事之各爲一局也竊欲分水學爲二如防江之垵禦海之塘黃河隄埽及他廣川洪流之分合通塞曰河道直隸之淀泊丹陽之圩圍吳越之澗港關中六輔龍骨陳潁鴻卻鉗盧其設閘建壩撩淺留泥諸法曰水利各採專門諸書以附之庶成規犁然往復講習可資世用以合於湖州學治事齋之法逾年書成思致之當事而未果後官河南延永清朱雲錦於幕考豫省志乘所載有水田處臚列其田水旺弱旣田多寡之數爲渠田說將檄郡邑墾治以往楚南未及行乃以其說附之畿輔水利書中至是始於沙堧數千畝廢地一試之嘗言天下之水未收其利須先去其患水利

在灌漑而患在衝決淹浸故興水利者留水以爲用而除水患者則排之而使去也事雖殊塗而功歸一致特施工分先後緩急耳明徐貞明潞水客談謂致力當先於水之源源分則流微而易御田漸成則水漸殺水無泛濫之虞田無衝激之患是興水利即可除水患此論祇可施於尋常湖蕩山泉小水若畿輔諸大川不能以此說施之當別有疏濬之法在又言陳儀直隸河渠志謂欲治河莫如先擴達海之口欲擴海口莫如先減入口之水是以南北運各設減河皆所以減入口之水也然此止以減南北運之水耳七十二清河之匯於東淀滹沱滏陽大陸寧晉二泊之匯於子牙河專以三岔河一綫爲尾閘獨無法以減之乎何公之未嘗言及此也至論永定河謂宜引之南下束以隄防於河淀皆無淤墊之害夫濁性之水流緩則沙停槽寬則溜緩永定從前之不能淤墊

河淀者以任其東西蕩漾故泥沙皆澄沈於固永之間逮至與清
河合流已漸成清流矣今若隄以東之則流急流急則沙泥俱下
迨至入淀則勢分溜散有不淤墊者乎若以隄東永定河而南則
濁流闐注必致高仰立形竊謂因其故道而變通之仍用其下口
入海之路未必無策也文安爲公桑梓之地東距東淀西距五官
淀北距清河潁水所臨勢如釜底公之意則甚惜郡丞徐元禹之
議不用竊謂保定界立閘引水易龍塘灣立閘洩水難蓋近日形
勢淀身較高於陸地則溝渠之水安能瀉之淀中竊擬文邑宜堅
三面之隄再於保定東擇地開減河由左各莊迤下歸入淀池減
河亦宜設立隄堰然後爲圍田於其兩旁借隄爲圍借圍護隄使
圍之內有田三百頃則村落必有千家嘗暮之暇合力修圍秋水盛
時同心防範減河之旁或爲涵洞或爲引渠旱則分潤潦則閉關

不惟陽侯不能爲災卽旱魃無由肆虐矣其言皆通達事理鑿然
有裨於實用蓋邦慶家玉帶會同河之間少時嘗究心於畿輔水
利洎通籍後往來淮徐楚豫之地觀於江淮河湖清濁交匯而得
其蓄洩箝制疏引灌溉之法復稽往籍求今昔之異與易地而可
以相師同事而不能相襲或功本可成以持論未善而爲浮議所
撓或效已漸收而他事方興未旋踵而已廢一切錯綜不齊之故
參互融貫務使師古而不執因地以爲宜取資博故擇之精發慮
審故語之詳其所謀畫又皆桑梓素習之處故文成百數十萬言
而無一言之不可施於用十五年以改撥人員被劾仍賞編修時
年已七十遂致仕邦慶奉職中外四十餘年所至多盤根錯節然
應機立斷荷兩朝倚畀凡有關於國計民生者朝上夕行至於水
旱成災爲民請命尤不憚至再至三務使實惠及民而後已歸里

後日默坐一室圖書外無他物爲學不專務考據凡關道義倫常者目覽手鈔置諸座右又好爲詩尤喜臨摹古帖寒暑不輟訓子孫讀書嚴立課程務使研經鏡史爲致用根本性孝友輕財好義因早失怙擢一官恨未逮祿養輒泫泫淚下出資改建家祠置祭田百畝備享祀歲修之用又擇吉壤爲合族葬地長養人材培植後進義行難更僕數道光二十八年卒年八十有三

盧坤

盧坤字靜之號厚山涿州人嘉慶四年進士選庶吉士六年改兵部主事十四年升員外郎十六年隨圍木蘭校步射賞戴花翎十七年遷郎中十八年京察一等擢湖南糧儲道十九年丁本生母憂二十一年服闋授廣東惠潮嘉道丁本生父憂服闋授山東兗沂曹濟道二十五年升湖北按察使尋擢甘肅布政使道光元年

護理陝西巡撫二年擢廣西巡撫九月調陝西時教匪初定議者
謂南山老林易藪姦不宜墾坤歷舉漢蜀唐宋諸史及漢李翕郝
閣頌以徵墾治之利至今賴焉三年五月甄別試用諸員疏言親
民之官其大在貪廉而係乎民生休戚者尤在勤惰明昧寬嚴之
別上題其言七月疏請修建鄜州倉廩之壞於水者買補榆林綏
德二府屬常平倉穀以重額儲四年疏請改訂營制設佛坪撫民
同知巡檢裁邵陽縣丞改墊屋縣丞爲鎮平縣丞而鎮平巡檢爲
袁家莊巡檢五年疏請修復咸寧長安涇陽墊屋郿縣岐山寶雞
華州榆林水利均報可六年七月逆回張格爾叛據喀什噶爾四
城詔坤以行衣陞見馳往甘肅會同總督鄂山籌辦轉餉事宜坤
上議曰烏魯木齊距阿克蘇三十二站官兵五萬餘日需糧五百
石每站須備駝五百有奇合之關內外臺站共需駝二萬六千請

刻期購撥出關以資接運竝條奏軍需章程十一事大營軍糧寬
爲籌備兵丁口糧量予加增籌給出口駝馬草料以資飽騰買補
缺額營馬以備續調監造軍火器械以期堅實撥運陝省制錢以
平市價添設台站夫馬以速軍報僱用車輛給發例價以供運送
募招護台民丁以資防衛請賞出口征兵皮衣帽以禦嚴寒後路
糧台酌駐官兵守護以昭慎重疏入皆特旨允行回疆旣平坤以
轉輸有功加太子少保賞頭品頂戴七年授山東巡撫調山西奏
設苛嵐州考棚添設陽曲縣主簿裁甘桃驛丞并柏井驛丞兼管
調陝西撫標之熟習兵法者來晉教演籌構槍礮彈丸儲銀二萬
四千兩生息之九年調廣東奏請緩征被水諸州縣丁糧蠲歷年
逋賦十年調江蘇擢湖廣總督時兩湖漕務循封輪例引滯商疲
疏請循前散輸之法建倉漢岸俾江船及早回空源源攬運以便

民食十一年籌銷楚岸積鹽量減售價設總卡塘角按船編號杜
內私外私之弊復定湖南永興縣粵鹽定額以保淮綱值楚北患
水災請免鄰省販米之稅竝借庫帑十萬兩購蜀穀平糶救饑民
凡減田租籌兵食疏河道築隄堰諸事皆以次舉行十二年湖南
逆猺趙金龍作亂坤親往督師密陳湖北提督羅思舉能辦賊時
湖南提督海陵阿及副將游擊皆戰歿桂陽常寧諸土猺蠡起應
賊眾號數萬常德水師荊州滿騎皆不習山戰坤至奏罷之改調
鎮筓苗疆兵分屯衡永常寧祁陽諸要隘餘則堅壁清野以與賊
相持會兩湖兵大集貴州提督余步雲雲南副將會勝皆馳軍來
助剿時大雷雨我軍乘勢襲擊於洋泉街街長數里當入山水口
有溪通舟楫坤檄諸路兵圍偪之羅思舉督諸將晝夜環攻立泥
淖中仰擲火彈火弩斃賊數千賊黨趙文鳳乞降佯許之攻益急

生禽其子女及頭目數百人金龍易服乘間遁捕斬之獲劍印木
 偶餘賊皆就殲捷聞賞戴雙眼花翎世襲一等輕車都尉在事文
 武各晉秩有差方捷書之未上也 上命戶部尚書禧恩盛京將軍
 瑚松額來視師未至軍賊已平會廣東逆猺趙子青糾眾數千入
 楚界聲言為金龍復讎坤移師敗賊於濠江又敗之銀江禽仔青
 磔於市時廣西逆猺盤均華廣東連山黃瓜寨排猺復相繼煽亂
 坤偕禧恩瑚松額先後往剿平之上逮治粵督李鴻賓而調坤總
 督兩廣時猺匪新定坤審時揣事臚陳善後九事上之竝編查戶
 口設猺長猺目漢民村寨設練總改綏猺同知為邊要缺教職佐
 雜改邊俸移提標右營守備駐錦田改游擊提標前營把總駐大
 橋永明中軍守備改分防城汎江華嶺東營守備改為題缺辰州
 分防浦市汎守備改部推抵嶺東營守備缺裁馬四百一十四匹增

學之名臣五

設步守兵四百名九月兼署廣東巡撫奏裁廉州府同知肇慶府
通判高廉二州司獄南海河泊所大使長寧始興二縣訓導十三
年奏莊垌汛把總移駐信宜縣金垌墟作爲專汛和平營外委移
駐連平州城作爲城守協防疏上皆從之三月越南奸民陳加海
結腹地游民馮生丁嘯聚狗頭山偷入內洋爲亂坤檄兵擊沈其
八船捕獲加海治如律餘寇悉平八月英商律勞畢貿易於粵違
法度坤照例封其艙律勞畢挾兵船入虎門戰於黃浦坤以巨船
載石沈水底結大筏塞水面遮其前後橫大石船於老洲岡遏其
歸路多備草船火攻具脅之斷商民接濟律勞畢窮蹙求給牌出
口詞甚恭澳門夷商伽律治等助之請命坤持之良久乃命出虎
門奏入宣宗手勅褒之十五年疏請添鑄礮位分置各台其施放
之法自南山至大虎分爲三段與沙角大角信礮聲勢相聯絡省

東中流沙地建設礮台以資保障竝條奏廣東南韶惠廉瓊五府州屬水陸營汛分別移改增設以歸周密六月疏言防黎善後章程查漢奸設墟場禁越境講水利籌經費凡五事均荷允行自是黎境安謐無復滋亂者坤器識凝重早歲留心經世學自官職方擢監司任封圻所蒞皆有名績治案牘析及纖微而宅心忠厚不爲深刻其典軍御將察吏安甯弭盜救災備荒辟地諸善政皆有實效 上深倚重之十五年八月以疾卒年六十四 上深軫惜詔贈太子太師兵部尙書賜祭葬如例諡敏肅長子端黼襲世職

名臣傳五終

大清畿輔先哲傳弟五

目次

三

名臣傳六

大清畿輔先哲傳弟六

天津徐世昌撰

白鎔

孫桓

白鎔字小山通州人嘉慶四年進士改庶吉士散館授編修充實錄館纂修官七年丁父憂服闋典試閩中十三年丁母憂服闋遷贊善提督安徽學政二十年疏陳安徽吏治民生利病略言安徽錢糧惟鳳陽泗州二屬遭湖河之害積逋較多緩徵之數陳陳相因如遇豐稔之年照例帶徵舊額在小民以一年而輸數年之賦雖逢樂歲不挽拮据而官吏懼干處分又復多方規避積重難返臣愚以爲與其存徵之名致小民日受追呼於國計依然無補何如核徵之實使官吏從容辦理於舊額尙可漸清嗣後二屬錢糧每年祇帶徵一年備遇歉收再行遞緩如此則民力漸紓民氣漸

厚而催科者曰顧考成亦必行之有效矣奏入 上覽之嘗撰正人心論刊示各州縣每下學集士人講學以正人心厚風俗爲本在
皖三年士論翕然二十一年試竣還京轉侍讀教習庶吉士充日
講起居注官二十五年遷詹事府右庶子是年擢侍講學士道光
元年轉侍讀學士二年督學廣東逾年遷內閣學士兼禮部侍郎
銜七年擢工部右侍郎兼管錢法堂事務九年四月命偕尙書松
筠按事保定五月再命往永平審辦撫寧民楊智王俊等案鎔鞫
實請分別按律治罪下部議行十年充經筵講官提督江蘇學政
尋命會同戶部侍郎寶興查勘河堦料鎔據實入奏 上褒其持正
而河督張井獲嚴譴明年五月授都察院左都御史尋以高郵湖
河漫溢爲災命偕工部尙書宋士彥查驗江南災振并履勘新壩
南關壩兩耳壩招關壩及智信二壩范公隄高家堰各堡工程就

商總督陶澍議以工代振事竣由江寧赴安徽周歷太平盩國池
州安慶廬州各郡沿途察捏災侵振弊先後疏奏之又命偕士彥
訊結唐汝甸湯天賜張鳳儀諸案往返七八月無晷刻間暇十二
年二月還朝復命卽日召見鎔剴切陳奏俱稱旨六月因都城缺
應詔陳言皆切中時弊七月署翰林院掌院學士旋充順天鄉試
同考官向例籍隸本省者例不聽宣鎔是日奉特恩都下榮之十
二月賜紫禁城騎馬十三年擢工部尙書充武會試考官以錯誤
鐫級左遷大理寺卿十九年乞病歸卒於里年七十有四鎔性篤
孝友母鄧素畏雷每夏秋日夜侍幃榻不敢違撫弟子女如已出
居官剛正自持不肯苟同於人然綜理部務遇事悉心商榷務求
其是同僚中未聞以言事齟齬者前後荷恩遇三十年事無鉅細
始終以誠慎結主知官詹事時奉召入對仁宗曰朕精神日退御

事輒煩當作何修養對以清心寡欲莊敬日強上爲動容給諫劉
啟南以直諫獲譴鎔力爲申解東南錢漕積蠹久鎔歷疏其弊民
困以甦初督學安徽青陽有徐孝子守仁者事母孝母沒廬墓側
逾三年鎔按試至其地造廬賻贈竝爲題請建坊旌之桐城童生
左鳴岐前明左光斗裔孫也年十三鎔特拔取之竝勉以詩校士
廣州時得先儒陳白沙後人復取之入學一時庠序聞風交以植
品礪名爲重又密保周天爵林則徐二人可大任人尤服其識云

孫桓

桓字建侯同治二年進士授吏部主事光緒二年升員外郎五年
升郎中六年授內閣侍讀學士七年補太常寺少卿九年轉太僕
寺卿十年擢大理寺卿尋補左副都御史十一年充浙江鄉試正
考官十五年擢兵部右侍郎九月知武舉充會試搜檢大臣及覆

勘試卷大臣者三充驗看月官大臣者二桓勤慎小心清操自勵
任事懃懇知無不爲初咸豐三年棗強縣苦蝗桓時爲訓導教以
捕蝗成法歲獨獲豐十一年擒匪張總愚竄河北烽火達畿南土
匪乘勢蠢然思亂時桓監理保定蓮池書院首舉清苑高士吳建
勳倡練團防賊不敢犯在吏部時案例皆躬自裁檢持平慎選吏
不能售其欺大學士文祥寶鑒尙書毛昶熙皆倚之爲重在兵部
一如在吏部時與司官議事其有意見不合者必反之使竟其說
而後援例以正之有未安者反復至再自朝至昃不以爲倦光緒
九年畿南大水設粥廠振民命桓爲黃村監振大臣摻採救荒備
荒各策實心實惠民不知災十七年因病請致仕允之十一月卒
於家賜祭葬如例

趙盛奎

趙盛奎字菊言深州人嘉慶七年拔貢生朝考以七品小京官用分吏部十三年授主事十六年充軍機章京十八年以議案兩歧降調納貲復原官二十一年父憂服闋復充軍機章京補主事升員外郎二十三年扈蹕木蘭校射中三矢賞戴花翎二十四年升郎中道光六年以四品京堂用八年補內閣侍讀學士九年升光祿寺卿時以纂輯平定回疆方略命暫留軍機章京上行走十年書成下部議敘授山東按察使擢江甯布政使十三年擢刑部右侍郎十四年命赴浙江勘修海塘工疏言另建新工緩不濟事請卽潮勢之重輕分工程之緩急酌議添築盤頭改修柴埭以護塘根又以海塘歲修本無定額請於浙江捐監項下歲提銀五萬兩存儲藩庫以備歲修從之十五年擢軍機大臣調戶部左侍郎上以盛奎廉明幹練凡重要案情輒命查訊於是福建有查訊縣

丞秦師韓誣控總督程祖洛提督馬濟勝之案山西有查訊趙城
逆匪滋事文武員弁疏於防範之案貴州有查訊署知府黎靖交
代含混署知縣劉椿侵挪倉庫之案湖南有查訊安鄉知縣李慶
孫委員陳同治辦振不實之案湖南學政龔維琳失察家人需索
竝刊文售賣之案澧州民李萬忠呈控知州王元鳳弊累之案廣
西有查訊南寧府同知慶吉售賣私鹽潯州府知府孫世昌稅廠
失火之案均鞫實分別議罪如所請行十六年以查訊昇寅司員
受賄案上責其草率降四品以三品京堂候補尋補太常寺卿十
七年以承審刑部司員盧應翔失實革職留任十八年擢倉場侍
郎十九年調刑部右侍郎兼署戶部左侍郎七月以疾請致仕尋
卒

張文浩

張文浩大興人以訾爲布政司經歷効力東河工竣發江南歷署
通州州判邳北河務通判嘉慶十年署宿北河務同知旋調權山
清外河同知再權山清裏河十四年山陽縣狀元墩隄壞水溢革
職十五年馬港口合龍出力降一等補用十六年二月開工塌令
革職賠修尋築王營減壩成以原官開復十八年補授外河南岸
同知十九年河東河道總督吳璥奉命塞睢河決口上以文浩習
水利命赴睢工總督百齡奏河防穩固加知府銜尋擢署淮海南
道二十年睢工合龍吳璥上其功二十三年黃河漲文浩相機宣
洩之得優敘明年河溢儀封武涉馬營壩復決上命文浩馳赴
蘭儀明年四月馬營壩決口塞賞戴花翎上以吳璥年老擢文
浩署河東河道總督酌議儀封築壩挑河銀四百五十萬兩上
俞其請特賞三品頂戴兼右副都御史銜文浩築隄堰疏引河四

閱月儀封工告成賞二品頂戴兼兵部侍郎銜道光元年正月彗
星出東壁分野在衛地其占主大水敕文浩與河南巡撫姚祖同
率屬防範文浩奏河灘高下不齊請加子堰二三尺四月奏請修
運河劉昌莊減水閘分洩漲水增濬利運五月奏運河東岸壩工
暨南壩頭河面護埽加鑲又奏黃河北岸馬營壩工飭委道廳各
員疏復溝渠鑲築壩埽 上嘉其實心實授河道總督奏修運河上
河二廳聞座竝請籌添馬營壩土埽諸工以資防衛旋丁母憂服
未闋特召來京三年署工部左侍郎命同直隸總督蔣攸銛會勘
南北運河及永定滹沱諸河文浩奏言永定河所以爲患者固由
下口不能暢流亦由上游無所宣洩請修築金門閘添設減水壩
再近年河溜側注北岸宜添築月隄以爲重障四年授江南河道
總督是年糧艘回空停阻河北者數月部議褫職特命降爲三品

頂戴仍留河督任會洪澤湖漲水未消連日西北風大作高堰十三堡隄潰一萬一千餘丈各壩均漫溢事聞上怒褫其職命尙書文孚汪廷珍馳往查勘詳訊工員僉稱張文浩於禦黃壩應閉不閉五壩應開不開致潰決上以文浩措置乖方命柳示工次一月戊伊犁六年回疆不靖烏魯木齊都統英惠奏派文浩糧臺上不許十六年卒於戍所

李鈞

李鈞河間人嘉慶二十二年進士改庶吉士授編修歷官刑部左侍郎咸豐四年兼署順天府尹值粵匪之亂司糧餉轉輸密疏言賊竄直境脅從者多請飭諸將豎旗牌書投誠免罪字或箭縛招降諭射入賊營俾其黨自攜散報聞是年南漕改海運僅浙船抵津上命鈞偕戶部侍郎基溥工部侍郎文彩崇實採米實倉儲鈞

議以國用維艱若發帑採買則以銀易錢既多折耗以錢買米又恐侵吞無論軍需之際籌款之不易也卽令儲有米價而行市不齊吏胥紛擾所損滋大因奏請仿捐銅局新例推廣開捐并擬章程十條上之如所請行尋充抽查漕糧大臣賜紫禁城騎馬五年授河東河道總督下北廳蘭陽三堡黃流漫溢倡捐堵禦疏凡十餘上言皆切要九年積勞卒官

王植

王植字叔培號曉林清苑人嘉慶二十二年進士改翰林院庶吉士二十四年授編修道光七年充國史館纂修官九年充會試同考官十一年充順天鄉試同考官十三年大考一等升侍講充日講起居注官十四年二月京察一等提學廣東四月轉侍讀七月升鴻臚寺卿十五年遷大理寺少卿均留學政任尋擢內閣學士

兼禮部侍郎銜召來京供職十六年三月稽察中書科事務充會
試副考官五月署吏部左侍郎七月擢禮部右侍郎十七年六月
充江南鄉試正考官旋轉提督安徽學政十九年調刑部左侍郎
十一月坐事降級留任二十年調吏部右侍郎明年調刑部右侍
郎兼署吏部八月命偕禮部尚書麟魁查訊湖南提督台湧覆命
稱旨二十二年轉左侍郎仍兼署任二十三年提督江蘇學政九
月命往浙江查事卽授浙江巡撫次日復調安徽暫攝浙撫事浙
江濱大海盜匪熯忽植嚴捕巨魁陳阿春等十餘人置諸法時杭
州五府荒歉疏請蠲緩額賦災重之富陽三縣來春給糧米竝籌
修海鹽石塘爲嘉興七屬田廬保障又於浙皖接壤造棚民戶冊
四境宴然二十四年抵皖任以河南中牟漫口皖境多被災令各
州縣買穀四萬石復勸富戶積儲屆期減價平糶竝興工代振嚴

緝匪徒防鉤結滋事奏人均允行十一月閱兵江北以營伍將弁奉行成法徒飾外觀無實際因參合古人成法疏陳六事與將弁勤習講求其目曰束隊伍立選鋒嚴選募精教演專習藝簡軍實竝刻訓兵條約束隊陣圖頒示各營二十六年台諫有奏銀錢竝重設法變通者植統籌全局詳陳變通之法略云臣竊惟邇來公私交困由於銀價之昂思欲救銀之窮必求廣銀之用黃金少而不可恃鈔帑虛而不易行則仍惟有重錢之一法然積重既久勢有難返惟有默爲轉移而不可明與之爭也且論者但言銀貴而臣則竊慮錢荒河者程本太重則官錢開鑄者日少銅價太貴則姦徒私消者日多朝廷饟運以銀爲重民間日用猶以錢爲急銀之貴病在國而民兼受之設竝錢皆少將若之何故臣竊謂今日欲救銀貴之弊正當多鑄錢以濟其窮而官錢一千用鉛七斤八

兩工本之費率三四千勢必不給似宜變通成法改鑄大錢銅分赤黃爲二等錢自當三至當五十爲五等銅質較舊制稍減與現在銅價相當工本輕而中外皆可鼓鑄則錢之用自裕至換易銀兩仍按現時市價不必求減蓋銅質既輕其中已幾於以一當二無貴錢之名而已收貴錢之實所謂民可使由不可使知也其外更以白銀黃金夾輔而行或亦化少爲多之術竝議鑄錢條款上之格於部議未及行論者惜之時議定夷務條約有飭各省出示准設立天主教堂之命植覆奏曰皖省民風樸直不信鬼神從無習天主教者各屬亦無天主堂名曰臣愚謂此事不禁已不可萬無公然准其設立出示曉諭之理又以鳳陽廬州潁州諸府匪徒動輒糾黨爲民害請嚴訂刑律以儆凶頑又奏陳壽州阜陽霍邱合肥四州縣煩劇難治改爲最要題補缺又因遵議給事中雷以

誠奏減漕運旗丁津貼章程疏請飭州縣幫弁各就本省查核津貼款目以最少年作為定數竝稽覈裝載米數多寡貼給不得以向有減米不減費之說籠統索費俱如所請行已西庚戌之歲皖省連患水災植奏留庫款設局撫濟又造小舟救渡普施餅粥藥餌擇高阜建草舍以棲災民捐貲修復盱眙縣張公邵公大王廟諸隄以防水患植初到皖錢糧僅七八分數年間培養休息漸至九分餘矣咸豐元年入覲召對八次皆稱旨會 上求直言植條奏勤典學崇體要急先務節冗用崇本計禁浮奢恤牧令飭法紀八事其言飭法紀謂殺人者死古有常經誅意原情門分類別讞斷隨而重輕最嚴者服制最重者鬥毆向例於理直傷輕之犯予以緩減此法外之仁也而今凡涉鬥毆多曲為開脫生者幸免死者何辜至於服制所關例尤嚴重刑法之中教化寓焉應請救中外

衙門遇有命盜及服制案件援情審例毋得故爲寬縱 上是其
議立行之尋內召授刑部右侍郎飭查江西南豐縣事平反大獄
士民歡感九月署江西巡撫二年請疾允開缺行次安徽望江卒
年六十一植歷官中外三十餘載深謀遠識視國如家讞獄尤詳
審人稱其能植曰天下事不外情理刑名乃一端爾初官刑部時
宣宗深倚眷之奏事日屢蒙召對奉旨以侍郎主刑部稿故事順
天鄉試直隸籍不與襄校辛卯植充順天鄉試同考官特命專閱
南中皿卷丙申又以會試總裁接充讀卷大臣皆異數也疊邀賜
上方珍物及 宣宗御製詩文墨刻爲世所榮督學廣東禁士習營
謀奔競巡撫安徽奏除部胥需索外官之弊躬率僚屬捐廉辦米
籌備京倉咸豐初元粵西寇起欽差大臣賽尙阿督師檄籌軍餉
植措銀二十萬兩以濟其性簡約所居署屋僅八九楹與僕從雜

處置書數萬卷雖公事絡繹嘗手一編校讎自號秉燭老人著有
經解述深柳書堂詩文集撫皖奏議家乘傳論訓蒙條規消閒錄
食饌筆記訓兵條約束隊陣圖等編桐城吳汝綸序其遺稿稱爲
深識君子以章疏爲最著云

劉源灝

劉源灝字鑑泉永清人道光三年進士選庶吉士授編修十四年
充山西鄉試正考官明年出知揚州府能治獄清數十年積案多
平反揚俗浮靡首以節儉躬率之召所屬才俊之士讀書郡中造
就者眾總督陶澍巡撫林則徐皆相倚重署常鎮通海道舊制清
江下游設滾水壩於高郵四河水長至一丈二尺卽開壩洩水河
督張鵬翮所定也十六年秋洪澤湖水漲大吏檄開壩甚急源灝
念壩開則下河數十萬居民均沒於水力持緩開之議河督怒飛

騎督之源灝泣請少待伏禱於天水陡落人驚爲神佑歡聲雷動
皆曰生我者父母活我者太守比於陳鵬年云九月移任陝西督
糧道理積案釐剔倉糧款目籌置關中書院經費延墊屋路德爲
之師黜浮華崇實學一如任揚州時調潼關道整稅章減浮費以
潼河久湮農田失溉灌捐金疏渝復其舊民至今德之累遷山東
按察使再遷布政使攝鹽運司事屏陋規鉅萬代辦鄉試監臨武
闈主考倡捐京饟以濟時艱特賞花翎咸豐四年粵匪竄陷臨清
巡撫張亮基督師出防源灝治辦城團嚴紀律下與士民均甘苦
危城獲安入爲光祿寺少卿尋擢湖南按察使遷布政使升貴州
巡撫與賊石達開竄入境燬號數十萬直犯廣順距省僅七十里
源灝日夜籌防守具悉備疏調提督田興恕來黔治軍屢戰皆有
功再遷雲貴總督以年老乞休同治三年卒年七十弟源濬字曉

川幼從兄學善屬文道光十二年舉於鄉十五年成進士改編修二十四年授荊州府知府有政聲舉卓異加道銜以勞瘁得目疾乞休歸咸豐三年粵賊犯畿輔踞靜海獨流鎮去邑百里源濬倡治團練有功時論其兄弟以岱繇方之

桑春榮

桑春榮字伯儕宛平人祖籍浙江山陰父錦堂爲河南睢州吏目有隱德宦歸傾貲贍族黨負償者輒燔其券貧如故游京師家焉春榮道光二年舉人十二年進士改翰林院庶吉士十三年授編修二十二年補河南道監察御史掌四川道監察御史外授雲南臨安知府調補雲南尋以卓異擢迤南道咸豐元年兼署鹽法道督辦官錢局靡廢不舉商民便之三年授貴州按察使四年遷雲南布政使綜稽吏事黜陟以公次年升巡撫兼署雲貴總督督辦

雲南軍務時滇匪倡亂賊氛逼省垣十閱月春榮從容坐鎮以忠義激士卒誓死守卒全其城尋來京補內閣學士兼禮部侍郎銜十月督辦順天直隸團練所至兵民相安賊不敢逼事定還朝同治元年署兵部右侍郎五年授刑部右侍郎賜紫禁城騎馬十年兼署戶部左侍郎十一年升都察院左都御史擢刑部尙書十二年充經筵講官先是辛丑會試充同考官至同治四年暨光緒二年兩充會試副考官得人稱盛光緒五年以老病乞休許之春榮長刑部十餘年案牘繁重手自勘定平反大獄務持情法之平不動聲色綱紀秩然年踰耆耄能強識援引律例言之鑿鑿同官皆翕服凡所矜恤獄囚冬衣夏藥悉捐俸倡之嘗誦歐陽求其生不得之語以誠僚屬遇事持大體不爲赫赫名每奉派查辦事力求實際懲勸法不事苛細八年壬午重赴鹿鳴宴賞加太子少保銜

其年十一月卒遺疏入 上震悼賜祭葬諡曰文恪生平公廉自
矢常推己以利物任雲南府時倉庾久虛歲捐廉萬金實之總制
雲貴會運道絕發倉食士卒穀將盡而饑至人尤服其先見權鹽
法道時本任道督兵赴黔歷一年凡道署所入悉歸其家上官諭
止之則云彼出以公例不得取耳督辦團防暨諸差務輿馬所資
皆自備不取諸有司奉身澹泊迄老無一嗜欲公暇惟覽書史自
娛而已身後無長物門庭肅然子孫恂恂若寒素京師言家法者
必歸之

韓超

韓超字寓仲號南溪昌黎人家貧厲學剛毅有大志喜讀韜鈴家
言中道光十四年副貢二十二年天津設海防超詣軍門獻攘外
策事平授職州判改府經歷分發貴州署三角屯州同地多盜創

治民團盜屏跡遠遁遷獨山知州獨山俗剽悍城北蕭毛大城東
余王蔭窩賊劫財人不敢誰何城南憨寨尤盜藪大吏知超能且
不責以文法超至訪士之有品學者優禮之懲唆訟者數人士氣
始靖念治盜莫如團延城鄉士紳告之利害教之步伐止齊聯絡
應接之法復親歷四鄉而簡閱之貴州之有鄉團蓋自超始以計
禽蕭毛大余王蔭磔諸市潛率兵役四十人假相驗迂道至憨寨
伏奇兵林薄閒鎗響伏起禽十九人下之獄復督役縛琴寨盜數
人先是某寨有被劫者命役往緝賊拒捕捉三役去將殺之祭旗
或恐治之急激爲變超曰是養奸也有事我獨當之不以累人密
諭十三總役分十三支支百人潛抵寨奪三人歸禽二十餘人沿
途觀者如堵自是鄉團益踴躍盜無所容閭里之間至夜不閉戶
大吏下其法於府廳州縣超之名益彰時益陽胡林翼守黎平招

之來爲練勇丁教之操法林翼薦諸巡撫蔣蔚遠謂超腹有十萬
甲兵胸羅二十一史雄心遠畧可爲名將亦可爲名臣咸豐元年
粵匪將入犯超屯懷遠縣之靠頭連日訓練水陸諸軍聯黔粵鄉
團助戰賊不敢近而臺拱清江八寨丹江古州五界之烏沙苗倡
亂超隨林翼進剿身爲軍鋒馳風雪中先後斬獲數百人餘黨悉
平將蔚遠上其功以知縣用賞戴藍翎明年擢署清江通判會粵
匪犯湖北上命林翼往鄂治軍超爲選精卒六百人林翼欲偕
超同往超曰余觀天下大勢黔亂將不久超仕黔十年矣知其亂
而去之義者不爲也公辦鄂我辦黔同心戮力以夷大難尙其勉
之初清江苗匪內外勾結白晝劫居民戕武弁殺捕役城中文武
官吏皆坐視不敢發一矢超捐廉募勇六十親訓練之數月成精
銳四年獨山土匪結粵賊內犯超增募勇士二十都八十八人率之

以往紀律嚴整所至無秋毫犯抵獨山與援兵相犄一日獨遇賊
首先陷陣殲數百人賊四潰連破播讓地壩諸洞大捷於董你場
禽賊首楊元保真諸法復深入廣西南丹州時敗匪麇聚州之芒
場大山超屯四亭誘禽賊首劉仲林丁老喬二百餘人進次芒場
而四亭賊忽大至乃合諸軍同擊賊眾數倍我軍分三路來撲超
誘之入隘賊以中路張虛聲而厚集兵力於左右二路超檄賈連
陞率精卒二百駐右軍後爲援應之師戒中路軍隨左右齊進連
陞見賊左右猛進突出擊之礮斃一賊賊大驚懼而反奔超率左
軍乘之呼聲震天地賊右路數千人踉蹌而遁中軍急進燒四亭
賊營輜重老弱皆燼賊左右二路見火起益驚潰追殺三日斃賊
千五百餘人境內遂平論功加同知銜賞換花翎七月同清江而
桐梓楊龍喜復爲亂連陷數城大吏檄超與游擊烏爾滾珠往先

解遵義圍火附城民舍踞紅花岡要隘賊遂失勢時匪踪徧千里營壘相望提督趙萬春懼怯不能軍屢敗挫而超所畫策又不從一日會議戰事超默不言眾固請則曰果從我必敗賊賊狂於屢勝防範必疏今夜分軍襲之可克也眾皆曰諾乃簡二軍以趙萬春襲雷台山已與定廣兵襲大因保手寫軍帖授諸將曰依此則勝否則敗是夜超率眾潛出至賊營數十步賊始覺驚呼我軍乘之毀賊營三而趙以失約爲賊敗死數百人賊遂蜂集超軍超且戰且行賊不敢逼是時川黔諸軍所至克捷而雷台山賊壘超率兵時時驚擾之復遣閒惑其黨賊大感超所募新軍四百復繼至楊龍喜遂竄永寧合黔西逆賊王三札巴連陷數城圍遵義五年正月一日超率諸軍冒雨馳行分路追北而已則迂道鎮寧州迎頭遮擊之賊奔坡貢踞枒口山山險峻仰攻不易乃別遣一軍出

山右攀藤而上超大呼曰右軍已登矣遂奮勇齊上陣斬王三札
巴並巨賊楊老令公小秦王等七人立解城圍復追敗諸葛章司
河禽楊龍喜斬之餘黨盡殲捷入擢知府適台拱廳以苛徵激苗
變超至建寓剿於撫之策曰此非盡民之罪也不逞之徒乘機煽
亂誅首惡釋脅從可不煩兵而定於是出示徧諭諸寨苗使縛首
惡以獻餘悉不問不數日獻首級八十餘亂遂定而黃平有諸生
三人者與知州某合謀倡滅苗清產之議苗人聞之大憤刻木相
約全疆同叛時川兵已回蜀超率兵五百馳援台拱解黃平平越
之圍轉戰至勝秉鎮遠賊塹山斷道以阻官軍援師又不繼至而
勝秉以無糧內鬩遂失其城時超屯鎮遠之邛水汎往來馳突其
閒戰百餘日未嘗稍挫其鋒一日訶賊懈夜燬其營數十座賊始
遁歸六年補石阡知府兼署思州超性剛直有膽畧好與上官爭

是非上官惡其煩聒有事每誠懇不使知由是黔省大吏多外推
崇而內陰嫉之者乃專責以剿賊而靳不與饟饑師轉戰往往奔
走呼號於鄰省大吏求協助時四川總督駱秉章湖北巡撫胡林
翼尤深知超交章論薦於朝林翼且謂其才非臣所及兵部侍郎
王茂蔭亦疏薦之九年擢貴州糧儲道時黔中苗教各匪蠶起連
陷諸郡縣上切責將爵遠超益感憤以孤軍扼邛水汛使苗教不
得合且遏其下竄湖南之路邛水居賊腹賊出全力撲之超約楚
軍夾擊賊大潰時思州之響鼓坪施秉之土地坪鎮遠之金鼎壘
鋒巖壘唐家營壘皆賊老巢超陷堅捶阨斬捕過當禽賊目張東
山僞王歐光義鎮遠諸處次第削平於是謀因地足食之道下游
民團舊以十戶養一壯丁超因其意稍變通之官募士而民輸糧
略仿唐府兵之制又籍叛產分授降眾流人以田代饟行之二年

得不饒之兵三千人軍威益壯先是黔省兵饒歲賴他省協濟八十萬金自軍興協饒不至於是地方官吏爭抽取釐金以爲補助至是超建釐金歸總之策一抽之後不復再抽商無滯累饒用以充其進退人材不拘定制或簡用富商大賈或諸老生童皆棄其所短用其所長而毀譽之事以一身當之不以累人用是黔中賢士大夫無不樂爲用者十年命幫辦貴州剿匪事十一年署按察使提督田興恕以超前後戰功上奏賞加布政使銜給武勇巴圖魯命署貴州巡撫超感激涕零益以肅清全黔爲已任日與田興恕同心僂力所向有功同治元年上命辦理防剿事宜五月回匪陷興義而雲南叛回潰勇竄擾貴州粵匪亦由川竄至正陽廟堂竝桐梓之松坎諸處超檄總兵吳安康進剿賊目王栲爲內應夜縱火招我軍攻破賊巢禽逆首僞元帥倪老帽斬之出難民二千

餘人六月閔家場踞匪糾集苗教諸黨偏江口下犯天柱匪首亦糾合土賊攻陷縣城且分股竄撲湖南之晃州廳高寨諸處陷印水青谿兩城謀截楚軍糧道超檄總兵羅孝連道員趙國澍進攻安順狎匪夷其壘斬賊酋韋登鳳尙大坪賊復約苗教分掠江內超覷賊巢虛檄羅孝連斷其歸路趙國澍等馳軍迎擊復令副將趙德光出冷水河梯子巖進襲尙大坪立破之印水汎城同時均克復進夷玉華山賊巢攻拔瓦寨復天柱縣城上嘉贊功命會楚軍疏捕伏莽超檄道員鄧爾巽總兵李有恆攻毀王家苗寨夾馬洞諸處老巢獲其酋李玉榮數十人黃白號教匪竄遵義東南兩鄉超檄知府李德我敗之三台山奪五里坎諸隘口賊壘悉平乘勝進攻石阡毀老王壘賊巢諸壘悉就撫而銅仁苗之聚官墳壩者亦驅除淨盡未幾石達開自川回竄分撲桐梓遵義黔西各城

超檄沈宏富等率兵擊卻之而回匪復陷安南興義分竄卽岱永
靈歸化上以超誤信徐之銘撫議嚴飭之二年乞病致仕歸而田
興恕亦以教案被譴黔事竟不復振矣貴州爲古夜郎地僻陋且
貧瘠咸豐初朝廷方憂中原未遑問邊略於是黔中羣盜乘機如
蝟毛紛起一時若苗匪教匪號匪槓匪種匪縱橫擄掠相爲首尾
而粵賊復抵其隙以相勾結黔疆二千里糜爛無完土超提數百
之卒遏方熾之賊以蚍蜉蟻子之師當豺狼角距之眾電掃風驅
當者披靡當是時黔東盜最劇黔踞湖南上游黔朝擾則湘夕敝
故防湘必先防黔超與駱秉章胡林翼反復陳說秉章林翼屢助
兵會剿超在黔東久周悉其地形風俗山川險阻賊巢所在無不
立予鏟鋤者超旣病歸賊焰勢復張及洪寇平始大舉川楚之師
專力於黔逮同治十一年始就盪平蓋距超之去黔已閱十載矣

光緒四年超卒於家年七十有九賜諡果靖貴州敕建專祠生平所著多散失孫方朴僅搜輯書牘二卷天津徐世昌序之行世

王發桂

王發桂號笑山清苑人道光十六年進士授禮部主事二十四年充軍機章京咸豐初擢員外郎三年遷郎中時粵匪長驅竄楚連陷武昌漢陽海內騷動發桂以賊順江東下所恃在船乃進火攻之策上嘉納尋授湖廣道監察御史時賊踞金陵爲僞都分股北犯發桂奏薦順天府府尹宗元酌駐臨洺關以北以資坐鎮貴州道員胡林翼捕盜鋤姦有膽有識其平日訓練丁勇仿戚繼光法而變通之勇不滿三百銳健果敢一可當十所著保甲團練條約及團練必要諸篇均有成效應畀以重任倚之平賊疏入命林翼治兵湖北其後卒克武漢收中興之功人尤以此偉之發桂以賊

匪猖獗各省制兵窳敗不足恃宜改練新兵補充舊額請遵名臣
戚繼光紀効新書練兵實紀成法竝條陳都城巡防事宜時逆踪
竄逼直隸統兵大臣守禦多失方發桂具疏劾之略曰軍興以來
獲罪効力之員職分較卑者可由統兵大臣驅策而奔走之至
一二品大員平日養尊處優差之旣不便差委之又不便委軍營
多一廢員糧台多一支應統兵大臣瞻徇情面埒列薦章希旨起
用帶罪幾同無罪圖功適以冒功達洪阿此次退縮失機致奮不
顧身之謝子澄倅鑑同時陣亡如此劣員死不足惜至欽差大臣
勝保 皇上賜以神雀刀令其便宜行事乃自入直境未聞斬一失
律將弁而獲咎大員屢經保奏非瞻徇情面而何請飭勝保將達
洪阿查明正法此後劣員無得奏留國法旣伸軍威自振疏入上
嘉獎之四年擢鴻臚寺卿奏請試行北省水利特舉直隸臬司吳

廷棟直隸在籍西安府知府徐棟總理其事疏上不果行九年遷太僕寺卿十年升通政使司通政使十一年擢都察院左副都御史署兵部左侍郎同治二年御史孟傳金奏參前安徽巡撫王植門丁陳小山罪僭用四品冠服與長官抗禮請聞發桂所言上命發桂查覆奏治陳小山如律三年授禮部右侍郎調刑部左侍郎五年授工部右侍郎兼管錢法堂事務病歸九年卒

惲光宸

惲光宸字濟生大興人道光十八年進士改翰林院庶吉士二十一年授編修二十三年充河南鄉試正考官二十四年充浙江鄉試副考官外授湖南岳州知府二十七年署衡永郴桂道明年調長沙知府二十九年升廣東糧儲道授鹽運使尋擢江西按察使三十年署布政使咸豐元年文宗御極詔疆臣各舉所知巡撫費開

授以光宸薦一年春入覲召對稱旨四月回任時粵匪竄擾湖南踰岳州下洞庭遂破漢陽攻武昌省城江西巡撫張芾檄光宸馳防九江武昌陷張芾親赴九江屯瑞昌光宸駐姑塘關口理糧臺事三年賊陷九江據江寧省城四出紛掠江西益戒嚴欽差大臣向榮追賊次九江檄撥米三萬石銀十五萬兩備兵勇坐船千餘光宸以冬漕免費應軍需悉發空運糧船備調遣事咄嗟立辦時金陵賊溯流上犯湖北按察使江忠源以援皖過九江飛咨張芾會防光宸以爲賊自上游來則九江先受之自下游來則湖口先受之今守湖口勢已不及則制人之計宜莫如省於是張芾乃疏留忠源守省城賊果棄九江陷南康進圍南昌隧地攻城破德勝章江兩門羣賊萃缺口蟻附而上守陴者辟易光宸大呼殺賊懸破格賞士皆奮搏不顧身賊潰退光宸植立缺口囊沙壘石塞之

城立完一日掘暗壕地道遂絕復覷賊不備令敢死士縋城出奪其攻具賊大蹙宵遁九江攻而據之巡撫陳啟邁檄令疏捕德安一帶伏莽七月擊賊義寧伏兵三都梁口之官山燕子山諸處圍而殲之餘賊竄武寧光宸乘勝窮追斬馘二千餘燬橫路口賊巢餘遁走十月命赴九江調集礮船會楚軍沿江攻剿時侍郎曾國藩方克武昌由田家鎮東下十一月光宸抵德安賊以田家鎮新敗益死守九江不去署總兵居隆阿進攻失利光宸豫伏勁卒爲後援賊至得不敗十二月大軍潰於吳城水師失利省垣大震檄光宸回省籌防五年以擅責舉人彭壽頤事降級留任七年復授江西按察使八年遷布政使九年擢巡撫會石達開下竄光宸飭沿江文武扼隘以守竝派師兼程援皖以資會剿初江西以軍饟不繼暫發半饟至是瀝陳錢費銀贖士卒艱苦狀請以全數發給

疏入下部議行十年以賊據安徽建德久其取道入安徽者江西之鄱陽浮梁等縣適當其衝皖兵憚深入畫嶺而守光宸檄援皖道員吳坤修黎獻諸軍乘夜銜枚抵城下緣梯而登遂克建德又掃除南安竄賊境內肅清又以浙江賊勢盛嚴防廣信竝分籌援浙之師連疏具陳俱報聞旋乞病致仕閏三月卒

廉兆綸

李齒

廉兆綸原名師敏字葆醇號琴舫寧河人少工騎射善屬文縣城南有峭帆亭遺址兆綸年十四偕友遊其地援筆賦之名噪一時初婚之夕應縣試所爲文淵涵澄靜縣令唐宗泰目爲大器擢首選道光二十年成進士改翰林院庶吉士次年授編修二十六年充湖北正考官二十七年充武英殿纂修官二十九年充順天鄉試同考官丁父憂服闋署文淵閣校理咸豐二年充會試同考官

署日講起居注旋補講官南書房行走四年授右贊善擢翰林院
侍講學士轉侍讀學士視學江西旋升內閣學士兼禮部侍郎銜
仍留學政任先是 宴芳嚮用兆綸遽丁憂去官遺命諸臣可大
用者兆綸與焉五年補授工部右侍郎兼管錢法堂事留任如故
當是時粵寇據金陵復遣悍黨石達開上擾江鄂諸省侍郎曾國
藩坐困江西八府五十餘城皆失陷寇氛近逼省垣人一日數驚
有汲汲不可終日之勢兆綸奏曰江西自有軍務以來募勇約一
萬五六千人名目繁多或數百人爲一隊或百餘人爲一隊管帶
者多係微員不相統屬地方有警則彼此推委觀望不前勝則互
訐以競其功敗則爭潰而不相救甚且擾民冒饗乘便營私弊端
不勝枚舉方今賊勢日張瑞州臨江相繼失守設有倉卒以此散
而無紀者當之何恃不恐惟有將所募之勇裁去一切名號併爲

三四軍每軍可得四五千人以三四監司方面素有威望者各統一軍以責其成功庶幾後效可幾而前弊可祛也六年三月兆綸試廣信賊陷吉安撫州進賢東鄉進據饒屬安仁縣城兆綸以江省支郡迭陷省城四面皆賊與廣信聲息不通上疏請援師竝以練勇千人扼守貴溪賊乃分竄德興陷建昌廣信益孤兆綸急率諸生招集煙戶練鄉團二千人日與廣信知府沈葆楨上饒知縣楊昇力籌防禦密檄上饒廩生郭守謙率鄉勇三百銜枚夜襲金溪生員曾守誠奮勇首先攻入北城賊不虞官兵至奪西南門逸獲槍旗衣械無算追殺二十餘里立復其城乘勝會攻建昌而賊眾撲陷饒州官軍失利廣信益危兆綸與曾國藩文俊合疏請截留閩兵一千六百名專攻建昌分檄郭守謙石景芬相機防剿時城守兵僅二百人或勸兆綸走避兆綸以書報之曰僕通籍後重

荷兩朝光寵以至今日夫今日之時何時也翼軫衡廬之地忽變而爲狐烏鬼蜮之場當事官紳頗以僕之去留爲行止此時自立之士猶不欲先去以爲民望又况僕之分位若此遭際若此設置大局於不顧而假託明哲保身之說以自文豈表率僚案之意乎雖然僕本無守土之責者也其不忍決然舍去亦非強以守土之責自責也然而有益於守土者三焉僕在此則浙兵可以奏調可以函催一也僕在此則省垣諸公義不能不關休戚倘以千人把斷安仁則廣勇得以專防興弋二也僕在此則人之勇者將曰客官且不去我奈何他往乎其怯者將曰長官且不去我何敢他往乎因以安集鄉團招練義勇三也三者有其一則廣郡可以力保江省可以徐圖而全浙可以無恐此僕所以四顧躊躇而決然定計者也萬二三事皆不可行則僕亦不甘坐此一隅自同守土然

亦不肯倉皇出奔爲天下笑竊謂死生蓋有天焉有命焉卽安居無事之時亦非絲毫所能自主況今日孤危至此而欲計出萬全豈可得哉烽火滿天妖氛四熾西江涓涓吾其濟乎然自有生以來所以見愛於君親與僕之所以自愛者如此敢用以告知已幸垂聽而見教焉六月都司畢金科會同覺羅耆齡破賊饒州克其城兆綸謂今日江省之事以力保廣饒爲先而欲保廣饒不能不兼籌撫建乃飛飭石景芬郭守謙等馳攻撫州會賊大至連陷廣昌南豐新城瀘溪四縣八月守謙移營突與賊遇三戰皆捷窮追遇伏力戰死時兆綸赴鉛山河口梗於賊飛咨衢州鎮總兵饒廷選乞援師廷選提兵二千一百至兆綸亦冒雨穿賊營而入共謀守禦賊屢撲不得志前後七戰捕斬賊目六人傷亡六千餘人於是廣信合屬七縣無賊踪兆綸防守危城盡出俸錢饒軍貧困至

不能自給旋以病告歸七年病痊 上命在南書房行走署工部右侍郎八年補授戶部右侍郎兼管錢法堂事務旋命會同倉場侍郎李菡驗收通州運米向例海運撥船攬雜虧短米數經紀查出者責令船戶獨賠若經紀并未查出或同舞弊者責令經紀撥船各半分賠嗣以李菡奏陳撥船虧短米石請將經紀未能查出一條改爲船戶全數賠補再令經紀罰賠二成以杜弊端兆綸疏言經紀未能查出若令各半分賠船戶恃有人代賠勢必任意偷竊經紀知異罪同罰勢必徇隱扶同請責令船戶全數賠補仍令經紀罰賠二成外再加一倍共計罰賠四成庶船戶所賠之數卽其所偷之數既可戢撥船舞弊之心而經紀所罰之數更倍於新案所賠之數則沿途稽查自必益加嚴密 上未從命照舊章妥辦以歸畫一八月調倉場侍郎日擊時艱以各省用兵事權不一上疏

略言各省督撫以節制各鎮專爲用兵而設是以皆加兵部之銜
課實循名責無可諉今於督撫之外另設統兵大員其本省督撫
雖有會剿之名其實專爲籌餉之事統兵者往往以呼應不靈餽
糈不給漸致遷延而督撫又往往以事權不一供億不貲各生意
見及至城池失守統兵者無地方之責或邀寬大之恩而並未帶
兵之督撫轉受其咎名實不符事多掣肘賊氛尙熾職此之由臣
惟督撫大吏類皆朝廷所簡拔之人設其人未盡知兵不妨於統
兵大員中畀以督撫之任使之各清各省而責其成功方今川黔
閩廣竝未另派統兵大員而本境漸就肅清湖南北之專任督撫
剿賊者轉有餘力助剿鄰境至於江蘇一省統兵者不一而足而
潰敗決裂糜爛至今平心而論統兵大員中豈乏公忠體國之臣
所以然者抑其所處之地不同而用情亦異此其故不可不深長

思也再蘇常亂後苗練狻獠江北戒嚴在在均關緊要竊聞徐宿淮揚等處皆宿重兵第帶兵者既無地方之責又彼此不相統屬實有散而無紀之虞加以豫東各匪出沒無常誠恐江南羣逆暗中勾結希圖北犯清淮一帶實爲南北要衝承平以來漸弛守備其地雖爲江南督撫所轄邇來隔絕大江鞭長莫及其淮安駐紮之漕運總督又不兼管地方宜及此時權設江北巡撫抑或將漕運總督權改斯缺所有江北各路軍務悉歸統制如此則江北地方聯爲一氣庶可以控扼江淮聲援汝潁不惟江南羣逆望而絕覬覦之心卽豫東會捻各匪出沒之區亦可以斷其一臂矣疏上不報九年英人北犯疏請以戰爲和又不報兆綸沈毅有爲感兩朝知遇之恩知無不言言無不盡以是所至多齟齬不合於時同治元年罷歸家居田產悉讓於弟主講天津問津書院藉束脯度

日六年卒年五十有七身後蕭然聞者爲之流涕云著有深柳堂集行世

李菡寶坻人道光二年進士改庶吉士三年授編修歷官至工部尚書其署禮部侍郎疏奏安徽宿蒙亳壽諸處三省民連眾捻蠶起此拏彼竄勾結蔓延巡撫周天爵招募壯丁曾有免罪收錄之請本欲借捻剿捻而虎狼之性不第不爲之用反爲之敵皖省留守之兵不足以資剿辦而琦善所調吉林馬隊尙未出山東一步琦善遷延湖北日久無功請飭改赴宿州旣利騎兵又宜陸戰用長舍短一轉移閒寔於軍事有裨疏入報聞署倉場侍郎廉得棍徒把持倉務饜設姦蠹狀奏除之菡歷充考官學政甄拔人才多經明行修之士士論翕然同治二年卒予諡文恪

高崇基

高崇基字仲巒號紫峯靜海人幼有神童之目道光二十三年舉於鄉三十年成進士選授山西壽陽知縣時大兵征陝回地當其衝從容籌措軍不譁民不擾宋景詩未叛時過縣境察其有異志戒民移婦女輜重山谷閒優犒出境抵獲鹿遂畔以卓異薦調補介休一月決呈牘千餘眾驚爲神編造魚鱗清冊大府取爲通省徵糧程法調署鳳臺西捻北犯帶鄉兵防韓侯嶺有勞調陽曲署忻州補河東監掣同知光緒元年特簡安慶知府尋移甯國履任五日而建平教堂案起持平理之民教帖服旋土客交鬩止發兵立傳諭之卒欣服而散調安慶丁艱歸服甫闋以前守甯國有惠政安徽巡撫裕祿山西巡撫張之洞交章調往遂回山西署布政使補河東道擢按察使升布政使事無巨細皆躬親漏四下始就寢政無不舉調廣東布政使粵中風俗侈靡度支常不給崇基以

傳六
三三
釐金爲入款大宗嚴定比較裁陋規增員役薪水以養其廉其近
江沙田水落成膏腴豪家據爲利藪稅不輸官乃立清丈法升科
至數十萬庫以不匱任三年特命巡撫廣西抵任未一月病卒妾
李氏絕粒以殉

李鴻藻

李鴻藻字寄雲號蘭孫高陽人道光二十四年舉人咸豐二年進
士改翰林院庶吉士三年授編修四年充功臣館纂修以分錄貞
觀政要賞文綺荷囊五年命在上書房行走充山西鄉試副考官
七年丁本生父憂服闋仍入上書房提督河南學政十年上命大
臣擇保儒臣堪膺授讀之任者大學士彭蘊章以鴻藻應命來京
十一年特詔充大阿哥師傅 穆宗登極 兩宮太后命鴻藻及前大
學士祁雋藻大學士翁心存工部尚書倭仁均在弘德殿授讀於

是有治平寶鑑之輯 上喜默思鴻藻每進書輒教之朗誦二月充
日講起居注官京察名列前擢侍講轉侍讀尋授國子監祭酒二
年十月鴻藻以 穆宗釋服會同祁雋藻倭仁上疏略曰 皇上冲齡
御極智慧漸開當此釋服之初舉行吉禮聖心之敬肆於此分風
會之轉移於此始玩好之漸可慮也游觀之漸可慮也興作之漸
可慮也嗜好之端一開不惟有以分誦讀之心而海內之仰窺意
旨者且將從風而靡安危治亂之機其端甚微而所關至鉅可無
慎乎伏願 皇上恪遵慈訓時時以憂勤惕厲爲心事事以逸樂便
安爲戒屏玩好以節嗜好慎游觀以定心志省興作以惜物力凡
內廷服御稍涉浮靡概從減裁雖向例所有亦不妨量爲撙節如
是則外物之紛華不接於耳目詩書之啟迪益沃於身心將見聖
德日新聖學日固而去奢崇儉之風亦不令而行矣疏入 上優詔

傳
三
褒答命將原摺交弘德殿以資省覽三年擢內閣學士兼禮部侍郎銜署戶部左侍郎四年命入軍機學習仍兼弘德殿行走鴻藻疏辭上未許尋署戶部右侍郎鴻藻初入樞廷遇事持重不苟爲異同尤爲大學士文祥所器文祥嘗謂之曰人才盛衰國家安危所繫進賢退不肖此吾輩職所當爲者鴻藻篤守其言前後在樞府四十年皆此志也五年擢禮部右侍郎兼署戶部三月調補工部右侍郎六月丁母憂 聖太后賜祭一壇銀二千兩治其喪又以鴻藻膺文宗特簡授皇帝讀迄今六年皇帝春秋鼎盛正緝熙典學之時不可或離左右且軍務未平兼資翊贊援雍正乾隆年間大臣孫嘉淦朱軾稽曾筠蔣炳于敏中故事命鴻藻開缺守孝百日後卽赴弘德殿授讀仍在軍機處行走凡遇朝會不必與列竝諭鴻藻移孝作忠勿以守禮固辭鴻藻具疏瀝陳哀懇終制 太

后不允命遵照雍正年間世宗諭旨二十七月內不穿朝服不與朝會筵宴遇有祭祀典禮咸集之處均毋庸與列竝諭鴻藻當深體朝廷不得已之苦衷勉抑哀思毋得再行陳請鴻藻復具疏呈由吏部代奏略曰先王制禮原準人情喪紀之設非徒以名教具文範圍後世蓋以人子之心必如是而後卽安鴻藻雖不才親喪自致之念豈獨無之伏念鴻藻前以翰林院編修在河南學政任內被先帝特達之知召還京師畀以傳儲重任者蓋以鴻藻恪慎自將尙能謹守禮法也若親喪未終而出入禁闈則先已違禮忍情負罪名教鴻藻一人何足惜然不亦有傷先帝知人之明乎今皇上富於春秋典學正關緊要使以不祥之身而日侍經帷冒不韙之名而虛言啟沃在臣心則無以自安於聖學則何所裨益見在弘德殿行走諸臣如倭仁徐桐翁同龢等皆能守道竭誠盡心

輔導此時雖鴻藻一人暫離左右似於緝熙進德尙不相妨至若
趨直樞廷則是三年之喪儼然從政尤令鴻藻進退失據跼蹐無
以自容鴻藻夙夜憂思欲堅持已見則似朝廷委曲矜恤而臣子
冥不知恩欲勉承詔命則疚心實甚而終身無以自處煎灼昏迷
惟有號泣伏惟天地高厚哀而憐之會倭仁等亦代爲陳請太后
責倭仁等前後異議命恭親王奕訢至鴻藻寓次傳旨令於百日
後照常入直鴻藻疏言百日將滿自揣病軀實難入直 太后溫語
慰勉至十月鴻藻復疏陳病勢賞假調理仍令病痊時照常入直
鴻藻遂得賜告終制始出七年二月擒賊竄畿疆祁州饒陽相
繼陷鴻藻方里屠巨觀各路諸軍近十萬統兵大員事權不一勞
師糜餼日久無功因上疏函陳其弊請特派親王爲大將軍坐鎮
京師以固北路左宗棠李鴻章爲參贊大臣分紮保定河間東西

兩路各率所部兵相機剿辦陳國瑞幫辦軍務專統一軍爲遊擊
之師直隸總督官文專顧省城籌備諸軍饟需以資接濟丁寶楨
駐紮直東交界防賊東竄李鶴年駐紮直豫交界防賊南竄直晉
交界則由左宗棠等分撥勁旅扼要屯防并請敕下諸大臣和衷
商辦迅奏膚功奏入 上遂命各路統兵大臣均歸恭親王奕訢節
制十月服闋命仍在弘德殿軍機大臣上行走竝署禮部左侍郎
賜紫禁城內騎馬八年補戶部左侍郎兼管錢法堂事仍兼署禮
部十年擢都察院左都御史尋授工部尙書九月 穆宗大婚禮成
加太子少保時有修葺圓明園之旨滿漢謂粵捻初平回氛方熾
宜培養元氣以固國本不應虛糜帑帑爲此不急之務 上大怒鴻
藻始終執爭事竟得止十二年 慈禧太后四旬萬壽特賞鴻藻本
生母氏御書蘭陔春永扁額十月復賞其母御書扁額福壽字及

如意錦綺時 穆宗有微疾上疏請修明聖德以自慎重復面爲陳
說 上嚴禱之十二月 穆宗崩鴻藻自以輔導無狀上疏自咎 太
后知其忠謹倚任益堅命專理喪儀光緒元年充實錄館總裁二
年命入總理各國事務衙門時譯署初設事皆扃始無成式鴻藻
遇事持平以存國體爲要忠信篤敬中外重之三年丁本生母憂
六年服闋命仍供原職尋署吏部尙書時與俄人議還伊犁事沈
桂芬主崇厚議鴻藻不可爭於廷持之甚堅卒治崇厚罪遣使改
約七年授兵部尙書協辦大學士八年調吏部尙書未幾法人啟
釁越南有忌恭親王奕訢者喉言官劾政府諸臣鴻藻降二級調
用十一年補內閣學士兼禮部侍郎銜尋授吏部右侍郎十三年
擢禮部尙書時河決鄭州 上命鴻藻馳往督辦大工會同河道總
督李鶴年河南巡撫倪文蔚迅籌堵築先是李鶴年倪文蔚議於

西壩興工十四年正月續籌東壩鴻藻以料少時促變通原議爲
併工省料之計會伏秋汛至西壩捆箱船失事疏請停緩大工俟
秋汛稍平接辦 上命鴻藻督工無效革職留任視李鶴年職命鴻
藻暫行署理八月回京十月禮部具奏典禮以籤改宣示日期未
照繕再議革職 上特寬免十一月 皇太后婚充大徵副使明年禮
成復原官充會試正考官兼署都察院左都御史十八年兼署刑
部尚書十九年正月鴻藻年七十賜壽賞資優渥八月署刑部尚
書二十年正月 太后六旬萬壽賜戴雙眼花翎充會試正考官八
月署刑部尚書日本朝鮮構釁命鴻藻商辦軍務授軍機大臣每
朝入對恆至日昃不遑暇食意所不可歸寓輒悒悒或撫膺痛哭
然其事未嘗以之告人也 上念其勞賜西苑門騎馬二十一年六
月命入總理衙門鴻藻以外交棘手設誠致行凡有益於國者隨

事力爭以圖補救朝廷懲前毖後急於變法而新進之士遂欲屏棄古訓顛覆成法以求遂其自由無忌之心鴻藻每痛抑之且曰禍天下者必此徒也故終其世不得逞自賠款驟增度支益絀有以加賦之說進者將議行矣鴻藻謂無濟於國而有害於民力阻之事得寢二十一年以病乞假假滿入對上派內監扶掖再賞假一月十月命以禮部尙書協辦大學士尋調吏部命免帶領引見頒賞書畫及諸上方珍物甚夥鴻藻歷充經筵講官武英殿玉牒館會典館正副總裁管理三庫事務大臣教習庶吉士會試知貢舉凡鄉試會試覆試殿試朝考考試差考試漢中書漢廕生庶吉士散館閱卷諸大臣皆以鴻藻充之五次京察均特旨交部議敘二十三年三月病篤賞藥餌命御醫往視七月卒年七十有八遺疏入上痛悼賜祭葬贈太子太傅予謚文正入祀賢良祠鴻

藻性至孝爲學守程朱務實踐不苟言笑持躬勤約有若寒素與
倭仁最善以道義相切劘其事上以誠不欺不隱而造膝密陳之
事雖子弟不以告傳 穆宗十餘年盡心啟沃一日 穆宗學書故爲
戲筆鴻藻立前捧上手曰 皇上心不靜請少息 穆宗改容謝之其
在樞府獨守正持大體平生以汲引正人護持善類爲心御史王
鵬運諫止修頤和園幾獲重譴鴻藻力解之得免 德宗簡曰一往
頤和園侍起居且不時駐蹕言官有言其不便者太后大怒欲黜
之鴻藻謂如此必失天下臣民之望力爲之請乃止嘗曰臺諫所
以輔宰相之不足可嫉視耶所保薦人才多清廉忠正之士然往
往有未識面者大學士李鴻章嘗謂近年用人多當其選此中得
失惟某深知之久之當收其效也左宗棠與鴻藻同直樞垣謂其
忠誠可格金石初與奕訢議事嘗齟齬繼乃大服曰李公愛我故

晚年交益篤一時名士若張之洞陳寶琛盛昱諸人尤倚爲腹心
海內識與不識皆推爲清流之首云

張之萬

張之萬字子青南皮人道光二十七年一甲一名進士授翰林院
修撰二十九年充湖北副考官咸豐元年充河南正考官二年大
考二等充河南學政三年粵匪北犯豫捻乘機竝起破歸德踰睢
州近偏開封之萬條上防剿事宜及地方錢穀差繇諸積弊先後
凡十餘疏多允行六年充日講起居注官七年命在上書房行走
八年詔授鍾郡王讀九年三月升侍讀充會試同考官十年擢翰
林院侍講學士充會試同考官值畿南土匪蠶起上命回籍治團
練獲巨酋張東成真諱法境內肅清十一年擢詹事府詹事會文
宗崩於熱河端華肅順專政蓄異謀醕親王奕譞知之萬素不附

肅順密與畫策召恭親王奕訢奔喪衛 太后還京師端華肅順
悉伏誅翌日遂有超署兵部左侍郎兼工部左侍郎之命之萬之
受知自此始十二月擢內閣學士兼禮部侍郎銜同治元年升禮
部右侍郎仍兼署工部先是 太后命南書房上書房翰林編輯
歷代帝王政治及前世垂簾事蹟可爲法戒者三月之萬偕太常
寺卿許彭壽等集纂書成錫名治平寶鑑賞資珍物轉吏部左侍
郎九月御史劉毓枬奏劾河南州縣苛派擅殺命之萬往按得實
巡撫鄭元善以下分別降革卽命之萬署理河南巡撫甫視事疏
請釐定折漕言軍興以來湖北變通漕折國與民俱得其利河南
收漕州縣大抵折徵銀錢每石約銀四兩請令各州縣以三兩三
錢解交司庫餘仍留爲本縣公費司庫設局津通以二兩一石購
米上倉再以一兩爲河南軍饟可支通省二三月軍食所餘三錢

留爲通省辦公之費有餘仍歸軍餼疏入飭部施行時擒匪張洛
行擾犯渦河南北而臨漳內黃土寇蠡起響應團總苗沛霖復反
側不可恃之萬遣總兵李世玉楊長春余際昌督兵攻剿兼以計
控馭沛霖十二月擒酋陳大喜竄踞淮南蕭王寨踰陡溝渡淮西
走犯南陽之萬親赴汝州督師至汝州檄總兵張曜余際昌先攻
張鳳林老巢以分賊勢鳳林震懾乞降之萬偵其詐飭諸軍嚴陣
以待禽而斬之二年補授河南巡撫御史呂序程奏河南州縣徵
收地丁請每銀一兩改徵制錢三千藉充軍餼之萬奏豫省丁糧
完銀完錢皆不及三千之數今若一律加收恐民心驚疑爲加賦
致滋紛擾遂寢其議時陳大喜竄安徽阜陽勾結皖捻分遣其黨
鮑金湖由岳城趨楊莊偪雷堰戴應華蕭文信乘閒入張岡南與
土扶橋賊巢互爲援應勢張甚其西路新收各寨見賊勢方盛皆

存觀望心乃檄張曜率所部併力規取荒坡以防竄逸余際昌會同總兵趙鴻舉連營環堵以斷西南各捻勾結之路二月陳大喜糾黨踞楊寨牽制官軍之萬飛檄余際昌等敗賊土扶橋追奔至光山縣南白雀圍同時總兵陳祿興趙鴻舉亦敗賊張岡克楊寨匪勢稍戢四月苗沛霖叛總兵余際昌遇伏死賊踞土扶橋方家寨萬安店與張岡犄角之萬飛調張曜馳擊張岡圍練大臣毛昶熙諸軍相繼至連戰皆勝賊敗走分竄皖楚逆酋張鳳舞窮蹙乞降斬於陣遂拔張岡乘勝擊斬逆酋以下千六百餘級別將亦先後平邢集陟溝尙寨談家園諸賊十數壘汝南全境肅清之萬駐軍許州分遣諸將東赴歸陳南防光固爲防苗剿捻之計七月回省而亳捻乘虛竄許州陷大莊保全兩寨上以之萬徑回省垣不知緩急降二級留任十月捻酋張總愚竄魯山南召入鄧州西走

浙川窺陝西而逆首藍大順由山陽商州走西坪謀與張總愚合其地爲三省險塞山嶺叢沓又逼近武關爲西安將軍多隆阿大營轉運路上詔之萬嚴兵防禦之萬遣湘勇四營會張曜馳擊連敗總愚於重陽店乘勝襲西坪藍大順亦敗走陝西十二月之萬進軍汝州剿皖楚竄賊三年移屯南陽調皖將宋慶至軍克汝南賊巢誅巨擒趙國良蹙賊於六安之流瀑曠斬馘略盡粵寇陳得才走死長嶺十二月張曜宋慶諸軍連敗總愚於寶豐魯山時豫之五擒已殲其四惟張總愚挾粵寇賴文洸爲患中原以總愚爲西擒文洸爲東擒蓋又四年而始定四年正月賊犯開封之萬回省擊走之三月擒竄曹州之萬檄張曜諸軍出境會剿四月署河東河道總督五月僧格林沁戰沒曹州督兵大臣皆獲罪之萬降革暫留署任八月河南巡撫吳昌壽督軍赴許州賊覷省城虛

逼近陳留謀掩襲之萬分道嚴防別選銳卒二百扼要以守賊不
得逞九月賞還二品頂戴補授河道總督之萬視工驗料必躬必
親著治河芻言以爲法五年調補漕運總督十月擒入徐州圖南
犯之萬以裏下河爲江淮財賦所出而清淮爲裏下河門戶洪澤
湖成子河六塘河皆要地部署諸將防守之又調浙軍洋槍隊三
千人與清淮礮船相輔十二月東擒突過六塘河踞鹽河兩岸謀
越運河與西擒張總愚合之萬檄記名總兵姚廣武張從龍水陸
諸軍擊敗之生禽擒酋賴文洸餘黨悉平捷入賞頭品頂戴賜花
翎七年閏四月親赴台莊會剿西擒七月大軍會圍總愚於黃運
之間盡殲其眾西擒以平迺疏陳江北善後事九年調補江蘇巡
撫十年偕署兩江總督會國藩會議海運漕白二糧章程十二事
均見施行九月補授閩浙總督十月以母年逾八旬請致仕回籍

養親許之光緒八年正月召來京授兵部尚書賜紫禁城內騎馬
充經筵講官九年調補刑部尚書三月充會試副考官十年三月
命入軍機兼署吏部尚書充上書房總師傅十一年十一月以刑
部尚書協辦大學士賞穿黃馬褂十二年充教習庶吉士會典館
正總裁十四年充方略館總裁十五年補授大學士管理戶部
德宗大婚禮成加太子太保銜授體仁閣大學士賜西苑門內乘
坐肩輿十八年命管理吏部事授東閣大學士二十年以總辦
太后六旬萬壽慶典賞雙眼花翎並賜用紫韉二十二年以病致
仕賞食全俸二十三年五月卒年八十有七遺疏入天子震悼册
贈太保賻贈有加予諡文達入祀賢良祠之萬襟懷曠達生平不
見欣戚之色其在師中臨危制變不動聲色嘗軍葉縣戲下卒僅
數百賊大至多設疑兵擊卻之善於擇將張曜宋慶姚廣武張從

龍等皆拔之稠人之中卒以戰功顯名於世居政府十三年讓功推能人尤稱其相度又工書善畫山水澹遠秀逸在雲林子久之間人得其片幅爭相寶藏論者謂王輩卒於康熙丁酉年八十六之萬卒於光緒之丁酉歲亦一奇也子嘉蔭大理評事工畫花卉得暉壽平神妙孫奎正亦精繪事專師戴熙年甫冠而卒

鹿傳霖

鹿傳霖字滋軒號廷叟定興人都勻知府丕宗第五子也幼與妻弟張之洞同學以文行相砥礪當丕宗守都勻時叛苗麴聚城下傳霖方率二百健卒迎饗聞警馳歸縋城入助戰守相持十閱月援絕城陷傳霖侍父誓從死不宗強使人掖之出乃及妻蕭同殉難傳霖聞關投總督告死狀從大兵攻復都勻負父母遺骸歸葬時年僅二十耳貴州大吏堅留黔不可卒穿賊穴北歸傳霖由是

知名咸豐九年舉鄉試投欽差大臣勝保軍招降濮州捻賊以功授同知同治元年成進士授庶吉士二年散館改官廣西興安知縣民苦纏訟傳霖受牒卽決獄無宿留有弟毆兄死給爲跌斃者察其實置弟於法兩富室構訟皆以賄進嚴拒而痛懲之劉長佑劉坤一聞其廉先後疏薦其受知朝廷自此始明年調臨桂茶商議廢小錢姦民鬪起罷市圖劫略傳霖示以小錢納官稅四境帖然巡撫疏其能遷龍州同知攝北流改權桂平躬履四鄉清釐糧賦九年元巨土賊起擊滅之十一年督剿柳雒土匪以計降其酋賜孔雀翎擢桂林知府廣西鄉試多賄通騰錄改闈中試藝傳霖嚴爲防制榜揭士論翕然光緒四年改授廉州時李揚才將叛擾越南急捕之立散其黨法國教士購地建堂已成約傳霖親與抗論卒折券寢其議明年調潮州總督檄查前知府馮某貪婪狀馮

素與傅霖齟齬平情按之白無罪旋升惠潮嘉道未滿歲擢福建按察使聞中民教相仇幾釀變傅霖飭牧令勿妄意輕重又與領事約不得收違法者入教民賴以安尋調四川遷布政使奉命查辦鹽務九年升河南巡撫清釐州縣納糧積弊歲增三十餘萬除例差疏溝渠禁種嬰粟政教大行十一年調陝西未期年引疾歸里十五年再出撫陝值黃河西齧將與洛通傅霖增築石壩三十餘座得無患癸巳歲饑發倉以振民忘其災二十年中日構兵遣兵入衛奉命兼攝西安將軍以日本講條要挾抗疏爭之二十一年擢四川總督蜀故多盜特立一軍捕治之創建同文學堂及算學館以教士子夔萬大饑發上游積穀汎舟下濟又採湖北糧米平糶以活饑民四境安堵無一思亂者是時英俄交窺西藏藏番恃俄援梗英畫界英嗾廓爾喀與藏構兵而瞻對土民苦藏官苛

虐思內附瞻對者迺蜀藏甌脫地分上中下距打箭鑪三百餘里地險人強常蹂躪明正疊蓋各土司初琦善督蜀檄兵往剿經歲無成功咸同間中原用兵髮捻無暇籌邊瞻對工布朗結益驕橫梗蜀藏茶商運道藏番駭憤司藏事者屢乞駐藏欽使奏請發兵征瞻朝命川藏會剿藏番需茶急且道近馳兵先至攻克瞻巢據其地藉索兵費十六萬始歸地內屬時蜀匪擾亂匱兵單遂以瞻地賞給達賴原一時權宜之計光緒十五年瞻民內鬩逐藏官乞內屬督蜀者瞽於邊務誅瞻民首禍者數人仍隸之藏改派番官并添堪布一人番兵八百以致愈肆強橫鴟張蠶食各土司脅於威力相率依附傳霖以瞻對爲蜀門戶瞻不化服無以威藏番藏番不聽命則界無時定而英之忌俄者益急圖藏藏亡瞻必隨亡行且及於蜀矣會朱簡章谷土司爭襲事起傳霖檄知府羅以

禮知縣穆秉文往諭以提督周萬順統防邊新建長勝各營進駐
打箭鑪瞻酋仔仲則忠札霸以兵侵章谷抗我軍傳霖乘機進發
聲罪致討六月八日趣萬順大軍出關瞻對險隘凡有三曰一曰
溝曰然馬公山曰然魯科崖壁陡絕林菁叢雜瞻築哨樓碉卡疊
木石爲死守計我軍分三路由僥道深入盪決直前迭克諸要害
各土司嚮服率兵聽調瞻民降者五千餘戶渡雅龍江抵瞻巢填
塹合圍斬馘過當逆番夷喜吐布丹率喇嘛番眾婦孺三百餘人
悔罪乞降盡收三瞻地是役也用兵僅三月餘全瞻一律肅清傳
霖區畫經營故諸將皆用命盡死力乃疏請歸流改設漢官爲善
後籌邊之策略謂瞻對在川省西南眾土司之中去藏遠而距川
近形勢最爲扼要自歸藏以來番官苛虐爲害已深況今藏勢岌
岌設一旦屬之他人其禍尤大此次用兵寓撫於剿土司瞻民歸

心向化不獨保川兼可保藏蓋懲之正所以保之也若再行賞藏則大失土司瞻民之心而藏番且視爲當然竝不知感其勢益橫瞻民痛心疾首必至糾眾相抗民勝則民與藏交相怨我措置尤難藏勝則土司全爲脅服川藏隔阻邊禍愈烈藏番之性畏威而不懷德我若牽就彼更披猖界務通商益加違抗激怒英人藏之危亡可立而待總之三瞻得失關係川藏安危亟應乘此收回設官撫治悉除苛政綏輯瞻民內可固川省之藩籬外可懾藏番之狡詐章谷朱窩兩土司轄地均當改設漢官略仿松潘五屯舊例三處辦妥次第推行經營裏塘巴塘德爾格忒等地築路開荒展修電線西接駐藏章京所轄之二十九族以達前藏則邊防就緒方可控御藏番政出令行仍操欽使且英俄覬覦藏地皆隱而未發我若力足制藏英甚願藉藏爲我屬堅以拒俄川藏鞏固庶可

紆朝廷西顧之憂竝請瞻對設直隸同知一員曰定瞻直隸廳隸
建昌道移建昌道於打箭鑪打箭鑪廳改爲直隸廳徑歸道轄章
谷宋窩兩土司改設屯官作爲差缺麻書孔撒白利三土司分隸
兩屯官兼轄而統於瞻對同知同城設游擊一員德爾格忒爲疊
蓋之合音幅員最廣據金沙江上游南界三瞻北鄰青海東西將
二千里直抵藏界察木多比年爲瞻酋霸據宜乘克復三瞻復其
土司之位使爲我用其地亦設屯官一都司一以鎮撫之竝隸於
瞻對至添設總兵或駐裏巴兩塘作爲邊鎮要缺以阜和協及巴
裏兩塘之都司新設之瞻對游擊德格都司均隸之先後剴切敷
陳疏十數上御史高燮曾亦以收回瞻對建置漢官爲言大學士
李鴻藻深韙其議鴻藻卒廷議中變傳霖爭益力屬有蜚語上聞
解職去逾數年邊藏竟有戕殺大臣之事論者服其宏識云二十

四年召授廣東巡撫疏爭廣州灣界務整頓沙田逾年移江蘇江蘇承前巡撫清賦之後吏治尙刻覈傳霖至以寬大濟之民困大蘇攝兩江總督釐革銀圓局積弊劾治鹽官之貪恣者鹽政以肅二十六年拳匪亂作傳霖募三營入衛奔及乘輿於大同扈從至太原授兩廣總督旋命入直軍機時樞臣多得罪兩宮察傳霖朴忠遇事輒就諮決傳霖亦直陳無所避從幸長安擢左都御史遷禮部尙書兼署工部改授戶部明年回蹕初京外解部銀兩皆索公費官與吏相倚爲利藪傳霖宣示廳壁悉裁罷之朝廷銳意變法紛紛言富強凡疏陳加賦括財損民以益上者傳霖率擯勿用而務就國所固有汰冗費去中飽竝奏罷不急之工均報可有詔自後宮內供需皆取給內務府戶部專掌軍國支計實傳霖發之也三十年調權工部轉吏部三十二年新官制成乃退直專治部

事兩宮終以傳霖忠讜不欺知大體命解部務仍入直以尙書
協辦大學士宣統嗣立與攝政醇親王同受遺詔加太子少保充
德宗實錄總裁 孝欽顯皇后山陵禮成恭題神主晉太子太
保歷拜體仁閣東閣大學士兼經筵講官國史館總裁傳霖居樞
密垂十年恩眷優渥先後賜賚上方諸珍物不可勝計宣統二年
春疾作章四上皆溫諭慰留監國攝政王親臨視疾秋七月卒年
七十五所上遺摺以用人理財練兵興學諸大政力求實際爲言
又 皇上典學慎選師傅務擇其志趣正大學問純粹者俾近在
左右其心術稍涉奇表學術稍近偏駁均屏而不用疏上 上震
悼派員勒奠醑贈太保予謚文端祀賢良祠定興建專祠致祭傳
霖起外吏知民疾苦所至廉約率下吏白事雖疾必接見參攷互
證務盡事實論人先實行後才辯尤惡貪吏雖貴勢不稍貴其在

軍機凡事不苟同以誠懇信於僚列而扶持善類將順德意有功
無迹世不盡知晚病重聽每召見諸王公大臣所陳對皆不得聞
常憤憤怒其欺罔屢乞休不獲中常抑鬱恥與爲進退曾奉命查
辦歸化城墾務大臣貽穀事朝內外諸大臣多左右貽穀者相率
以爲言傳霖悍然不顧至則盡發其貪暴諸狀參劾不職者數十
人及卒貽穀論遣戍 天子褒以一事不苟一語不欺蓋實錄也
生平至性過人篤孝友八歲時母蕭戒勿妄語卽謹守終身父丕
宗死難奔走集貲營建專祠洎七十賜壽兩宮鑒其孝思御書祠
額二方以賜蓋深嘉之也兄傳昉病跛出入必扶掖自幼至長無
少離所交皆端人耆德自奉至儉無他嗜好退朝惟手一編危坐
竟日喜讀資治通鑑守其先忠節遺書學以慎獨守約爲主又常
急友難有太公善繼之風傳霖與張之洞先後成進士同直軍機

時以房杜比之宣統元年之洞卒明年傳霖亦卒又明年楚北事起或謂傳霖在國禍必不至此海內識與不識僉痛惜之

名臣傳六終

大清畿輔先哲傳第六

名臣傳七

大清畿輔先哲傳第七

天津徐世昌撰

張之洞

張之洞字孝達號香濤南皮人洽聞強記淹貫羣書尤究心經世之務以天下爲己任咸豐二年年十六舉鄉試第一一時才名噪都下乃益自淬勵精研歷代諸儒之學而以實用爲歸同治二年登進士殿試對策直陳時政得失不拘守行墨常式閱卷大臣皆不悅議置末甲大學士寶鋆獨激賞之以爲奇才置二甲第一進呈御覽兩宮皇太后特置一甲三名授編修之洞受知於朝自此始六年典浙江鄉試得知名之士五十餘人後多以勳名學問顯者尋授湖北學政捐俸創立經心書院十二年典四川鄉試旋授學政蜀士多聰敏有才智而習尙浮譎專以時文帖括苟取

科名爲事凡經史子集四部之書多束而不觀閒有嚮學者亦苦無師資茫然不得其途徑之洞奏設尊經書院選高材生肄業其中復建尊經閣廣置書籍開印書局刊行小學經史諸書又撰輯軒語書目答問二書發明宗旨示以讀書之法成都士子向有攻訐冒籍槍替諸弊往往糾黨持械相鬪殺之洞皆親爲訊斷士論翕然松潘有回人武生蘭某勇健多黨恣志橫行設策禽之繫於獄於是成都武試亦惻惻守法無敢多事者因疏陳整頓試場積弊八策光緒五年晉國子監司業吏部主事吳可讀奏請預定大統之歸 太后敕廷臣妥議之洞疏曰 穆宗毅皇帝立嗣繼嗣卽是繼統止出於 兩宮皇太后之意合乎天下臣民之心而爲 皇上所深願乃可讀於所不必慮者而過慮於所當慮者而未及深慮 穆宗繼嗣之語屢奉 懿旨人君子孫凡言繼嗣者卽

指續承大統而言繼統繼嗣本無區別其分爲兩事乃明代張璁
桂萼諺說 高宗欽定儀禮義疏已辭而闢之矧今 懿旨申命
再三設有迷妄小人舞文翻案廷臣皆得執簡而爭不必慮者一
也所舉宋太宗背太祖明景帝背英宗然德昭非太宗子見深非
景帝子也若 皇上以皇子嗣 穆宗名爲先朝之繼體實則今
日之麟振有何嫌疑有何吝惜以 皇上之仁孝受 兩宮皇太后
之殊恩起自宗支付之神器必不忍負 皇太后必不忍負 穆
宗不必慮者二也趙普黃玘之輩誠難保其必無然明世宗察大
統而厯私親以興獻已沒也使其尙在必能以禮自處少加裁制
今醇親王天性最厚忠直恪恭他日如有妄進異言者必能出一
語以爲之救正不必慮者三也至請明降懿旨將來大統仍歸
穆宗嗣子意則無以易矣辭則未盡善也緣前奉懿旨 皇帝生

有皇子卽承繼 穆宗爲嗣參以該主事之說是一生而已定爲後之義卽一生而已定大寶之歸將類建儲有違家法所謂未及慮者一也前代讓搆奪嫡流弊已多今被以紹統之高名重以承繼之形迹較之尋常主器猶易生嫌所謂未及慮者二也天位授受簡在帝心帝堯多男非止一索聖意所屬知在何人此時早定豈不太驟所謂未及慮者三也伏讀此次 懿旨卽是此意四字言簡意賅至堅至確天下萬世誰敢不遵顧聖意宜遵家法亦宜守今日之事約有二說淺之爲 穆宗計者則但如諸臣之議竝請一渾涵 懿旨略謂屢次懿旨俱已賅括 皇上孝友性成必能處置盡善似無所妨矣然生卽承繼卽是此意二語字字當遵託諸文辭可避建儲之名見諸事實儼成一建儲之局他日誕皇子命承繼廷臣中或援祖訓以爭則承繼之事且中止是此日以

恐類建儲而承統之說不能定異日又以恐類建儲而承繼之旨不能宣是等皇上轉多難處矣然則深之爲穆宗計而卽爲宗社計惟有因承統者以爲承嗣一法不能遽定何人承繼將來續承大統者卽承繼穆宗爲嗣此則本乎聖意合乎家法皇上處此亦不至礙難伏請兩宮聖裁卽以此意明降懿旨皇上親政之初循覽慈訓感惻天懷自必仰體聖意再頒諭旨祇告郊廟宣示萬方則固已昭於天壤堅於金石矣如此約有五利守 夔訓一也待 宸斷二也無嫌疑三也無更變四也精擇賢五也至於精擇賢而其利宏矣在兩宮慈愛之念惟期於繼嗣繼續久遠遵行豈必亟亟焉指定一承繼之人而後慰卽穆宗在天之靈當亦願後嗣聖德永綏洪祚又豈必斤斤焉早標一嗣子之目而後安此固爲我國家億萬年之至計卽使專爲

穆宗嗣子策之似亦無善於此者矣或謂禮制精深動關名義由
此以承統爲承嗣之說安保日後無泥古聚訟者則臣請得條舉
其說而豫辨之一曰禮爲人後者爲之子三代人君凡繼先君之
統者卽爲先君之後雖無父子之名而用父子之禮 皇上承
穆宗之統矣何以又別立後不知父子之說漢唐來久已不行且
皇上承繼 文宗顯皇帝爲子已有明文文宗有子則 穆宗
無子矣豈有御宇十三年功德溥四海之先帝而不爲立後者其
不足辨一也一曰禮嫡子不得後大宗不知此爲臣庶言之非爲
天家言之也古來擇取親屬入承大統則本宗不敢私其嫡子尊
尊也若嗣君爲先君立嗣則嗣君亦不得私其嫡子蓋嗣君與先
君當日固有君臣之分者也亦尊尊也然入承大統者旣承累朝
之大宗則本支應自爲繼別之宗竝不得以小宗論於禮於法當

別立嗣者也嗣君既爲大宗則雖以子爲先君後於禮於法不能
別立嗣者也然則就今日事勢論之將來皇子雖爲穆宗之嗣
子仍無妨爲皇上之嫡子尊尊亦親親也皇朝律令對承繼之
文則曰本生父母他日稱謂區別聖心自有權衡兩宮以聖而
行權皇上以聖而制禮一舉而忠孝慈友之人倫備焉尊尊親
親之禮意賅焉義協而禮起何爲不可其不足辨二也一曰春秋
傳云君子大居正故兄弟叔姪展轉授受每難貼然不知從父從
子乃生釁隙若皇子承繼先朝但存名義豈判親疏其不足辨三
也凡此皆羣經之精言而實不切於今日之情事設有迂儒引之
以撓夫國是佞夫藉之以文其莠言大智聰明豈能惑哉今者往
事已矣惠陵永闕帝后同歸既無委裘遺腹之男復鮮慰情勝無
之女傷心千古夫復何言承嗣承統之說不過於禮制典冊之中

存此數字空文俾穆宗在天之靈爽雖遠而不遠幾忘而不忘庶
可稍慰兩宮鬱悶之思且伸皇上友于之愛夫吳可讀區區一
貶謫小臣耳尙且昌言以發其端致命以期其許何況子道弟道
兼盡之聖主哉昔漢景帝欲悅竇太后之意至有千秋萬歲後傳
梁王之語梁王非有應嗣之分者也宋高宗以太宗之後乃閔太
祖子孫零落而以太祖七世孫孝宗爲嗣孝宗非有承統之約者
也皇上聖明遠在二君之上竊謂今日者惟在責成毓慶宮侍
學諸臣盡心輔導培養天性開陳至道皇上孝悌之心油然而
自生尊尊親親之等秩然而不紊任賢去佞內修外攘則所以仰
體兩宮上慰穆宗者固不僅在繼嗣承統一端而已也卽以
此一端而論其沃心正本之方亦在彼而不在此伏惟皇太后
與皇上名分已定恩誼日篤皇太后視皇上所生皇子無

論承繼 穆宗與否同爲己孫 皇上視所生皇子無論承繼

穆宗與否同爲己子君臣一德共濟艱難此宗社之福而臣民之

願也臣恭繹 懿旨中卽是此意爰議具奏二語文義是者是其

將來大統宜歸嗣子之意議者議夫繼嗣繼統竝行不悖之方臣

工應命陳言豈敢以依違兩可之游詞貽廟堂他日之籌慮乎五

月以四川東鄉重案疏請誅知縣孫定揚以恤民生七月以星變

地震疏請修省以弭災變八月升詹事府左春坊左中允九月晉

司經局洗馬十二月俄人議歸我伊犁使俄大臣崇厚擅訂新約

十八條眾論大譁 上命廷臣集議之洞疏曰新約十八條其最謬

妄者如陸路通商由嘉峪關西安漢中直達漢口秦隴要害荆楚

上游盡爲所據馬頭所在支蔓日盛消息皆通邊圉雖防堂奧已

失不可許者一東三省國家根本伯都訥吉林精華若許其乘船

至此卽與東三省全境任其游行無異陪京密邇肩背單寒是於
綏芬河之西無故自蹙地二千里且內河行舟乃各國積年所力
求而不得者一許俄人效尤踵至不可許者二朝廷不爭稅課當
恤商民若回準兩部蒙古各盟一任俄人貿易概免納稅華商日
困猶未也以積弱苦貧之蒙古徒供俄人盤剝以新疆鉅萬之軍
餉徒爲俄人委輸且張家口等處內地開設行棧以後逐漸推廣
設啟戎心萬里之內首尾銜接不可許者三中國藩屏全在內外
蒙古沙漠萬里天所以限俄人卽欲犯邊迤北一面總費周折若
蒙古台站供其役使彼更將捐重利以啗蒙人一旦有事音信易
通糧運無阻勢必煽我藩屬爲彼先導不可許者四條約所載俄
人準過卡倫三十有六延袤太廣無事而商往則譏不勝譏有事
而兵來則禦不勝禦不可許者五各國商賈從無明言許帶軍器

之例今無故聲明人帶一槍其意何居假如千百爲羣闖然徑入是兵是商誰能辨之不可許者六俄人商稅種種取巧如各國希冀均需洋關稅課必至歲絀數百萬不可許者七同治三年新疆已經議定之界又欲內侵斷我南通八城之路新疆形勢北路荒涼南城富庶爭礮瘠棄膏腴務虛名受實禍不可許者八伊犁塔爾巴哈台科布多烏里雅蘇台喀什噶爾烏魯木齊古城吐魯番哈密嘉峪關等處準設領事官是西域全疆盡歸控制有洋官則有洋商有洋商則有洋兵初則奪我事權既則反客爲主馴至彼有官而我無官彼有兵而我無兵且各國通例惟沿邊沿海準設外邦領事若烏里雅蘇台科布多烏魯木齊古城哈密吐魯番嘉峪關乃我境內今自俄人作俑設各國援例將十八省腹地徧布洋官不可許者九名還伊犁而三面山嶺內卡倫以外盤踞如故

據高臨下險要失矣割霍爾果斯河以西格得滿島以北屯墾無
區畜牧無所地利盡矣金頂寺久爲俄人市廛旣與約定俄人產
業不更交還是伊犁一綫東來之道必穿俄巢出路絕矣寥寥遺
黎彼又盡遷以往人民空矣擲二百八十萬有用之財索一無險
要無地利無出路無人民之伊犁將安用之不可許者十俄人索
之可謂至貪至橫崇厚允之可謂至謬至愚 皇太后 皇上赫
然震怒譴使臣下廷議可謂至明至斷上自樞臣總署王大臣以
至百司庶官人人知其不可所以不敢公言改議者誠懼一經變
約或召豐端然臣以爲不足懼也必改此議不能無事不改此議
不可爲國請言改議之道其要有四一曰計決二曰氣盛三曰理
長四曰謀定何謂計決無理之約使臣許之朝廷未嘗許之崇厚
誤國媚敵擅許擅歸國人皆曰可殺者也伏望拏交刑部明正典

刑治使臣之罪卽可杜俄人之口按之萬國公法既有不準違訓越權之例復有臣執全權可否仍在朝廷之條正與崇厚不遵密函不請諭旨之罪相合耆英之獄成憲昭然故立誅崇厚則計決何謂氣盛俄人欺我使臣孤懦倡脅畫押施一償百意猶未饜不料俄羅斯靦然大國乃至出此不特中國憤怒卽環海萬國亦必皆不直其所爲至俄使不待定議聲言歸國外洋亦無此例況凱陽德係署理公使豈能擅歸其爲恫喝無實情狀顯然儘可聽其去留不必過問莫若明降諭旨將俄人不公不平臣民公議不願之故布告中外行文各國評其曲直竝屬各國會堂將我國家情理兼盡之處刊入新聞報紙明諭邊臣整備以待據眾怒難犯之情執國斃不從之志俄國雖大自與土耳其苦戰以來師老財殫臣離民怨近歲其國主屢有防人行刺之舉若更渝盟犯順圖遠

勞民必且有蕭牆之禍行將自斃焉能及人故明示中外則氣盛
何謂理長種種要約皆由伊犁而起若盡如新約所得者伊犁二
字之空名所失者新疆二萬里之實際而每年尙須耗四五百萬
饟需以供邊帥防軍建城開屯之用是有新疆尙不如無新疆也
索伊犁而盡拂其請則曲在我置伊犁而仍肆責言則曲在俄况
使臣畫押未奉 御批未鈐 御寶一如載書未歆豈足爲憑俄
人理屈詞窮焉能生豐故緩索伊犁則理長何謂謀定俄人而講
信義兵端可以不開若俄人必欲背公法棄和好設防之處大約
三路一新疆一吉林一天津左宗棠席累勝之威兵力素強金順
劉錦棠錫綸張曜亦皆健將以靜待動俄人必敗聯絡喇嘛棍噶
札拉參遏其歸路彼將踣輪不返若出吉林邊地遼賈林谷叢雜
其地去俄都二萬餘里懸軍深入饋餉艱難不能用眾如特簡兼

資文武之將帥授以重權資以的饒分南北洋海防經費之半爲
經略東三省之資命左宗棠金順選撥籍隸東三省之知兵將官
數人東來聽用招集索倫赫津打牲人眾教練成軍其人素性雄
勇習與俄鬪定能制勝卽小有挫衄堅守數月必解而去天津一
路逼近神京然俄國兵船扼於英法公例向不能出地中海卽強
以商船載兵而來亦非西洋有鐵甲等船者比李鴻章高勛重寄
歲糜數百萬金錢以制機器而養淮軍正爲今日若竝不加一戰
安用重臣伏請嚴飭李鴻章 諭以計無中變責無旁貸及早選
將練兵仿照德國新式增建礮臺戰而勝則酬以公侯之賞不勝
則加以不測之罰設卽以贖伊犁之二百八十萬金雇募西洋勁
卒亦必能爲我用俄人蠶食回疆吞併浩罕意在拊印度之背不
特我之患亦英之憂也李鴻章若以此開悟英使輔車唇齒當可

同仇近年立功宿將如彭玉麟楊岳斌鮑超劉銘傳善慶岑毓英
郭松林宋慶喜昌彭楚漢郭寶昌曹克忠李雲麟陳國瑞等或見
任或退閒或處廢籍如酌量宣召來京令其詳議籌策分駐京通
津沽及東三省以備不虞山有猛虎自可建威消萌故急修武備
則謀定臣非敢迂論高談以大局爲孤注惟深觀事變日益艱難
西洋撓我權政東洋思啟封疆今俄人又故挑衅端若更忍之讓
之從此各國相逼而來至於忍無可忍讓無可讓又將奈何無論
我之禦俄本有勝理卽或疆場之役利鈍無常臣料俄人雖五戰
不能越嘉峪關雖三勝不能薄甯古塔終不至掣動全局曠日持
久頓兵乏食其勢自窮何畏之有然則及今一決乃中國強弱之
機尤人才消長之會此時猛將謀臣足可一戰若再閱數年左宗
棠雖在而已衰李鴻章未衰而將老精銳漸盡欲戰不能俄人則

已城於東屯於西行棧於北縱橫窟穴於口內外通衛藏脅朝鮮
不以今日捍之於藩籬而待他日鬪之於庭戶悔何及乎要之武
備者改議宜修不改議亦宜修伊犁者改議宜緩不改議亦宜緩
崇厚者改議宜誅不改議亦宜誅此中外羣臣之公言非臣一人
之私言也輔謀在疆臣作氣在百寮據理力辯在總理衙門而決
計獨斷始終堅持則在我 皇太后 皇上事關宗社大計坐視
不能緘默不敢仰懇將臣此疏一併發交廷臣會議不勝憂憤迫
切之至矣於是 上褫崇厚職交部治罪以侍郎曾紀澤爲使俄大臣
之洞疏言馭俄之策宜先備後講備之法三曰練兵曰籌餉曰用
人講之法三曰責以義折以約怵以勢總而論之備爲主講爲輔
操縱爲變化我苟無備則俄人知我虛實肆其恫喝雖有辯士將
不得言言亦不信也因疏陳海防十一事請急修戰備籌地籌人

以爲保全和局之策六年授翰林院侍講轉侍讀晉右春坊右庶
子充日講起居注官八月轉左上以俄使布策將來飭廷臣統籌
全局之洞疏陳前此七失及講法備法之要九月曾紀澤要布策
回俄訂議之洞恐議約不慎全局受虧乃上疏曰俄使爲我追回
若不開誠決計速爲定局令其挾忿重來是怒敵國也旣無分別
輕重簡約易行之策又無不畏決裂準備一戰之語徒令使臣吐
茹不得剛柔皆非是窘使臣也然使臣多執成見但論界務不爭
商務若不予限制不授機宜必致逞臆率定一翻不能再翻是誤
國事也今曾紀澤再議必承該使臣五條上文而言查原議五條
本有難解內祇索還伊犁全境一條爲要務爲實爭其餘已屬次
等措詞又甚浮游如領事暫緩一條卽言暫字終歸必設是名爭
而實表爭也如天山兩路不全免稅一條將來新疆各城但納稅

一兩處卽爲如約是爭其所不必爭也如塔喀邊界派員議定一條空言議定並未言分界限以何處是竟以不爭強稱爲爭也如哈巴古三城一處留貨一條尤爲屑瑣本非十八條之一是雖爭尙不如不爭也試思伯都訥西安漢中旣許通商張家口旣許設棧內地近畿暢行無阻而於關外沙漠計較留貨之區亦顛倒之甚矣大抵曾紀澤之意旣苦俄人強橫又復偏執已見於最要者止爭伊犁全境一條而以四條或不關緊要或並非實爭者搪塞充數名爲五條實止一耳雖俄人概允我已大失便宜况布策追回譬如賈人出門我後招之使返必須增價無疑可知曾紀澤此次必至降格相就據彼外部來文伊犁割地俄志甚堅即使布策十分通融極之準改其四亦必不允其一然則伊犁全境終不可得矣夫曾紀澤卽有五條不權輕重之上文失言於前日又有總

署八月八日漫無限制之電寄橫互於胸中將來轉圜結局不過
新疆俄商稍有一多處納稅而已夫以中外大局擾攘近一年徵
調半天下九重怨羣臣爭再遣行人六下廷議而究竟止歸於爭
得邊外區區一兩處稅銀而止以言實則大傷以言名則不正天
下萬世將謂之何臣謂彼既有不强概允一言正可就此與之力
爭要著此時必宜速救曾紀澤埽除前文從新另議注意重務專
力籌商除其他各條應由使臣相機辯駁外竊謂西漢通商一節
尤爲大利大害之所關臣上年十二月第一疏已經備陳而大學
士左宗棠覆奏疏中病國病官病商病民諸說尤爲詳盡至於目
前維持臣已兩疏陳有減稅招商中俄兩利之策此時與俄人辯
論但當以華商生計爲言蓋新疆賈販本皆西商今準俄貿易準
俄免稅則山西甘肅數省之商民於關外已無所獲何忍併此而

奪之查張家口恰克圖一路舊有茶商二十八家利息豐盛自成
豐季年俄商盛行存者止三家耳西漢若引入俄商吾民生計尙
堪設想哉捐關外之利于俄商留關內之利于華民可謂極寬極
讓極和極平俄人於他條所得已多於此條亦復有利何至決裂
就令敵國不顧情理使臣何忍不一啟口乎嘗讀同治六年九月
故大學士曾國藩覆奏豫籌條約疏有云總就小民生計與之切
實理論自有顛撲不破之道如果洋人爭辯不休儘可告以即使
京師勉強應允臣等在外亦必以全力爭回即使臣工應允而中
國億萬小民窮極思變與彼爲仇亦斷非中國官員所能禁止中
國之王大臣爲中國之百姓請命不患無辭置辯甚至因此決裂
而我以救民生而動兵並非爭虛儀而開費上可以對天地列聖
下可以對薄海蒼生中無所懼後無所悔等語又云害我百姓生

計則當竭力相爭不設抵制之詞不用巖峻之語但以誠意動之
始終不可移易彼知理直不可奪眾怒不可犯或者至誠所感易
就範圍等語縱樞臣以臣爲書生之見獨不思左宗棠固嘗連篇
累牘而上陳乎縱使臣以臣爲不曉洋務獨不思其父曾國藩固
嘗痛心切齒而力爭乎伏請敕取左宗棠曾國藩兩疏上呈御
覽令諸臣等一再思之至如松花江行船一條曾紀澤本有提開
緩議之說卽不能爭亦當姑置勿議免致說斷無可轉移如伊犁
全境一條卽不能爭亦當與俄人婉商酌分南境爲中國留一南
通八城之路免致棄伊犁孤城爲絕地如領事一條則烏里雅蘇
台科布多兩處尤要我之防兵稀少一設洋官數千里蒙古盡爲
彼用卽不能全爭亦當擇此切迫者實力阻止免致以一暫字自
伏禍胎卽或智窮勢迫此三端必不能爭而西漢一節斷不可讓

聞曾紀澤之意目前著重專在伊犁全境然臣謂萬一彼此相持和議難成中國可爲商民生計而興兵亦不值爲伊犁屬地而決裂輕重之權此亦易曉者也竊謂事勢至此補救將窮限期一展不能再展敵使一迫不能再迫樞臣因惶惑而全無定衡使臣執已見而不度利害使臣旣以當爭者爲不必爭樞臣又不肯籌一審敵情箝敵口之法以指授使臣則雖爭亦如不爭若再不乘此數日未定之轉關力爭此一綫實在之利害臣不知樞臣使臣諄諄實請頒國書釋崇厚結五案展限期卑遜包荒無微不至所爲者果何事也臣誠迂陋亦知相時勢諒使臣獨以區區愚誠有見不敢不爭有言不敢不盡惟 聖明垂察焉乃又附陳西防東防津防選將籌兵之事且言即使俄人與我無費而以後朝鮮之防勢不能已尤冀廟謨廣運於東防將士早爲籌畫周密以固陪京

目前應急之計止可徵調南軍若計久長則關外征防總以選練北將北兵爲上南兵斷不相宜識者尤服其老成先見云之洞前後疏凡七八上卒改前約還伊犁七年升侍講學士疏陳禦倭禦俄事宜六月擢內閣學士兼禮部侍郎銜以星變奏陳修政之要曰用人曰言路曰武備曰禁衛四端又以封疆重寄未可虛懸請定疆臣以安邊圉十一月授山西巡撫山西當大禮後民物凋敝度支益艱之洞至考究一切利病源委首劾護理巡撫藩司葆亨代理布政使冀盛道王定安虐民糜費誅求屬吏諸款糾治吞振之官十數員舉廉明者五人疏言國之元氣在戶口蕃息田野墾闢政事有綱紀經賦無侵盜而聚斂吝嗇不與焉民之元氣在官吏無苛擾四民無苛憊而未富姦利不與焉官之元氣在官項無虧累上司無誅求賢否不顛倒功過有黑白而濫恩曲法不與焉

晉省歷年以來公私困窮幾乎無以自立物力空匱人才艱難上官政出多門屬吏愍不畏法民習積惰以蹙其生士氣衰微而廢其學軍律日卽蕩弛吏胥敢於爲姦譬如冠羸之軀而復爲百病諸創之所攻削固非表裏兼治不可晉省要務約有二十事責墾荒清善後省差徭除累糧儲倉穀禁鶯粟務本以養民也減公費裁攤捐養廉以課吏也結交代核庫款杜吏姦理釐金救鹽法去蠹以理財也開地利惠工商輔農以興利也培學校重士以善俗也紆饜力練主兵遏盜萌修邊政固圉以圖強也凡此皆儒術經常之規絕不敢爲功利操切之計其前八事謹於此次分別陳請辦理其餘容詳加規畫陸續奏陳時議者多持鶯粟不宜禁之說復上疏力陳其害仿天津立戒煙局延醫購藥官生將卒勒限自新以明賞罰澤潞平孟等處舊有土鐵出洋之禁爲奏開之並除

民間歲輸官鐵路紬之累設局清釐道光至光緒數十年庫款積弊一清之洞嘗欲開墾邊外七廳蒙地爲興屯練兵之計適擢粵督未竟其事繼者踵其法大舉興辦實之洞首倡之也初戶部函咨各省議增京官津貼之洞以其數太少請增之竝請籌政府言官公費且云山西雖褊小願視大省戶部旣不肯加而又以此項津貼改充京饟之洞力阻之謂此事關係人才吏道斷不可廢朝令夕更亦非政體如必提充京饟請願照數別籌爲京官津貼權其輕重所得爲多疏入執政愧之不果行八年法越事起之洞疏請籌兵遣使以先發爲豫防因條上十六事畧謂法人狡謀已遂情形已彰徒遣密使偵探無益徒在法京辯論亦無益惟有遣使帶兵赴援保護上可令退出越京次可代定條約敵之注意滇急而粵緩我之下手滇緩而粵急非從兩粵進兵批亢擣虛則滇防

徒爲糜費粵西陸師出龍州鎮南關粵東水師出廉州鎮海皆會
於越東京至於籌餉粵可取給於閩粵兩海關四成洋稅滇饜可
取給四川廣西庫儲可支半年餘由廣東接濟我師入越詰問法
使兵官責以公法示以戰意乃爲居閒調處則法越立約必有限
制宜竝與法越定議中國常以一軍駐越港口護越護商廣東爲
洋舶來華第一門戶越事旣須經營則粵防愈要當年曾國藩建
議南洋大臣本擬駐粵擬請增設而以兩廣總督兼之不惟經畧
南交兼可先得各國要領免以增兵置帥致起各國猜疑竝薦黎
兆棠爲使越大臣總兵方曜貝錦泉巡撫唐炯布政使徐延旭可
備水陸將才之選十年入覲四月命署兩廣總督時法越兵事日
亟朝議和戰不決法乘隙擾台灣及福建之洞至粵建攻越南以
救台灣爲圍魏救趙之計招回黑旗劉永福與唐景崧攻宣光岑

毓英率滇軍攻臨洮府粵軍攻文淵州諒山一路饜銀軍械大舉
洋債以強半助滇桂粵台諸軍法攻越邊急桂軍敗兩廣大震廣
西官將皆棄龍州之洞奏遣馮子材王孝祺兩軍援桂扼鎮南關
險要苦戰兩晝夜大破敵遂克諒山法人懼且急電求和之洞力
爭電奏七次皆不得卒由總署北洋與之劃界定議之洞意謂泰
西各國現皆講求管墨蘇張之術練兵制器競爭富強中國若不
仿行恐受制於敵疏請粵省設立水陸師學堂首儲人材考察戰
法選取秀士及行伍中材力勇健者以充學生延聘外洋教習繙
譯西國兵書測繪地圖諸學製造火藥電綫諸技藝分門講習以
備將材之用次制器外國爭勝恃鐵艦水陸攻守恃快槍巨礮設
守海口恃水雷皆機算精微未便率爾先創槍礮廠仿左宗棠閩
船廠規模造槍彈火藥魚雷艇兵船各件附焉次開地中國煤鐵

富甲四洲福建穆源古田安溪皆產善鐵兼饒煤聖廣東惠州清遠等處所產亦佳擬於省城設立礦務局招商試辦六月以諒山功賞花翎七月實授兩廣總督十月籌議海防大治水師因分條陳奏曰中國洋面北起吉林南訖欽州沿海軍宜分四大枝北洋爲一枝旅順煙台瑋春屬焉南洋爲一枝浙江屬焉閩洋爲一枝臺灣屬焉粵洋爲一枝瓊州屬焉每枝設統領一員左右翼分統各一員轄於統領聽洋面督撫調遣節制而皆隸於京師以總理衙門爲之總領粵洋海軍一枝擬配水帶鐵甲三艘鐵甲魚雷船六艘每一鐵甲巨艦配兩鐵甲魚雷爲一隊統領左右翼各領一隊合爲一軍至南北閩洋應由各疆臣自行酌辦計費鐵甲雷船一軍以四百萬兩爲率四營共需一千六百萬兩其款擬於洋藥稅釐提出五年收數之半爲造船專款洋例貨價議妥定銀先付

三分或五分之一此項定銀擬由戶部墊撥八十萬兩飭出使大臣於其國銀行暫借餘由四川湖南湖北江西安徽限數勸捐以足其額自定議造船二年後各船陸續來華擬將提半藥釐仍四分之以充將卒師匠之修船等費巨艦兩年必須一修故製船必先製澳粵省黃埔澳淺窄當徐圖擴充各省有無可作大船澳之所請飭疆臣豫籌備用練將之法擬選派員弁生徒出洋練習一途隸出使大臣分發各國學堂水陸營務礮台船廠分科練習一途駕坐練船周歷華洋各海口先中後外藉以周知諸邦口岸形勢戰船規制練習風濤駕駛練船卽爲學堂兼可講習諸藝閩省船廠規模已備滬廠亦畧有憑藉粵省本無船廠春閒試造淺水兵輪造成察看利病藝熟工精再當定議大舉至於礮台粵東省防虎門內外新造各台礮畧未備惟有隨時增改其五門要隘現

已另籌辦法瓊廉海口爲南洋第一重門戶急須堅自巨礮各省
海口應由疆臣自行酌理槍械一事粵省現正籌設槍雷各局其
城內機器局擬併歸城西增步軍火局以就水運十二年兼署廣
東巡撫疏陳邊防事宜畧謂廣西邊隘以鎮南關爲最要關之中
後左右均須設防分爲三路以防軍十二營屯中路四營屯東路
六營屯西路並將廣西提督由柳州移駐龍州原屬新太協之龍
憑營都司改爲龍州城守營遊擊並添設中軍守備新太協副將
及所轄左營都司尙燾營都司均改屬提督裁右營守備柳州添
設柳慶總兵改提標左右兩營遊擊爲鎮標左右兩營撤去柳州
城守營都司一營其寧遠義寧兩協副將融懷營參將諸營俱統
轄於柳慶鎮龍州開關通商重兵所萃設太平歸順兵備道總轄
全邊駐劄龍州以左江道所屬太平府全境暨東邊南寧府屬之

上思州西邊鎮安府屬之小鎮安通判歸順州隸之沿邊統屬一
道上思州撥歸太平府屬升歸順州爲直隸州小鎮安改爲鎮邊
縣加通判銜屬於歸順州設道庫大使總管關稅瑣務鬱林州遠
在東南改撥直隸州屬左江道以協形勢又以北海通商廉州爲
水陸第一門戶高州鎮總兵駐防北海不能兼顧奏請廉州特設
總兵名北海鎮水陸總兵陽江鎮事務較簡併入高州亦改爲水
陸總兵澳門者粵東肘腋患也自總署改舊約澳勢漸張奏請澳
門同知移駐關閘扼其入內要隘嚴定界限衛之以兵以防侵軼
十五年巡視欽州至越南境迂道廉瓊以瓊州孤懸大海逼近越
南關鍵中外築礮台七於海口城西五里秀英山築礮台三於十
里西塲山築礮台五於城後大英山濱海築長堤西起西塲東止
牛始開礮路備礮車扼沿灘入口敵船遠攻近擊交相爲濟廉州

北海一口近接九頭山爲海盜窟宅擇要居高築礮台五座其平沙則練礮車數隊以備往來攻擊之用榆林港者中國第三船澳也之洞籌款經營購巨礮台數十繼其後者謂爲無用移之北洋論者惜之時法人建議開越南鐵路之洞慮其狡謀增建平而關南關礮台十餘處以嚴防禦並著廣東沿海險要圖說上之之洞在粵六年孜孜求治凡所興革皆關大體其戡瓊州黎匪開瓊島中心十字路通四方聲息以絕黎患奏定械鬪專條復松筠治盜章程重誘華人出洋之法禁赫德徵稅巡船封外人之在內地設棧者又以國用支絀潔已奉公裁粵海關陋規鹽商私費數十萬兩改訂肇慶府黃江稅廠除廣西梧州經費提惠潮嘉道關稅餘銀以濟公需整頓潮鹽復舊課十二萬兩創鑄銀幣歲盈三十餘萬榷膏賭捐罰之款歲凡五六百萬於是足軍實造兵船立廣雅

書院武備文事次第舉行時議者以之洞用費浩繁虧巨帑無算及是年調補兩湖李瀚章繼至詳核之洞初至粵時庫儲不及五十萬至是卸任儲銀正雜款二百五十餘萬瀚章愕然大驚服遽起立長揖謝之先是海軍署奏請接修鐵路御史余聯沅等先後疏陳請停辦之洞議曰泰西初行鐵路將近百年實爲馴致富強之一大端其初各國開建幹路以通孔道迨後物力日裕闢路日多支派貫注都邑相屬百貨由是而灌輸軍屯由是而聯絡上下公私交受其益初費鉅資後享大利其功效次第實在於此今中國方汲汲講求安攘之畧自不得不採彼長技以爲自強之助臣竊以爲今日鐵路之用尤以開通土貨爲急就中外通商時局論之中國民生之豐歉商務之息耗專視乎土貨出產之多少與夫土貨出口較洋貨進口之多少以爲之斷近數年來洋藥洋貨進

口價值每歲多於出口價值者約二千萬兩來源既難杜遏惟有設法多銷土貨以救之此乃王道養民立國之本源竝非西商爭利會計之小數中國物產之盛甲於五洲然腹地與區工難運貴其生不蕃其流不廣且土貨質粗價廉非多無利非速不多非用機器化學不能變粗賤爲精良化無用爲有用苟有鐵路則機器可入笨貨可出本輕費省土貨旺銷則可大減出口稅釐以鼓舞之於是山鄉邊郡之產悉可致諸江岸海壩而流行於九州四瀛之外銷路暢則利商製造繁則利工山農澤農之種植牧豎女紅之所成皆可行遠得價則利農內開未盡之地寶外收已虧之利權是鐵路之利首在利民民之利既見而國之利因之利國之大端則徵兵轉饟是矣方今強鄰環伺外患方殷內而沿海沿江外而遼東秦隴回環萬里防不勝防費不勝費若無輪車鐵路應援

赴敵以靜待動安所得無數良將精兵利礮巨饜而守之夫守國
卽所以衛民故利國之與利民實相表裏今宜先擇四達之衢首
建幹路以爲經營全局之計至津通一路其緩急輕重之宜尙有
宜加審慎者而御史余聯沅等原奏或恐洋教之煽張或惜捐金
以資敵或以狡謀利啖爲懼或以人心風俗爲憂不知鐵路不過
行程迅速至洋人洋教之多少與此無涉造路之鐵可用華產修
路之工仍用民人洋匠薪水亦屬有限洋廠勸造不過市僧圖攬
貿易之故智竝非別藏禍心輪車與輪船電綫確有利用之實不
得謂之淫巧至所呈引敵失業兩事業經王大臣剖晰詳盡言之
惟津通密邇輦轂非尋常散地可比今大沽鐵路已至天津若再
開至通州不爲置兵築壘以扼要隘但恃臨時收車撤軌之圖則
備豫仍覺未周苟於中途多設堅臺巨礮以爲之備則所費實屬

不貲其當審者一也又奎潤疏稱津通之民以車商行店負販爲生者約六萬人以一家五口計之已有三十萬人仰食於此津通二百餘里地段不長中站停頓不過數處據西人鐵路述畧稱英地四萬里鐵路執事等眾需十六萬五千人以此爲準津通二百餘里僅需八百餘人加以各項販運夫役不能過三千人閒民苦其太多而地段苦其太短其難於消納實與他處不同其當審者二也或謂非常之舉難與圖始鐵路爲利便所在不宜鯁鯁過計致失事機顧所以續辦津通者但爲養路計耳夫欲籌養路之需而度支轉益屯防之費恤公司之困而郊甸乃有無告之民利害相兼宜籌兩全之策其當審者三也又西國鐵路每爲距遠水口陸行艱滯而設有無輪車利鈍懸絕故雖重費勞擾而不嫌今則潞河深通帆檣如織車驟馳驟經宿可至商旅驛遞爲益無多權

以西例此路尙非所亟其當審者四也至於徵兵一節津沽爲京師門戶常屯重鎮大沽有事後路援師早應厚集津門若待至天津郡城告急勢難再分都門之禁旅遠出赴援亦無從抽大沽山海之防軍回師宿衛苟無此路亦無甚妨其當審者五也夫利不顯而不興害雖隱而必慎旣非萬不得已之計卽宜防意外枝節之端設此路初造之時稍有紛擾則習常蹈故者益將執爲口實視爲畏途以後他處續造集股之官商必裹足疑沮之愚氓必有辭則鐵路之功終無由成而鐵路之效終無由見記曰先其易者後其節目及其久也相說以解言興事宜有次第也今津通一路關係旣重不便尤多此亦鐵路中之節目也竊計翁同龢等請試行鐵路於遠地以便運兵徐會澧等請改設於德州濟甯就黃河故道墊路以便運漕均擬緩辦津通爲另闢一路之計但邊地偏遠

無裨全局若於僻隅發端其效難見且非商旅輻輳之所則鐵路費無所出不足以自存德濟一路黃河岸濶沙鬆勉強堆築工費太鉅河流遷徙無定其鐵橋等事尤難時時改作臣愚以爲宜自京城外之蘆溝橋起經行河南達於湖北之漢口鎮此則幹路之樞紐枝路之始基而中國大利之所萃也蓋豫鄂居天下之腹中原綰轂胥出其塗鐵路取道宜自保定正定磁州歷彰衛懷等府北岸在清化鎮以南一帶南岸在滎澤口以上擇黃河上游灘窄岸堅經流不改之處作橋以渡河則三晉之轍下於井陘關隴之驂交於洛口西北聲息刻期可通自河以南則由鄭許信陽驛路以抵漢口東引淮吳南通湘蜀萬里奔湊如川赴壑語其利便約有數事內處腹地不近海口無引敵之慮利一南北二千餘里原野廣莫編戶散處不如近郊之稠密一屋一墳易於勘避利二幹

路表遠厥盛站多經路生利既繁緯路枝流必旺執鞭之徒列肆
之賈生計甚寬舍舊謀新決無失所利三以一路控八九省之衝
人貨輻輳貿易必旺將來汴洛荆襄濟東淮泗經緯縱橫各省旁
通四達不悖豈惟充養路之資費實可裕無窮之饒源利五近畿
有事三楚舊部兩淮精兵電檄一傳不崇朝而雲集都下或內地
偶有土寇竊發發兵征討旬日立可蕩平徵兵之道莫此爲便利
六中國礦利惟煤鐵最有把握太行以北煤鐵最旺而最精然質
最重路最難既有鐵路則輦機器以開採用西法以前煎鎔礦產日
多大開三晉之利源永塞中華之漏卮利七海上用兵首慮梗漕
南漕米百餘萬石由鎮江輪船溯江而上三日而抵漢口又二日
而達阜城由蘆溝橋運赴京倉道里與通州相等足以備河海之
不虞關飛挽之坦道而又省挑河剝運之浮糜較之東道王家營

一路礙於黃河下流者辦理最有把握利八此路既成但有利便
竝無紛擾民受其益人習其事商覩其利將來集資推廣續造不
至爲難兵民食貨無往而不宜公私行役轉運盜竊損失雨潦稽
延虧耗蠹蝕之患不禁而自止關東隴右以次推行惟力是視二
十年以後中國武備屹然改觀矣難者曰幹路之利誠如此矣其
如鉅費難成何則請以分段之法爲之擬分自京至正定爲首段
次至黃河北岸又次至信陽州爲二三段次至漢口爲末段中原
地勢平行工力可省若令承辦員匠核實樽節估計大約每里不
過五六千金一段不過四百萬內外合計四段之工八年造成則
款亦八年分籌中國之大每年籌二百萬之款似尙不至無策開
辦之始先從首段估造候本段工竣餘段以次推廣其籌款之法
由鐵路公司照常招股酌擇各省口岸較盛鹽課較旺之地分別

由藩運戶司關道轉發印票股單設法勸集至購買鐵料取之海
外則漏卮太多實爲非計其山西之鐵產自平定盂縣者可運至
於獲鹿縣產自澤潞者可運至於清化鎮鐵軌非同船礮取材不
在至精土鍊之產雖遜洋鐵亦足濟用即使價值畧貴幾微其財
仍散在中國不宜斤斤計較庶幾施工有序而藏富在民總之津
通之視豫鄂度地考工相去懸絕臣之爲是議者非敢有驚廣侈
大之心實以置路於不可開之區雖一節有所必惜展路於有利
無害之域卽艱重亦所當爲又言籌辦鐵路其最要以不外耗爲
本計利便爲末積款采鐵鍊鐵教工爲先勘路開工爲後何謂外
耗借洋款用洋鐵必致坐受盤剝何以積款擬酌減新海防捐例
每年約得二百萬金洋藥稅釐年撥一百萬金由戶部提存備用
急求采鐵鍊鐵之方鐵則取之晉鄂粵三省派曾經出洋學生一

二十人赴鐵路各國專習此藝兩年學成回國指授工匠展轉傳習則可無需洋匠多人如此定期開工修路兩端並舉一氣呵成海署所擬南北並舉之法最爲扼要北路直隸總督任之南路湖廣總督任之並令河南巡撫會同辦理得旨報可故有移楚之命十一月履任一以路政工業爲務大冶產鐵江西萍鄉產煤設練鐵廠於漢陽大別山下旣奏開之資路用兼設槍礮鋼藥專廠以荆襄宜桑棉麻桌而饒皮革因設織布紡紗縲絲製麻製革諸局佐之以隄工通之以幣政用盡地利抵洋貨實業之興皆自之洞發之十九年兼署巡撫二十一年中東事棘兩江總督劉坤一督師出關命之洞權兩江巡閱寶山江陰鎮江礮台易其雜劣窳敗者購泰西新式礮五十餘尊建礮台二十餘座是爲江南有後膛臺礮及西式礮臺之始礮台專設臺官兵屬臺不屬營又設總臺

官不許隨時更調是爲江南礮臺設專兵專將之始江南諸路防營素爲各統將把持有如世業乃察南北營政廢弛者更撤壽春蘇松狼山徐州各鎮統領收諸路兵權歸之督府奏調馮子材率粵軍防海州朱洪章防金山沿海屹然恃以無恐募德弁練江南自強軍采東西規制廣立武備農工商鐵路方言軍醫諸學堂遣生徒游學設將校講習所籌款造船創修江甯馬路又采上海道黃祖絡議接築南市馬路設巡警斷外人侵入華界以保政權初各國於租界外往往廣闢馬路爲擴充之計之洞奏請於其馬路盡處接修一路以扼其鋒總署惛然竟寢其議自此滬上租界愈闢愈廣矣二十三年回湖北明年朝議變法謀富強下中外大臣集議之洞疏曰救時必自求人材始求才必自變科舉始四書五經道大義精炳如日月講明五倫範圍萬世聖教之所以爲聖中

華之所以爲中實在於此初北宋創爲經義取士明成化時始定爲八股之式行之已五百年文徇俗而愈卑法積久而愈敝今改用策論誠足以破拘攣陳腐之習矣然文章之體不正命題之例不嚴則國家重教之旨不顯取士之格不一則多士之趨向不定廢時文者惡其苛瑣浮濫不能闡發聖賢之義理也非廢四書五經也若不嚴爲定式恐策論發題或雜采解經字句或兼采經史他書界限過寬則爲文者漫無遵守徒騁詞華行之日久必至不讀四書五經原文背道忘本此則聖教興廢中華安危之本非細故也今日當詳議者約有數端一曰正名正其名曰四書義五經義以示復古二曰定題四書義書四書原文五經義書五經原文不得刪改增減亦不得用其意而改其詞三曰正體以樸實說理明白曉暢爲貴不得途澤浮豔作駢儷體亦不得鈎章棘句作怪

灑體四曰徵實準其引徵史事博考羣書凡時文所禁忌者悉與
蠲除五曰闢邪若周秦諸子之謬論釋老二氏之妄談異域之方
言報館之瑣語凡一切離經叛道之言嚴加屏黜則八股之格式
雖變而衡文之宗旨仍與真正之聖訓相符顧猶有慮者若仍以
頭場爲重則二三場雖有博通之士仍然見遺若趨重二三場其
詭誕浮薄務趨風氣者或又將邪說異說解釋四書五經本義全
失聖道既微世運愈否其始則爲惑世誣民之論其終必有犯上
作亂之事流弊尤多爲禍尤烈今宜籌一體一貫之法合科舉經
濟學堂爲一事求才不厭多門而學術仍歸一定方爲中正無弊
昔朱子當南宋國勢微弱之際憤神州之多難懼救世之無才屢
欲改變科舉嘗考語錄中力詆時文之弊者不一而足而究其救
科舉之法則曰更須兼他科目取人歐陽修知諫院時惡當時舉

人剽盜割裂全不曉事之弊亦疏請改爲三場分試每場皆有去
留頭場策論合格者試二場二場合格者試三場其大要曰鄙惡
乖誕以漸先去少而易考其說頗切於今日之情事朱子之擬兼
他科目猶今之特科經濟諸門也歐陽修之欲以策論救詩賦猶
今之欲以中西經濟救時文也竊謂宜遠師宋歐二說隨場去取
將三場先後之序互易之而又層遞取之第一場試中國史事國
朝政法論五道二場試時務策五道專問五洲各國之政專門之
藝三場試四書義二篇五經義一篇首場按中額十倍錄取二場
三倍取者始準試次場每場發榜一次二場完畢如額取中磨勘
之日於三場尤須從嚴如有理詞謬妄離經叛道者士子考官均
須黜革大抵首場求博學二場於博學中求通才三場於通才中
求正士先博後約先粗後精既無迂闊庸陋之才亦無偏駭狂悖

之弊始以中西經濟補益之終以四書義五經義範圍之較之偏
重時文策論者所得多矣其歲科兩考生童以此例推之先試經
古專以史論時務策命題正場試四書五經義各一篇抑臣更有
請者試場兼重詩賦小楷京官之用小楷者尤多士人多逾中年
始成進士甫脫八股之厄又受小楷之困以至通籍十年之侍從
年逾六旬之京堂各種考試仍然不免夫八股猶可覘理解之淺
深詩賦亦可見文詞之雅俗小楷則有藝而無文其損志氣耗日
力廢學問較之八股詩賦殆有甚焉舉天下登科入仕之人才歸
於疏陋輒熟以至今日遂無以紓國家之急今既罷去時文則京
官考試詩賦小楷亦祈停免惟殿試典禮至重自不可廢然臨軒
發策登進賢良自宜求得正誼明道如董仲舒直言極諫如劉蕡
者而用之斷不宜以小楷爲去取一經殿試即可據爲授職之等

差朝考一場儘可從省通籍以後無論翰苑部堂一應職官皆以講求實學實政爲主至於詞章書法潤色鴻業若朝廷需用此項人員特頒諭旨偶一行之不爲常例畧如考試南書房考試中書故事嚴則止及翰詹寬則部屬小京官皆可與考視其原有階品分別授官與三年會殿試取士之通例各不相涉庶幾文學政事兩不妨矣又疏陳武科取士之法畧曰今日用兵專恃火器外洋各國鎗礮之製日出而益精武學教鍊之法日推而益密然則武科取士斷宜專習火器別定新規然後無所習非所用之弊臣詳稽舊制參考新章謹擬一營伍學堂武科三司合一之法查武場條例武科人才取諸旗綠各營弁兵本係國家舊制今旗綠弁兵而外又有防營弁勇比之綠營材力較強操練火器尤爲嫻熟今武科改試鎗礮莫若卽令營弁兵勇應試最爲無患於地方而

有益於軍旅若令應武試者皆於武備學堂肄業則廣設學堂一時既苦難籌而教習之員亦斷不敷學堂之用外洋定章凡入武備學堂三年者必須隨營操練一二年以增閱歷斷無學生而在營伍之外者兵勇應試名籍易考鈐束易施所用鎗礮發之本營自然一律將來風氣漸開華弁能充教習者漸多各府州縣籌設武備學堂稟官辦理立約束稽察章程雖有鎗礮可無伏戎藉寇之虞學成之後分營効用則營伍學生合爲一貫是整飭科舉卽所以整飭營伍矣總之營伍應試其利有三外洋火器價值甚昂平日練習需用藥彈爲數尤鉅若生童惜費不購則操練無具若各省紛紛購買則所費不貲空增一絕大漏卮亦爲非計今應試取之兵勇則操練械藥本各營應有之需閒有願附入防營學習者鎗礮由官借用藥彈由生繳價是曰塞漏其利一也我朝將材

輩出大率出於行伍自咸豐軍興以來其由武舉武進士呈功著稱者實屬寥寥此輩恃符武斷如虎而冠魚肉鄉民窩庇匪盜各省官商士民無不以爲巨患萬口一辭徒以舊例相沿幾如附骨之疽去之無術究其所長者不過粗豪膂力倖中箭枝不識字者十人而九臨敵之火器旣未嘗習制勝之韜鈴更未嘗解卽使安分守法豈能與於干城腹心之選乎且武生武童舊習騎射硬弓刀石亦只臨場肄習無論中否過考輒棄於國家儲材禦侮之意毫不相涉今若專令營弁兵勇就試卽入武學登武科以後仍有本營長官鈐束無從爲非其技藝亦不至荒廢從此爲地方暗滅此一種違法擾害之游民尤潛移默化之微權矣是曰戢暴其利二也疇昔征討髮捻之時各路軍營有以步卒水手不數年而保至提鎮者海內忠勇之士翕然向風近年軍務救平保案少則防

軍之拔擢難文法繁則綠營之升遷尤難雖有偉材壯志無所得官糧饜聊以糊口操練視爲具文雖經按期簡閱收效終微蓋兵勇自視不過如擔夫匠役食力營生其謹愿者僅不爲會匪地痞而已人既卑視兵勇兵勇因而自卑若望其深明敵愾同仇之大義講求破敵致勝之韜鈴實亦難矣今若懸此一途以爲營弁兵勇進身之階功名所在則肄習自精不待朝廷督責將帥勸勉而各省各營皆爲勁旅是曰勵軍其利三也抑臣尤有進者親上死長者強國之本原明恥教戰者操兵之要術當此羣強憑凌正所謂天下危注意將之時近年東西洋各國精研兵事最重武職其國君服提督之服鄰國之君互相贈送以將官之衾故人人以當兵爲榮以從軍爲樂以敗奔爲恥王子之尊下儕成卒一隊之長榮若登仙凡挂名軍籍者居鄉則里黨貴之過市則路人敬之以

致弁兵之自愛聲名修飭行檢過於儒士中國乃有好鐵不打釘
好人不當兵之諺稍有身家咸所鄙棄貴賤之分強弱之源也夫
中國所貴者士士之徒步而致任公卿者多矣人之貴之蓋有由
也中國所賤者兵兵之荷戈而流爲傭丐者眾矣人之賤之固其
所也即使不終於困餓而三四十歲以外猶爲廝養之賤卒五十
歲以外始爲循資之神將旣已純乎暮氣豈能建立奇功今欲重
武厲兵而積習已深不能驟改惟有勵行伍以科舉之一法使其
非由行伍不得科舉非由科舉不得將官爵祿所在則豪傑爭趨
流品旣殊則廉恥自立將領不肯侮辱旁人不敢輕重從此凡爲
兵勇者儼然又列士流欣然請得大獎夫然後世族文儒皆肯入
伍感慨漸發人人有執干戈衛社稷之心奮士氣修軍實轉移微
權實在於是總考各國軍政有武學而無武科其各等學堂以次

考拔發營錄用卽是中武科武試從無不由學堂出身之官校亦無不充軍營校伍之學生其法實將武營武科二事合而爲一今日欲採擇西法莫如先自練兵始欲學西人之練兵莫如自開兵勇之升階合學堂營伍始矣若其學習老誠之法非僅改用鎗礮遂能收效歷考外洋諸國從無不讀書不明算不能繪圖之將弁亦無不識字之兵丁誠以今日戰事日精戰具日巧卽一哨弁之微亦斷非粗材下品所能勝任若只考鎗礮準頭從容施放中靶者多殊難去取且憑此卽授以侍衛參游都守之官似亦太易擬請仿馬步箭弓刀石武經三場之制頭場試鎗礮準頭兼令演試裝折運動之法二場試各式體操及馬上放槍步下擊刺之技三場試測繪工程台壘鐵路地雷水雷與他戰法等學鄉會試格式宜較嚴童試格式宜較寬三場合較智勇兼優方爲合格其初人

營及末弁入學堂者酌定年限多不得過二十五歲蓋以年力少壯則體操及測算各事始能按程學習穎悟易通也疏入 上皆俞允於是天下言新政者囂然而起少年新進之士變本加厲肆行無忌中外執政之臣相與側目之洞亦惄然憂之乃著勸學篇會通中西權衡新舊以相救正八月黨禍起幾釀大變至是其言果驗二十六年二月兼署提督五月拳匪亂作殺教士教民毀教堂圍使館各國聯軍兵艦麤集大沽中外鼎沸之洞疊請剿亂民護使館不報則急電各國外部及來華水師將領立保護東南約勿擾京師驚乘輿竝聯合各疆臣與外國領事立約不得犯長江及 兩宮西幸又堅明約束勿擾襄樊以通東南貢賦之道七月聯軍入京師 朝廷命李鴻章爲全權大臣與諸國議和之洞電告鴻章款局當速議遲恐生變竝陳四要義駁正要挾諸款時唐

才常等保皇黨餘孽乘京師不守謀糾合湘皖江南會匪起事於漢口刊布富有票分設糧台立官職造偽印名爲東南新造自立之國安徽大通湖南臨湘已舉事分投武漢新隄之洞檄將士誦捕渠魁數十人實之法散其黨眾事乃大定俄乘拳亂占東三省脅將軍增祺定新約迫鴻章畫押已有日矣之洞力爭電奏凡二十餘上遂得寢明年講定 兩宮回鑾論功加太子少保之洞以兵事粗定乃與劉坤一上變法三疏其一謂中國不貧於財而貧於人才不弱於兵而弱於志氣人才之貧由於見聞不廣學業不實志氣之弱由於苟安者無履危救亡之遠謀自足者無發憤好學之果力保邦致治非人無由今就育才興學之大端參考古今會通文武酌擬四事曰設文武學堂改文科停武試獎遊學此四者爲求才治國之首務蓋非育才不能圖存非興學不能育才非

變文武兩科不能興學非遊學不能助興學之所不足其一謂治國如治疾然陰陽之能爲患者內有所不足也七情不節六氣感之此因內政不修而致外患之說也療創傷者必先調其服食安其臟府行其氣血去其腐敗然後施以藥物鍼石而有功此欲行新法必先除舊弊之說也蓋立國之大要有三一曰治二曰富三曰強國既治則貧弱者可以力求富強國不治則富強者亦必將轉爲貧弱整頓中法者所以爲治之具也采用西法者所以爲富強之謀也今就中法之必應整頓變通者籌十二事曰崇節儉曰破常格曰停捐納曰課官重祿曰去書吏曰考差役曰恤刑獄曰改選法曰籌畫八旗生計曰裁屯衛曰汰綠營曰簡文法此十二者皆中國積弱不振之故今日外患日深其樂因循務欺飾動以民心固結爲言不知近日民情已非三十年前之舊羨外國之富

而鄙中土之貧見外兵之強而疾官軍之懦樂海關之平允而怨
釐局之刁難誇租界之整肅而苦胥吏之騷擾於是民從洋教商
挂洋旗士入洋籍始由否隔寢成渙散亂民漸起邪說乘之邦基
所關不勝憂懼必先將以上諸弊一律剷除方足以固民心禦外
侮其一謂環球各國日新月盛究其政體學術大率皆累數百年
之研究經數千人之修改成效旣彰轉相倣效美洲則采之歐洲
東洋復采之西洋如藥有經驗之方劑路有熟遊之途徑正可相
我病證以爲服藥之重輕度我筋力以爲行程之遲速蓋無有便
於此者今采西法以補中法之不足就其切要易行者臚舉十一
事曰廣派遊歷曰練外國操曰厚軍實曰修農政曰勸工藝曰定
鑛律路律商律交涉刑律曰用銀圓曰行印花稅曰推行郵政曰
官收洋藥曰多譯東西各國諸書此十一者皆舉其切要而又不

可不行者布告天下則不至於駭俗施之實政則不至於病民而
大旨尤在考西人富強之本源繹西人立法之深意再臣所陳諸
事需費不貲論者必以度支困絀爲詞不知節用與自強宜並行
不宜偏廢今若不圖自強但竭海內之財歲供賠款以求無事則
外國必將視我爲苟安無志之人而彼之輕我侮我者更將得步
進步不待賠款還清而中國已不能自立矣疏入 上多從之初
中東事定湖北勅立武備自強諸學堂兩湖經心書院更定課程
以學堂之法教之至是詔立學堂乃臚陳辦法十五條首師範次
小學次文普通中學次武普通中學次文高等次武高等次方言
次農學次工學次勸成學堂次仕學院次經費次省外中小學次
蒙學次設學務處以資董理籌要旨八條一小學爲至要二日課
專加讀經溫經時刻三教科書宜慎四學堂規制五文武相資六

教員不遷就七求實效八防流弊復在武昌設勸業善技益智三
場以教工商設圖書館以惠士子籌重費選通才游學日本以肄
習陸軍製造實業諸事又鑒於新學之徒有背道蔑倫之患乃創
立存古學堂以維國本正人心之洞自丙申以後專以西法練兵
特設陸軍小學堂以教新兵設將校講習所以教舊將復購日本
兵輪六艘魚雷艇四艘於是湖北始有戰艦東西人士來觀者皆
以鄂軍甲諸省歎服而去二十八年充督辦商務大臣九月再署
兩江道員謝某請許商人開海州鑛以二十萬金爲賂之洞劾罷
之親臨儀棧考鹽法利弊設兵輪造船舉緝私之令以道員蒯
光典爲儀棧緝私以方碩輔爲正陽關督銷以趙有倫爲下關掣
驗重之事權鹽課大旺一年增課五十萬二年一百餘萬以上海
製造局居商埠之中遇海警多危險奏請移置江西之萍鄉以就

煤鐵凡節存舊版款年七十萬一千九百零九年入覲 命充經濟特科
閱卷大臣編纂大學堂章程竭八閱月力書成奏上之並言立學
宗旨均以忠孝爲本以中國經史之學爲基俾學生心術一歸於
純正而後以西學瀹其智識練其藝能務期他日成材各適實用
至條規禁令及設教立法之要義悉備詳於管理通則學務綱要
兩冊之中其維持聖道慎防流弊之意胥於是乎見之是年回任
陞辭面奏數百言力請 兩宮化去滿漢畛域以彰聖德遏亂端
如將軍都統等官可兼用漢人駐防旗人犯罪用法與漢人同不
加區別 上嘉納之三十年裁巡撫以之洞兼之三十二年授協
辦大學士未幾晉大學士仍留總督任尋內召擢體仁閣授軍
機兼管學部充經筵講官三十四年督辦粵漢鐵路前後 賜紫
禁城騎馬西苑門乘肩輿賞帶膝貂袿用紫韉寵眷優隆朝臣莫

與比會 德宗及 孝欽皇太后相繼崩 醇親王載灃監國攝政
之洞以顧命重臣晉太子太保鎮綏內外朝野望新治而積勞成
疾八月卒於位年七十三遺疏入 天子震悼賜陀羅經被治喪
銀三千兩派員勒載壽奠醴晉贈太保諡文襄人祀賢良祠之洞
學兼漢宋漢學師其翔實而遺其細碎宋學師其篤謹而戒其空
疏初受經學於呂賢基受史學經濟於韓超受小學於劉書年受
古文學於朱琦平生講學最惡公羊謂爲亂臣賊子之資至光緒
中年果有演公羊之說以倡亂者最惡六朝文字謂纖仄拗澀強
湊無根柢道喪文敝莫甚於此書法不諳筆勢假託包派隸楷雜
糅書爲詭異險怪欺世亂俗天下無寧宇矣其識微見遠類如此
之洞歷官中外垂四十年持國治民根於學術而經畫宏遠綜理
微密千端萬緒默運一心其所籌策皆中外利害輕重至計堅持

定力不爲動搖辛丑聯軍立約各國濬吳淞口利商船之洞抗詞
力爭歸中國自行疏濬卒阻其議壬寅與英國議商約定徵銷場
稅收回治外法權外務部奏阻開礦一事之洞疏言中國鑛產不
能不開外人入股斷不能禁二十年來句串姦民私行開采者眾
矣旣無法律又無限制徒失權利流弊滋大不如乘此議一定章
使舊開者得補救新開者有範圍 上夫稱善乃采東西各國事例
擇善而從以保主權惠民輕稅項成書兩卷奏上之在鄂時德
商欲攬收全國洋藥土藥稅餌以重賄之洞嚴斥之奏陳其害大
學士榮祿大悟事遂不行日本謀借漢口泊船德人效之挾兵輪
來要之洞與德使穆默議卒罷設船之舉總稅司赫德建議加田
賦免商賈稅釐政府不敢抗之洞獨疏斥之得罷美人精琪圖攬
中國銀幣大權政府已允之矣之洞與之詰難上疏陳其謬事遂

中止美比合資開粵漢鐵路之洞首發其弊抗議收回兩國皆不
欲出全力拒之卒絀於之洞威信舉而歸我之洞用財繁浩而精
核計籌國用恤民生往往謗在當時而功在後世丁酉戶部續借
洋款誤以江南鹽釐二十五萬兩撥歸鄂省之洞據部文萬戶沱
辦晰更正以脫巨累庚子賠款鄂捐一百二十萬之洞以鄂民貧
困設法別籌以應賠款創築紅關青山白沙洲金口江堤八十餘
里鮎魚套上新沙石岸十餘里漢口攔湖長隄四十里以捍水災
裁鄂省釐捐局卡改爲統捐以恤商民平日專持以工代振之論
以爲散錢施粥非善政也所至多興工作造鐵路開鑛山修隄閘
濬河渠建礮台築馬路開民食力者日常數萬人其視天下之事
皆如己事向無彼疆此界之見鄰省有急籌助饟械不遺餘力在
粵在江在楚先後協助雲南廣西廣東奉天陝西甘肅山東河南

湖南江蘇軍火以鉅萬計其救災助振或中或外尤不吝巨貲其用人一秉至公擇賢任能不苛以文法澄清吏治以養廉爲首裁除大小官吏一切陋規濟以公費深惡酷吏遇州縣審擬重辟必詳慎推求多有平反者深痛中國監獄狹暗穢溼往往痠斃其在粵改修南海番禺監獄在鄂改修江夏監獄依西國法式造之以爲模範平生以登進賢才護持善類爲己任尤好表章古人所在祠其先賢先哲而自奉儉約未嘗造一屋置一田癸卯入對太

后賜銀五千兩乃建慈恩學堂竝捐置莊田以惠士子又仿范仲淹故事奏置義莊贍宗族其同高祖以下則別置孝義堂義莊一區沒後家無一錢惟圖書數萬卷而已之洞嘗與人言平生有三不爭一不與俗人爭利二不與文士爭名三不與無謂人爭閒氣因取張曲江無心與物競詩意自號爲無競居士之洞善爲國家

用財不爲一己私財廷臣泥常蹈故縮朒喜敷衍多駭其所爲樞
臣孫毓汶戶部尙書翁同龢遇事輒猜沮醕親王奕譞爲不平奏
請特旨允行且函告毓汶曰勿藉樞廷勢恐張某且謂同龢曰張
某爲國開生迹宏遠謀如有缺當彌縫之實則其所用財大率取
之中飽私規不竭民膏不侵庫款之洞嘗曰吾所辦之事皆非政
府意中之事吾所用之錢皆非本省固有之錢日在艱苦中守中
庸勉強而行一語然亦竟覩成功者眞僥倖也之洞性疏曠不欲
爲外吏旣膺疆寄屢上疏乞休嘗欲讀書十年再出任事曰司馬
溫公已官中丞而居洛著書十八年湯潛菴耿逸菴已官監司而
解組講學皆可師也之洞電眸河口美髯鬚善談論能連夜不寢
以文章道德主盟壇坫者數十年五洲之士皆仰之爲中華山斗
光宣之間主持變法藩籬旣決人心益囂之洞鑒於末流之弊恍

然不窳而風會所趨挽回無術棟梁旣摧國體斯革論者追論禍首貪爲口實此之洞所不及料者也烏虜豈非天哉豈非天哉

陸鍾琦

子光熙

陸鍾琦字申甫宛平人幼嗜學與宗室盛昱以學行相砥礪年十九補縣學生同治十二年以拔貢生授教諭選撫甯光緒十一年舉於鄉十五年成進士改庶吉士授編修二十九年外簡江蘇督糧道三十四年擢江西按察使調湖南再移江蘇宣統元年晉布政使三年擢山西巡撫八月武昌兵變山西相繼難作九月八日殉焉鍾琦篤志向學嘗自言生平得力在官撫甯教諭十二年日與諸士人讀書講道教數相長出其門者率以名行著稱而性尤廉介無一事自苟值縣大水李秉衡方令撫甯請振濟飢民總督檄林宗岱來監放鍾琦副之宗岱謀吞噬以利誘鍾琦繼挾以威

鍾琦不爲動單騎走山村親爲平劑之活者無算及官翰林管理八旗官學殷殷教誨一如在撫寧時其官江蘇糧道也革除陋規殆盡倉場侍郎桂春爲其戚假二百金不應桂春怒欲中以事求之不能得清風亮節囊橐蕭然及升湘臬至不能成行嘗以臬司爲一省人命所關日研究法律諸書清釐積案有乾隆時未結株連至數百人者於是與僚屬約定功過賞罰嚴禁私鬪懲訟徒杜請託暮年宿牘一清調蘇臬凡遇疑獄輒坐堂皇自訊不假屬吏手一日遇一命案甫訊數語囚俯首承招已畫供矣鍾琦反復閱原牘曰此死囚也而認供之易若此非情也乃更提訊告之曰汝知汝罪乎囚應之曰知之徒罪耳鍾琦曰誰告汝者此死罪也囚乃大哭曰此案實非我殺以錢百緡買我承曰罪不過徒刑一年耳今若此奈何鍾琦提解役訊之得其實事遂雪其矜慎民命類

若此在蘇藩除無名陋規屬吏無敢以私進者其撫山西南二十
二日部署未定難卽作鍾琦出作大堂死焉次子光熙跪死於其
側妻唐氏亦同時殉股受彈傷或曰吞金死也事聞 上震悼予
諡文烈子光熙予諡文節諭有忠孝節義萃於一門之褒蓋自革
命以來朝臣疆吏所僅見者初鍾琦與同年王懿榮熙元寶豐及
李秉衡王廷相友善光緒庚子之亂五人者皆先後殉節死鍾琦
聞之大哭夜奔馬樞自經家人救之出次日入廚取刀自殺復遇
救不死後聞 兩宮已出狩始免於難及至山西見亂事急乃召
其三子敬熙告之曰大事不可爲矣省垣旦夕恐難保脫有不測
余惟以死殉國耳汝曹讀書宜明大義屆時勿害我儻效婦人之
仁我亦斷無生理不過換一地使我不死所耳脫一旦有變吾
公服坐堂上飲彈而死斯爲幸耳若變兵不加殘吾惟有自縊之

一途吾體胖且年老繫繩尙須汝曹儻不如命非吾子也又曰生死之關父子不相強聽汝自爲之但吾孫不可同盡以斬吾宗汝其記之敬熙知其父意決入內見其母乞速回京師母曰汝父殉國吾惟從之而已他非所知也敬熙以事棘遽回京商之其兄光熙光熙聞之馳抵晉遂同死焉僕人李慶雲河間人幼役其家三十一年鍾琦出大堂慶雲侍左右揮之不去曰願相隨地下以報叅養之恩言畢挺身出遂遇害時又有幕友徐光弼者字仲明臨榆人光緒十四年舉人江蘇知縣精英文算學鍾琦一見奇其才延之幕中凡五年亂兵起闖入其中手搏之受創百餘體無完膚事定送醫院治之三月始能起逾年回里傷發而卒光熙原名惠熙字亮臣幼聰穎年十二已讀畢十三經稍長專精三禮之學光緒二十九年舉於鄉明年成進士改庶吉士初光熙從宗室盛昱

學十二年精研清朝掌故盛昱沒改從桐城吳汝綸受古文義法
考入北京大學求經世之用不喜寫摺卷及成進士覆試殿試朝
考書法皆不工且多塗改殿試列三甲而覆試朝考卷分大學士
徐世昌見之激賞其文歎爲奇才均拔置一等拆卷知爲光熙乃
大喜曰爲國家得一俊士矣光熙講性命之學重實行慨念中國
之不振遂東遊日本學武備與士卒同習兵法共甘苦七年盡得
其長及回國欲施之於用京內外達官交章薦之授侍講身死而
國難作論者悲之光熙性至孝庚子之變年甫二十三作帶銘以
紀其事帶者卽鍾琦庚子自縊之帶也次年鍾琦患危疾光熙侍
湯藥歷二十三晝夜未嘗解衣卧潛割左股肉和藥進之病獲痊
人無知之者死節之年僅三十四云

名臣傳七終

大清畿輔先哲傳弟七

名將傳一

大清畿輔先哲傳第八

天津徐世昌撰

徐可成

徐可成懷來人性忼爽補衛庠學生明崇禎十七年三月流寇入城數謀狙擊不果清朝定鼎王師西至懷來僞官解某據城以抗可成要眾誅逆賊歸清夜縋城出見統兵親王請大兵退十里全城以獻王許之翌日可成率義勇焚賊黨縛解某馳獻軍前王壯之命射一發貫的授榆林協副總兵擢河南懷慶參將時餘賊潛以數萬騎圍懷慶旁陷河北數邑勢大熾城中僅羸卒數百不能支可成誓死守分軍民更代乘陴多樹旗幟令老幼擊鉦警示賊以強先是賊預遣百餘人僞爲商賈者伏城中謀乘夜斬門作內應可成訶知命子起龍勒兵清街巷獲奸人悉斬之賊計沮宵遁

縱兵追擊大破之尋調駐防衛輝從剿土寇一把沙等處將校多
爭利可成獨收賊所掠民間子女屬廟中令親屬領回無主者擇
良家子配之可成數防大郡所至卹軍厲士兵民感悅年八十二
卒崇祀鄉賢

王可就

王可就字向明灤州人官山東撫標遊擊剿巨盜王進周收撫賊
張正等數萬人以功陞延安府參將平逆賊謝化奇之亂陞慶陽
府東協副將經畧洪承疇奏調雲貴鎮守備橋其地有諸葛洞者
江中多峻石不通舟楫軍需繁重皆民丁負運之因召父老問其
狀僉曰中有巨石高數丈石下有洞讖云若要此洞開除非諸葛
來可就慨然力任之募石工勇慧者鑿之巨石下得一碣有丁口
京邊九十分之語可就曰此吾名隱語也眾皆踴躍數旬工就上

人勒石記之以功陞杭州城守副將先是杭多滑賊專以賄通當道不肖者往往左袒賊可就與賊唐起凡戰敗之而兵備道某反咎可就可就抗爭當道前乃專任可就平賊起凡屢遣人賄說可就不出戰可就怒曰賊視我爲何如人哉於是元日會兵圍其砦親登手刃之餘黨降起凡兵稱百萬爲杭害者幾二十年至是始平上嘉其功加榮祿大夫署都督同知賜蟒玉封三代任杭時總督被江賊劫所佩刀急召與議可就請塞沿江便路置塘戍守率兵嚴捕江賊遂平尋陞福建副總兵以都督同知署總督標下中營事陸見上親臨試射授雲南臨阮澂江等處總兵時吳三桂變作復召見賜綵緞一表裏諭令速回聞密察耿藩遂星馳踰仙霞嶺而耿藩已變密遣四僞官要於途既至圖乘間誅之謀洩迫趨都尉府度不能免歎曰大丈夫不能爲國家除賊夫復何言舉

家號泣隨之不顧遂遇害年六十二上憫其忠賜祭葬廕二子

朱萬祺

子偉

朱萬祺字敬廷號范瞻涿州人警敏有幹畧初爲諸生猿臂善射崇禎間學使者校騎射獨稱萬祺謂二十七邑士無與匹者甲申李自成僞都尉入涿括富室金萬祺鳩義士朱光祚等殲其眾自成怒率眾來攻誓屠城萬祺多方守禦會清兵南下萬祺縋城馳見豫王授本州參將賊聞大兵至退走萬祺追獲象馬無算上詔賜錦袍白鏃在任五年平土寇十餘起四境獲安順治三年上幸盧溝萬祺橐鞬扈蹕賜飛魚裘冠鞞佩帶明年封鎮國將軍五年免官以陳喜代之經畧洪承疇移喜湖南以萬祺再任參將後佐治河卒於官萬祺性豪俠能急人之難工詩善書其品學尤爲時所重子偉字駿侯博學善屬文工書法不樂仕進別號煙火

神仙自爲傳以言其志人爭傳之

陳喜

周天命

李得春

張承恩

陳喜字瀛海慶雲人國初以武生授天津道標中軍遷薊屯營遊擊豫王征潼關喜爲前鋒奏凱賜戰馬白金以旌其功總兵孔希貴奏隸本營有削平巨寇功分守歸德李化鯨據河北窺河南急喜度賊必潛師上流襲我後設伏以待覷半渡水陸夾擊之賊大潰轉涿州參將經略洪承疇出師江南奏請隨征賊眾時十餘萬攻常德諸將各守汛地喜獨以僻地爲憂嚴陣待之賊果來攻以有備而遁敘功以副總兵協鎮金華海氛不靖躬擐甲胄晝夜數十戰積勞卒年四十五

周天命天津人順治初爲天津鎮標中軍副將土賊莽塞聚眾唐官屯肆擄掠天命督兵入賊巢力戰受創死事聞廕都司經歷入

名宦祠

李得春通州人順治初以副將鎮沂州恤軍愛民武備完整時西山土寇嘯起民多他徙得春平叛卒招流亡三年間四境宴寧百姓復業卒於官喪歸軍民感遺愛泣送者不絕於道

張承恩字洪宇昌平人善騎射有勇略順治二年守鎮江值疆宇初平奸宄未靖承恩單騎往長蕩湖招撫宿賊誅其渠餘盡釋之八年遷福建邵武協副將會剿土寇不旬日降之治兵嚴肅有犯民間一絲一粟者聽擊鼓鳴冤所部肅然

楊捷

楊捷字元凱宣化人明死難總兵國柱姪也國柱亡賜葬保安捷為經理其家因入籍清初歷官督標副將順治五年江西鎮將金聲桓叛捷與固山譚泰合師復潮州累進左都督充福建右路總

兵康熙元年移鎮山東適于七倡亂登萊瀕危提督兵分道進捕
斬賊首境內以安十二年調鎮江南總兵十七年以少保兼太子
太保擢福建全省陸路提督時海寇勢甚張漳泉屬邑幾不守提
疾馳抵建寧請兵于大將軍水陸進師克惠安轉戰至洛陽橋賊
踞橋北設炮城三重自固提陰遣銳兵遠出賊背大破之復敗其
餘黨王一鵬紀朝佐克復江東橋萬松關十九年賊聚眾漸山獅
子山立十九寨聯絡島嶼充龍滄海以壯聲援提建營高浦調八
漿諸船牽制賊師連破十九寨進攻廈門悉平之調補江南提督
以功世襲三等阿達哈哈番二十九年卒贈少傅賜祭葬諡敏壯
崇祀賢良祠

呂八音

苗之秀

張燦

許國璧

呂八音字偕倫甯津人康熙初由武舉任懷來守備將軍拜某薦

專一 名將一

其才隨至廣東參謀幕府粵藩謀畔閉城迫撫軍提督降八音殺
門卒數十毀鑰開門縱撫軍提督出藩兵追至八音殿後力卻之
護全軍過梅嶺並復吉安陞福建後鎮中軍游擊轉撫標左營游
擊臺灣之平也戰金門廈門屢有功陞督標後營參將擢廣西思
恩府副將遷直隸三屯營尋鎮守石匣陞山東總兵官都督同知
未蒞任卒其弟九成以左都督管副總兵事鎮守湖廣衡州諸處
子黃鐘以左都督管遊擊事鎮守福建同安諸處皆有聲
苗之秀字吐華武邑人由行伍起家累功陞廣東碣石衛總兵衛
地濱海寇出沒不常之秀多謀畧備禦有方海疆宴然三藩變起
屢立戰功擢山東提督未蒞任卒追贈驃騎將軍其部將有張燦
者字在中棗強人善騎射隸之秀麾下康熙十二年隨征劉進忠
復普甯揭陽諸縣奪鳳凰洲取其礮臺而還十四年隨征鄭經說

葛鎮獻城奪鮮水關取永定縣戰績卓然時之秀墮經計居漳州後以計脫歸碣石而家屬悉陷賊經脅之入海之秀日夜涕泣燦偕三十人入漳奪之歸歷升參將征三藩傷左股卒於家著有難譜一書

許國璧字元璞井陘人以武舉授山左裨將遷濟南遊擊土寇亂捕獲孫南松等七人陞參將改官山右康熙十四年吳三桂畔陝西朱龍孫崇乘機叛陷神木府谷國璧督兵圍之禽斬偽官復府谷城以功擢都督僉事管通州副總兵事卒祀鄉賢

李連

傅鵬翔

李連字楚白東明人性倜儻有大志初授梁山營把總累遷提標中營守備時鄭芝龍遺孽據閩圍泉州提督知其才委署福建右營遊擊首復惠安賊逼洛陽橋爲寨不得渡連密諮士人夜涉陳

山壩五鼓抵賊營焚其壘斬馘六百大兵踵至夾攻賊船悉沈溺死者無算泉州圍解進擊江東橋賊斷橋踞河中以舟師登岸逆戰連奮擊敗之連環施礮碎其船遂克江東橋進戰下坑山追至果塘玉州等寨戰兩月以捷聞復隨提督攻破獅子山克陳州馬州灣十九寨遂復海澄初戰海澄連中礮傷股裹創力戰不少挫故卒能成功賊計窮謀內衅連冒險出海澄招撫其僞官吳桂羅士珍等七百餘卒萬三千船百三十艘乃以吳桂羅士珍攻廈門諸島皆下之閩平論功陞都司僉書歷都督僉事管福建右營遊擊事尋陞左都督一拜他喇布勒哈番湖廣兩桂營參將召見賜

饌授浙江嚴州府副將以病卒於官

傅鵬翔開州人武舉康熙十年授浙江紹協左營守備十三年剿閩逆多斬獲功陞平陽鎮標右營遊擊十四年屯美家山賊潛渡

劫營敗之斬馘無算十五年攻克石塘復雲和龍泉慶元松陽諸處招撫僞參將等六十餘人兵三千餘授廣東雷州副將加提督銜告歸卒於家

白斌 李正春

白斌字聖緒滄州人幼英毅好騎射善讀兵書康熙二年武舉人十六年選授陝西鎮標守備時僞將王屏藩據漢中命守西河豐縣禦諸隘口賊攻豐急城幾陷斌乘賊不意出奇兵掩殺之城獲全復隨勇署將軍趙良棟進剿四川敗賊將張棟于白水壩西直抵成都禽僞將韓天福時僞將胡國柱屯敘城西岸斌偕守備顧龍陳英出地道潛渡襲之賊大潰遁入犍爲追敗之江壩先是斌出敘州大將軍圖海餞而壯之曰白斌吾干城也此去必滅賊捷聞圖海令人偵追逸賊斌乘勝取馬湖府路抵新鎮大戰十丈峻

黃茅崗賊走死是時斌威振南荒 上命征雲南取關山路入滇關
山者入滇要隘也賊守禦嚴斌率敢死士扳索潛渡大兵繼進遂
復關山於是進瀘江渡金河剿會川無敢敵者賊平論功補西甯
鎮遊擊時康熙二十二年十月也生番西兒素寇莊浪殺參將斌
率兵至先密寺生禽之殲其黨歷九載陞山東卽墨參將遷直隸
通州副將召見乾清門特授直隸宣化鎮總兵掛鎮朔將軍印賜
甲套各一詔領所部三千人隨征噶爾丹指陳兵勢稱 上旨以實
心効力褒之賜蟒服食物駝馬金盆諸珍物繼從 上獵賜扁額
手卷貂鼠搭獲三十六年 上西巡甯夏呢嚕特各番投降斌運
米抵拖羅隆賜宴坐督臣右後以宣人爭煤窰事落職歸里卒年
六十八

李正春字茂枝遵化人幼豪俠敢任不拘細行比長有勇力好讀

軍事書善劍樂康熙二十九年噶爾丹跳梁西北上諭不論有
無官職准自備鞍馬効力正春投牒兵部願從軍報可是年七月
隨裕親王出古北口八月至烏闌布通遇賊奮前搏戰斬首十餘
級戰良久十盪十決賊披靡王壯之授千戶凱旋補石匣營守備
洊陞遊擊三十四年奉旨揀直隸將弁年力精幹者二十員正春
列首記名復征噶爾丹出口賊偵知正春在行間紛紛鳥獸散追
至二十四台俘獲甚多次土賴地賊遠颺整旅而還正春素嫻韜
鈴善擊刺敢戰爲士卒先故所向有功以征西將軍白某薦擢大
名協副將嗣調山永協正春每蒞任以整營伍練士馬爲不時之
備屢蒙召對賜賚甚優廕一子入監弟遇春官守備君賢官總兵
皆其所教者年六十二卒於官

穆廷斌

穆廷斌字符公臨榆人康熙六年武進士十四年授直隸蔚州路
守備整飭營伍以敏幹稱二十一年遷四川提標遊擊二十四年
疊溪大定保山後生番恃列角雙馬廟山卓沙白卜諸寨阻截哨
道羣踞巴豬寨劫掠爲民害總兵高鼎檄廷斌及李鎮鼎等渡河
先攻列角寨番眾悉走入寨爲死抗計廷斌進擊火其礮二十八
直抵寨下三面環擊復燬礮九十餘盡殲其眾雙馬廟山諸寨俱
震懾乞降官軍乃分三路進攻巴豬寨廷斌由廟山攻中路大破
之圍其寨燬礮百餘逆首挖子焚死餘黨冒火而逃廷斌尾躡殲
之山溝窮追至黑水江搜獲僞印劄生禽悍黨三加普諸逆三十
年九月移駐威川防守西番而牛羅寨逆番復入保山界肆掠
廷斌擊禽寨首白止泰番民帖然四川巡撫噶爾圖提督吳英陝
西固原提督何溥交章薦遷威茂營參將四十年轉永甯協副將

明年擢蘇松水師總兵四十四年 上南巡廷杖迎駕山東賜御書
精肄堂額皇輿表古文淵鑑諸書四十六年南巡復召見御書勤
訓練額賜之五十一年賜平定朔漠方略明年 上命廷杖總管水
師營戰船運江南倉米十萬石貯廣東福建備振濟五十三年擢
江南提督十二月陛見賜戴孔雀翎五十四年二月調福建陸路
提督賜御書八閩邦屏額六十年臺灣奸民朱一貴爲亂廷杖督
兵駐廈門策應反側立消連平永春德化安瀛三邑諸賊以勞卒
官遺疏入 上痛惜贈左都督賜祭葬如例諡清恪廷杖性謙抑
廉潔自持有古儒將風泉州民感其德爲立生祠遺疏懇其眷口
居江南 上允之字秉常仕至雲南漢水總兵

張英奇

張英奇字子干深州人年十九中康熙九年武進士殿試第一授

一等侍衛歷漕標金華洞庭九谿副協特旨擢高雷廉總兵奉詔
入覲備詢營制稱善賜金與馬其赴都時路經吳川電白兩縣士
民以積逋泣懇入告英奇允之陛見日卽上奏制下兩邑逋租盡
蠲計數萬金旣回任值信宜土寇起英奇以德撫之眾遂降以計
禽六頭堡賊首不費一鏃卒於官賜祭葬如例

劉國興

周貴

劉國興字振宇赤城人從軍入閩平古田土寇積功遷守備晉遊
擊康熙十七年海寇攻廈門國興出擊之禽其渠乘勝招安反側
撫流亡禁士卒淫掠有犯必懲紀律嚴肅民戴其德擢西安副將
三十四年從征噶爾丹有功遷廣東碣石衛總兵卒於官子世明
有父風歷官閩浙總督人謂國興能以陰陽作貽謀焉其時同屬
有周貴者字榮五懷安人康熙十年官台協副將號令嚴明弁兵

不法治之不稍寬故事軍中食用及一切供應皆取諸民間貴至立罷之在台三載盜賊屏迹海疆宴然

王文雄

王文雄大興人康熙二十二年由行伍隨提督施琅勦海寇鄭克塽於台灣僞侯劉國軒率賊二萬餘踞澎湖文雄由銅山進擊敗之敘功加左都督銜二十九年大軍征噶爾丹文雄赴前敵隸火器營敗賊烏蘭布通授張家口遊擊三十五年上親征噶爾丹文雄隨軍至拖諾山遷張家口副將三十八年調江南督標中軍四十二年擢登州總兵四十三年疏請葬母故例武職從無給假葬親者特旨給假四十日八月疏言東省沿海二千餘里自海禁一開商民舟楫往來姦宄不無覬覦登州左臨大海控禦尤要向來水師無船設額兵僅三百八十六名請增至一千二百於所屬

各營抽調足數酌撥鎮江松江狼山崇明等處趕繪船二十備用
改設遊擊一守備一千總四把總六操演水師防汎巡島庶幾有
裨大局下部議行四十六年五月 上南巡文雄扈從至臨清賜
孔雀翎御書輯和東土扁額賜之四十八年擢貴州提督先是提
督李芳述疏言黎平一協孤懸邊徼易於藏奸且距省窳遠艱於
呼應請以黎平府割歸湖南改協爲鎮文雄言黎平一隅界連粵
西邊徼偏近九股生苗所轄西山一汎尤爲緊要應專設一營增
守備一千總一把總二移兵三百名駐防彈壓仍歸黎平副將管
轄又黎平至省必經湖南之天柱靖州往返四五十日若由所屬
之湖耳司經天柱縣及瓦寨卽抵鎮遠祇十餘日宜安設塘汎以
便往來乃與巡撫劉蔭樞會疏以聞下部議從之五十年疏言安
籠鎮所轄之黃草壩接連滇粵偏近三江去普利州二百餘里原

屬安龍鎮左營汛地應設左營遊擊一千總一把總二兵三百駐防庶足控扼要隘其右營遊擊之分汛新城者撤回鎮標又言安龍一鎮深處萬山之中與滇屬之羅平廣南粵屬之西隆泗城接壤去石門坎二十里卽鄰粵西煙瘴之地實爲貴州要區其有缺出應遴人地相宜之員以資鎮守不必拘於常例得旨俞允五十二年調廣東提督尋以流匪陳四搶奪案鐫級留任五十二年疏言廣州府番禺縣之市橋人煙輻輳附近石碁等處奸民濟匪漁船而外私造花漁奶船出海截劫商民受害如此要區僅有千總一員兵三十四名難資防守又歸善縣屬之飯籬岡一汛濱臨大海密邇外洋土著之民無幾多聚無藉之徒日有漁船四五百出入澳口雖有水汛把總一員兵六十六名遠駐稔山鞭長莫及請以虎門協都司千把總各一兵三百駐守市橋內外以千總一兵

百名分防石碁互巡外海內河移沙灣司巡檢同駐市橋以廣州
協大龍汛把總及兵六十移駐石碁以平山汛守備及兵百名移
駐飯籬岡移平海營稔山水汛把總及兵船駐海口以文官稽覈
保甲漁船以武官盤詰海口奸匪水陸交嚴庶可戢奸弭盜五十
六年疏言商船出洋准帶軍器原爲禦賊之計但槍礮弓矢皆非
商船水手所素習徒借盜資應行禁止除官兵外不得攜軍器出
洋儻有賊船一覽可知亦屬防海久遠之計均議從之是年十月
與海陽知縣爭獲盜功部議革職上以文雄屢著戰功命赴進藏
軍營効力攜其子廷梅以行尋以疾還京雍正元年卒年六十有

二乾隆八年祀山東名宦祠

李君賢

路鳴竹

田駿

李君賢號拙菴遵化州人生有異相喜談兵康熙三十五年噶爾

丹叛投牒兵部從大軍征討凱旋以功揀發雲南授劍川協守備五十八年澤旺阿喇蒲坦侵哈密君賢從鶴麗鎮總兵出塔城口赴江雙橋地險絕且寒三伏冰雪深數尺君賢獨前驅無難色軍士病卧雪中君賢以所乘馬載之親調湯粥以食士卒皆感奮願效死番民見大軍至歡迎道左聲如雷動會內地亢旱廷議令退兵屯邊口主帥將班師君賢力爭曰藏地被蹂躪久番民爭望救我師所過輒望風歸附謂天兵至能蘇其困也且踰險阻已大半計日可搗賊巢今一退則番人失望降者復叛再來攻取恐事倍而功未能半也帥大悟覆奏而前兼程以進歷四晝夜抵喇哩君賢踔險先登禽其酋巴丹巴斬之喇哩平繼攻竹貢降其番目八月既望次墨竹公卡圍之三匝賊窘迫不能當僞藏王自縛請降西藏遂定 上多其功授鶴麗鎮遊擊雍正二年提督郝玉麟征青

海奏君賢自隨軍抵擦瓦岡挺身擊賊禽其目十三人降夷民五千餘戶十二年累功擢南昌鎮總兵所至整營伍簡將弁兵民畏懷乾隆六年以年近七十具疏乞骸骨旋里居林下十年始卒

路鳴竹字九苞南宮人幼讀書兼習韜鈴中康熙四十一年武舉人授涼州千總五十九年從征西藏躬冒石矢有功陞湖廣鎮守備雍正六年苗疆不靖檄統兵屯巖口陞遊擊加副將銜乾隆六年授漢中協副將申條約修墩鋪嚴防守勤訓練在任三年奸宄屏跡九年以足疾乞假歸尋卒

田峻字耕野獻縣人康熙四十八年武進士第一由侍衛授陝西副將青海賊寇哈密峻出屯噶斯賊遁駐軍巴里坤峻周相山原上下數百里請於帥曰地可屯田請以兵十人出一人耕作不數年可減轉輸之半帥奉行之巴里坤屯田自峻始雍正二年青海

賊犯土魯番峻會蒙古台吉往討之戰於烏魯木齊台吉傷峻大呼陷陣斬其酋一人賊崩潰捷聞擢涼州總兵加左督都五年遷廣西提督值逆苗之亂峻帥師直抵八達寨夷其穴梟逆渠以徇餘黨悉平旋師中瘴癘卒於官

李漣

李漣南宮人康熙四十二年武進士授江西瑞州營守備歷陞江甯副將統轄六營訓練稱職授江西南贛總兵鎮舊有鹽規及塘租地租銀兩漣奏請建倉買米借給兵丁一軍賴以無饑雍正十三年陞鑲白旗漢軍副都統漢官無授都統例特恩也是年卒

崔起潛

崔起潛字際雲正定人幼喜讀書工書法及長膂力過人善騎射入武庠康熙五十年舉於鄉明年成進士赴古北口迎駕上疏

上召問家世命復寫所上疏一字不遺再命射三發皆中的上
嘉之授三等侍衛回鑾語諸翰林曰在古北口得一武翰林卽出
疏遍示立召起潛至南書房曰此乃翰林文人往來地爾可爲武
翰林遂賜南書房行走銜復出二米墨迹使觀書法益大進雍正
初出爲大同遊擊累遷衡州副將署永州總兵苗疆不靖疏劾前
雲貴總督鄂爾泰視職事白旄里修家譜著射藝詳說評定戚少
保紀效新書行世

王無黨 袁立相

王無黨萬全人康熙五十一年武進士授藍翎侍衛五十九年授
廣西梧州協中軍都司雍正元年遷雲南開化鎮標右營遊擊六
年調中營七年遷東州營參將九年協剿烏蒙餘匪議敘功加二
等十年四月遷廣西梧州協副將十一月援勦貴州台拱九股叛

苗擢左江鎮總兵十二年四月九股苗復叛無黨馳抵古州分兵
赴八寨督勦清理八弓邛水一帶十二月經略張廣泗檄無黨分
攻台拱之大台雄克之平交上等三十餘寨禽逆首巴利會收牛
皮大箐乾隆元年五月署貴州提督隨廣泗剿撫上下九股餘匪
二年二月實授貴州提督閏九月疏陳黔省急務四事一籌積貯
一築城垣一整墩臺塘房一禁掠賣人口下部議行三年會同廣
泗奏定番州屬姑盧寨苗恃險強橫臣等量遣官兵撲滅其地在
都勻定番界苗狎環處未見兵威乃酌撥漢土官兵三千餘分路
燬逆寨搜深箐禽首惡老排旬餘軍務肅清 上嘉其妥速四年陞
見賞孔雀翎六年四月調湖廣提督八年 上以營伍廢弛革職留
任九年疏言康熙二十八年荆門營守備移駐沔陽新隄又增撥
水師把總一員距本營水程七百五十里陸路八百餘里鞭長莫

及請撤回其千總仍帶原兵駐防報聞十三年二月以徇底標兵
革職命調京引見十四年補湖南沅州協副將十七年遷雲南楚
姚鎮總兵十八年署提督十九年擢鑾儀衛鑾儀使二十年授福
建漳州鎮總兵二十四年遷浙江提督二十七年以目疾解任二
十八年卒賜祭葬如例諡壯愨萬全又有袁立相者康熙三十九
年武進士授侍衛出爲直隸涿州營參將累擢至天津鎮總兵雍
正元年調山西太原總兵疏陳澤州城僻易藏奸非重兵不足資
彈壓請設守備一千總一守兵百人駐澤州歸潞澤營參將管轄
其原設把總及守兵二十人請移駐攔車鎮擇隘分防 上納之
六年臨晉縣奸民糾眾滋事檄遊擊胡海率兵馳諭獻首犯餘不問
其黨果縛首犯獻之立相卽撤兵密訪奸民戶口姓名及有司疏
懈狀具疏以聞 上嘉其能授提督節制山西全省太原之設提督

自立相始也尋以病乞休卒謚勤毅孫秉誠由武進士授侍衛乾隆十五年出爲江南河標蕭營都司累擢至浙江温州鎮總兵三十九年卒

丁士傑

丁士傑大興人康熙五十二年一甲二名武進士授二等侍衛旋遷直隸獨石口參將洊擢正定協副將雍正二年陞貴州大定鎮總兵四年擢福建提督五年緣事革職乾隆元年起授直隸大名協副將四年陞河南河北鎮總兵五年奏言豫省劫案獨多其故緣前督臣田文鏡遇有劫盜皆諱匿不報以致盜賊肆猖雖竊取糧食升斗莫不明火執仗張膽爲之以冀漏網年來各撫臣嚴禁諱匿無論大小竊劫俱令通報故積案纍纍今當於巨鎮大市嚴立保甲密加巡防以銷盜未萌將來凡有應行之事當按起咨商

撫臣和衷共濟使地方營伍均有裨益得旨允行又奏言豫省兵
丁技藝生疎蓋由各營中有從前出師一等兵丁四十名遇有把
總外委缺例應拔補但伊等皆車騎營步兵弓馬未嫻而盡數補
用則眾兵悉無冀望未免怠不知奮勵後應請於各營中挑選材
藝俱優者與出師一等兵丁參酌撥補庶幾人知策勵又奏請整
頓營伍教習弓馬緝捕奸匪借給米穀各事宜均報可七月調浙
江處州鎮總兵奏言處州地僻民貧各兵技藝未精亦以謀食故
分其手足未便驟加督責應漸次整飭以期有成 上是之六年調
廣西左江鎮總兵奏言鎮屬土司間有不法生事者一由所管官
弁縱役騷擾一由怠弛長奸更有內地漢奸勾通所致現飭各汛
營弁力除積習以安邊圉八年調直隸宣化鎮總兵旋擢貴州提
督十年歸化營屬那魯縱火燬寨土傑督兵往捕一戰而平奏入

得旨嘉獎十四年六月尙書舒赫德奉命至黔按驗軍伍以古州地多瘴氣擬將所轄營協調赴都勻土傑以其地屬苗藪要區且其性多疑不可不慮奏止之十八年奏黔省水草惡劣馬匹易致倒斃而例價不敷買補丁役苦之請援照滇省定例通融買補下軍機大臣議行十九年以坐事被議降補廣西左江鎮總兵旋因貴州總督碩色提督宋愛奏參土傑侵剋草豆銀兩私用公儲革職二十九年卒

哈元生

子尙德

哈元生字天章河間人父應忭任湖廣武昌水師守備元生由行伍拔把總累遷直隸黃花路守備康熙五十七年遷建昌路都司六十年因失察私木過關革職雍正二年起補撫標右營守備七月貴州威甯總兵石禮哈奏帶往貴州隨剿狝家苗三年補威甯

鎮標中軍遊擊四年烏蒙土知府祿萬鍾擾東川府鎮雄土知府
隴慶侯助之雲貴總督鄂爾泰檄元生與四川兵協剿賊據險以
拒元生冒矢石奮攻克之鄂爾泰上其功擢雲南尋霑營參將六
年三月米貼苗陸氏不法元生破險設伏擣其巢陸氏就禽八月
赴阿驢界阿路瑪會剿四川雷波士司楊明義以其助陸氏劫糧
者也詔賞銀四千兩遷元江協副將九月兵還阿驢人謀而圍我
軍元生率遊擊卜萬年督戰兩晝夜賊敗卻元生奪據赤衣臺十
月元生由小溜筒江搜捕餘黨阿驢人空寨遁十二月克附逆拉
金者呢等寨鄂爾泰以聞且言元生之初赴阿驢野夷目隨營聽
用爲元生鞭責致滋釁請交部議上以夷性反覆不能專咎元生
免其處分七年正月調犁平營副將二月擢安籠鎮總兵八年十
月烏蒙賊復叛鄂爾泰檄元生由威甯一路進剿不數日擊破賊

數萬射斃兇目黑寡暮末連躡賊營八十里直抵烏蒙復郡治捷
聞上獎其功賜戴孔雀翎冠服賞銀萬兩九年二月擢雲南提
督上以元生母年逾八十特恩賞給封誥以彰慈孝尋調貴州
十年召來京陛見賞給公用銀三千兩十月至京召見特解御衣
以賜命軍機處行走並令同籍省親十一月貴州九股苗不法命
回黔督剿十一年丁母艱賜祭一壇命在任守制六月奏禽兇苗
百餘寘諸法其悔罪投誠者量地安置駐兵以彈壓之十二年三
月奏進新闢苗疆圖志上曰古州八萬等處新闢苗疆三千里非
有圖志無以垂久遠哈元生所奏卽交巡撫元展成詳查考訂以
期周備十三年古州苗叛擾黃平元生遣兵擊之總督尹繼善奏
調湖廣廣西兵會剿詔以元生爲揚威將軍而以湖廣提督董芳
爲之副嗣苗疆底定大臣張照與元生忤倡議分地分兵劃施秉

以上爲上游用滇黔兵隸元生施秉以下爲下游用楚粵兵隸芳
元生與芳劃界交辨日久無功元生坐革職解京擬斬乾隆元年
詔免死賞副將銜赴哈密軍効力三年正月卒於軍 上悼惜加總
兵銜賜祭葬如例子尙德初隨父至雲南充伍拔授千總雍正八
年從剿烏蒙齊疏奏捷以遊擊題補九年補雲南鶴麗鎮標右營
遊擊十三年遷奇兵營參將率兵赴貴州剿古州叛苗乾隆元年
經略張廣泗奏其功詔擢貴州清江協副將二年調定廣協三年
偕大定協副將馬似龍會剿定番州屬姑盧等寨逆苗平之尋丁
父憂回籍六年補湖南辰州副將八年擢湖廣宜昌鎮總兵九年
調陝西涼州鎮尋調雲南臨元鎮十三年閏七月調貴州古州鎮
命赴金川軍營十四年五月傅恒奏尙德攻克右梁山下巴朗平
礮報聞會班師尙德赴古州任雲貴總督張允隨疏劾尙德乖張

狂悖革職交巡撫愛必達查審得尙德焚贓狀擬杖流二十二年正月賞副將銜赴西路軍營效力三月復因解送羊隻多倒斃革職枷號責賠補三十一年回籍三十八年卒

劉順

李煦

汪騰龍

何守林

劉順順天人雍正五年武進士藍翎侍衛六年授圓明園守備七年揀發陝西署靈夏鎮標中軍遊擊十年實授十一年署平羅營參將十二年調署鎮海營十三年署同州協副將乾隆四年署定邊協副將五年遷鎮番營參將九年擢金塔協副將十三年正月率甘涼肅兵千五百赴金川偕副軍高雄出甲索攻囊得甫次松林賊來突犯擊之遁越日追捕賊眾毀其碉閘七月隨大軍平毀諸碉殆盡惟普瞻雙單二碉守甚固日暮將旋師順潛卒敢死士偏單礮縱火焚之賊大潰連奪雙碉大軍繼之遂克色底是時普

瞻之西阿利山賊碉林立八月順冒雨奪山梁木卡復繞山左進
 擊斬賊二十四奪碉一九月躬督礮隊斃賊六十餘克大碉一石
 卡四平房二十四經略納親奏順奮勇冠諸軍十四年金川平議
 敘功加三等擢貴州威甯鎮總兵 上以順在甘肅久熟習邊情調
 補甘肅西甯鎮總兵十六年陞見賜戴孔雀翎二十一年二月督
 解駝馬送巴里坤軍營十二月署安西提督二十三年二月檄辦
 戈壁水泉穿井設臺軍行無滯五月擢甘肅提督仍留安西二十
 四年調安西提督二十六年十一月以病乞休十二月卒 上痛
 悼贈太子少保賜祭葬如例諡壯靖

李煦天津人乾隆四年武進士授藍翎侍衛十三年補江南滁州
 衛守備十八年遷山西運城營都司二十四年遷四川達州營遊
 擊三十一年擢提標營中軍參將三十四年陞貴州鎮遠營總兵

又明年調古城鎮時大兵進剿金川命領貴州兵三千赴敵三十
七年五月抵西路軍營偕副都統富勒渾率南山兵踰喇卜楚克
山梁奪對面高峯賊卡據其嶺復毀賊三大卡賊設木柵林箐中
謀死拒煦馳下山頂乘勢奪木柵六石卡三潛出南山後分路進
攻斬賊十餘賊遁走復分三路進殺賊數百賊悉入大柵固守不
出煦環柵設十餘壁以斷賊援將軍溫福以聞特擢貴州提督時
賊設木城堅守鄂克什舊寨及木蘭壩要路煦逼木城而壁賊來
爭擊敗之殲賊三百餘進壁山岡賊屢犯不得逞先後立卡七乃
謀分路進攻之策溫福以瑚爾迪克山梁西通策卜丹南近木布
爾檄煦屯兵貢噶爾嚴防後路九月賊酋聲言願盡返鄂克什地
贖罪煦等議兵不厭詐諭令將南北兩山美美卡木間壩各卡全
行撤燬煦隨領兵下壓抵鄂克什舊寨上以逆酋狡詐恐其偽退

引我深入爲潛抄後路之謀諭留兵數百交煦等於貢噶爾一帶
嚴備之十一月移屯璦爾迪克總路十二月大兵克明郭宗抵美
諾 上命傅郎劉秉恬同煦留駐美諾理降番事務三十八年正月
溫福奏調煦赴大營分領貴州陝甘官兵進剿師次功噶爾拉分
三路進大兵出著領煦同副都統巴郎出右綠山脊殺賊十餘人
奪卡二座時溫福移營木果木令煦同常保住帶兵三千屯防功
噶爾拉閏三月有賊夜從東北山梁下撲者煦等以其地距金川
遠斷非金川賊匪或係小金川鄂克什換班者竊爲之溫福以山
梁偏近功噶爾拉了口實係金川賊眾因劾煦等捏飾狀 上怒
命卽革責柳號軍營示眾命內閣學士博清額會同劉秉恬嚴訊
尋訊實擬斬會賊番進奪美卧清卡倫參贊海蘭察以煦向經戰
陣素得士心奏請疏柳率兵屯守簇拉角克 上允之並特賞給

遊擊隨同阿桂軍營差委以徵後效三十九年二月補貴州永城營遊擊三月大兵攻羅博瓦山梁賊從喇穆衝出煦奮力迎擊賊多落巖死七月將軍阿桂奏補定邊協副將四十年十一月擢浙江處州鎮總兵四十一年卒

汪騰龍昌平人乾隆二年武進士授藍翎侍衛選江南江甯協標浦口營都司十三年遷甘肅西甯鎮標前營遊擊十八年陞提標中軍參將二十三年擢直隸大名協副將二十四年大學士川陝總督黃廷桂奏留騰龍暫護西甯鎮總兵印務卽留甘肅以副將另補尋補慶陽協副將二十五年五月擢興漢鎮總兵八月調西甯鎮二十六年命往葉爾羌換防三十一年三月回任八月遷陝西提督三十六年大兵征小金川四川總督桂林督南路之師調陝兵二千名騰龍自請赴軍前効用三十七年二月抵卡了軍營

專名將一

時大兵方攻東山梁墨壘溝金川逆酋索諾木潛結小金川土司
僧格桑互爲助守三月騰龍進攻扎哇窠山梁奪溝口大碉五石
卡二十一並擊走對面山梁之賊乘勝克阿仰東山梁墨壘溝賊
眾悉潰散進至達烏獲賊寨十四碉房六百餘斃賊無算四月參
將薛琮敗沒果洲山桂林匿不奏報前四川總督阿爾泰與總兵
宋元俊以欺罔劾之並劾騰龍與桂林終日酣飲不治軍桂林復
以銀五百兩令汪騰龍交總兵王萬邦贖取金川所掠軍士奏入
褫桂林職騰龍解任候訊 上命額駙尙書福隆安馳往嚴鞫六月
福隆安奏阿爾泰所劾皆不實惟薛琮敗沒未據實入告其所交
銀兩乃備賞土番非向金川贖兵之用請即革騰龍職以兵丁效
力贖罪 上特賞參將銜命自備資斧帶兵赴綽斯甲布督土司進
剿十月參贊大臣阿桂以綽斯甲布革布什咱均爲進擣金川之

路而金川所據綽斯甲布其地有日甲爾壘壩者密邇革布什咱
得之可以爲扼隘進兵之策乃令騰龍偕侍衛音吉圖率兵由拉
古鄂進破甲魯賊碉據之南攻正地溝口連破水碉木柵十二月
將軍溫福阿桂進克美諾僧格桑遁入金川大軍分路進攻騰龍
等在甲魯瞭見山下火起乘勢攻正地溝口番眾大奔獲碉六木
柵二十三石卡六三十八年正月副將軍阿桂以馬奈馬爾邦爲
入金川要路後通格臧章谷諸處令騰龍以重兵守之十月補授
甘肅提標中軍參將三十九年正月將軍阿桂進討金川以南路
僧格宗四面受敵請於總兵英泰參將汪騰龍二人中擇派一人
統兵防守 上以騰龍專務口給不足特命英泰往嗣明亮奏英泰
不能離大軍乃改命富勒渾由僧格宗以騰龍協助之二月桂林
奏僧格宗驛卒李文遇賊傷 上怒其疏於防範視職枷號復加

恩釋放隨海明經理僧格宗軍事海明病歿上賞騰龍參將銜
責其實心防守並令桂林往來稽察之六月奏請移南路屯兵於
納木覺爾宗一帶派騰龍駐守七月卒於軍同時有何守林者字
崑峯又字桂亭西甯人年十七從征金川隨偏裨攻碉卡不避矢
石屢冠軍鋒創痍徧體蒙賞縣甲領功劄十三擢陝西七里關守
備時年二十二陞定邊營都司遷甘肅紅水營遊擊調巴里坤右
營又調中營遊擊署理哈密副將遷湖北興國州營參將以足疾
引退後緣事禡職論戍武威其官巴里坤遊擊也兼管屯田事種
田人舊以羣徒充吏士多虐使之晝驅之耕夜則閉諸室以鐵鍊
繫頸足寒饑不得衣食多逃亡獲則置之死而逃者益眾不可止
守林至嚴禁主者勿陵虐飽其飲食冬則人給羊裘一不復拘囚
咸感泣無復逃者是時方運大玉玉大如屋製大車都二十四輪

駕羸馬百餘人鳴鉦擊鼓千夫揮鞭呼喝從之羸馬奔騰踈壓
 夫役多死者輪數轉即止稍憇復鞭之行軸或一日數折則鳩匠
 修作或值雨雪人畜困泥中官役苦之大府以御用不敢奏聞守
 林慨然力言於欽差吳某將軍杜某曰是役也日斃羸馬數十士
 卒數十日費金錢若干萬不能運即運至內地而地狹路窄不可
 容且舟船難載橋梁難勝運至京師尤不易易宜奏聞停止以省
 民力節財用或奏明此玉應作何器招集玉工斲成坯段則運之
 或尚易也吳使者和珅之舅氏也據此致書和珅珅不聽督運益
 急會 仁宗親政珅以罪誅籍歿時於其家得吳書有以上聞者
 上詔停止勿運其知大體敢言如此守林幼未讀書及官守備慚
 不能握筆乃延師自課讀四子書能曉文義罷職家居日閱資治
 通鑑數十年未嘗休卒年七十有二

齊大勇 閩文編

齊大勇字養浩號鳳高昌黎人幼穎異通書史素負大志年二十
爲諸生應鄉試不第乃就武學爲武生雍正七年武闈又不第大
學士馬齊素知大勇膂力過人善弓馬兼長文事爲之稱屈上
聞之特命與新科武舉在紫光閣一體考試欽賜武舉明年會試
殿試俱第一授乾清門頭等侍衛一時名噪都下九年三月奉命
赴準噶爾隸大將軍岳鍾琪軍賜孔雀翎盛甲衣服又解御佩小
荷包賜之大勇益感激圖報馳赴巴里坤鍾琪檄率兵進剿六戰
皆有功西酋聞之心慄十三年補山西撫標中軍參將乾隆七年
陞湖南沅州協副將丁父憂歸服闋補江南鎮海軍標中軍副將
十二年授湖廣襄陽鎮總兵量移陝西興安鎮十三年命統西安
固原延綏河州興漢五鎮官兵進剿金川十四年凱旋陞授湖廣

提督十六年改陝西固原提督疏稱營兵強弱勤惰不一驟難責其成效惟擇技藝絕熟者優加獎拔生疏者寬期學習嚴飭各將弁實心訓練可期漸底精良固原兵悍寬則玩法嚴則缺望惟以公正馭之雖有愚頑久當自化 上韙之調甘肅提督仍移固原十一月入覲命在乾清門行走賜鞍馬弓矢尋復任二十三年調湖廣提督以前在固原提督任保舉不稱鑄職賞參將銜發往巴里坤効力凡四年召回京授河南城守營參將以母喪致疾葬甫畢歿年六十有六大勇服官三十載廉潔自矢區畫軍務鉅細精詳兵民愛之如父母去之日靡不流涕道左勒石以誌不忘其性尤孝友兩遭父母喪哀毀幾滅性鄉黨爲之流涕工書法於舊搨名筆尤精鑒別喜與文士往還問學雅歌投壺有古儒將風焉閻文繡字素公大名人康熙四十八年武進士授三等侍衛轉都

司僉書累官河北鎮總兵廉潔自矢所在革除陋規以練兵核餉
爲務戎務肅然世宗賜內帑千兩並他諸珍物召對賜戴花
翎藤帽晉階議政大臣命率四省車騎營西征與士卒同甘苦均
勞逸士皆用命積勞卒軍遺疏陳方略上震悼諭祭葬廕一子

李國柱齊元輔

李國柱天津人由行伍拔補天津鎮標左營把總雍正八年隨征
科布多十年遣修烏里雅蘇臺木城十一年陞直隸正定鎮王家
坪營千總留科布多緝捕逃匪十三年禽賊首高二殲賊數十人
遷直隸山永協右營守備十三年凱撤回營乾隆三年調江南河
標右營守備六年陞浙江麗水營都司十一年擢温州城守營遊
擊十六年遷撫標中軍參將十八年陞杭州協副將二十年擢貴
州威甯鎮總兵以母老請留杭州協任允之二十二年調衢州鎮

總兵二十七年擢浙江提督賞戴花翎三十年母憂服闋命以提督銜管處州鎮總兵事三十一年二月補湖廣提督八月湖廣常德等府水災國柱率將卒荷土壅水日夜籌防復疏洩湖北濱江州縣田廬之被淹者 上嘉之三十二年調貴州提督三十三年仍調湖廣提督三十五年署貴州提督先是大兵征緬匪國柱撥貴州兵萬餘赴敵雲貴總督彭寶以其兵多老弱不堪者奏參之降三級調用尋以古州黨堆寨苗人滋事率兵馳往剿之疏入 上嘉獎六月獲首逆香要授山東兗州鎮總兵三十六年復擢湖廣提督三十九年正月大軍征金川過境國柱供億有章馬騰士飽上嘉其辦理迅速下部議敘十二月入覲召見垂詢詳切命仍同本任國柱卽奏請於新正月二日請訓並告假省墓 上怒其昧大體交部議褫職加恩改爲留任四十一年以年老休致四十三

年卒

齊元輔字佐九東鹿人由行伍擢至遊擊台灣朱一貴作亂元輔隨藍延珍進剿奮勇先登破之以克復全台功擢浙閩督標參將陞廣東香山協副將計禽老萬山巨盜高松大府特薦入覲獎賚有加給假營葬賜葬費六百兩擢廣西左江鎮總兵雍正八年思明土府屬之鄧橫寨蠻變元輔與總督議不合被劾遣戍特命往北路軍營隨軍進剿科布多有功以副將補用授直隸河標務關協副將調山西蒲州協告休歸十年卒年八十六

董天弼

董天弼字霖蒼大興人雍正十年武進士授四川提標前營守備從討瞻對陞馬邊營都司隨征大金川以功擢戩邊營遊擊大金川平罷師陞章臘營參將調綏甯營再調提標中營率師討巴唐

平之陞維州營副將小金川與黨霸爭地天弼單騎入其境諭以禍福兩土司皆聽命郭羅克者黑帳房部落也掠衛藏人貢刺麻僧天弼奉總督檄出黃勝關察之夜合雜谷兵逼賊巢以槍驚其馬羣馬盡逸賊不得遁生擒其酋麻茲滾布得所掠物事定陞松潘鎮總兵旋賜花翎陞四川提督乾隆三十六年小金川酋僧格桑復叛圍沃日土司于達圍天弼由卧龍關往剿拔密耳賊據斑斕山死守天弼仰攻八日糧匱拔草咽士卒不得已退軍至關見大學士溫福請大軍堅守自將重慶兵一千循黃草坪救沃日道甲金達山斗峻不可上乃下令軍中求問道得近山得勝溝溝在兩厓間厓壁高數仞賊夾溝設守卡厓上會大風雪天弼將健卒夜伏馬鞍行溝中賊守者皆不覺遂直抵達圍破之乘勝拔日隆關迎大軍會於關下時大軍久不得天弼軍消息諸大臣已劾天

弼逗撓而天弼以用奇大勝得免死爲卒伍將兵五百人守資利
寨參贊額駙王色與論軍事大奇之疏請賜副將銜拔曾頭溝陞
重慶營總兵拔卓克朵復賜花翎拔橫梗山梁抵谷葛復繞坎竹
溝間道進攻燒大木城一旁擊碉寨數十皆下連拔沒藥山大版
昭復迎大軍會於布郎郭宗時南路參贊阿桂亦拔美諾賊巢僧
格桑竄入大金川大軍遂拔氏木達是役也天弼常爲軍鋒而得
勝溝坎竹溝之捷冒死入險地以迎大軍功爲最三十八年上
以大金川酋索諾木嘗助小金川命溫福爲定邊將軍討之擢天
弼爲四川提督守黨霸溫福奏底木達新定乃賊巢且諸軍要隘
天弼宿將宜鎮之與兵五百人守底木達底木達當賊衝勢危甚
而溫福復調兵三百赴大營並撤後路接應兵一千三百是時溫
福自屯木果木軍屢勝不以賊爲意七圖葛拉爾思甲布等千餘

人先後詭降温福開軍門納之使雜廝養七圖安堵爾等因出入
大營誘降人爲內應且探知底木達兵弱無後援定計先犯底木
達再劫木果木大營六月一日賊潛自山後擁眾來犯天弼兵單
不能支遂遇害年六十二後九日賊劫大營温福亦死天弼貌瓌
瑋美鬚髯臨陣常身先士卒所向無前有哈薩克二赤驃馬最雄
健温福常索之天弼曰天弼倚此二馬平金川俟手梟二逆并二
馬上將軍温福壯之其歿也在軍諸大臣劾天弼失守要隘上
怒徙其子聯毅等於伊犁四十一年大小金川平頭人七圖萬拉
爾思甲布傳送行在上問爲逆狀對甚悉復言陷底本達時四
川提督董天弼將所部二百抽短刀力戰不可敗夜半頭人以鳥
槍數百環擊殺之至是乃赦還聯毅復舉人原資賜內閣中書

許成麟

許成麟字瑞符號慶堂易州人乾隆元年武進士授侍衛歷廣西
贛州左營遊擊廣信營參將廣東督標左營參將肇慶協城守副
將調廣東督標中軍副將母憂服闋補湖北黃州協副將擢江南
壽春鎮總兵調江西南贛總兵遷廣西提督以事鑄級授江南狼
山總兵年六十一卒成麟歷敷中外三十餘年精勤如一日文武
僚屬皆推誠相與終始無間言視兵民一體持大綱不事苛細廣
信遇歲旱米價翔踊民嗷嗷待振成麟以郡守他出知縣不任其
事遽以狀白大府出積穀數千斛減價糶之民得不饑在肇慶增
城民王亮臣聚眾謀亂成麟馳入藍分華峯諸山場搗其巢穴逆
首皆就禽無一漏網者成麟初臨贛州有威惠及總戎南贛兵伍
聞其至皆相戒曰勿欺許公粵西左控交阯右界滇黔蠻獠錯居
多瘴癘成麟巡歷兩鎮七協及諸土司關隘率兩歲而徧輕裝減

從未嘗以供億累民柳州多火災成麟闕城廂多草舍乃請支公
庫生息銀假兵民改易陶瓦火患遂止又以効力武舉限於例百
不得一缺因與總督議通省干把出五缺後補用武舉一人粵西
距京遠部推武職到任輒經年事多稽閣奏請照它省預保之例
得旨允行大兵之征緬甸也詔粵西協濟戰馬二千餘匹成麟督
率所屬具芻麥遞送並火藥數萬斤皆如期而至狼山夏旱率屬
步禱烈日中值盛暑親至海口呂四場閱水師戰船教以陣法卒
以積勞成疾而歿成麟事親孝在宿衛聞父卒一晝夜馳三百餘
里比至號慟欲絕季弟蚤卒撫其孤如已出居鄉恭儉退讓嘗訪
友郊外乘一騎一童子自隨見者不知爲貴人也

哈攀龍

子國興

國興子文虎

哈攀龍河間人乾隆二年一甲一名武進士授頭等侍衛九年授

專八名將

三

福建興化城守副將十一年擢河南南陽鎮總兵尋調福建海壇
再調漳州十二年丁母憂回籍十三年二月上東巡攀龍迎駕
命往金川隸總督張廣泗軍署松潘鎮總兵五月統兵出美諾溝
規取撤卧山大松林噶達諸寨分兵搗馬溝右梁搜截松林毀松
卡二過左梁山溝礮斃賊數十六月攻克渴足寨焚碉寨四水城
一殺賊二十餘尋與署重慶總兵任舉合兵圍攻色爾力石城舉
陣亡攀龍入上下林殪賊三十餘奪舉屍回七月偕同都統班第
署重慶總兵段起賢侍衛富成分路夜襲色爾力焚木卡三殺賊
五十餘進破石梁雙溝諸壘經略訥親總督張廣泗會奏哈攀龍
戰不力降二級留任上命攀龍回奏知其屈復原官尋隨經略
大學士傅恆夜攻色爾力先登拔石未殺賊番數十十四年二月
金川平凱旋攀龍功加三等再功加一等命署固原提督十六年

調湖廣十八年奏整飭弁兵 上嘉之二十一年實授湖廣提督
明年調貴州二十四年陞見以病留京二十五年卒賜祭葬如例
子國興

國興乾隆十七年武進士授三等侍衛二十三年補授雲南督標
右營遊擊二十八年遷東川營參將三十一年緬甸匪目召散據
孟良爲亂大學士楊應琚誤用趙宏榜納木邦蠻莫之降及宏榜
師敗新街匿不以聞以永北鎮朱崙爲總統龔士模陳元震參其
事國興至鐵壁軍營甫出關而緬師已大至時十一月十八日也
緬兵數萬國興率東昭兵九百人乘高據柵戒兵卒無動俟賊近
柵開槍擊之相持四晝夜提督李時升自黑山門以兵七百益之
賊詐降別遣其黨從萬仞關入於是撤兵入關緬人始知我軍有
哈將軍者二十二年署騰越營副將會擊賊於楞木進據猛卯城

親督戰槍傷右顛病齒及臂援兵至賊始遁楊應琚以聞賜花翎
十一月從將軍明瑞克木邦戰蠻莫大破之復偕侍衛莽克察擊
斬守隘賊六十餘十二月擢楚姚鎮總兵三十三年五月陞見命
在乾清門行走資銀幣九月還軍營調普洱鎮總兵十月擢貴州
提督三十四年經略傅恆籌戰事宜用水師國興赴銅壁關外野
人山督造戰船調補雲南提督並加太子少保銜以示鼓勵船成
隨經略耀兵猛拱孟養南豐猛列猛壩而還師次老官屯水兵不
能進賊水陸防禦堅官軍從外來疲且病惟將軍阿桂所將萬餘
從虎踞關出軍威頗壯會開地道築臺發大礮擊之緬懼其酋諾
爾塔遣其目得赫蘇立棚上遞緬文乞解兵傅恆令國興出見曉
以利善諭還三事一不敢再擾邊一送還內地人一十年一貢緬
誓如約遂撤兵兵撤而貢表弗至且留諭使都司蘇爾相而詭言

國興曾許給還木邦猛拱蠻莫三土司三十五年召國興至京削
宮保銜降補貴州古州鎮總兵明年調雲南臨元鎮後二年得魯
蘊至老官屯請如前約時金川需大將命出川馳赴溫福軍營三
十七年授西安提督轄陝甘征兵命偕總兵董天弼由曾頭溝一
路徑取底木達布朗郭宗溫福奏請國興別由策卜丹徑取美諾
其曾頭溝一路專委天弼七月國興由阿喀木雅山溝繞出瑪爾
廸克山寨詳察策卜丹地勢林深徑狹取道實難乃率兵二千往
助海蘭察攻瑪爾廸克會貢噶山左賊千餘謀劫糧國興馳擊八
月設伏貢噶山梁斬賊百餘並搜箐奪其碉卡九月賊叩國興營
請降且獻鄂克什地國興要南北兩山美美卡木蘭壩及瑪爾廸
克並獻始許降越日賊果盡撤各柵國興以兵入鄂克什舊寨賊
退守路頂宗十月金川逆酋索諾木送前被留之外委臧儒等至

國興營且請勸僧格桑出降溫福以聞諭國興勿爲賊誑言所惑
時國興同海蘭察等以兵五千駐貢噶山謀攻策卜丹阻冰雪未
進命遣師協剿路頂宗路頂宗山麓有巨溝溝之源爲南山海蘭
察繞出山後侍衛額森特由小路徑接應而國興直越溝攻其碉
大軍繼進遂克路頂宗及喀木色爾寨先後破卡五十餘座碉三
百餘俘獲甚眾十一月由喀木色爾北山攻穆拉斯郭大寨進據
兜烏山巔與總兵馬彪合兵奪附近碉卡克額爾莽木柵又率兵
渡河隨大軍進剿明郭宗別以兵襲擊公雅山克木爾古魯賊寨
並奪據嘉巴山麓下部議敘十二月廷議於平定小金川後分兵
三路討金川命國興爲參贊大臣是月克明郭宗焚其念經樓整
兵進取日果爾烏谷山麓直壓美諾賊巢尋隨大軍攻克布朗郭
宗僧格桑遁金川我軍直抵底木達僧格桑父策旺出降小金川

平而國興適病卒 上深軫惜賞銀一千兩存卹其家並加贈太子太保賜祭葬如例諡壯武入祀昭忠祠命圖形紫光閣御製贊曰中土同人性多拳勇哈其大族每出將種向略趨拉屢舉險要中道病殂成功未告子文虎以廕補陝西提標右營守備三十八年攻木果木陣亡入祀昭忠祠賜其弟文彪爲千總

俞金鼇 李壽春

俞金鼇字厚菴天津人乾隆七年武進士授藍翎侍衛十五年補山東高唐營中軍守備十七年擢甘肅西甯城守營都司二十一年陞蘭州營遊擊二十二年陞肅州鎮標中營參將二十七年調西甯鎮鎮海營參將二十八年陞廣東澄海協副將二十九年調陝西西鳳協三十年擢廣西左江鎮總兵三十一年調甘肅肅州鎮三十二年命往伊犁辦理屯田三十四年屯田收穫豐裕三十

六年伊犁將軍伊勒圖奏綠營兵二千二百名每人收穫米二十八石有餘部議加二級三十七年調巴里坤總兵三十八年調福建漳州鎮總兵九月擢烏魯木齊提督三十九年奏籌辦春耕事上嘉獎之四十一年奏沙州副將都司移調安西參將守備原額兵數移調沙州以安西地當孔道差務殷繁稍事變通防守差役均無貽誤巴里坤迤西至瑪納斯幅員三百里未設墩塘宜擇有水草地或三四十里或五六十里酌量安設下軍機大臣議行九月會同署烏魯木齊都統永慶奏烏魯木齊提標移駐眷兵上年秋間以兵丁鹽菜銀既經裁汰照安西舊例每石以二兩二錢全數折銀實給令其自行買食伏思糧價每至秋成平減值青黃不接則必昂貴若按季領銀聽其自行買食勢必隨價低昂仍與生計無益伏查官兵一歲糧餉銀折例於年前秋季委員赴鎮廵

道庫領交廸化州存貯按季支放莫若乘糧價平減時將一歲應折銀兩酌定鎮兵眷屬一年應用糧米若干預將價銀提出選員發給及時買貯營倉按月散放至採買長贖銀兩同正餉並貯州庫仍按季給發俾各兵日食足而衣履有資再瑪納斯新設眷兵二千名本年冬初先到一千名其度關糧餉亦照提標科則以二兩二錢折銀實給見隨提標糧餉額銀請領兵丁眷屬一例用度口糧勢所必需應請將一歲糧石一體預爲買備上從之四十二年調江南提督四十三年調福建陸路提督四十六年陸見移甘肅四十九年固原同民李化玉與河州新教田五聚眾滋事分擾固原之裴家堡分水鎮進攻靖遠縣城金鼈借涼州副都統圖桑阿合兵會剿賊竄馬營街乃與剛塔等督兵追擊斬獲多名搶占山頂賊卡土司楊宗業督番兵仰攻東山賊憑高衝壓番兵敗

走金鼇迎救之賊始退夜竄石峯堡糾合會甯回黨至數千人副
都統明善進擊受創而亡金鼇進至烏家坪再擊伏羌賊匪斃其
目三生禽二十九人轉戰至秦安土鼓山賊敗竄蓮花城六月踵
賊抵雙峴隨總督李侍堯由中路進攻敗之福康安奏大兵進剿
石峯堡請令金鼇掘防底店以顧糧運後路七月逆回平調湖廣
提督五十年正月預千叟宴五十一年調直隸提督未起程而辰
州府鳳凰廳所屬句捕峒苗人石滿宜聚眾爲亂金鼇聞報卽馳
往查拏旋奏鎮筮鎮總兵尹德禧督兵直擣賊巢生禽首逆上
以金鼇諳楚省苗地情形留湖廣提督任以資彈壓五十四年十
二月陛見命在乾清門行走五十五年正月賜紫禁城騎馬三月
回任五十八年以骸疾請解官回籍上允之加恩賞左都督銜
以示優眷是年十月卒金鼇受朝廷特達之知恩眷最爲優渥嘗

作金門待漏圖自撰序文徧徵題詠可以想見當日君臣遇合之隆舉千叟宴時集闕廷者三千人上手賜玉觥者二十二入而金鼈名次十九且命賦詩紀事以未嫻吟詠對上顧笑曰汝香樹小舅又受業其門豈未解吟詩者香樹者錢陳羣之字小舅則北俗所稱妻弟者也其官兩湖時相國和珅欲納交金鼈毅然不附其生平大節尤不可及云其後天津又有李壽春者道光二十一年一甲三名武進士侍衛內廷獲入宮瘋犯賞頭等侍衛俸滿引見中五箭賞戴花翎授福建督標左營參將陞浙江杭州城守營副將調福建延平營副將剿征會匪屢立戰功守城八閱月積勞成疾歿城樓上事聞優卹廕一子世襲恩騎尉

名將傳一終

大清畿輔先哲傳第八

名將傳二

大清畿輔先哲傳弟九

天津徐世昌撰

劉國樑

董果

孫廷璧

劉國樑任邱人乾隆十九年武進士授三等侍衛乾清門行走二十六年授雲南提標都司三十五年從征緬甸有功定邊右副將軍阿桂奏請議敘三十六年升雲貴督標左營遊擊尋遷騰越營副將四十年二月擢陝西延綏鎮總兵隨征金川四月進攻木思工噶克了口偕總兵達色截殺各路援賊五月大軍進克下巴木通諸處國樑偕副都統烏什哈達總兵海祿等連破了口左手木城石碣直上榮噶爾博大山梁奪其碣座連戰二日自第一峯至第七峯悉下之七月復偕署總兵特成額攻破第八九峯及巴占穆古諸碣卡進至冷角寺從高下壓悉焚寺旁砦落直偪烏勒圍

賊巢四十一年兩金川大功告成調雲南永順鎮總兵賞戴花翎
圖像紫光閣列後五十功臣內命儒臣製贊四十二年調騰越鎮
總兵尋以事革職留任四十三年調開化鎮總兵明年總督李侍
堯劾其才具平常命解任來京發往伊犁効力五十一年釋回署
東河沿守備以母老告歸五十八年卒

董果豐潤人乾隆二十六年武進士授三等侍衛三十年補陝甘
督標右營遊擊時甘肅回民馬得鰲爲積盜總督吳達善檄果偕
固原州知州姚葵往緝獲得鰲並黨羽十餘人擢湖北荊州營參
將三十七年遷鄖陽協副將領兩湖兵征金川三十八年參贊豐
昇額以綽斯甲布道路通金川檄果督兵防禦並總理軍糧時山
西撒拉角遞公文兵丁冉如學夾壩被殺飭果查定界址獲米商
田濟國載銀兩米票赴軍營射利報聞正法三十九年將軍阿桂

密約分兵進攻達爾圖果潛師伏深箐攀山梁擊賊不備賊覺抵死拒果直薄賊壕力攻木城未克會有外賊來援果左右衝擊受重創奮力殺十餘人餘悉遁授福建甯鎮總兵四十一年春大兵攻噶拉依督兵防守巴布郎谷山金川平賞花翎赴建甯鎮任旋調漳州鎮總兵四十二年調臺灣鎮四十五年奏言鳳山縣屬山猪毛社生番直理產等因被土目虐索率眾移居大路關山腳願內附果妥爲安插疏入報聞四十六年丁母憂服闋補福建福甯鎮總兵四十九年調海壇鎮因足疾解任卒

孫廷璧大興人乾隆二十五年一甲三名武進士授侍衛三十年出爲湖北荊州參將三十三年土匪孫大有何佩玉鳩眾爲亂廷璧會同荊州知府蘇長齡率兵剿捕殺賊四十餘生禽孫大有數十人寘之法事定擢湖南永順協副將三十四年擢浙江黃巖鎮

總兵三十七年坐事鐫級尋召見以遊擊發往四川軍營効力時
大兵征金川廷璧抵南路達烏營隨侍衛明亮進攻甲爾木山
梁十二月隨參贊大臣阿桂攻取美諾三十八年阿桂爲定西將
軍檄廷璧經理軍藥隨克納占山梁三十九年克絨布寨卡卡脚
等處三月克穆當噶爾得碉一石卡三先後皆在事有功九月補
湖南九谿營遊擊分領楚兵由金川河南進攻布咱爾里克石卡
二四十年調赴北路宜喜軍營出達爾山梁攻克得楞諸碉卡連
破茹寨石真噶山包沙爾泥寨以功最得議敘是年復偕翼長全
保掃除約木底一帶溝箐克獨古木卡及甲咱各寨直抵獨松四
十一年毀噶拉依賊巢金川平大兵凱旋廷璧留辦善後事宜四
十三年抵九谿營任五十四年擢江南蕩營參將六十年調補
鎮江嘉慶三年擢太湖副將八年擢狼山鎮總兵尋調蘇松十年

遷浙江提督八月調湖北提督十月卒於官

李國梁 安廷贊

李國梁豐潤人乾隆二十二年第一名武進士殿試一甲第一授頭等侍衛三十一年授浙江提標參將三十四年擢台州協副將三十七年調象山三十八年擢定海鎮總兵三十九年調處州逾月調福建漳州四十年護理福建陸路提督四十一年實授四十二年母憂回籍四十四年署湖廣提督明年服滿實授四十六年川省囑匪結黨劫掠爲民害國梁檄將卒捕治 上嘉其妥速命率精兵三百往兩湖貴州四川會同督撫實力搜捕國梁尋奏拏獲囑匪張元保李廷昌多名鞫實分別懲治 上念國梁捕匪有功四十八年賜其父李瑞大緞貂皮並以瑞年屆九旬特調國梁直隸提督俾就近侍養蓋異數也五十一年失察汛兵糾夥謀竊部

議鑄級得旨免降調五十二年卒加賞太子太保銜賜祭葬如例
諡恪慎

安廷贊樂亭人生而駢脅巨臂膂力絕人乾隆二十二年武進士
由二等侍衛出爲四川保甯右營都司會噶匪亂檄領銳卒五百
協剿道與賊遇戰一晝夜自引弓射其渠殺之賊潰走廷贊會眾
議乘勝搗其巢眾難之廷贊曰賊在山如池魚穿虎圍可困攻可
取也若待其外出山險兵稀如釣鱗巨壑逐獸平原安能測其所
至遂鼓行而前憑險急擊剋日破賊壘禽其魁斬之餘黨悉平以
功陞重慶鎮右營遊擊累官至廣東香山協副將尋署總兵引疾
歸卒於家

王普

王普字德輝固安人乾隆六年授永定河外委補把總會河決落

職投江南營辦理天妃閘閘官事務累遷至文登營副將三十九年以事鐫二秩逆匪王倫擾壽張臨清棠邑陽穀諸處山東巡撫徐績督兵剿之不利檄普至東昌九月七日戰賊於臨清周家店身爲士卒先戰六時斬捕過當賊不支始退走疏聞以參將用適將軍舒赫德額駙拉旺多爾濟兵繼至會戰臨清殲賊殆盡臨清平復副將銜連擊諸郡賊皆潰走普易裝疏捕民間匿匪四閱月全境肅清詔以總兵用賞花翎授河標副將四十九年擢河南河北鎮總兵十月入覲問王倫事對甚悉抵任獎勵將弁教練士卒不職者禡之老弱技疏者汰之一時賞罰嚴明軍政肅然五十年伊陽奸民秦國棟聚眾戕官聞警馳往未至賊竄走以是挂部議先是賊起崑民受迫挾多附之者至是皆遠遁普下令悉招之歸伊人戶祝之普轄衛輝彰德諸地凡九營益以時簡閱而訓練

傳方
之嚴束士卒有縱馬傷田間一禾者輒鞭責之不貸公餘訪漢孝
子丁蘭郭巨明超烈女諸墓明季王丁二忠祠爲勒石表彰之以
勵民俗五十五年上八旬萬壽特詔復原官召見賜食品等物
並御書福字玉如意五十七年患目疾致仕歸又四年卒於家年
七十有一

謝斌

謝斌字定國定州人由武生中乾隆二十一年鄉試第一二十六
年成進士選授江南瓜州守備陞山東渠山營都司拿獲逆匪張
廣仁擢河標營遊擊三十九年戰臨清逆匪王倫被創擢河標左
營參將陞廣西梧州協副將五十年總鎮浙江處州五十一年三
月迎駕楊家莊詢王倫戰創事賞戴花翎加奮勇巴圖魯名號調
補温州鎮總兵署甯波提督復調補定海鎮總兵六十年致仕嘉

慶十四年卒於家

蘇靈

劉文忠

安定邦

蘇靈大興人乾隆二十七年由行伍拔巡捕營中營外委累擢至遊擊三十九年授北營參將四十二年父憂服闋賞副將銜授圓明園副將四十六年調中軍參將四十九年遷甘肅涼州鎮總兵次西安聞同變馳赴前敵奪賊卡殲數十人賞花翎副將卒掘壕斷賊水路力戰十六次箭傷左肘力疾搜捕賊首馬文喜等四十餘人賊平列首功五十一年調河州鎮總兵五十二年擢甘肅提督五十七年陝甘總督勒保奏靈選赴藏馬匹疲瘦內召以巡捕營參將補用五十八年授圓明園副將五十九年擢湖南永州鎮總兵六十年黔楚逆苗滋事靈至鎮率兵迎擊奪據得勝坡獅子口山梁上嘉其勇隨總督福甯提督劉君輔屢殺賊爲軍鋒

福甯檄守鎮竄賊來窺城靈隨福甯防禦出不意襲擊之賊叢集
撲螺螄坡卡冒死上靈槍箭並施殲賊無算賊以城東觀景山扼
要萃眾來爭我兵奮勇擊之賊陣動靈率遊擊胡廷泰等出茶園
坡夾擊斃三百餘多墮崖死餘悉潰竄靈追擊之轉戰石羊哨楊
州坪八晝夜賜勤勇巴圖魯名號賞貂冠大小荷包諸物嘉慶元
年調赴隆圍堵禦連獲悍目時老必吳滿兒等論功賞賚有差靈
撫禦苗疆招降石季三歐再禮等一百八十餘寨煙戶三千餘事
平功列超等二年授廣西提督五年以川省邪匪爲亂調兩粵兵
擊徐添德股匪 上嘉其奮勇交部議敘六年十一月卒於軍
劉文忠獻縣人乾隆三十四年武進士殿試騎射馬驚奔至紫光
閣文忠躍下屹立控之馬不能動 上大喜特選侍衛異數也後
官貴州副將守黃草壩苗匪圍之堅守月餘晝夜不交睫事急取

救兵無能出者文忠單騎大呼揮刀而出賊披靡遂取救兵至賊
悉平

安定邦懷安人乾隆四十八年舉武鄉試充兵部差官驍勇有幹
略膂力過人善挽強弓馳奔馬矢無虛發有敢戰名逆苗倡亂隨
官軍征剿十年之間大小百餘戰先登陷陣禽首逆王囊仙王抱
羊韋七綰鬚高二伍懷志等十數人軍功列超等賞戴花翎歷升
瑪納斯協副將署巴里坤鎮總兵以病乞休卒於家

蔣觀濤王鑑

蔣觀濤寶坻人乾隆三十六年武進士三十七年補授福建延平
城守右營中軍守備四十六年遷湖南阮州協中軍都司五十三
年遷湖北遠安營遊擊六十年黔楚苗人爲亂觀濤禦之鶴峯州
聶車坪復調赴湖南隆軍營督剿龍門楊家諸寨嘉慶二年調赴

湖北協剿教匪戰十一次受石傷擢均房營參將屯白溢寨麻虎營殺賊二十餘三年赴鄖陽堵禦禽逆匪石映蓮四年卜三聘分竄黃草坪觀濤捕斬多名賊退走巫山五年遷湖南常德城守協副將六年屯興山房竹邊隘截剿川陝土匪七年湖廣總督吳熊光檄觀濤與副將孫應奉擊賊與歸時房保空虛山內零匪百餘竄出滋擾觀濤回兵會同總兵李天林南向迎擊數日悉就禽七月賊竄至房縣錦雞坪攻圍民寨復率兵擊走之八年川陝諸賊出東河秦口北竄熊光檄都司鄧興相赴北溝口觀濤扼南溝口分兵夾擊賊亦分兩隊一向北溝口一翻山繞出南溝口官兵後我軍前後受敵勢不支觀濤馳上對面山梁憑高奮擊賊大敗潰搜除匿賊悉殲之九年賊平十二年授雲南昭通鎮總兵二十三年卒

王鑑字光照定州人乾隆五十五年武進士授襄陽鎮標左營守備屯南漳縣嘉慶元年教匪擾保康據縣城西北之鳳凰山圍城三日鑑親督兵勇擊走之退踞城西二百里之東坑屯高峯上鑑塞隘絕水道賊窘乏降誅其魁釋脅從令歸農事平改提標左營授廣西梧州協都司思恩營遊擊會雲南高羅衣夷人不靖命赴百色鎮防堵署廣西義甯協副將陞湖南臨武營參將引疾歸卒年八十三

穆維 安慶 劉管城

穆維清苑人隸督標為兵乾隆三十九年山東逆匪王倫滋事維以斬偽總兵楊壘功擢千總先是賊聞京兵南下急掠糧艘造浮橋圖西竄維揮軍直搏獲賊礮二座焚其橋 上嘉之給奮勇巴圖魯名號並賞戴藍翎積功至膠州營副將嘉慶元年調赴楚剿捕

教匪五月西安將軍恆瑞攻賊劉家集維率兵馬橫貫賊陣大軍躡其後衝擊之賊屍山積六月師次灤河北岸賊屯對岸董家岡梁家坳諸處連營數里維與副將王文雄選精兵五更潛渡先擊董家岡奪賊卡遂移師破其營九月隨烏魯木齊都統永保協剿鍾祥賊再隨湖北巡撫惠齡剿襄陽賊皆有功二年授登州鎮總兵仍留軍十月賊首高均德王廷詔擁眾二萬餘分擾斑鳩關窺渡漢江維偕副都統六十七等迎擊雙河塘復追敗之士門埡功上蒙嘉獎三年五月隨都統勒保擊王三槐徐添德於石壩山大敗之賞給玉喜字二月三槐添德分竄通江維與提督富成等截之竹峪關洪口諸隘走賊首冉文儔連攻黑馬山大敗之四月賊出李家山西逸勒保檄維軍截其前維登大完山巔以礮下擊賊懼退他軍乘勢追捕斬馘不可勝計維直搗李華寺破文儔之巢

以勞致疾卒於軍 詔視陣亡例賜卹子承齊廕生

安慶清苑人由行伍補督標後營把總嘉慶元年川楚教匪滋事檄赴湖北軍剿賊七月隨直隸提督慶成敗賊於紅土山獲賊目黃玉貴授行營千總九月剿賊陳家河受矛傷十一月戰於草店有功賞藍翎二年正月隨理藩院尙書惠齡破賊槐樹岡擢行營守備淡家岡杏兒山之戰禽賊首劉起榮補易州營千總時川匪出雲陽圖窺楚慶隨惠齡馳軍抵梅子壩偵賊聚雙河口惠齡分兵先踞山梁賊持紅黃白三旗撲官軍慶撲入黃旗賊隊惠齡率兵繼之捕斬無算八月再敗之太平縣亭子廟追至官塘壩射殲騎賊目餘盡奔擢直隸插箭嶺守備十一月隨西安將軍恆瑞擊賊司渡河戰三日禽賊數千生禽其渠王廷基等五百餘人賜強勇巴圖魯名號換花翎三年升沿河口都司四年戰張家坪敗其

眾斃賊目張漢潮命以遊擊擢用五年賊萃鎮安凹山梁我兵分三路進慶從中路首入殺七十餘賊八年三省底定補直隸督標後營遊擊積十餘年擢至四川松藩鎮總兵二十五年命來京道光元年賞頭等侍衛五年授廣東潮州鎮總兵九月卒劉管城慶雲人乾隆五十四年武進士授藍翎侍衛五十七年選湖北襄陽鎮標中營守備嘉慶元年湖北教匪聶傑人犯宜都據鳳凰山扼險抗官軍屢掃眾來撲營管城折衝搏戰禽賊目涂聯芳乘勢擣其巢獲聶傑人殲禽無算捷入陞雲南鶴麗鎮標左營都司二年賊竄杏兒山遇伏而殲復追擊之隨州大洪山禽其渠劉啟榮管城功最多賞戴花翎二月調陝西定邊協中軍都司六月追捕襄陽黃號賊齊王氏姚之富躡入川敗之麻壩寨八月賊脅其黨復竄回楚屢爲管城所摧三年陞甘肅河州鎮標左營遊

擊五年擢陝西波羅營參將擊賊黃瓜嶺茶鎮諸處捕斬八百餘人六年陞岷岷協副將八年調陝甘督標中軍副將八月三省漸就平屯兵西鐵佛寺摻斬木馬河支河零匪十二月移防江岸七星壩賊出白土嶺北折籬溪管城遏之平利獅子壩賊復由旱田壩北走甄坪悉爲我軍所截斬獲甚多九年剿除苟朝九股匪餘黨悉平十五年調甘肅永固協副將十九年擢陝西陝安鎮總兵二十三年陝甘總督長齡劾管城鎮將不和降調二十四年補廣西富賀營都司道光二年休致十八年卒

邢敦行

邢敦行字立德號恕堂定州人少失怙倜儻好勇而事母最孝遇不平事輒與人鬪聞母喚屏息斂手退雖堵門詬詈不出也乾隆四十二年由武舉登進士廷試第一充頭等侍衛外授參將陞廣

東協副將奉母抵任所五十四年十月安南梗命孫士毅奉詔督
剿檄從征敦行恐貽母憂秘不敢發乃詭曰兒奉命巡邊歸期無
定母可攜兩弟暫歸遂將平日所製衣服百餘襲及紫杉板四潛
貯船底次日送母登程強笑語母亦不之覺也別後目送里許乃
再拜稽首放聲哭曰昔爲人子今則爲人臣矣星夜赴大營連戰
連捷賊眾震怖棄城走士毅命撤兵三百里獨以兵千人付與敦
行及許提督二副將守之賊乘隙結他國兵眾號數萬夤夜至敦
行與諸將登埤議曰賊眾一至城下勢如破竹矣吾輩守亦死戰
亦死與其束手待斃不如捐軀赴敵尙可冀僥倖奏功於萬一也
遂以衣佩一二事付其僮曰歸告太夫人謂兒不得生還持此葬
我可也遂與許提督等開門赴敵死事聞議卹贈總兵銜世襲騎
都尉

孫清元 王清弼 李錫命

孫清元晉州人乾隆四十五年武進士官湖北襄陽守備遷貴州銅仁協都司六十年苗人石柳鄧叛圍松桃城總督福康安督兵至城下清元出城合擊解其圍賊復踞長冲塘負隅抗官兵清元登山毀寨殲其眾論功賞花翎遷平越營遊擊嘉慶二年隨內大臣額勒登保四川總督福凝征湖北教匪清元戰賊大流口碎其木城晉安徽甯國營參將擢安慶協副將四年川匪張起貴竄楚境清元設伏破之敗其黨李樹徐添德萬餘人李樹謀竄荆襄清元伏以要之賊至伏兵起追殺二十餘里俘馘無算擢襄陽鎮總兵五年賊渠樊人傑自陝境入楚清元禦之竹山南田壩賊竄房竹兩縣界梗糧道不通清元自東路攻賊潰而走鄖復敗之羅家川賊遁保康追至五虎坪溝口揮兵鏖擊大破之賊東趨當陽四

散入陝境徐添德復掠南漳渡漢江直趨荆門我兵分三路禦之
賊大敗入西南山餘黨奔吉陽關及陝西白河縣境清元乘勝促
之賊折而東逸我兵躡之窮晝夜不息賊勢蹙大軍復敗之蕭家
堽清元由洋坪至蔡家灣爲策應之師追殺三十餘里奪獲輜重
禽僞先鋒廖黑兒適丁母憂請歸葬奏入 上留軍不遣賞騰阿
特依巴圖魯名號添德復自陝竄楚圖走均州穀城六年復結賊
渠張允壽擾房縣清元隨湖廣總督書麟屯壽陽坪進擊克之復
追敗之白沙河賊北走鄖境時川匪苟文明李彬由陝竄竹谿而
賊黨崔宗和胡名元聚眾三千撲攻房北境清元分兵應之擊走
其眾是月改爲鄖陽鎮總兵諸賊懼楚兵謀竄入川清元出興山
東迎擊之賊據茅倫山林木叢密勢甚險大軍萃攻累日賊死傷
殆盡清元礮殪其渠張允壽於熊藏山捷聞 上嘉其勞賚賜優

渥崔宗和胡名元逸至楊家店王國賢率賊二千與之合六月又
與川匪湯思蛟劉潮選同擾楚邊清元隨提督長齡擊諸五台山
斃五百餘賊遁入黃家山我軍以礮環擊賊乘夜突出撲營清元
衝陣入捕斬三千餘人生禽偽總兵彭良才賊折趨東南清元取
道毛耳觀敗之賊首龍紹周與崔胡合折入楚屢爲我軍所摧而
川陝餘黨辛聰曾芝秀又覆於興山賊目趙金時龍紹周窮蹙入
川糾合王四等由大甯巫山折還房縣清元拒之於柵子山復扼
其東竄擊諸平三壩賊出巫山夜义崖清元截其前參贊大臣德
楞泰擊其後盡覆之王四曾芝秀匿老林中饑不得食糾黨戴四
趨巴東復合川匪樊陳聚龍潭坪仙峯觀清元與吉林泰分兵馳
擊之賊潰七年王四曾芝秀出川東竄歸州走馬嶺清元兼程出
賊前計禽偽元帥掩殺賊黨四百餘人賊鋒大挫尋會長齡馳赴

歸巴擊敗之白果園賊分黨擾緒河圍攻民寨清元遣兵解其圍
乘勝追殺四十餘里賊復糾悍黨五六千人踞雞公山梁清元渡
河設伏掩擊之賊大崩溺死者無算乃由間道逸入保康南山值
大雨溪漲清元偵賊渡寒水河乘夜擊之獅子嶺賊驚潰進逼漁
沱樊人傑曾芝秀赴水死 上命清元搜斬餘匪數千人以創傷
發引疾歸十三年擢雲南提督調貴州再調四川十八年卒官
上聞震悼賜祭葬卹典有加

王清弼雄縣人乾隆四十年武進士補陝西漢鳳營守備積功擢
陝甘固原提標左營遊擊嘉慶元年湖北鄖縣教匪王金禮徐良
踞泥河口孤山村謀掠白河洵陽以攻鄖西提督柯藩檄清弼督
兵攻其旁寨乘雨仰擊殲禽四百餘人進攻孤山斷汲道以輕兵
誘賊出戰眾卒蛇行循牆而入燬其巢賊大潰獲王金禮等四十

六人泥河口平四月陞甘肅平羅營參將二年二月隨總督宜綿
侍衛明興田出老君洞襲賊會家山有功三月偕副將王柱率兵
出清谿口擊姚家寨賊竄走四川抵秋波梁清弼截擊敗之羅其
清冉文儔屬聚方山坪分路撲我營七月賊伏兵朱射斗營旁拔
鹿角噪而進清弼乘夜馳擊賊却走宜綿以方山坪險巖不易攻
必奪蓋頂坪多福山兩寨以孤其勢而檀帽山地勢高峻有建瓴
之勢乃分檄總兵楊秀攻檀帽山知州劉清偕百祥攻多福山知
州常發祥偕朱射斗攻蓋頂坪兵既合賊見多福山陷遂大潰清
弼與朱射斗亟進奪其寨檀帽山同時並下越數日遂克方山坪
十月羅其清王三槐合擾巴州宜綿檄清弼與知州劉清繞道援
之三年陞貴州大定協副將時賊首洪道人胡透方等起蘭芽場
清弼隨總督勒保攻東門關穿箐林小徑克其寨賊眾潰洪道人

胡透方悉就禽七月賊首包正洪竄走雞鳴寺東南清弼與朱射
斗參將張文貴三路圍而殲之包正洪死奏入賞齊喇巴圖魯名
號十二月賊首冉添元王登廷與麻柳灣賊合勢張甚經畧額勒
登保分兵截擊清弼戰歿於陣事聞賜卹如例賞雲騎尉世職子
丕承襲

李錫命字天寵東安人樸誠有幹略乾隆四十九年以一甲第二
名武進士選侍衛出授廣東潮州遊擊嘉慶元年從大軍剿川楚
教匪嘗單騎入賊營生禽賊目以歸芭葉山之戰功尤多先是賊
爲大兵所蹙棄寨入山扼險死拒錫命揮眾仰攻山中矢石如雨
下奮身不顧呼而先登眾從之直搗賊壘賊相顧驚曰大刀李至
矣相率宵遁獲糧芻無算上嘉之賞花翎賜巴圖魯勇號擢廣
東羅定州副將錫命臨敵揮巨刃故軍中有大刀李之名初賊由

楚而川而陝經略額勒登保以其蔓延三省督兵截北路徧之入川我軍禦之蒼溪賊渠有冉天元者驍悍善戰經略檄提督阿克登布楊遇春分左右翼擊之錫命時隸阿軍阿克登布恃勇輕敵繞出賊前跨山鏖戰賊取徑山後自巔馳下我軍腹背受敵錫命與參將以下二十三人皆戰死事聞賜卹如例給雲騎尉世職

王萬清

王萬清大城人乾隆五十五年一甲三名武進士授二等侍衛五十七年補授江西南贛鎮標左營遊擊嘉慶七年調江南河標右營遊擊十四年擢雲南城守營參將二十一年雲南臨安江外夷匪滋事總督伯麟薦其戰功賞藍翎二十三年偕都司曹得周破賊羅家寨禽賊目曹波韋伯麟渡江分兩路剿賊萬清偕遊擊石成玉由東路進至蟻夏會夜霧賊潛劫營萬清伏兵於蟻夏左右

聞人馬聲伏起賊奔潰擠巖墜死者無算尋偵知賊匿大宗哈塞左首右峒地陡削不易登萬清堵峒口然草熏之賊冒煙突走斬獲殆盡復攻賊賴巖破其巢禽首逆高老五以功賞花翎八月擢雲南維西協副將二十四年署督標中軍副將擢普洱鎮總兵七
年入都旋卒

郭繼昌 史善載

郭繼昌正定人乾隆五十七年由行伍補固關營外委嘉慶元年川陝楚三省教匪不靖隨直隸提督慶成出師湖北敗賊張家塘擢直隸提標後營把總三年巴州賊羅其清糾黨貫道謀寇順慶繼昌隨西安將軍恆瑞馳赴川攻鯉魚嘴奪賊壁三賊五百繼昌受石傷功最多通江賊冉文儔合太平賊龍紹周龔建等自大神山竄鳳坪負嶠自固我兵出馬鞍山進攻克之斃賊目冉文富

殄賊二千襄陽賊張漢潮等竄踞陝境繼昌隨恆瑞躡其後累以
功陞山永協山海路千總賊竄甘肅帶羅山繼昌隨大軍掩擊敗
之老柏樹五年擊賊大中溪斬捕過當陞督標右營守備六年遷
龍固營都司道光四年累擢甘肅安西協副將六年陝甘總督楊
遇春檄赴葉爾羌值逆回張格爾之亂大學士長齡令率兵援和
闐因留防阿克蘇城賊目庫爾班素皮率眾潛師渡渾巴什河分
圍繼昌及協領都倫布繼昌開營血戰殪賊千餘餘遁走進援都
倫布親督馬隊陷其圍縱橫夾擊斬賊目庫爾班素皮賊鼠竄渡
河追擊之淹斃四百餘人獲其輜重陝甘總督楊遇春上其功賜
幹勇巴圖魯名號以總兵用七年隨長齡進討連破賊於阿瓦巴
特諸處乘勝踵至渾河賊潛渡河犯我師繼昌擊却之張格爾遁
走再追敗之色勒庫爾八年凱旋敘功授安徽壽春鎮總兵繪像

紫光閣御製贊曰生於近畿拔於行伍屢立戰功我壯我武臨陣督兵隨營俘虜俾鎮壽春張弓控弩九年調延綏鎮總兵官十年以安集延不靖調赴喀什噶爾治軍事十三年署固原提督十七年陞廣東陸路提督二十一年卒

史善載宛平人襲職雲騎尉補京營南營守備歷擢甘肅甯夏鎮總兵道光六年回人張格爾叛陷喀什噶爾四城善載督兵赴沙雅爾七年正月和闐縛賊投誠未幾復陷善載隨參贊大臣楊遇春赴巴爾楚克進剿二月揚威將軍長齡檄善載留防洋阿里克巴爾楚克護糧運五月四城克復上命成玉署和闐領隊大臣善載幫辦尋凱旋入關回甯夏任八年調江西南贛鎮總兵旋留本任九年正月署甘肅提督予告歸二十四年卒

李士林

李士林字英選晉州人乾隆五十九年舉武科鄉試嘉慶元年成進士選侍衛出授陝西漢中營都司遷遊擊牛亮臣之亂督兵擣其壘獲其渠及賊目數人隨以所部赴陝之南山柏楊嶺白花川諸處捕斬餘黨無一脫者道光初奉檄調西甯征黑番所至有功晉參將歷靖遠莊浪洮泯潼關副將擢西安延綏鎮總兵卒官

武光琳

孔廣源

張鑑

武光琳正定人嘉慶元年由行伍隨直隸提督慶成出師楚北剿逆匪有功補龍岡營額外外委二年調赴陝西累有戰績補順德營經制外委三年賊目羅其清句結川匪攻撲營山我兵分路進攻內外合擊克之羅逆分竄儀隴之石板壩等處官軍併力夾擊遇之水東寺敗其眾光琳俱在事敘功升昌平營把總復追逸賊張漢潮於盤屋洋縣俘馘甚眾遷三屯協千總五年偵知股匪高

二馬五由戴家營竄入西鄉我師合力圍截敗之七年調松棚路千總九年調大名協左營千總十六年擢陝西延安營守備十九年檄赴喀什噶爾二十年塔什密里克逆回攷牙墩糾眾侵邊喀什噶爾辦事大臣永芹率兵進剿賊恃險抗拒光琳冒石先登奮勇鏖戰禽其渠賞戴花翎補臨洮營都司道光二年升甘肅俄卜嶺營遊擊六年張格爾不靖據阿爾坪南北兩莊我兵分道截擊光琳偕都司李萬餘等馬步環攻賊眾大潰斬級五生禽七十三人奪獲輜重無算七年赴烏什偏南柳樹泉督兵防禦會有奇里克部落布魯特黨逆肆焚掠負隅以抗我軍光琳率死士仰攻殲賊七十餘人生禽四人擢督標右營參將六月凱撤九年署陝西靖遠協副將十一年署定邊協副將尋授督標中軍副將十三年署甘肅肅州鎮總兵旋授貴州威甯鎮總兵十四年卒

孔廣源初名光祖正定人嘉慶元年由行伍拔補順德營外委隨慶成征湖北擊敗鄧州棗陽諸賊升宣化鎮右營把總二年理藩院尙書惠齡剿四川賊李全王三槐等於太平縣田家壩廣源爲軍鋒追殺二十餘里偵賊伏西牛壩與副都統六十七等合擊之追至楓木嶺賊竄亭子廟將入陝廣源遏其前敗之於官壩塘擢倒馬關營千總三年將軍恆瑞剿賊四川逆首羅其清冉文傳踞孫家梁擾儀隴運道廣源橫截磨盤寨連敗之四年隨恆瑞剿甘肅藍號賊由五福河進攻追敗於老柏樹斬捕一千二百餘遷涑水汛守備七年經略額勒登保薦升貴州凱里營都司九年調平遠協左營都司十五年擢古州鎮標中營遊擊二十一年入覲賞花翎二十二年升黎平營參將道光元年遷上江協副將八年擢鎮遠鎮總兵九年坐事罷歸十一年卒於家

張鑑天津人乾隆五十年由行伍拔補天津鎮標右營外委五十二年遷把總五十三年升千總嘉慶二年川陝楚教匪起隨直隸提督慶成西安將軍恆瑞敗賊於司渡河七里溝斬馘無算旋入四川敗襄陽黃號賊首王廷詔巴州白號賊首羅其清太平黃號賊首龍紹周獲其目陳友珍復剿襄陽白號高均德通江藍號冉文傳諸賊奪香安坪土門啞諸卡進破賊巢再敗之龍鳳坪賊竄箕山與羅其清合我兵分路兜截破賊於鳳凰寺進擊大鵬山寨攻克之四年擢插箭嶺守備隨西安將軍恆瑞赴陝西追斬襄陽藍號賊首張漢潮於東义河捕殺過當進擊鎮安破賊竹凹山禽其目周遇順訊知襄陽黃號賊伍金桂糾眾數萬將竄商雒鑑由陽高壩店擊卻之額勒登保奏聞升直隸河屯協中軍都司八年賊平凱撤九年調廣昌營都司十三年升四川督標右營遊擊十

八年授普安營參將署夔州協副將十九年調署提標中軍參將署越雋營參將二十年署懋公協副將二十二年調署阜和尋擢督標中軍副將二十五年擢松藩鎮總兵道光元年署重慶鎮總兵旋調建昌署四川提督三年卒

周景魁

周景魁衡水人嘉慶間武進士授藍翎侍衛歷官湖南澧州參將貴州永安鎮副將署威甯鎮總兵有勇略善用兵八寨廳之變單騎入賊巢禽其魁居恆手不釋卷有古名將風

董光甲

石清吉

程三光

劉玉豹

董光甲字冠一河間人嘉慶十四年武進士以營守備分河南十八年隨剿滑濬教匪力戰而創積功至遊擊道光十八年鄧州有潛匪光甲入其巢捕獲賊魁黃佩臣等十人咸豐元年擢河北鎮

總兵時粵逆洪秀全踞永安州城光甲隨提督向榮壁上壘橫嶺
龍眼塘賊乘壘未定輒出衝突擊退之進攻摩天鵝嶺賊出
紅廟子我兵設伏敗諸河向榮過河擊之光甲身爲士卒先戰一
日賊不支大潰二年正月川兵被圍光甲馳往援殺黃旗賊六人
圍解進援滇兵賊見光甲旗輒遁走攻摩天嶺西逼賊壘而營浚
溝納巨礮破賊壁丈餘賊驚奔移營老柏村再移新營築礮台逼
賊巢益促夜風雨作賊遠竄復州城俘賊首洪大全餘匪竄昭平
光甲麾軍追敗賊於古東龍寮嶺時光甲三晝夜不得食割韡充
饑至黃茆嶺薄於險雨甚賊反撲力戰死之事聞贈提督銜諡勇
烈入祀昭忠祠

石清吉字祥瑞沙河人道光二十一年武進士授侍衛咸豐元年
補湖北鄖陽鎮保康汛守備五年粵匪竄楚戰禦有功皖鄂民爲

立生祠四年賞花翎歷升副將賜幹勇巴圖魯名號同治元年加提督銜三年賊圍關口馳救之受重創亡上聞悼痛追授振威將軍謚忠烈入祀昭忠祠

程三光字明遠號亭功邯鄲人道光二年武進士第一由侍衛授湖北遠安遊擊力整武備教卒伍坐作進退擊刺如法遷撫標中軍參將崇陽賊匪爲亂白楚督請率一隊獨當之不許守城垣造火箭無廢事苗人藐法市肆苦搶掠痛懲之爲歛迹晉貴州松桃協副將丁艱服闋授江南督標中軍副將特簡徐州鎮總兵粵匪下破武昌寇安慶犯金陵總督奏留防堵咸豐三年賊抵城下誓死守江霧作賊穴地陷儀鳳門揮刃巷戰殺賊百餘級力之事聞賜祭葬如例謚壯愍入祀昭忠祠

豹字振翰新河人由武進士選授山東武定營守備以緝匪

功遷膠州都司擢曹州中營游擊咸豐三年調赴安徽大營以姪
開甲甥翟登雲自隨屢戰有功侍郎周天爵山東巡撫李德薦補
卽墨營參將仍留皖剿賊隨攻宿州又調懷遠碭山徐州靈璧固
鎮石清山臨淮關及潁亳一帶諸匪斬捕無遺加副將銜賞戴花
翎壽州之戰賊數萬彘集困重圍中開甲登雲皆戰死玉豹單騎
潰圍出生禽悍賊陳鰲於霍邱進攻六安賊寨三戰三捷五年九
月移駐香泉賊驟至急出隊禦之刀矛攢集身負重傷歿於陣事
聞賜祭葬銀諡貞毅世襲雲騎尉入祀昭忠祠玉豹偉健多力不
避艱險能得士卒心其死也合營爲之流涕

吳璋
吳燦

吳璋字晉廷清苑人有力能挽強道光初由行伍補白羊峪把總
遷前營守備嘗謂海防以火器爲先因創造炸礮旋轉如意式如

瓶重五百觔遠及三里子炸二畝許繪圖說上之尋遷北塘營遊擊文宗御極詔疆臣密保將材璋名預焉二十九年三月英人入犯璋列營禦之敵繫礮於檣乘夜攻擊璋息火罷鼓去營里餘鹽灘中篝火三五爲疑兵當敵舟之未至也璋命演礮以敝舟爲準至是令精兵伺敵船至其地始開礮敵知備乃退其次日篝火處果得礮子十數枚有重二十餘觔者咸豐三年粵賊北犯隨總督訥爾經額赴河南防禦師抵柳園口賊數萬謀夜渡璋兵分兩隊伏左右約聞礮乃起賊以十舟先濟甫登岸礮發伏起斬獲數千毀賊船六生禽四十人賊乃西竄時欽差大臣勝保尾賊後意賊必由北渡至是西竄知有勁兵截擊因詢璋戰狀大服卽奏調同赴懷慶進剿璋擊賊西南礮台破之有違節度者掌其頰二百眾曰營無此刑也璋曰軍法重者殺次杖次貫耳行兵勝負靡常

杖重不能行倘逢不測是罪不死而置死地也眾皆感泣八月賊竄西北入平陽城璋尾之門未及閉北竄直隸璋踵至滹沱賊結筏下流將濟璋覓舟不得擇善水者泅渡繫繩於岸眾沿繩以涉追至天津之得勝口四年賊回竄璋擊之念祖橋斬千餘賊出舒城而南璋馳軍誤出賊前夜半狂風迷所向賊從後突至璋分所部爲十隊以八隊掩火禦敵自率二隊往來盪決賊將退矣比曉知我兵少乃合圍幸救至得不敗賊據阜城璋乘其未定擊之單騎馳而入當者輒靡身受矛傷二大軍繼之連破四營殺賊七千江南賊援至勢復熾璋奉旨充前敵先鋒官隨勝保分兵截剿抵臨清州南三十里賊眾我寡璋命俟賊過擊其尾將戰令曰不俘不馘殺賊以左耳爲驗拾衣械者殺面傷者受上賞賊遂敗走破臨清分黨營清水集璋潛師待半過夜擊之追至豐殲焉以殄滅

全股聞擢副將尋擊李開芳於連鎮傷右股明日復戰傷左股時武弁皆帕首璋以爲怯每戰不去冠勝保以爲言璋曰不敢畏死壞朝廷制度五年勝保獲罪璋隸忠親王僧格林沁軍未幾改隸欽差大臣西隆阿璋前與用事者不能協至是因事陷璋璋曰死讐不若死寇吾甯効命疆場以馬革裹尸耳每戰必先連克西河常甯平定市興隆集歷山鎮師抵德安府時降賊將復叛璋廉得其情密上當事當事笑置之未幾降者果反與賊合圍璋於府城之西歷十八日糧盡援絕死傷過半璋夜率卒銜枚至賊濠布陣僞爲救援之師者賊不敢出軍還用事者斬其勇將萬寶來軍益孤六年請歸伍同治七年卒其時同縣有吳燦者亦以勇著

吳燦字玉祥魁奇多力善騎射幼以任俠雄於鄉由行伍擢千總道光中引見試箭全中命覆射又中賜藍翎以守備用遷天津中

營遊擊咸豐二年髮賊北竄隨欽差大臣勝保尾至懷慶府戰一
日夜賊礮破其冠斷執旗兵手燦不爲動揮軍進戰大敗之加副
將銜賜花翎戰阜城受礮傷裏瘡而進破賊營四座奉旨賜齊車
布巴圖魯躡至冠縣攻城礮中股創甚授廣東惠州協副將傷甫
愈而賊竄高唐燦躍出戰創裂血出死事聞予騎都尉世職祭葬
如例

王錫朋

王錫朋字樵慵甯河人少雄武有俠氣以武舉補兵部差官援例
得固原城守營遊擊道光六年權慶陽營參將是秋逆回張格爾
亂作陝甘總督楊遇春檄錫朋往剿師次大河拐誘賊萬餘殲之
俘二千殪頭目邁曼底阿渾等五人賊屯沙布都爾號十餘萬我
兵從三路進擣錫朋戰西北禽獲獨多箭斃大頭目色提巴爾第

及其從素皮木克等八人揚威將軍長齡以擊賊功最入奏賜花翎進戰至阿瓦巴特賊阻渾河沿樹寨二十里錫朋從大軍間道渡河抵喀城夜破之東門斬首六萬級禽七千人獲器械火礮以萬計進取英吉沙爾葉爾羌和闐諸城執玉努斯於故瑪戩之出寨追賊圖舒克塔什及達爾瓦斯地險且無援錫朋以孤軍四百轉戰冰山雪窟中竭死力克之師還詔擢湖南臨武營參將十二年猺民趙金龍亂湖南殘常甯新田總督盧坤檄錫朋偵剿入羊山五岡黑夜冒雨緣巖攀葛上抵石灰坪道遇賊戰自辰至酉賊遁潛兵洋泉口斷其出沒接戰五晝夜燬賊房無數賊稍蹙奔住街詐降錫朋覺之復進兵誅首逆趙金龍獲其黨趙金旺趙文鳳別將逐賊楊家園亦大捷回攻高山坪圍賊殲之賞銳勇巴圖魯名號擢寶慶協副將時廣東猺亦煽動趙仔青進擾湖南兩廣總

督檄以兵控兩省中地殺賊背江口進至濠江口又破賊銀匠冲
賊踞山鳴鼓角錫朋手長矛洞紅旗酋一人磔僞旗號趙文興扼
葛騰冲再踣之麻岡冲及陽南仔青反走追獲之及其孥湖南平
赴廣東大軍戰連州大洪橋乘勝入火燒排之蛇兒嶺奪馬鞍山
遂平五排猺又從定蓮花汛冷水冲鼓而西破金竹根桃花冲大
搜紅泥田十九冲轉擊而東趾之陽公歧大古坳諸猺悉平功竣
之寶慶十三年擢福建汀州鎮總兵尋丁憂服闋改安徽壽春鎮
二十年英人陷定海去之錫朋以壽春兵鎮其地二十一年英人
再至總督裕謙檄充翼長八月英船闌人錫朋出守九安門鄭國
鴻駐竹山門葛雲飛駐曉峯嶺相去十餘里敵先犯九安門不利
退攻竹山曉峯錫朋馳救轟擊六晝夜俄兩營敗錫朋力戰眾且
盡所親卒及身自盪殺且數百人敵至益多揮短刀陷陣死時

八月十七日也年五十有六是役也敵兵可三萬我兵計五千錫朋檄請益兵大府不應戰且五六日勢足以待救亦坐不救錫朋既死天子震悼以提督禮賜恤諡剛節建專祠子承泗承瀚皆賜舉人襲騎都尉世職錫朋知兵善戰嚴號令明賞罰能與士卒同甘苦人樂爲用自遊擊從楊遇春定回疆知名及平徭功居最嘗誠諭士卒曰戰利呼人共之獲倍多卽人不利趨救之可兩全待兄弟交友皆有至性歸省親更衣結襪履皆躬執之家書及祭所親文詞旨溫雅不知其爲武人梅曾亮以儒將稱之

段飛熊

段飛熊字夢卜鉅鹿人精騎射諳韜略道光十二年武舉人授陝甘秦州守備陞利橋金塔寺安西州都司署玉門遊擊號令嚴明操練士卒悉精銳可用時西番數寇邊飛熊率兵擊走之遷督標

後營遊擊護理西甯總兵陞蘭州副將親老致仕歸監修城垣學
宮工堅而費省同治元年賊起飛熊練鄉團剿捕有斬獲功賜花
翎卒年六十九

郝光甲

郝光甲任邱人道光十八年一甲一名武進士授頭等侍衛歷官
至山東膠州協副將山東巡撫李德奏薦擢陝西陝安鎮總兵咸
豐三年粵匪竄山東上詔光甲統兵往剿陝甘總督舒興阿以陝
安要地疏留之六月賊竄河南圍懷慶光甲馳抵水北關逼賊而
營槍殪執旗賊首燬其木台賊潰敗越日大軍渡河萃攻入柵光
甲偕總兵烏勒興泰往來應擊大敗之俘馘二千餘人棄器械山
積圍立解八月賊走山西陷垣曲光甲踵至平陽壁北門賊三撲
三敗之九月賊竄直隸踞靜海獨流河南捻匪結之麻起光甲隨

舒興阿踰河追賊抵連鎮奏留直隸尋爲勝保所劾職粵賊犯
廬州舒興阿赴援光甲爲前鋒抵廬州戰水西門外賊旣陷廬州
據桐舒諸縣四年提督秦定三檄剿舒城賊出三連橋擊敗之進
攻楊家莊賊萃眾拒戰光甲督後路軍夾擊賊挫而奔移屯三角
井越日戰五里橋手殪乘馬賊捕戰多名七月賊出黃家店撲我
軍光甲連戰北之燬三連橋賊壘閏七月賊退屯橫嶺光甲督兵
抄擊大敗之進攻橫嶺設伏兵兩路以火器燔其巢賊驚亂伏發
斃賊千餘殪黃衣渠二江南提督和春奏入賞三品頂戴署陝安
鎮總兵六年總兵珠克登率兵薄城下已革總兵音德布先登光
甲繼之緣梯而入賊大亂遂復舒城詔賞給總兵頂戴賜花翎六
月擒賊擾潁上光甲移兵擊走之擒復糾髮賊犯潁州上命河
南巡撫英桂會剿諸軍聽調遣而光甲誤回徐州命革職八月擒

出潁州光甲尾至江集槍殪二百餘名禽其渠王鳳林七年援桐
城眾寡不敵力戰死之賜卹如例謚武節予恩騎尉世職同治七
年建專祠

郝上庠

郝上庠沙河人道光十八年武進士授藍翎侍衛任登州右營守
備咸豐元年升沂州協都司三年擢武定營遊擊四年土匪爲亂
巡撫張亮基奏請上庠護理兗州鎮總兵幅匪朱廣田竄郟蘭沂
莒各屬上庠會紳團郤之賊竄江蘇贛榆縣追殪多匪殲其渠事
聞陞參將賜花翎五年捕誅金鄉縣匪陶二相時山東有賊艇往
來海上巡撫崇恩奏以上庠護理登州鎮六年升撫標中軍參將
九年以禽斬幅匪李希夢等功擢沂州協副將署曹州鎮總兵賊
首汪來鳳破濮州官兵圍之賊請見上庠一言卽降上庠單騎入

城諭以禍福賊投戈歸命以功加提督銜會匪偷渡濮范革職留營克復張秋鎮復原官尋移剿堂邑踞匪戰賊丁家廟敗之賊勢復大集上庠左右衝突馬蹶沒於陣事聞賜卹如例諡勤勇賞騎都尉兼一雲騎尉世職入祀昭忠祠同治元年上命建專祠東昌府

安勇

安勇清苑人由行伍拔補千總道光二十一年授泰甯鎮右營守備二十六年擢江西興國營都司咸豐元年二月粵賊竄南贛突撲龍南之芳竹嶺勇督兵扼擊礮殲賊首數十人餘潰遁擢山東武定營遊擊二年奉檄赴江南防堵三年六月賊由瓜洲犯三汊河營勇截於楊子橋破之賊築礮台對岸結浮橋將搶渡勇冒雨先進他軍繼之賊潰退七月賊出鈔關門天甯門來犯官軍擊之

退追至護城河勇伏兵東岸賊至殲之事聞以參將升用時江甯揚州皆陷勇隨欽差大臣琦善趨三汊河敗賊焚其營四年分攻揚州勇首先陷陣進擊瓜洲勇奪賊土城賊盡殲直隸提督陳金綬上其功賞戴花翎九月戰賊季家廟毀賊壘擊新橋虹橋皆有功五年賊合鎮江匪竄入儀徵過鹽河踞帶子溝我軍爲淨橋以濟勇前驅奮力捕之復偕副都統富呢雅杭阿攻河南賊毀其屯二四月賊糾鎮江大股竄八里鋪謀犯三汊河勇約副都統德興阿兩路夾擊賊斷隄築壘我軍馳入攻奪之積功擢直隸大沽協副將六年升天津鎮總兵八年克復江浦有功五月敗皖賊大劉莊捷聞賞號烏里達勒圖巴圖魯九月賊由天長犯揚州勇督兵渡河堵禦賊他竄十年漕運總督袁甲三以防剿出力奏加提督銜同治四年卒奉旨賜卹

石皓

蔣照臨

鄭奎士

奎士子永祥

石皓字耀彩藁城人明大學士石瑤裔孫剛正有識略道光二十三年沿海鹽民滋事總督納爾經額欲臨以兵皓時以前營千總充巡捕官諫止之躬率十餘人諭解其黨咸豐二年隨琦善南征粵匪三年屯揚州北門外鳳凰橋拔賊營數座擢補舊州營守備琦善檄皓造大小礮數十枝築礮台百餘座尋赴儀徵燬內江賊巢禽其目六人奪賊船十五艘上褒其功賜尙方諸珍物四年還揚州夜四鼓選精卒渡城濠梯城而登火石齊下遂復揚州以都司拔補賜花翎並賞御製金牌銀牌各一進攻老河影洲平其巢補喜峯路都司八月防剿江浦賊潛撲城皓迎戰五里橋大敗之乘勝克九淤洲賊營四江浦之民始獲安堵五年賊悉眾犯江浦由新江口登岸築壘相持時城中兵僅七百攻二十餘日不能克

始解圍去補山東壽張營遊擊六年奉檄防儀徵江浦民臥轍阻
其去甫至儀徵復檄統津鎮兵攻揚州三汊河及紅橋克之餘黨
奔瓜洲提督向榮檄皓南渡攻金陵而瓜洲賊屢犯三汊河遂北
歸防守七年進兵金山賊破其船墜水中礮傷髀遇救獲出傷愈
誓克瓜洲夜三鼓率部卒以紅巾纏首與賊亂梯城而入賊潰走
循江西竄皓出瓜步青山截殺之賊無一脫者擢參將賞給智勇
巴圖魯名號八年平大劉莊賊營十年粵匪糾眾擾邵伯湖皓統
領水礮台戰九晝夜克復公道橋薛成良賊多墮水死十一年江
皖賊眾竄揚州皓沿湖轟擊克湖西各鎮加副將銜同治二年隨
大軍收復天長六合江浦和全椒諸州縣三年守太平洲九日賊
不得逞進攻丹陽克之升德州營參將陝甘總督楊岳斌侍郎彭
玉麐浙江巡撫曾國荃同調皓攻金陵生禽偽王及偽天軍副主

將並巨目十餘人悍賊二百餘諭以總兵記名簡放四年凱旋赴
德州參將任營規整肅兵民翕然七年擒匪平加提督銜尋告歸
卒於家年六十有六

蔣照臨字普齋慶雲人咸豐初以武生隸行伍二年拔補蔡村汛
經制外委三年從征粵匪戰揚州累功遷遊擊九年擊六合賊敗
之陞德州營參將攻克僧道橋菱塘賊壘殲薛成良叛賊加副將
銜十一年江皖賊糾眾連營撲揚城率所部敗之授廣西義甯協
副將同治元年江南悍賊渡江攻揚城每戰輒捷加提督銜四年
克復丹陽補授天津鎮總兵凱旋陞見命帶神機營南防撤防赴津
鎮任擒匪入陝調補撤防山西太原鎮總兵六年十月乞病回里
七年病痊命辦理直東軍務疾發卒年四十五

鄭奎土宣化人道光間由行伍積功授湖南守備粵匪亂起從征

有戰績遷廣西正安營都司擢湖南九谿營遊擊隸提督向榮軍
咸豐三年賊陷廬州率師赴援復調江南攻復巢廬江等縣授安
徽壽春鎮總兵加巴圖魯勇號八年擢浙江提督轉戰金陵甯國
江蘇親提一旅輒身爲士卒先創傷遍體如刻畫同治五年擒匪
北竄奉命馳往協剿踰年署理直隸提督八年傷發乞假歸卒於
家子永祥官浙江遊擊咸豐九年受創死廬州營次

李成虎

子昌麟

昌麟從子二剛

弟昌慶

李成虎號鎮崗安平人少勇力過人能挽三百鈞道光二十四年
武進士咸豐元年由侍衛出署泗州都司擢署宿州營遊擊會南
河隄決檄成虎防護有功補授廬州營都司賞戴藍翎尋遷宿州
營遊擊粵匪陷江南淮上被擒擾土匪應之周天爵檄成虎防臨
淮關悍賊張鳳山擾關下戰輒執旗揮眾無反顧成虎怒馬馳入

斬三人賊大披靡自是以勇名諸軍俞家灣者江南北重鎮也賊
久踞攻之莫能下成虎行抵賊巢六七里天陰夜昏黑下令築壘
列槍礮壘上以盾覆燈蛇伏其下夜三鼓賊果出噪而前鎗彈戛
牆過兵伏不稍動俄賊摩壘而呼壘中鼓角起撤盾懸燈萬槍齊
發賊大驚潰是役破賊萬眾而成虎兵僅千人於是益逼賊巢爲
營增築礮臺晝夜攻之死傷相枕藉卒拔其巢李家軍之名震於
遠近捷聞賞換花翎陞甘肅花馬池參將加副將銜當是時給事
中袁甲三淮上之軍李成虎臧紆青并爲名將俞家灣旣克進兵
和州之官渡官渡古烏江地賊之自安慶而東也官渡適當其隘
沿江上下賊多設卡防我軍成虎毀卡數十座獨芝蔴港老曹廟
堅守不下成虎分兵三左右挾火彈伏卡下而親率中路誘賊戰
戰方酣卡中煙焰起風烈火大作賊竄伏芝蔴港港池濱江多稻

田溝洫縱橫人馬不易進五年四月十五日成虎約諸路應援躬督大隊五更蓐食疾驅遇賊三戰三捷抵霸王廟葭葦中伏賊起成虎受數創所約援軍無一至者遂殞焉年四十五賜祭葬如例謚忠勇入祀昭忠祠成虎爲人篤勤防河時陰雨兼旬方興鉅工設十三廠貯物料成虎每夜手一燈從二三健卒周行巡視時有風雨十三廠廠見將軍之謠成虎在宿州賊每迂道避之曰毋犯此鐵臂將軍行軍馭下有方秋毫無犯然遇之甚厚烏江之役瀕行賜軍士酒曰俟得賊酋再與諸君痛飲耳旣戰沒和滁全椒等郡縣萬餘人尋其元得之建祠全椒城西南隅子昌吉武舉人襲雲騎尉世職其時同屬武強死難者惟于昌麟爲最烈

于昌麟字澄秋咸豐初由行伍歷安徽撫標千總四年隨參將扎隆武遊擊嵩瑞攻剿廬州賊有功賞戴藍翎五年擢潛山營守備

換花翎復隨剿南路賊陞亳州營都司賊陷廬州士民王子顧遣
羅金柱縋城出約大軍攻賊爲內應十月我軍大舉昌麟攻小東
門首登城燒賊更棚賊大潰遂克廬州以遊擊儘先陞用並賞給
奮勇巴圖魯名號六年補兩江督標右營遊擊克巢縣城七年擢
山西甯武營參將八年以擅提將壩釐捐款錢二千緡給勇糧翁
同書奏効革職拏問九年六月懷遠捻龔得糾眾數千撲定遠縣
城昌麟督團勇敗之奏復原官十一月夜偕守備徐立壯破定遠
賊巢平燬營壁數十巡撫翁同書上其功加總兵銜賊之據定遠
也壁城西三里爲三壘與城賊犄角主帥以定遠爲必爭之地募
能屯城下斷內外賊交通路無應者昌麟獨請往一夜壘成賊內
外夾擊糧絕無援兵昌麟謂其從子二剛曰我必死爾其突圍去
二剛不忍營破被獲嚇令降昌麟罵不絕賊以沸油灌其口死之

二剛亦遇害袁甲三奏聞予諡壯勇贈提督銜賞騎都尉兼一雲
騎尉世職弟昌慶安徽撫標把總累遷守備同治元年戰死蒙城

史榮椿

王鳳祥

王浚

史榮椿大興人由行伍拔補外委歷升中營參將咸豐元年大學
士賽尙阿督師征粵匪以榮椿自隨調補左營參將二年以戰賊
功賞戴花翎三年四月升中營副將十二月隨欽差大臣勝保進
攻獨流榮椿列隊王家營隄岸殲賊數百屯兵峽口窪四年賊突
賈口榮椿列隊截之戰蘆葦塘斃賊三百餘翌日榮椿督率哲哩
木盟及火器營等兵合力兜擊賊紛紛敗竄踞阜城二月隨副都
統達洪阿分攻堆村西南兩面殲賊三千餘平三村賊壘捷聞賞
哈希巴巴圖魯名號五年欽差大臣科爾沁親王僧格林沁荐擢
直隸大名鎮總兵七月直隸總督桂良檄赴河南剿賊衛輝九月

亳州擒竄皖境榮椿馳兵追躡十二月蒙亳賊直撲提督武隆額營榮椿擊走之賊反歸德榮椿馳抵郡城乘夜縋兵入賊隊賊驚潰六年三月賊擒二萬餘於熟穀集四月賊竄鹿邑禦之界溝集賊已潰矣復糾悍黨夜至界溝火近村民舍潛出我軍之後戰五時斃賊千餘五月河南巡撫英桂以榮椿捕除彰懷兩屬擒奏聞調徐州鎮總兵八月賊踞永城宿州榮椿行次永城苗村橋西南賊讙擁出我軍噪而進戰三時匪黨麇至抄我軍後路榮椿縱橫排擊斃賊七百餘七年正月進剿岳家集毀其巢三月以徐州剿擒功賞提督銜五月賊分匿王墟諸處榮椿挑之戰連破姚鄧諸墟生禽逆首戮之九月攻韓墟賊傾巢出我軍分路截擊燬其屯進逼趙屯賊屢撲不得逞八年正月攻豐家集擒首劉狗勢蹙乞降受而殲之六月升直隸提督九年七月英吉利船闖入天津內

河榮椿力戰中礮死僧格林沁奏聞命優卹直隸天津及原籍建
立專祠予諡忠壯賜騎都尉兼一雲騎尉世職同治五年 穆宗御
極追念死事諸臣各賜祭一壇榮椿與焉

王鳳祥寶坻人監生入貴爲衛千總道光九年補浙江湖州所領
運千總歷升山西石樓營都司復捐輸以遊擊分發山東三十年
署文登協副將咸豐元年署單縣營參將二年署兗州鎮標中營
遊擊剿捕蘭山郟城幅匪時粵匪亂作調赴江南防堵宿遷二年
賊由皖豫分竄山左右入直隸四年鳳祥奉檄回山東隨巡撫崇
恩克復臨清州移守德平防連鎮竄賊十月補高唐營遊擊五年
大軍克連鎮以防堵功賞戴藍翎粵匪自連鎮分竄山東高唐州
別股踞在平之馮官屯大軍以次攻克之鳳祥均在營有戰績尋
檄赴湖北行抵河南留剿彰德等府屬聯莊會匪七月隨河北鎮

總兵崇安解新鄉獲嘉之圍殲除會匪殆盡六年河南巡撫英桂
疏奏鳳祥戰功賞換花翎補臺莊營參將時安徽亳州擒分擾皖
豫竄柘城鳳祥奉檄赴陳州扼防越境解毫圍夷白龍王廟諸處
賊巢盡殲之七年升陝西西安城守協副將加總兵銜八年攻六
安州賊擁眾突我營鳳祥會諸軍截殺之賊不得逞越日乘夜薄
城約內應啟門大呼而入賊狂走追殺數千立復州城七月擒首
張落刑糾眾襲踞陳家莊諸處鳳祥糾合民團馳往攻之誅擒目
余慶遠遂克陳家莊賊壘十月懷遠擒首李大喜蹂澮河迤南圖
北犯官軍敗之復由宿州北符離集折而西鳳祥偕知縣張汝梅
伏兵褚莊捻過符離集伏突起賊驚潰追斬千餘賊復壁澮河北
岸鳳祥偕知府張學醇奪門入殺賊幾盡捷聞以總兵記名簡放
九年二月懷遠賊渡澮而北我軍截之復遁回澮河鳳祥乘賊半

渡擊之溺死者無算九月隨督辦河南軍務副都統關保戡賊於
毫東丁垵集諸處賞資勇巴圖魯名號十月關保移師許州鳳祥
敗賊於洪河賊走臨潁撲縣城我軍踵至大敗之別賊竄鄆陵官
軍馳擊於太康縣之王隆集賊悉奔逸鳳祥策馬躡之賊奪路東
竄擾鹿邑遏之梁老家諸處援賊至至鳳祥分兵兩翼以馬隊搏
其中賊大潰越日賊悉眾來撲陣斬千餘關保上其功擢四川
北鎮總兵十年鳳祥隨關保駐鹿邑賊擾蔡浦見鳳祥兵至皆驚
潰東竄逐北至槐午店殲千餘奪軍械無算賊竄確山鳳祥分路
截殺殪賊千五百餘賊入亳州老巢鳳祥攜長矛深入馬蹶墜地
負重創歿於陣事聞賜卹如例子諡恭勤賞騎都尉世職
王浚萬全人以行伍起家歷官陸路提標中軍參將道光三十年
署南雄協副將以剿辦英德匪徒失利革職枷號咸豐元年投效

廣西軍五月金田賊由中坪仁義鄧村竄古磨黃岱嶺欽差大臣
賽尙阿檄浚伏兵下官村別以輕兵誘賊賊至伏起斃先鋒三人
餘潰走七月官兵攻破雙髻山營界頂是夜賊三路圍其營礮擊
之不退浚馳至大呼陷陣斬百餘人賊敗奔命以都司補用二年
三月賊以呂公車攻桂林廣西巡撫鄒鳴鶴率浚登城力禦焚其
車殲賊多名賞戴花翎七月隨湖綏靖鎮總兵和春攻復嘉禾縣
城捷入擢湖南鎮筵鎮標中營遊擊四年湖北提督向榮檄浚攻
江甯雨花臺奪賊卡六重俘斬數百擢廣東雷州營參將十月江
甯賊南竄毀巷馬木橋浚馳往截之不及追及於秣陵大敗之潰
出北關口浚伏兵抄截斬馘百餘遂破其柵五年升廣東三江口
協副將十月賊出朝陽門龍脖子諸處分窺我軍官兵擊卻之賊
復以千餘騎出太平門浚等自靈寺山前分隊迎擊賊敗走六年

三月三汭河石埠橋棲霞諸匪乘雨夜逸浚督隊沿江追剿賊棄械逃三汭河賊壘悉平毀五月太平神策各門賊潛出龍脖子築壘大小水關馮家邊一帶浚等督馬隊分路包抄賊撲仙鶴門並擊卻之七月賊攻五里牌浚隨福建漳州鎮總兵張國樑分路兜擊斬賊渠一人殺捕過當復進擊寶堰踞賊敗之記名以總兵用七年二月進攻句容斬黃衣悍賊數名四月擊攻援賊賊悉出城來撲浚揮兵衝突刺悍賊數人墮馬破西南賊壘五遂克句容以功賞毅勇巴圖魯名號八月擊退鎮江踞賊敗西城賊之攻台勇者斃三十餘十一月克鎮江府城擢陝西陝安鎮總兵賞提督銜八年三月隨張國樑大敗江甯賊賊從雨花臺突出浚等更番轟擊直搗臺屯殲賊無算九年賊築壘建卡於江浦縣之雙陽圩蕭家圩浚等分五路進直薄圩圍賊出巢死拒而包公廟九汭洲賊

黨萬餘蠶擁出我軍喋血鏖戰賊壘悉夷十一月擢湖北提督十
年四月攻剿丹陽賊乘天大霧冒官軍旗幟數道並進浚轉戰移
時中槍死安徽壽春鎮總兵熊天喜馳救之亦沒於陣事聞上憫
惻命議卹幫辦軍務四品京堂許乃釗奏浚播弄威權請撤銷卹
典上以王浚見危授命飭照參將例議卹賞雲騎尉世職同治五
年御史朱鎮奏請江甯建忠義祠祀殉難諸臣浚與焉

劉景芳

劉景芳景州人以武監生倡辦鄉團調赴連鎮軍營剿髮逆有戰
功賞戴藍翎咸豐七年隨大軍剿皖豫擒匪攻克方家集三河尖
賊巢補直隸固關營并陘汛把總八年解固始縣圍克復安徽天
長擊走盱眙粵匪九年補四川提標中營守備十年攻克懷遠踞
匪賞換花翎閏三月隨總兵承惠剿賊鄖陵太康諸處戰斃千人

追至柘城順河集斃三千餘生禽二百六十崔橋之戰馬賊突出
分抄景芳孫伏而進斫馬足殲數十人馬賊反奔與步賊相蹂死
百餘官軍乘勝掩殺餘賊悉潰竄河南肅清捷人以遊擊補用加
副將銜旋補直隸大沽協中右營都司十一年勝保督兵入臨清
破濮頭賊巢賊糾莘冠教匪並約濮范鄆鉅諸賊圖報踞清水鎮
及館陶縣城勝保檄總兵伊綿阿進剿景芳副之抵館陶景芳與
道員周士健攻其右約副將成祿諸軍三面齊進賊出馬隊萬餘
拒之景芳穿賊西面馬步叢中入成祿由東面兜擊斷賊爲兩賊
棄城走遂克館陶景芳會諸軍追擊之而清水悍賊忽來援逸賊
回鬪我兵寡困圍中勢將敗矣適侍衛祥恩軍至景芳合力衝擊
賊棄清水走盡焚其壘勝保上景芳功以參將補用賞給禦勇巴
圖魯名號六月進攻冠城莘縣教匪連破白塔集三河鎮賊壘移

壁蕭家寺會總兵徐廷楷道員王榕吉沿途按捕直博莘縣老巢賊大敗遂克其城是冬教匪萬餘人圍北竄景芳隨副都統明慶馳騎出賊前副將黃得魁躡其後夾擊盡殲之事平以副將用同治元年粵捻合圍潁州副都統烏勒興阿率馬隊分兩翼進景芳以步隊居中擊之賊萬餘列陣殊死戰景芳以槍礮連環轟擊戰良久以短兵接賊始不支景芳踵至太和屯劉家集大小數十戰斬馘萬餘遂解潁州圍先是官軍深入重地景芳以築營未定爲賊所乘被劾革職至是復原官嗣勝保督辦陝西軍務以景芳隨八月偕協領高福擊賊渭南九月破賊咸陽平馬家堡老巢毀普馬寨回巢七捷聞加總兵銜二年調署直隸天津鎮右營遊擊教練槍隊造軍火禽馬賊多四年邊外馬賊入喜峯口擾直東上命景芳率馬勇赴玉田屯御道南是年尙書文祥剿辦奉天馬

賊逆首王小泉踞省東南勢甚張文祥檄景芳追擊之賊退入山
誘我軍景芳督隊先登賊彈如雨下景芳下馬鏖搏賊敗奔逐北
二十里禽斬五百墜崖死者無數奪獲馬二百餘五年再敗於吉
林加提督銜六年署直隸正定鎮總兵八年調赴綏遠將軍定安
疏稱其戰功交軍機處存記十三年丁母憂賞假百日八月假滿
到綏治軍光緒三年調赴奉天防剿七年卒於軍賜卹如例十二
年盛京將軍慶裕奏請附祀盛京三賢祠

賈吉齡

賈吉齡字惠迪南宮人奇偉有壯志咸豐九年從軍入建威營十
年楚軍援皖擊賊於小池驛並克復潛山太湖二城十一年克隨
州賊悉殲同治二年調赴陝西復山陽城遂管帶隴軍三年以一
軍當川髮諸逆不得逞旋管帶水師防陝西與安州賊聞之遠遁

五年幫辦山東東沼營務是年十月破肥城黃家寨七年東捻肅清十月赴都召見九年檄帶古北口練軍中營旋統中右兩營出防庫倫光緒元年十月回防五年調往朝陽有殺賊功累官至副將加總兵銜賜花翎號赴勇巴圖魯山西巡撫張之洞以吉齡果勇耐勞疏調晉省整飭諸軍十六年署河屯副將十九年調署正定遊擊尋卒

曹克忠

曹克忠天津人咸豐五年投効湘軍隨湖北按察使李孟羣攻克髮賊於漢陽黃梅及廣濟童牌司嗣隨福州副都統多隆阿會攻安徽懷遠縣屬石碑司夷沿河賊壘積功擢都司賜花翎九年補直隸杜勝營都司湖廣總督官文奏請留營自助十年多隆阿檄管帶忠字營募勇五百大破援賊連克潛山太湖兩城洵擢參將

賞給捍勇巴圖魯名號賊酋陳玉成糾捻十餘萬自桐廬上援安慶十月克忠隨大軍拒之桐城挂车河大破之晉副將十一月賊黨林紹璋洪成玕吳如孝收合逸匪二萬餘再圖上犯克忠追擊之新安渡天林莊馬踏石一月五捷十一年八月會諸軍復桐城宿松黃梅蘄州廣濟等州縣擢總兵同治元年進克廬州加提督銜是時豫匪勾結粵賊竄陝境孝義鎮安相繼陷詔多隆阿以荊州將軍督辦陝西軍務克忠隨之赴陝兼程馳解商南之圍賊酋合馬步五六萬自捉馬溝至武關連屯五十餘里謀結回匪併力西趨閩八月克忠躡擊至西平殲賊幾盡二年正月移兵擊同州回匪賊據王閣村羌白鎮爲巢穴中峙八營繚以長濠堡壘森列不易攻多隆阿檄克忠單騎叩其壁諭之禍福賊素憚其威剋日乞降克忠察其情叵測二月朔潛會諸軍攻羌白一鼓下之乘勢

奪王閣村獲糧械牲畜無算給三代一品封典三月率烏拉馬隊兼統楚勇七營屯長安鄠縣之交以通省垣糧路光秦廟者入省要衝也賊踞之窺省城三犯不得逞七月克忠率所部直搗賊陣賊望旗而潰分軍追敗之整鄠諸處運道始通上多其功擢提督補河州鎮總兵九月渡渭大破賊於白起營馬家埠十月再捷於白吉原陣斬賊首陳生喜安依幅邠州平陝回遂西趨犯靈州海城伏莽麻起回酋馬化龍踞金積堡築碉卡納亡命勢甚張平涼寧夏狄道西寧肅州先後陷賊三年二月克忠平麟游諸賊會師援甘五月敗賊郿縣之西河口六月又敗之黑水峪賊多降者時河州守將恇怯不能軍詔克忠赴河州本任克忠至官克復秦安解秦州圍功最賞黃馬褂及尙方珍物四年正月攻蕭河城其附近五堡及馬家嘴將臺堡隆德堡以次悉平三月克海城回不能

支併竄李旺堡同心城爲固守計甘肅自回變起地荒民散士卒忍飢血戰將帥徵饗不時至克忠夙倚糧鞏秦亦資食於回至是食罄益力攻賊巢謀藉寇糧贍軍遂下同心城次靈安堡揚言渡河援中衛已乃逕趨金積堡屯強家沙窩閏五月連獲大捷斬馘二千距金積堡尙十五里卡壘林立水鹹澀不能飲軍初至雜糝糠掘草根爲食不得一飽賊偵官軍疲集悍黨環攻克忠驅飢軍與戰克八卡獲糧少仍不濟軍益進攻克卡五遂薄金積堡賊豫伏萬餘騎圍鈔我軍克忠方下高章三堡他軍失利克忠軍牽率退二十里陝甘總督楊岳斌瀝陳克忠功得不罪九月授甘肅提督時陶茂林軍飢潰初定固原提督雷正滄軍復變金積堡回乘機窺延鄜河狄回犯鞏昌圍靈道馬營監義岡川回竄張家川掠隴州擾慶陽自蘭州達西安烽火相望甘涼道黎獻剿肅州回軍

亦飢潰於是甘軍勁卒叛逃殆盡自楊岳斌楚軍外僅克忠一軍與回相持而已十月克忠馳援鞏昌禽斬二萬餘賊遁走狄河圍解疊攻熟陽董家堡毀巨巢十餘十二月復敗之新市五年正月洮州城陷克忠赴援次李岐山回目馬芳乞降克忠受之僅誅其酋丁重選等而還三月蘭州標兵變楊岳斌促克忠移軍蘭州克忠至誅叛兵百數十軍心始定然卒以糧饟兩竭乞病再三請始允回籍十年上命赴陝接統淮軍辦理肅州軍務十一年軍壁乾州平逸匪撫降回輯難民時銘軍有結會匪爲亂者甘軍楊世俊馬隊亦潰於馬營監通渭等處豫皖降擒多叛應之克忠分檄總兵徐邦道傅連升等合兵迎擊九月潰勇平克忠以積勞病勢增劇事聞詔按察使劉盛藻接統銘軍十一月仍命克忠赴蘭州助左宗棠治軍十二年力疾赴甘署甘肅提督光緒九年法越事起

1573353

文和...

命募六營防海屯滄州旋移防山海關十年授廣東水師提督一
 年乞病歸賞食全俸二十年日本失和命治天津團練總統津
 勝營馬步全軍二十二年十二月卒賜祭葬詔在天津原籍及立
 功諸省建立專祠

名將傳二終

大清畿輔先哲傳弟九

198-740



21101000161349